

# ЖАХОН АДАБИЁТИ

Адабий-бадиий, ижтимоий-публицистик журнал

**Alisher Navoiy** Anna Axmatova **Jeyms Joys**  
Xose Ortega-i-Gasset Janni Rodari Jonatan Swift Jorj Bayron  
Fransua Rable Edgar Allan Po Ryunoske Akutagawa Frans Kafka  
Tomas Eliot Martti Larni Artur Rembo Gi de Mopassan  
**Vilyam Shekspir** Ivan Bunin Aflatun Dante Aligeri Chan Chhol  
Roa Bastos Mario Vargas Losa Isay Kalashnikov  
Anton Chexov Taduesh Dolenga Mostovich  
Andreys Pumpurs Fridrix Nitshe **Fyodor Dostoyevskiy**  
Viktor Gyugo Ivo Andrich Ann Fiilip Marsel Prust **Mo Yan**  
Aleksandr Veselovskiy Roxelio Sinan Andres Mata **Abdulla Qodiriy**  
**Moris Meterlink** Hermann Hesse Oktavio Pas  
Onora de Balzak Migel Otero Silva Arastu  
Ernest Heminguey Tomas Mann G`afur G`ulom Gabriela Mistral  
Tetsuo Miura Erkin Vohidov Aleksandr Pushkin  
Boris Pasternak Premchand Ulter de la Mer Toni Morrison  
**Migel de Servantes** Emil Zolya  
Muxtor Avezov Abdulla Oripov Johann Gyote  
Mark Toutant Yan Parandovskiy Nelli Zaks Bernard Shou  
Chingiz Aytmatov Oskar Uayld Li Munyol Xose Marti  
**Semben Usmon** Homer Jaloliddin Rumiy  
Grem Grin Emili Dickinson Herta Myuller Oybek Lev Tolstoy  
Avetik Isaakyan Sharlotta Bronte Grant Motevosyan Lesya Ukrainka  
**Rabindranat Tagor** Sofokl Aka-uka Grimmilar

## Жамоатчилик кенгаши:

Муҳаммад АЛИ  
Наим КАРИМОВ  
Иброҳим ҒАФУРОВ  
Низом КОМИЛОВ  
Шуҳрат СИРОЖИДДИНОВ  
Муҳаммаджон ХОЛБЕКОВ  
Хуршид ДЎСТМУҲАММАД  
Абдураҳим МАННОНОВ  
Муҳаммаджон ҚУРОНОВ  
Муҳаббат ТЎЛАХУҶАЕВА  
Баҳодир КАРИМОВ  
Муҳиддин ОМОН

**МУАССИСЛАР:**  
РЕСПУБЛИКА МАҲНАВИЯТ  
ВА МАЪРИФАТ КЕНГАШИ

ЎЗБЕКИСТОН МАТБУОТ  
ВА АҲБОРОТ АГЕНТЛИГИ  
ЎЗБЕКИСТОН ЁЗУВЧИЛАР  
УЮШМАСИ

## Бош мұхаррир Шуҳрат РИЗАЕВ

### Таҳрир ҳайъати:

Жалолиддин САФОЕВ  
Амир ФАЙЗУЛЛА  
Назира ЖҮРАЕВА  
Алимурод ТОЖИЕВ  
Дилдорхон АЛИЕВА  
Алишер ОТАБОЕВ  
Жамила АСҚАРОВА  
Даврон РАЖАБОВ  
Шаҳноза НАЗАРОВА

## МУНДАРИЖА

### НАВОИЙ САБОҚЛАРИ

- 3** Алишер НАВОИЙ. Ёр келса дўстлар... (*Рус ва инглиз тилларига В.Липко ва А.Буматова тарж.*)

### HACP

- 8** В.ИХЛОСИЙ. Гули сиёҳ. Ҳикоя. (*Араб тилидан Г.Жалилова тарж.*)  
**27** А.ДОМБРОВСКИЙ. Афлотун ва Арасту. Роман. (*Рус тилидан А.Файзулла, М.Махмуд тарж.*)

### ШЕЪРИЯТ МИНТАҚАЛАРИ

- 22** Х.Л.БОРХЕС. Шеърлар. (*Рус тилидан Т.Али тарж.*)  
**121** И.ЮСУПОВ. Шеърлар. (*Қорақалпоқ тилидан О.Хожиева тарж.*)  
**148** Ш.ШАМС. Фазаллар.

### ЭССЕ

- 79** Я.ПАРАНДОВСКИЙ. Сўз кимёси. (*Рус тилидан М.Акбаров тарж.*)  
**164** Ш.РИЗАЕВ. Рақс тушаётган одам.  
**176** Ж.ХОЛМЎМИНОВ. Нитшенинг шарқона тушлари.

### ДРАМА

- 128** Ж.КОКТО Инсон овози. Пьеса-монолог. (*Рус тилидан Б.Курбонов тарж.*)

### АДАБИЁТШУНОСЛИИК ВА ФАЛСАФА

- 138** Н.КАРИМОВ. Маълум ва номаълум “Эгмонт”.

### ЖАРАЁН

- 158** Ҳ.БОЛТАБОЕВ. Ҳаётдан ташкаридаги ҳаёт.

### ПУБЛИЦИСТИКА

- 173** Ҳ.АМИНОВ. Халқ қалбининг кўзгуси.

- 190** Тарихда бу кун  
**192** Муқовамиизда  
**195** Тақвим  
**198** Журналнинг русча ва инглизча мухтасар мазмуни  
**200** 2017 йил мундарижаси

# NAVOIY SABOQLARI



*Алишер НАВОИЙ*

(1441–1501)

## ЁР КЕЛСА, ДҮСТЛАР...

*Ёр келса, дўстлар, оҳанги рафтор айламанг,  
Инфиолимдин нафас урмоқни душвор айламанг.*

*Ёлғуз уйда қайда ёро боқмагим рухсорига,  
Холатим тағиридин сирримни изҳор айламанг.*

*Токи кўнглум изтиробию таним титратмаси  
Сокин ўлмас, нукта айтурга мени ёр айламанг.*

*Соате чунким ўтуб, бу навъ келсам ҳолима,  
Сўз аро ошиқлиқ алфозини тақрор айламанг.*

*Чунки бўлса мултафит чун ер ўтуб ўлгумдуур,  
Ҳар жафо қилсан ўзумга, манъ зинҳор айламанг.*

*Эмдиким ўлдум, таним ёр итларига таишлангиз,  
Лек агёрин бу маънидин хабардор айламанг.*

*Қайси ошиқким Навоийдекдуур, эй аҳли зуҳд,  
Ишқ манъин айлабон кўнглига озор айламанг.*

*(Наводир ушишабоб, 353-ғазал)*

ЛУФАТ:

**Оҳанги рафтор** – бироннинг истиқболига чиқиши.

**Инфиол** – хижолат.

**Ёро** – тоқат, чидам, ҳадд.

**Тағиир** – ўзгариш.

**Нукта** – қисқа ва маъноли сўз.

**Алфоз** – сўзлар.

**Мултафит** – илтифот қўрсатиш.

**Ағёр** – бегоналар; душманлар.

## Байтларнинг насрый баёни

Дилнавоз ЮСУПОВА шарҳи

1. Дўстлар, агар ёр келиб қолгудек бўлса, истиқболига чиқиш учун ўрнингиздан қўзғалманг. Мени хижолатга қўйиб, нафас олишимни қийинлаштирунган.

2. У билан уйда ёлғиз қолгудек бўлсан, юзига бокмоққа ҳаддим сифармиди?! Ахволим ўзгаргудек бўлса, сиримни фош этманг.

3. Кўнглимдаги изтироб ва таним титратмаси тўхтамагунча, мени сухбатга чорламанг.

4. Бирор соат ўтиб, ҳаяжоним босилгач, ўз ҳолимга қайтсам, илтимос, сухбатда ишқ ва муҳаббат сўзларини келтириб, яна мени изтиробга солманг.

5. Мабодо ёр мен томонга юз буриб, илтифот кўрсатгудек бўлса, ер ўпид ўлсан ё бошқа жафоларни ўзимга рано кўрсан, зинҳор мени бу жафолардан қайтарманг.

6. Ишқида ўлдим, энди танимни ёр итлари олдига ташланг. Аммо ағёр бу ҳолимдан зинҳор хабар топмасин.

7. Эй зоҳидлар, қайси ошиқ агар Навоийдек бўлса, уни насиҳат билан ошиқлик йўлидан қайтармоқчи бўлиб, кўнглига озор берманг.

### Ғазалнинг умумий маъно-моҳияти

Ушбу ғазал висол остонасида турган ошиқнинг руҳияти, изтироб ва тўлғонишлари тасвиридан иборат. Маълумки, Навоийнинг фироқномалари, ёрдан айру қолган мажнуншеваларнинг кечмишлари ифодаси бўлмиш байту ғазаллари кўп. Келтирганимиз ушбу ғазал эса висол онлари яқинлашган пайтда ошиқ кўнгилнинг турфа ҳолларга кириши тасвирига бағишиланган.

Дастлабки мисрадаёқ Навоий ишқ аҳли орзиқиб кутадиган висол онлари яқинлигидан мужда берувчи сўзларни келтиради:

*Ёр келса, дўстлар, оҳанги рафтор айламанг,  
Инфиолимдин нафас урмоқни душвор айламанг.*

Байтнинг мазмунига қараганда, Навоий бир гуруҳ дўстлари билан ўтириб, барчага манзур ва маҳбуб бўлган ёрни кутяпти. Аввалги шарҳларимизда тилга олганимиздек, мумтоз адабиётда, хусусан, Навоий ижодида ёр тушунчаси маъшуқадан ташқари, дўст, рафиқ, устоз, пир, Пайғабаримиз (с.а.в.) ва ҳ.к. маъноларда кўлланилган. Ушбу ғазалда тилга олинаётган ёрни фақат маъшуқа маъносида тушуниш уни асл мазмунидан узоқлаштирган бўларди, зеро ғазалнинг кейинги байтлари бу ёрнинг атрофдагилар учун ҳам ғоят меҳр ва муҳаббат билан кутилаётган азиз зот эканлигини англатяпти. Бу зот Мавлоно Абдураҳмон Жомий, Султон Ҳусайн Бойқаро ёки Сайид Ҳасан Ардашер бўлиши мумкин. Бунинг унчалик аҳамияти йўқ. Муҳими – йиғилган жамоа ҳаммаси бу зотни яхши кўради, унга интиқ, интизор. Лекин Навоий бу ёрни дўстлардан фарқли ўлароқ, бутун вужуди билан яхши кўради, ардоқлади. Шу сабабли, ёр-

нинг келиши унга бошқача таъсир қилган: мабодо келиб қолгудек бўлса, уни чиқиб кутиб олишга ҳатто ҳоли йўқ. Бу ҳолидан хижолат терига ғарқ бўлиб, нафаси қайтиб, уйда ёлғиз қолганида ёр агар пешвоз чиқсан дўстлардан олдин кириб келгудек бўлса, бош кўтариб юзига термулишга ҳам журъати етишмайди:

*Ёлгуз уйда қайдо ёро боқмагим рухсорига,  
Холатим тағийиридин сирримни изҳор айламанг.*

Дийдор ва ташрифдан ҳосил бўлган ҳаяжон бир лаҳзалик эмас. Ҳамиша интизорлик ва муштоқликка ўргангандан кўнгилнинг дийдор чоғида изтироб ва ҳайрати янада қувват олади, вужуд ҳам қишики уйқудан энди уйғонган дараҳтдек титраб туради. Шунчалик тиришса ҳам, одатий-мўътадил ҳолатга қайтиш учун камида бирор соат лозим. Сиртдан ором ва осуда кўрингани билан кўнглида ишқ тўғони ғалаён кўтарилаётган кишидан нуктадонлик кутиб бўлмайди. Ирода кучи билан пайдо бўлган сокинлик муҳаббат қиссаси ўртага тушгач, бир лаҳзада барбод бўлади:

*Токи кўнглум изтиробио таним титратмаси  
Сокин ўлмас, нукта айттурга мени ёр айламанг.*

*Соате чунким ўтуб, бу навъ келсам ҳолима,  
Сўз аро ошиқлиқ алфозини тақрор айламанг.*

Шамъдек анжуманга файз ва нур олиб кирган ёр барчага илтифот кўрсатиб, “навбат менга келганда, подшоҳ қабулига мушарраф бўлган камтарин қулдек ерни ўпиб, ширин жонимни нисор этсам ёки бошқа жабру жафоларни ўзимга раво кўрсам, мени бу йўлдан қайтарманг”, дейди шоир. Негаки, у айнан шу лаҳзаларни кутиб яшади, шу дамлар умиди уни хижрон азоблари, фироқ қийноқларига сабр қилишга унгади, кўнглида ишқ гавҳарини покиза ва бегард асраб келди. Аммо орзу қилиб тилаган лаҳзалар воқеликка айланиб, дийдорга мушарраф бўлган чоғда шунча азоб ва изтиробга чидаган вужуд ва кўнгил ёрни муносиб равишда кутиб ололмагани учун ҳар қанча жабру жафога лойиқдир:

*Чунки бўлса мултафит чун ер ўпуб ўлгумдуур,  
Ҳар жсафо қилсам ўзумга, манъ зинҳор айламанг.*

Кутилмаган бу илтифот учун энг азиз нарса – жонини фидо қилишга тайёр ошиқ ўз танасини ёрнинг вафодор итлари олдига ташлашни васият қиласди. Аммо бу ҳолатни ағёрдан пинҳон тутмоқни истайди. Негаки, муҳаббат дардидан бегона кимса бу фидойилик моҳияти, танаси ёрнинг итларига талаш бўлиш саодатини тушунмайди:

*Эмдиким ўлдум, таним ёр итларига ташлангиз,  
Лек аёёрин бу маънидин хабардор айламанг.*

Ғазалнинг дастлабки байтлари ҳаё тараннумидан иборат бўлса, сўнгти икки байтда вафодорлик ҳақида сўз юритилади. Одатда биз ҳаёни

маъшуқаларга хос сифатлардан деб таърифлашга ўрганиб қолганмиз. Навоий талқини бўйича, ҳаё ва вафо инсонийликнинг ўзак нишоналаридан бўлиб, бу икки олийжаноб туйғу ишқ ахлига баробар тегишлидир. Вафо ва ҳаё бири-бирини тақозо қиладиган тушунчалар ҳисобланади. Қолаверса, имоннинг асоси ҳам шу икки хислатда жамланган. Жумладан, “Маҳбуб ул-қулуб”да бу ҳақда ёзди: “*Вафосизда ҳаёй йўқ, ҳаёсизда вафо йўқ. Ҳар кимда бу икки йўқ — имон йўқ ва ҳар кимда имон йўқ андин умид кўзин ёрутса бўлмас. Маҳбубки, бевафодур — андин жовид висоли тамаъ кутса бўлмас... Комиллар — аҳли ҳаё ва ноқислар беҳаё.*”

Мактаъда Навоий зуҳд ахлига мурожаат қиласди ва бу ҳам бесабаб эмас. Тасаввуфий манбаларда “зуҳд” сўзини “з” – зеб-зийнат тарки, “х” – ҳою ҳавас тарки, “д” – дунё тарки, деб талқин қиласдилар. Навоий тарнум этган муҳаббатга зеб-зийнатга ружу қўйиш, моддий манфаат-парастлик, ҳою ҳавас, дунёнинг турли жилваларига мафтун бўлиш каби маънавий иллатлар билан эришиб бўлмайди. Шу сабабли, шоир маънавий камолотга етказадиган, мисни олtinga айлантирувчи муҳаббат аҳли соҳибини насиҳат билан йўлдан қайтармоққа уриниш дилозорликнинг бир кўриниши эканлигини таъкидлаб, зуҳд ахлига мурожаат қиласди:

*Қайси ошиқким Навоийдекдуур, эй аҳли зуҳд,  
Ишқ манъин айлабон кўнглига озор айламанг.*

Фазал мутаржим Владимир Липко томонидан рус тилига ўгирилган. Таржимада аслият ҳажми сақланган, лекин ғазалнинг умумий мазмун моҳиятидан узоклашиш бор. Таржима билан танишиш жараёнида мутаржим матнга Шарқ мумтоз мусулмон маданияти анъаналаридан бехабар ҳолда ёндашгандек тасаввур уйғонади (ёрни фақат маъшуқа тарзида талқин қилиш, ишқни ошиқ учун саодат эмас, балки азоб сифатида кўрсатиш ва бошқалар). Таржимада нидо санъати (мурожаат)нинг объекти бўлган дўстларга ҳам салбий муносабат кузатилади: *От зависти не задыхайтесь* (1-байт), Друзья, я заклинаю вас (2-байт)... ва бошқалар. Ваҳлонки, ғазалда ошиқ кўнгил ўз руҳий ҳолатида дўстлардан мадад истайди, уларга ўз сирларию розини тўкиб солади.

Умуман олганда, ушбу ғазал мазмунан воқеабандлик касб этиб, унда акс эттирилган мўъжаз лирик сюжет шоирнинг ҳасби ҳолию соҳир қалами билан уйғунлик касб этган.

### Ғазалнинг русча таржимаси

Таржимон – Владимир ЛИПКО

*Друзья! Коль милая смягчится и посетит мой дом опять –  
От зависти не задыхайтесь и не мешайте мне дышать.*

*Один я, пуст мой дом и жалок. Друзья, я заклинаю вас  
Моих мучений злую тайну не раскрывать, не разглашать.*

*Пока волненье не утихнет, не заставляйте говорить,  
Пускай пока на наших встречах лежит молчания печать.*

*Но и потом, когда опомнюсь, не говорите о любви.  
Не возродиться счастью снова, как рекам не струиться вспять.*

*Пускай в мученьях умираю, пускай унижен, оскорблен.  
Какое б ни было страданье – не запрецайте мне страдать..*

*Когда умру, не хороните, отдайте псам ее мой прах.  
Но недругам про то – ни слова! Не нужно им об этом знать.*

*О Навои, других влюбленных, таких, как ты, на свете нет.  
Твою любовь ничьей угрозой не погасить, не обуздать!..*

### Ғазалнинг инглизча таржимаси

*Таржимон – Аидахон БУМАТОВА*

*Were my dear one to come, oh friends, you rush to greet do not,  
From the excitement I should have, my heart tough to beat do not.*

*Would I dare to look at dear – had we to meet tet-a-tet,  
From the change of my condition, my secret revealed do not.*

*Unless the pain in soul and shiver in body fade away,  
Involve me ever into your conversation sweet do not.*

*Were I to regain my calm after an hour passes by,  
The theme of love in that conversation you repeat do not.*

*Were I to have a kind glance from dear one I beg you, my  
Falling unconscious also madness of mine forbid do not.*

*To the hounds of dear, you, my breathless body throw, but still  
Keep from revealing a word – my foe with joy replete do not.*

*Should someone fall in love as much as Navoi did, hermit,  
Trying to keep him off the love his poor heart mistreat do not.*



## Валид ИХЛОСИЙ

(1935 йилда туғилган)

## ГУЛИ СИЁХ

Ҳикоя

*Араб тилидан  
Гўзал ЖАЛИЛОВА  
таржимаси*

Валид Ихлосий 1935 йили Исқандария шаҳрида таваллуд топди. Бошланғич таълимни Ҳалаб мактабида олди, сўнгра Мисрдаги Александрия университетидаги ўқиди. У “Миллий театр” деб ном олган Ҳалаб ҳалқ театри ва киноклубининг ташкил этилишига катта ҳисса қўшди. 1970 йилда келиб Ёзувчилар ўюшмасининг раиси этиб тайинланади.

Адабининг “Гули сиёҳ” ҳикояси янгича йўналишда ёзилган бўлиб, унда ижтиёмоий-сиёсий мавзулар қамраб олинган. Асарда муаллиф ҳикоячи образида гавдаланади. Ҳикояда сюжет иккى йўналишда – ёзувчининг ўз онаси, унинг илҳом манбаи бўлмиш севимли боғи билан муносабати ҳамда бошқа персонажлар ҳаёти тафсилотлари асосида ривожланади.

Табиат... О, она табиат!

Боғда осуда куз фасли ҳукмрон, яшил майсаларни санавбар дарахтларининг сояси қамраб олган. Сукунат аста ҳаракатга келиб, шаффоф тутун осмонга кўтарилиди. Бу тутун гўё боғни ташқи оламдан ажратиб, ичимга жо қилди.

Бу ерда учтамиз: дарахтлар, майсалар ва мен. Мен ҳали сарлавҳа топиб улгурмаган ҳикоямнинг қораламасини яқиндагина тутадим. Лекин тан олишим керакки, менда жўяли таассурот пайдо бўлганди. Бу таассурот мени ҳикоядаги шахсларни қамраб олган барча хис-туйғулардан бутунлай кутулганимни кўрсатарди. Энди мен ҳам худди боғдек сокинман.

Бирордан сўнг ён кўчадан пастроқдаги боғимга қараган юқори қаватлар қандайдир бир ҳаракатни юзага келтираётганини сездим. Ҳаракат фазодан заррама-зарра иниб келаётганга ўхшарди. Зарралар шовқин солиб сўзларди. Мен эса ўзимни овунирадиган бир иш қилишим лозим эди. Боғда янги шахсларни излай бошладим.

\* Манба: “Majalla-al-adab al-masviy”. – Al-kairo: Dar al-kutub, 1985.

Бироздан сўнг унсиз учайтган капалаклар, сўнгра кекса бир дараҳт шоҳларини тўлдириб қунт билан ҳаракат қилаётган чумолиларнинг кичик-кичик қўшинларига кўзим тушди. Оёғимда бир чумоли ўрмалаб юқорига чиқишга ҳаракат киларди, бироқ кўзи етмади шекилли, ортга қайтди.

Куним хотиржамлик билан бошланди. Кичик боғимда гавдаланган табиат билан янгидан пайваст бўлдим. Ҳикоянинг қораламасидан жой олган фикрлар ва чалкаш сўзлар ўрнига боғ, балки, табиатнинг ўзи келганди.

Табиатнинг сарлавҳаси дилимда пишиб етилганди.

Бу сарлавҳамнинг номи, шубҳасиз, “Сокин хурсандчилик” эди. Ваҳолонки, ҳикоямга ҳали сарлавҳа танлаганим йўқ. Энди мен бир неча ойдан бери ичимда яшаётган ҳикояни ифодалай оладиган бирор сўз ёки жумла излаб, бошимни оғритмасликка қарор қиляпман.

Куз уфқи кўз олдимда тобора кенгайиб бораради. Кўк рангдаги икки капалакни кўриб озмунча завқланмадим. Гёё улар денгизнинг бир заррачаси каби эди. Чегара қўриқчиларига ўхшаб қатор саф тортган чумолиларни кўриб, кўзларим катта-катта очилди. Капалак жонини қурбон қилиб табиатга ранг улашаётган бир пайтда чумолилар сабот билан туради. Шундай қилиб, “Будда” ва унинг маъшуқаси “Атика” суврати пайдо бўлди.

Доктор Иsom “Будда” номи билан танила бошлаганди. “Будда” бу Иsom-нинг ҳаракатига қараб айтилган лақаби эди. Ўртоқлари ҳаракатчан иқтидор эгаларини шундай деб чақиришарди.

Табиат билан ҳикоя аралаш-куралаш бўлиб кетди. Ҳашаротлар инсонлар билан бирлашиб кетди. Куннинг ярмига бориб ҳарорат кўтарилди. Мен эса юнгли ридога ўраниб олгандим. Ҳудди қариликдан узоқлашаётган ёки ўтиб кетаётган ёшлигини маҳкам тутиб қолган кишига ўхшардим.

Мана, кун ҳам яримляяпти, умр ҳам қисқармокда, холислик нуктасида табиат кимёси сезгишар табиати билан ҳали сарлавҳаси йўқ ҳикояга айланиш учун кунлар давомида тўпланиб қолган ҳодисалар қоришиб ётибди. Мана, хотиржамлик яна зил кетиб, мен қайтадан хавотирга юз тутяпман.

Ишлар чигал, ёзув ҳам аксига олиб одатдагидек аниқ-тиниқ эмас. Жумлалар ҳам саҳифанинг узунасига-ю энига сочилган эди. Ўйланиб қолдим...

Ҳикояни ўйлардим. У Атикага нисбатан тугамаган бўлса ҳам, мен учун тугаганди. Атикани қаҳрамон қилиб қўйдим. Ёки ўзини ўзи ҳаётнинг энг кийин, инсонни адойи тамом қилувчи умидсизлик ихтиёрига топширган. Ҳақиқатан ҳам у (Атика) чумоли эди, йикилган ва ўша заҳоти ўрмалаб чиқишга уринаётган чумоли. Агар у шу митта ҳашарот бўлса, демак Будда капалакдир.

“Чумоли ва капалак”.

“Ниятидан қайтмаган чумоли ва ёниб тугаган капалак”.

Ҳикоямни “Чумоли ва капалак” деб номлайми?

Бир неча лаҳзалардан сўнг боғ ўртасидаги жойимни тарк этмоқчи бўлдим, лекин табиат мендан устунлик қилди. Дараҳтлар устига тушган меҳмонларни яна кўздан кечира бошладим. Овозлар ёқимли мусика оҳангига ўхшарди. Учидан келаётган чумчуқлардан болалик севгисини туйдим ва улар билан осмондаги ҳақиқий ошёнлар сари парвоз қилдим. Қушлар мени яна ортга, йўқ бўлиб кетган беғуборликка, воқеликдаги тошу ҳақиқий сахро худудларига ва тубсиз денгизга қайтарди. “Қотиб қолган кон, ҳасратга тўла қум, қуёш ва умидни ютиб юборгудек теран денгиз”.

Ўшанда узок саёчат қилиб, тунда қолган қадам изларини кўздан ке-чирдим. Денгиз мавжлари из қолдирмайди. Ҳаттоки, қумга ботган оёқ изларим ҳам бир неча лаҳза ичида гойиб бўлди. Худди йўлдан адашган одамдай изларимни қидира бошладим. Ҳикоядаги ҳақиқий воқеаларнинг аксарияти соҳилда рўй берганди. Ҳикояни юзага келтирган воқеалар узок муддат давом этмаган. Ҳақиқатни тўлиқ идрок этаётган бўлсам ҳам, денгиз бўйидаги тошлар олдида туриб, қуёшнинг чиқиши-ю ботишини такрор ва такрор ўйлаб, вақтнинг ўтиб боришини кузатдим.

Ахир табиат гўзал эмасми? Нима учун у бизларни кун ботиш томон олиб кетмоқда?

Овозини эшиттирмай мени баҳтсиз қилган Буддада бўлгани каби менинг ҳам бошимда бир гап айланарди. У ҳақда Атика сўзлаб берганидан бошқа ҳеч нарса билмайман.

“У ҳамиша жим эди!”

“Доим маҳзун эди, лекин ёмонликни билмас эди!”

“Ҳаётнинг унга, оиласига шафқатсиз бўлишига қарамай, у йиги нималигини билмас эди!”

“Ўқишидаги ва ҳаётдаги муваффакиятларига қарамай, табассум нима эканлигини билмас эди”.

“Ишга чақирилишидан олдин электр соҳасида янги бир назарияга асос солишига оз қолган эди. Ҳамма нарсани стол устида қолдирди-ю, худди бир муддатдан сўнг илмий ишини охирига етказиб қўйиш учун яна қайтиб келадигандай ҳеч нарсага эътибор бермай кетди”.

У билан шахсан танишиш иштиёқим қўпинча табиат билан юзма-юз учрашишга бўлган муштоқлигимга ўхшаб кетарди.

Уй сокин, мусиқа аппарати ҳам ўчиқ.

“Мусиқа сунъий табиатдир”.

“Табиат эса нота ифодалай олмайдиган мусикадир”.

Онам тўшакдан туролмас, бир ўзи ёлғизланиб қолганди. Ўзимга ўзим: “Унинг гўзал Атикаси бор, сенинг-чи?” дердим.

Мен учун боғ бор.

Кел! Ёмғир ва ваҳшатдан ўзга самовий хурсандчилик бера олмайдиган қора булутлар тўсатдан келиб қуёшни тўсиб қўйишидан олдин боғни тарк этайлик.

## ЖОНСИЗ НАРСАЛАР ТОМОН ҚАЙТИШ

Бу жимжитлик мени баайни киshanлаган эди, лекин онамнинг инграши яна харакат қилишга унгади. Бурчакдаги қалин баргли яшил каучук дарахтча яшнаб турарди. Одатдагидек, у (дараҳт) билан сўзлашиб турдим. Шу пайт дараҳтнинг битта барги сарғая бошлаганини кўрдим. Уйга олиб келганимизда у кичкинагина эди. Қўлимда худди чақалоқдай турарди. Бу кўчат ҳали янги барг чиқариб, шохлари баланд бўлади, илдизи бақувват дараҳт бўлади деб орзулардим.

Атика пишган зайдун рангидаги яшил рўмол ўрарди. Унинг қайғуси эса кўзларининг порлашию юз-андоми қиздирилаётган зайдун ёғи каби эди.

У билан ўтган сафар учрашганимда интизорлик билан маҳбубини кутаётганини айтди. “Келиши гумон бўлган кишини кутишдан нима маъно?”

“Мени айтди дерсан, у албатта, келади”.

“Нега бу қадар ишонч билан айтяпсан?”

“Ўлишимизни биламиз-у, яна нима учун яшаймиз?”

“Демак, сен унинг келмаслигига тўла аминсан?”

“Келади...”

Дараҳт менга илҳом берди. Бир неча соатлардан бери у билан бирга бўлсам-да, у мени ҳалиям ўзига бутунлай тортиб ололмаганди. Атрофимда қалин барглару бир ёқтириб-бир ёқтиргмаган ҳикоям... Демак, булар айни пайтда мавжуд бўлиб турган олам. Менга қайғу келтирган, мени тўлиб-тоширган ўша ҳикоя... Охирги лаҳзаларда яна ёзишга эҳтиёж сезаётганимни хис қилдим. Илгари ҳам шунга ўхшаш хис-туйғулар пайдо бўларди, лекин хеч бири ҳозиргидек кучли бўлмаган. Мана Атика ўз муҳаббати билан мен илгари билган, таниган аёлларнинг барчасини енгиб ўтмоқда. Мана, Будда ҳам шуълага айланиб, ўз олови билан барчани чирмаб бормоқда.

Қани Атика, қани Будда?

Бу ўша тўлиб-тошишими?

Бугундан кейин ёзишдан батамом тўхтаб қолишимни, табиат қўйнига қайтишимни хис қиляпман, ҳақиқатан ҳам, табиатни узоқ вақт эътибордан четда қолдирдим. Гўё инсонлар тилида сўзлай олмайдиган маҳлуқотлар маконига келиб қолгандайман.

Ҳикоямнинг сарлавҳаси асло “Чумоли ва капалак” бўлмайди. Кўлёзма вараклари устида ўтиарканман, хаёлимдан шу фикр кетмади-кетмади.

Шу лаҳзалар ичида аввалги ёзганларимда фойдаланган рамзларимнинг ҳаммасини ёмон кўриб кетдим.

Эркин бўлишни, жисмим билан табиат шовқини-ю, инграшини, жарликка тортаётган кучсиз сукунатни тўғридан-тўғри тутиб олишни истайман. Санавбар дараҳтининг шираси билан лойнинг ширасини бир-биридан ажратишни истайман. Бир лаҳза куртакнинг очилишидан хабардор бўлишни, хотиржам худудлар ёки коинот четида муаллақ турган йўлаклар сари сафар қилишни жуда-жуда хоҳлайман.

Ҳали ёзилмаган шеърдек тонггача сукут қиласиз. Атика ва Будда каби коинот сари биргалиқда сафар қиласиз... Покланамиз ва бир лаҳза қуёшда ёниб, сўнг оловимиз сўнади. Ахир рост сўзлаш вақти келмадими?

Севган инсонда рўй бериш мумкин бўлган ҳар қандай нарса, бу ўзининг ички олами ва у сингари кенг бўлган борлиқ тўғрисида рост сўзлашдир. Ошиқ-маъшуқларни қамраб олган барча эҳтимоллар мени рўй бериши лозим бўлган ҳодисалар олдига етаклаб келди. Бу ҳикояда бўлган ва бўлмаган воқеаларнинг бари рост эди. Ҳикоянинг ҳар бир кичик қисмидан сўнг хаёлан танлаган шахсларим ҳақиқатга айланиб борарди. Ҳаттоқи, сўнгги соатларда ёзганларимга ҳам шубҳалана бошладим. Чунки мен бўлган ва бўлмаган воқеаларни ажратса олмайдиган бўлиб қолгандим.

Бошида ҳодисалар менинг тилимдан ҳикоя қилинар эди. Сўнгра Атика, гоҳида эса бошқа бир аёл томонидан сўзланаётганини билиб қолдим. Баъзан мен шахсан танимайдиган Будда ҳақида ҳам гап кетади. Ваҳолонки, мен унинг биргина сувратини кўрганман, холос. Кейин унга макон ва замон бериб, уни бир ҳолдан иккинчи ҳолга, севгидан маҳрумликка, ўлимдан ҳаётга, борлиқдан йўқлик сари ўтказиб бордим. Ҳаёлимда Атика мени, мен эса Буддани сайр қилдирдим...

Саволлар ва шубҳалар кўпая борди. Шундан сўнг биринчи сахифадаги ҳикояга қайтдим. Ундан хаёлда тарих бўлишга улгурган нарсалар-

ни изламоқчи бўлдим. Улар ҳамон сохталикни билмайдиган аёл каби воқеликни ҳис эттириб турар эди. Мана, ўзим учун қадрли бўлган саҳифаларимни қидиряпман. Мана, улар бир аҳволда. Бармоқларим варакларни пайпаслай бошлади ва ваҳимага туша бошлади. Мени қўркувга солаётган нарса варакларнинг камлиги эди. Ҳикоядаги биринчи фасл йўқ. Кўз олдим қоронfilaшиб, жинни бўлиб қолай дедим.

## ҲОДИСАЛАР, ХОТИРАЛАР ТИТРОҚҚА СОЛАРДИ

Гоҳида уйнинг ташқариси ёки ичкарисида йўқлигимдан онамнинг хавотир олиши сени яхши қўрадиган инсонингга нисбатан азобдан ҳузурланиш ҳиссини туйдирап эди. Энди мен азоб бергувчи хавотирдан холис бўлган лаҳмдан ўтиб бораяпман. Йўқолган вараклардан ном-нишон йўқ. Ҳикоямнинг биринчи фасли йўқолиши мумкин эмасди. Тиниш белгилар... нуқталар... вергуллар... Ҳикоя ичида тартиб билан ўрин олган барча ҳарфлар, улар остидаги шахсларни ҳақиқат оламига чиқарган фикрлар ва сувратлар... Бу тузатишларни яна қайтадан ёзишга имконим йўқ.

Бу қайси бир лаҳзаларда хуружга оладиган жинниликми? Вараклар йўқолган жойларни ўйлашдан чарчадим. Чарчадим. Гўёки каучук дараҳтчасининг барглари ҳам хорғин, барглари сарғайган. Сўнг ҳикоянинг бошини эслатармikan менга деб боқقا чиқдим.

Боши... Бошланиши муҳаббат эди. Биринчи варакда хатлар Лондон осмонини Қуддус самоси билан боғлаш учун ҳавода учарди.

Хатлар... Хатлар...

Хатлар... Лондон туманига ўралиб ётган доктор Исом Атикадаги хушбўй зайдун ҳидига ҳасад қилиб ёзди. Зайдун бу руҳни хушбўй қилган атири манбаидир. Атика ёзди: “Ортга қайтишни орзу қилишинг мен учун етарлидир. Сен билан учрашишни исташим ўзимга кифоядир”.

У узундан-узун хатлар ёзди. Бир марта: “Биласанми, уйимиз сени кутиб олишга тайёр. У (янги уй) Хейдбергга қараган ва дараҳтзорга яқин. Эй севгилим, сен билан бир марта гаплашишга ҳаракат қилдим. Лекин тил менга хиёнат қилди. Ваҳлонки, учта тилни яхши биламан. Мен ҳамиша жимман ва қачонгача жим юришимни билмайман”.

Ўзида завқу шавқларни мужассам қилган севги йўлида хат ёзишлар узоқ давом этди. Бир марта Атика тантиқлик билан унга хат ёзди:

“Севгилим, уйимиз ҳақида менга батафсил сўзлаб бер. Ёзиш ва ўқища фойдаланишимиз учун бир-бирига қараган иккита стол тайёрладингми? Докторликни сенинг соянгда ниҳоясига етказаман. Докторлик рисолам фалсафа ҳақида бўлишига қарамай, фалсафа билан асло шуғулланмайман. Ўзинг билганингдек, ўз куллиётимда бўламан...”

Ҳис-туйғулар тўла мактублар тоғлар, денгизлар ва даралар орқали Қуддус-Лондон томон учарди. Вазият кейинроқ ойдинлашди. Қуддус томондан келган хатлар жавобсиз қолаверди. Кундан-кунга хатлар бора-верар, улар кетидан совуқкина жимжитлик эргашарди. Атика ўз сатрларида ғазабни ифодаламади. У аклу фаросатига таянди, лекин Исомнинг қотилларча эътиборсизлигини кечирадиган бирор-бир оқлов тополмади. Сўнгра бунинг сабабини бир номаълум киши Атикага етказди:

“Исом кисқа муддат хат ёзишдан тўхтаб туради. Сўнгра сенинг олдингга қайтади”.

У хўнграб йиглади. Кўққисдан юраги бир хатарни сезган эди. Ниқобли кишидан яна нималарни дир сўрамоқчи бўлди, лекин ғазабланишдан бошқа ҳеч нарса қўлидан келмади. У Қуддуснинг нафасни бўғгувчи тунида ниқобли кишининг ҳаракатини кузатарди.

Кутиш хавотирга, хавотир эса ғазабга айланган эди. Ғазаб эса парчаланишга олиб келяпти. Парчаланиш эса бутун келажакка ўз таъсирини кўрсатмоқда. Атика Қуддуснинг “Бинлуб”ига айланадими? У илк ёшлик чоғида кўпинча уни масхаралаб келган афсонавий сабр билан “Улисс”ни кутадими?

Бошланиши шиддатли севги эди, тугаши узоқ кутиш бўлади. Кунлар, соатлар ўтади, ақл эса фалсафани баҳс қилиб боришга ожиз бўлиб қолади. Исом ўз севгисини, келажагини ёки илмий ишлар институтидаги ишларини хавф остида қолдирадими?

Муҳаббат хавф-хатар соясида қолмоқда. Умид қуши елкага оғирлик қилмоқда. Ёмон гумонларга берилиш қуши эса бошқа елкада худди мағлубият байроғидек хилпираб турар эди. Исом Атикага ёзган хатида ортга қайтажагини айтган эди:

“Сени севдим, чунки сен баҳтли ақл эгасисан. Сенга яқин бўлишни хоҳлайман. Сен билан учрашганимда сени ҳақиқатан ҳам аёлларнинг Момо Ҳаввоси эканлигингни, ўзимни эса унинг қовурғасидан яралган Одам Ато эканлигимни ҳис қилгандим.

Атика ва Исом. Бу сўзлар эски ҳовлидаги қариб қолган зайдун дараҳтига ўйиб ёзилган. Севгининг мантиқий муаммоси. Бошида у мустаҳкам оила қуришни хоҳлаб, ақл билан муҳаббат нишонини чизди. Ақлий, илмий, изтиробий барқарорлик жиҳатдан teng оила. Атика фарзандлар тўғрисида ҳам ўйлаб кўрган.

“Киз ва ўғил, мен яхши кўрадиган ўғил, чунки сен ўшасан ва сен яхши кўрадиган ширин қизча, чунки мен уман. Иккаласи Қуддусни яхши кўради. Болаларимиз бу қадимий шаҳарни бир умр севиб ўтадилар”.

Исом мактубларини безаш учун сатрлар орасига зайдун меваларининг расмини чизиб шундай деб ёзди:

“Болаларимизни қандай келажак кутмоқда? Улар инглиз тилида фикр-лайдиларми ё Хейдбергдаги озодликка боғланиб қолишадими? Ўзлари шарқлик бўлса-да, гарбча таом еб, ота-боболари яшаб ўтган ерларни унудадими? Ахир, бу нақадар ёмон-ку!”

Лекин Исом яна рангли, ёқимли сувратларга қайтиб, шундай ёзади: “Биз ҳали соғлом ва ақлли фарзандлар кўрамиз, улар билан фаҳрланамиз, улар ҳам сен ва мендан фаҳрланишади”. Исомнинг мактублари Атика доим ёнида олиб юрадиган чарм сумкада туради. Юзлаб мактублар барча йўқотилган вақтларнинг эвазига келган. Атика изланишлар билан боғлик китоблар ва манбаларни ҳар куни ўқишига қарамай, хатлардаги ҳар бир сўзни қайта-қайта ўқишига вақт топар эди. Атика бутун ақлу заковатини Исомнинг нега тўсатдан ўзгариб қолганини аниқлашга қаратганди. Шимолдан эсадиган шамол ҳеч қачон бирлашмайди, деган фикр хаёлини банд қилмаган-у, лекин аёллик туйғуси Атикани номаълум бир хатарга етаклаб келди.

Бир куни кечаси ваҳимали туш кўрди. Атика ёш қизча, Исом эса ёш йигитча эмиш. Исом барглари қалин дараҳтга кўйлаги билан осиб кўйилган эмиш. У хавода муаллақ туриб, бир жўжадан ёрдам сўраётган эмиш. Жўжага эса илонлар ҳамла қиласмиш, Атика эса унга ёрдам бера олмай, эсанкираб, ўзини йўқотиб кўйган эмиш. Мана шу туш Атиканинг анча вақтгача эсидан чиқмай юрди.

## ҲАЯЖОНГА СОЛУВЧИ ВАРАҚЛАР

Анчадан бери боғдаги жойимдан қимиrlаганим йўқ. Ичкаридан онамнинг заиф овози эшитилди. У мендан: ”Варақларингни топдингми, болам?” – деб сўради. Мен унинг муздек оёқлари олдида чўкка тушиб афсус-надомат чекдим:

“Хеч нарса топмадим. Кейинги варақлар ҳам оппоқлигича турибди. Гўёки устидан шамол эсиб, ҳарфларини учирив кетгандай. Она, иккинчи фасл ҳам йўққа чиқди”.

Барглар тўхтovсиз тўкилар, боғ эса совук эди. Кўплар мени кўрарди-ю, мен уларни кўрмасдим. Мусиқа эса оғир садо таратар, гўё пул учун иргишлаган раққосаларнинг аҳмоқона қадамларига монанд янграётгандай. Қани энди йўқолган нарсалар топила қолсайди.

Хотира қийнар, тил баҳиллик қиларди. Ҳикоя қаҳрамони Исом эса кўп гапирмасди.

Ҳикоя тамтароқ оҳангларга айланган, улар эса тириклиқдан кейин келувчи ўлимни яратиш дуолари билан омухта эди.

Ҳаммаси соҳилда рўй берганди.

Қайиқ қоронғида қолган. Юзлар эса қорайган, ҳеч бир маънени ифодаламайди. Кичкинагина кеманинг ичига ўн икки одам тиқилиб олган. Мен эса Атика улар билан бирга, Исомга маҳкам ёпишиб, “мен учун қайтгин” деяётганини тасаввур қиласман. Лекин бу каби суврат нафратни қўзғайдиган даражадаги ҳис-туйғуга эга. Мен буларни ўчириб ташладим. Жумлани шафқатсизларча ўчириб, кейин дам олганимни эслайман.

Нурлар ва хотиржамлик шовқин-суронига ғарқ бўлган шаҳарда юрдим-юрдим, лекин инсонларнинг таниш бўлганини қарамай, хушрўй ва жим юрадиган Буддага ўхшаш бирор кишини топмадим. У (Будда) коронғу тунда ерга қараб турар, ўзи эса қайиқнинг ўртасига суюниб олган, чурқ этмай, бошини эгib олганди. Жимжитлик аста-секин ўз ўрнини шовқинга бўшатиб беради.

Будда мажбуран ўз жойини тарқ этгани, шаҳар ўртасидаги янги ҳаётни, Хейдбергдагилар олдида араб тилида гапира олмагани, инглиз тилини яхши билса-да, лекин бу тилда гапиришни ёқтираслиги ҳақида ўйлар эди. Вазифа – бу харакат эди. Бу янги дунё тили эди. Зиён ва фойда баробардир. Янги тил бу Будданинг йўлидир ва у натижалар ҳақида ўйламайди. Бир кишининг бақириши кемадаги тинчликни бузди:

“Душман кемаси!”

Бу кема худди қон ҳидини олган йиртқич балиқдек денгизни кезиб юрарди. Ҳамма жим бўлиб қолди.

Шовқин одамларга яқинлашиб келаётган мотор овозидан ҳам баландроқ эди. Микрофонда араб тилида гапиришарди:

“Моторни ўчиринглар, қуролларингни ташлаб, тепага чиқинглар!”

Будда ғайритабиий бир нарса юз беришини билди. Уларнинг кемалари ҳали душман худудидан узоқда эди. Шунинг учун у одамларни хотиржам қилмоқчи бўлиб, “Хотиржам бўлаверайлик, улар арабларнинг кемаси” дея бошлиди. Лекин ўзига ҳам номаълум бўлган бу ҳолат айни пайтда уларга манфаат келтирмаслиги ҳақида ўйлади.

У туйғулари билан сездики, қоронғуда булар томон келаётган бегона кема улар ўйлаган душманларники эмас, балки шу яқин орада уларни кўлга туширмоқчи бўлганларники эди.

Бўлар иш бўлди. Одамлар қурол-яроғлари билан бирга боғланиб, соҳилга олиб чиқилди ва ерга улоқтирилди. Бошларига қора қоп кийдирилди. Будда янги зулмат тўғрисида ўйларди. Қулоги эса ҳужум қилганларнинг гаплари билан тўлар эди. У барчалари ўлимга маҳкум эканини билди. Илгари душман қўлига тушмаган кишилар нохуш ҳодиса рўй беришини сездилар. Энди Исомнинг барча харакатлари саробга айланиб, Атика билан қилган орзулари гумдан бўладими?

Исом ва унинг шериклари душман кучлари томонидан қўлга олиниб, барчаси Кўрфаз яқинидаги ғорда сўйиб ташланди. Уларнинг бирортаси оиласи ва қариндош-уруғларига хат ёзишга ҳам ултурмади.

Кон худди адашган қўзичоқлардай атрофга тирқирап, қассоблар эса душман устидан ғалабани нишонлаб, сопол қўзалардан шароб сипқорар эди. Атика бу хавфни сезиб, қичқириб юборди: “Исом осонликча ўлиши мумкин эмас”. Атика ҳар доим ўзига-ўзи шундай дер эди. Албатта, рўй берган нарсаларга ишонмас, уларни гумон деб биларди. Уни ёнига қайтишига умуман шубҳа қилмасди. Шунга қарамай, Атика бир ҳафта ўзига келолмай юрди.

Соҳил бўйида нималар рўй берганди? Уни таърифлаш ҳам қўрқинчли. Манзаранинг бутун даҳшати – қўрқувдан чақчайган қўзлару, сўйишдан лаззатланаётган жонлар, шодликдан ҳавога отилаётган оловли ўқлар, емирилган қоялар, шовқин-сурон, тинимсиз айтилаётган салавотлар, кочоқ болалар, аёллар, хибсдагиларнинг оҳ-воҳларидан иборат. Тошларнинг ранги ўчган, денгиз чағалайлари қўрқиб қочар, балиқлар даҳшатга тушар, денгиз эса тобора каттариб борарди... Ғарб томонда уфқни денгиз тўлқинлари тўсган. Шарқда эса уфқни тобора қонли тусга кириб бораётган баланд тоғ қад ростлаб турарди. Танасидан жудо қилинган бошлар ўрни ўйилиб қоларди. Сўнгра уларнинг бошликлари бошларни бир жойга тўплаб, уларга оғзидан ароқ пуркар, ваҳшийларча хирилларди.

Батафсил айтиб беришга ҳолим йўқ.

Чарчадим...

Сўйиш воқеаларини ортиқ эслагим йўқ.

## ҲАҚИҚИЙ ШАРПАЛАРНИ ҚИДИРИШ

Чарчадим. Ҳикоянинг вараклари эса аросатда – ё бутунлай йўқолган, ёки оппоқ ҳолида қолиб кетган. Гўёки, бу мен даволай олмайдиган сехржоду ёки тавқи-лаънат. Лондон ва Қуддус ўртасидаги масофани денгиз ва шаҳарлар орқали ифодалаб турган сувратни нихоялаш учун ёрдам берар деб юзлаб тафсилотларни тўплагандим. Энди-чи, энди нима бўлади? Тафсилотлар аралаш-қуралаш бўлиб кетди. Вараклар, қаламлар, китоблар билан тўлиб-тошган хонамдаги стол билан онамнинг каравоти ўртасида юз мартача бориб келдим. Эслашга, ҳикоямнинг йўқолган варакларининг қаердалигини тахмин қилишга уриндим. Мени ҳаётга келтирган солиҳа аёлнинг умрини узайтиришини Худодан ёлвориб сўрадим.

Пайт пойлаб, тун қўйнида ўз шахрини тарк этган Атикани деб қайғуда эдим (гарчи унга ёрдам берган нарса факт тун эмаслигини билмасам ҳам). Ўшанда Атика енгилган эди. Лекин у бир куни шундай туш кўриб уйғондикси, тушида: “Исомни кўришни истайман” деб бақирап, сўниб бораётган умидларни қайта ёқмоқчи бўларди.

У Исомни излаш сафарида қотилликка гувоҳ бўлган кўрфазга етиб келди.

Атиканинг табиати ғалати эди.

У ўзидаги заифликни ёки кўзларидаги ёшни бирор инсонга кўрсатмаган.

“Кўз ёшларимни ватанга қайтиб ҳузурланишга ёки учрашув шодлиги учун сақлайман” дерди. Одамларнинг ажойиб турмушига ҳасад билан қараш унга ёт.

“Мен Исомнинг ўлимини ҳис қилмадим... Демак, сўйиш ҳодисаси ҳам рўй бермаган”. У кўрфаздаги тепалик олдига бориб тўхтади. Кўпчилик бўлиб ўтган қотилликка барҳам берилди дерди. Уларнинг ҳақиқатни очиқ айтмаётганлиги тагида бошқа маъно бор эди. Ўч олишдан ким қандай фойда кўриши мумкин? “Интиқом айни пайтда рад этилаётган ишдир”.

“Севгилим Исом учун ўч олишни ўйлайми? Буни қандай амалга оширишим мумкин”, дея Атика ўзига такрор ва такрор савол берди. “Умидимни узмайман”.

Атика ҳеч қандай қаршиликсиз ўлишга қарор қилган эди. Исом бекордан-бекорга сичқондай қопқонга тушиб қолмаган. У Атиканинг ҳаёти давомида учратган инсонлари ичида энг суюклиси эди. Жимлик ва умидворлик Исомга хос бўлиб, ундаги барча хислатлар энди Атиканда бош кўтаради. Атика ўз ҳабиби деб, ҳабиби эса ватани деб муаммога учради. Орзулар асрида муаммолар тугайдими ўзи? “Ҳақиқатан ҳам бу орзу асрими?”

Ҳодисаларнинг ёмонлиги умидсизликка чорлаётган бўлса ҳам, лекин қон излари умид қилишдан дарак берарди. Буни Атика фалсафада ўрганган эди. Бундай оғир вазиятларда унинг кўзига фақат илм кўринарди. У тобора фалсафага берилар, ҳар бир нарсани ақл ва мантиқ тарозисига қўйиб ўлчар, мулоҳаза натижалари эса унга умид бағишиларди.

Исом ўлган ёки ўлмаганлиги ҳақидаги ўйлар Атиканинг миясида ғужғон ўйнарди.

“Сўйиб ўлдирилган”.

Ўлмаган деган фикр тарози палласида оғирроқ келарди. Бечора аёл бегона шаҳарда, эшиклари зич ёпиқ хонада “ишонмайман” дея қичқирарди.

Атика инкор қилмоқда. Бундай инкор этиш ўз маҳбубининг ўлимини эътироф этмайдиган инсоннинг фазилатидир.

“Агар ўлдирган бўлсангизлар, менга унинг жасадини кўрсатинглар, юзини кўрсатинглар менга... Шунда ҳам барibir ишонмайман”.

Атика яна такрорларди: “Агар бутун дунё Исомнинг ўлдирилганини тасдиқлайдиган ақл ҳужжатини келтирганида ҳам, ҳиссий ҳужжат Исомнинг қаердадир юрганини, у мени эслаётганини таъкидлади. Модомики, эслаш, хотирага келтириш бор экан, ҳаёт ҳеч қачон йўқ бўлмайди”.

Воқеалар зиддиятли, лекин умид бор.

Йўқолган ҳикоя тўғрисидаги эслатмаларимни ниҳоясига етказишга ҳаракат қиласман.

Ажабо, ҳикоя бирор инсонга етиб бормасданоқ ўлдими? У ҳақиқатан ҳам бир марта яшади, варакларим узра бир марта гина умргузаронлик қилди. Энди ҳамма нарса мендан ва ҳақиқатдан узоқлашиб кетди. Миямда ўзини сикиб бораётган ақлдан бўлак ҳеч нарса қолмади. Шундай қилиб, Атика оз бўлса-да умид билан яшашда давом этди. Янги бир гувоҳ қаттиқ маст бўлганида шундай деди: “Ўлдириш учун биттасини танладик, бошқасини

эса шеригининг ўлдирилишига гувоҳ бўлиши учун тирик қолдирдик. Бу бир ўйин эди”. Атика бу кишидан ҳаёти сақланиб қолган олти кишининг тафсилотларини, тирик қолганлар ва ўлганлар ҳақида батафсил маълумотларни сўраб олишга ҳаракат қилди. Лекин у кишининг тили тутилар, Атика эса бунга кўпда эътибор қилмай, Исомни билганича таърифлаб берди. Ваҳолонки, Атика Исом ҳақида тўлиқ маълумотга эга эмас эди. Шунда ҳалиги гувоҳ: “У ўлдирилганлар ичидаги бор эди-ёв”, деди.

Сўнгра Атика у кишига Исомни бошқалардан ажратиб турадиган ваз-минлик хусусияти, унинг салобатини таърифлади. Шунда гувоҳ киши: “У нажот топганлар орасида бўлса керак”, деди. Шундай қилиб, аёл денгиз бўйида қатл қилинган жойга бориб, биттама-битта сўрашда давом этди. Суҳбатлардан шу нарса маълум бўлди, у билан гаплашганларнинг ҳар бири ўша воқеадан озми-кўпми хабардор эди. Шундан сўнг, бир нотаниш киши Атикага шундай деди: “У ерда ҳеч бир одам сўйилмаган. Асиrlар озод этилган. Сўнгра улардан ўзларини-ўзлари саклаб қолиши талаб қилинган. Асиrlар узоқлашмасданоқ орқаларидан ўқ узилган. Улардан олти нафари ерга йиқилган, қолганлари эса тирик қолган”.

Атиканинг қалбида умид туғилди. Исом тирик қолган. Чунки у ўқдан қандай кутулиш йўлини билади. Демак, ҳабиби ҳозир қаердадир юрибди. Ва у, албатта, келади. Атиканинг туйғулари алдамайди. Шундай бўлсада, у қўрқа-писа қайта-қайта сўрар эди: “У жароҳатланганми, бирон-бир ёрдамга муҳтоjмикан?”

Атика асиrlар қочган томон юрди. Унинг ўз яқинини излаб юргани тоғдаги кишилар орасида ҳам овоза бўлганди. Жабрдийда аёлнинг олдига бир кекса киши келиб: “Кишанланган бир неча киши бир гуруҳ милиция қўриқчилигига шу ердан ўтиб кетганини эслайман. Лекин сен айтгандек, у пайтда на ўқ овози, на дод-фарёд эшитилди”, деди. Бунга яна бир қари дехқон аёл қўшимча қилиб: “Охирги ойларда кўп қотилликларнинг гувоҳи бўлдик. Бир гуруҳ одамларни денгизда қўлга туширишган ва ўша ерда қатл қилишган, сўнг қум остига дағн қилишди”, дея қўрган-билганларини сўзлади.

Кейин қўшни кишлоқдан бир кизча келиб, Атикага: “Шу ердан усти очиқ машинада арқон билан боғланган одамларни олиб ўтишди. Улардан бири менга кўзини кисди”, деди.

Атика Исом ҳамон тирик эканини, унинг болаларча туйғуларини маъсум кизча билан ўйнашишга ундаланини англади.

Аёлнинг ҳис-туйғулари қўркувга, хавотирга айланди. Лекин умид уни ҳаракат қилишга ундарди. Атика бўлган ишларни ақл тарозусига солиб қўрарди ва Исомнинг тириклигига ишонар, унинг овози излашдан тўхтамасликка чорларди. Бир куни меҳмонхонада бир киши Атиканинг хонасини тақиллатиб: “Ҳабибингга бўлган хавотиринг бизни ҳам уни изланишга ундейди. Демоқчиманки, Будда тирик. Менимча, уни милиция хукуматга топшириб юборган. Бошқа одамларимиз ҳам худди шундай қўлга олинган-у, лекин тирик қолишган”, деди. Кейин ўша киши севган инсонини йўқотган кишидай қайғули оҳангда қўшиб қўйди: “Айни пайтда қўлимдан келадигани шу”.

Атика қичкириб: “Агар у ер юзидағи бирорта қамоқхонада ётганини, унинг тириклигини билсан бўлди, менга шундан бошқа ҳеч нарса керакмас”.

Атика пойтахтга жўнаб кетди. У адолат тантанаси учун тинимсиз қилган изланишларидан чеккан азобларини ўз яқинларидан бирортасига билдирмай дам олиши ва ўзига келиб олиши зарур эди.

Ҳикоялар кўп, лекин умидсизлик кучли.

Харитага назар солсанг, ҳамиша пойтахтларнинг бир-бирига ўхшашини кўрасан. Энди ёзув тасмаси воқеаларни жонлантирар деган умидда жиҳозни ишлатишпим керак. Тасма ғилдираги айланаверади, айланаверади...

Мен Атиканинг ўша куни пешинда одамларга тўлиб-тошган шаҳарга етиб келишини таърифлашга ҳаракат қилаётган эдим. Сўзлар тушунарсиз, лекин сўзларни тушуниш учун жиҳозни аста-секин ортга қайтаришга ҳаракат қиласдим.

Шаҳарда ранг-баранг эълонлар, афишалар қоқиб ташланган, одамлар кўп бўлишига қарамай, у ер ғамгин ва тушкун ҳолатда эди.

Атика оломон ичидан ногоҳ бир киши чиқиб: “Севгилингнинг қаердалигини биламан”, дейишини тасаввур қилас, лекин унинг аъзойи бадани зулм ва жабрдан эзилиб кетганди, шу сабабли у меҳмонхонага қочди ва у ерда Исомни топиш режасини тузмоққа аҳд қилди.

Унинг биринчи мақсади душманга қарши курашувчи кишиларда ишлайдиган таниш котиба билан учрашиш эди. Атика у билан учрашиб, ахволини баён этди. Шунда котиба аёлларга хос жасурлик билан Атиканинг билагидан тутиб, бу мавзу тўғрисида билиши мумкин бўлган расмий ташкилотларни айланиб чиқа бошлади, лекин қилинганд ҳаракатлар барибир уларни умидсизлик эшитига олиб бораверди. Шунда котиба: “Асло ноумид бўлмаймиз. Мухабbat умидсизликни билмайди”, деди. Атика: “Умидсизлик менинг хаёлимда ҳам йўқ. Умид ҳақиқат сари интилади. Исомни севишим – менинг умидим”, деди.

Бир куни унга хушхабар битилган хат келди. Бу хатни кўтариб, қўриқчилари билан юрадиган бир мансабдор кишининг олдига борди. У киши Атикага ишонч ва хотиржамлик билан: “Хоним, иншаллоҳ, ниятин-гизга етгайсиз”, деди.

Атика бу гапларни эшитиб, юраги қувончга тўлди. Атика у ерда ҳали ҳам жавонмардлик яловини кўтариб юрган кишилар борлигини биларди. Хушхабардан хурсанд бўлганча у бўлажак учрашувга тайёргарлик кўриб, ўзига оро берди. Лекин у киши ҳам қуруқ ваъдалар билан унинг қўйинини пуч ёнғоққа тўлдирди. Атика ҳам хонасига қайтиб, котиба дугонасига иши яна тескари кетаётганини айтди. “Унинг тириклигини билмасам, бу ҳаёт менга ҳаромдир!”, деди.

Қадам-бақадам, қамоқхонама-қамоқхона, ҳар бир қўлга олинганни кўриб чиқиши – бу дугонасидан чиққан фоя эди. Чунки бундай нотаниш жойларда қўриқчилардан кимдир бўлса ҳам бу ҳақда билиши керак. Котиба Исомнинг қаердалигини билган ёки кўрган кишига катта мукофот борлигини айтди. Кундан-кун натижалар ёмонлашиб борди. Атика умидсизлик билан жон олиб-жон бериб курашарди. Кунлар алам ва хавотир сари етаклаётган бўлса-да, мухабbat ҳам порлашда давом этарди.

Бир куни котибанинг хонасидан қувончли қичкириқ овози эшитилди. Атика эса дугонасининг гапига ўнинчи марта кулоқ тутаётганди. Унинг айтишича, боласини излаб юрган бир аёл маҳбуслар орасида Исомни кўрганини айтиб қолибди. Атика ҳали боласини топмаган онани қучоқлаб қичкириб юборди ва “Биламан, у тирик. Унинг тириклигини билардим”,

деди. Аёл ҳеч нарсани тушунмади. Қандай келган бўлса, шундай чиқиб кетди. Атика эса дугонаси билан учрашувнинг яқинлашиб қолганини нишонлаб, кечани Куддус ҳақидаги қўшиқни куйлаб ўтказди.

Эртаси куни икки аёл (Отна ва котиба) уйга оёқларини судраб қайтишиди. Масъул кишилар ўзларида гапирмаётган кишининг борлигини ҳам, Исом ёки Будда лақабли кишининг борлигини ҳам инкор қилишиди. Атика балконда тун қўйнида шаҳарга тикилиб зулмни ҳис килди. Ёшлиқ, муқаддас заминнинг босиб олиниши, суйган инсонлардан узоқлашиш... Зулмки, унутиб бўлмайдиган зулм. Уadolatни истайди. Севган инсонининг ҳали ҳам ҳаёт эканини рўй рост айтадиган инсонни истайди. Қандай талаб бу кийинчиликни келтирмоқда, қайси зулмат шаҳарни ўз комига тортмоқда, қайси кунлар ҳисобсиз ўтмоқда... “Энди умид ҳақида хаёл қиляпсанми?”

“Зайтун дарахти чарчадими? Доим яшил турган барглар сарғаймоқдами?”

“Келгуси кунларнинг сирини очиб бермоқчи бўлган садафлар жарангни ким эшитади?” Ким озод бўлади? Ким ғалаба қиласи? Атика қалбида, дengiz соҳилида, бутун ҳаётида шовқинни юзага келтирган йўқлик фалсафасини маҳкам тутишга қарор килди.

Умид нима учун яралган? Ҳаёт нима учун берилган?

Нима бўлса бўлсин... Вараклар йўқликка маҳв бўлди, лекин ҳақиқат ҳамон эгилган... Нима бўлса бўлар, ҳикоя йўқолди, лекин ҳали у юзага чиқади. Мана, мен қадимги китобларга қайтяпман. “Минг бир кеча”, “Сафар ажойиботлари”, “Ҳақиқий ёки мавхум умидни изловчи Атика воқеалари”, “Калила ва Димна”, “Ҳикмат мағзи”... Йога билан шуғулланувчилар хушсиз ухлайди. Магеллан йўлдан адашади, сўнг ерни кашф қиласи. Абу Зарр ҳақиқатни билади, сўнг заволлик сари боради...

Агар Атика фалсафани тарқ этиб, тарихга қайтганида эди, ундан кўра аза тутиш афзалроқ бўларди. Эй қайғули хоним, қаерда бўлмай мен сен томон битта умид билан юзланаман. Тарихни ўрганишинг керак. Тарих менга ҳам таскин беради. Балки у сен йўқотган хотиржамликни қалбингга олиб киради.

Нима бўлса бўлсин... Энди келгуси нарсалар ҳақида ўйлайлик. Она кундан-кун тўшакда сўлиб бормоқда, каучук дарахтининг барглари сарғаймоқда. Эй, гўзаллик ва қайғуга эрта келувчи заволкор зот! Ниҳоя мантиқий ва гўзал бўлсин. Мана, мен уларни боғдаги яшил ўт-ўланлардек ёнма-ён келаётганини кўряпман. Будда ва Атикани бир-бирларидан қайғу ёки фирок ажратолмайди. Ниҳоят, икки севишган учрашди ва соғинч шамоллари иккисини бир-бирига талпинтириди.

Уларни қўриб хурсанд бўлдим. Икки севишган қалб бир-бирига яқинлашар экан, қадамлари яшил гилам узра илдам ҳаракат қиласиди. Ёш болалардек кулишар, кўзлари қувончдан порларди. Бинафшаранг капалаклар уларнинг боши узра учади... Эй, саодатни ҳис қилдирган ниҳоя! Эй, ниҳояни ҳис қилдирган саодат!

Кассетани тўхтатдим. Сўнг кассетани охирги узилган жойининг бошига қайтардим: ўша куннинг тонгида Атика ўзи ёқтиримайдиган мусиқа остида уйғонди. Ўшанда ҳали у учрашиши керак бўлган масъул шахс ҳам ёки уни умид сари етаклайдиган киши ҳам йўқ эди. Атика кўзгуга қаради. Унда чизиқлар ва сояларни кўргач, шаҳарга бокди. Тўғри йўл билан яшашни ўйлаётган ёки умуман ўйламаётган кишиларнинг ҳис-туйғулари тўғрисида фикр юритди.

Кутиш билан юз йил ўтдими? Атика қайғуга эътибор бермай, янада кўпроқ табассум қилмоқда. Кўзгудан Будданинг сиймосини кўргач, Атика яна узоқ вақт яшаши кераклигини ҳис қилди.

Шоядки, ўша кассета овоз чиқармай, бўум-бўш айланса. Унга ёзилаётган жимжитлик ўзида сирларни сақлайди. Богни кезаётиб, гоҳ Атикани, гоҳ мевали зайдун дарахти остида жимгина турган Буддани кўрардим. Улар бир-бирлари билан кўзлари орқали сўзлашарди. Айни вақтда бир-бирларидан узоқлашиб ҳам борарди. Шунда Атика даҳшатга тушганча девор ортидан бир масъул кишининг уларни кузатаётганини билди. Богда хавотирлик ҳукмрон. Қора булатлар намли, ҳамма нарса унинг сояси томон юради. Атика ортга қайтади. Масъул киши эса уни ўзига тортади. У қаршилик қилиб ортга ҳаракат қилса-да, масъул киши кучли эди. Будданинг кўзлари эса бўшлиққа тикилган...

Хикоядаги ҳодисалар аралаш-куралаш бўлиб кетди. Жимжитлик борган сари ўз домига тортарди. Шу пайт тўшакда заиф ётган онамнинг “Ёнгин, ёнгин” деб ёрдам сўраб чақирган овозини эшилдим. Шошиб хонага кирдим. Онам бармоғи билан боғ томонга қараган дераза тарафни кўрсатарди. У ердан осмонга ўрлаётган тутун кўринарди. Мен вазиятни билиш учун эҳтиёткорлик билан ўша томон бордим. Шунда боғ бурчагида ловуллаган оловга кўзим тушди. Ҳеч нарса қилмаса керак деб ўйлаб тургандим, лекин аҳвол бирдан ўзгарди. Олов қуруқ шохларга тегиб, аста-секин кўтарилиб борарди. Кейин худди шамол келиб кучайтириб юборгандек, олов бирдан шиддатлашиб кетди. Қўрқиб, боғ томон юрдим. Бир пайтлар ўзим экиб, ундаги ўзгаришларга қараб, воқеаларни яхшилик ёки ёмонликка йўйиб юрган ёлғизгина дарахтим – зайдун томон силжиб бораётган оловни ўчирамоқчи бўлдим. Ақлим ишламай қолганди. Нима қилишни билмай, олов устига тупроқ соча бошладим. Лекин шамол кучайиб, аланга яшил ўт-ўланлар сари чўзилди. Зайдун мевалари эса оловдан пишиб тўкила бошлади. Сувга қараб чопдим. Шамол бўронга айланди. Осмонда яшин пайдо бўлди-да, ёмғир ёғиб дардимга шерик бўлди. Фикримни жамлай олмай, жим тўхтаб қолдим. Бироздан сўнг ҳаммаси тугади. Хотиржам бўлдим. Ёнгин хиди билан ёмғирдан сўнг пайдо бўладиган тупроқ хиди бир-бирига қоришиб кетди. Ким ҳам бунинг сабабини қидиради дейсиз? Мен эса тинчликни қидирмоқдаман. Дераза ортида боғда бўлган ҳодисани қайғу билан кузатаман. Якка зайдун дарахти ўз меваларини йўқотди. Ўт-ўланлар эса қорайиб кетди. Капалаклар қочиб кетди. Чумчуқлар жим бўлиб қолди. Чумолилар тупроқ остига яширинди. Онамга “Ҳаммаси тугади, волидам”, дедим.

У хотиржам бўлиб, кўзларини юмди. Кассета ҳам айланишдан тўхтади. Сув ва олов билан тинчланган ҳис-туйгуларимни нима деб номлашимни ҳам билмайман. Менга нима бўляпти ўзи? Бизга нима бўляпти? Йўқолган варақлар, йўқолган ҳарфлар, мубҳам ниҳоялар...

Боғ ичидан Атика менга қайғули ҳолда юриб келаётган кекса аёл бўлиб кўринди. Шунча воқеаларга қарамай, унинг овози умид билан титрарди. Секин-секин қадам ташлар, оёқлари қорайиб кетган ўт-ўланларга қўмилиб келарди. Тезроқ ҳаракат қилмоқчи бўламан-у, лекин бунинг удасидан чиқолмасдим. Атикага нима бўлди? Бечора муҳаббатга нима бўлди? Атика эндингина эришиб, уни маҳкам ушлайман деганида ўрталарида катта девор пайдо бўлди.

“Исомни мен билан бирга қидиргин”, дерди Атика менга қараб. Унга: “Албатта, уни сен билан бирга қидираман”, дедим. У эса хамон жойидан қимирлай: “Мени қидир, шунда уни топасан”, деди.

Сабрни бемор ётган онамдан, умидсизликка тушмай изланишни Атикадан ўргандим. Шунча воқеага қарамай, зое кетган вақту арзимас нарсаларни ҳис қиляпман. Оёкларим корайиб кетган ўт-ўланларга кўмилади. Воқеалар тинчиди, гумонлар тарқади. Бофимни таъсирли жимжитлик билан тўлдирган барча шахслар ҳикоя майдонидан ғойиб бўлди. Тўсатдан ёзишдан тўхташга қарор қилдим. Атика севгилисини топмади. Чамаси, у хаёт ҳақиқатини билишга бўлган барча умидларини йўқотди. Бу билан мен бефойда изланишнинг манфаатига алоқаси бўлмаган биргина ҳарфни ҳам ёзib олишдан фойда йўқлигини англадим...

“Эй Аллоҳим, фикрларим тарқоқ, мен йўқолмоқдаман”.


Сочилиб ётган қораламалару ёзилмаган варакларни ҳам ёкиб юбордим. Ҳаммаси оловда ёниб, кул бўлди. Бемаъни ҳодисалардан таъсирланиб, азобнинг ниҳоясини ўйлаб қолдим.

Будданинг ё ўлмай, ё яшамай қолишига мен жавобгарманми? Мени бундай танг ахволга солган айнан Атика эканлигини сездим. У мени гуноҳ ботқоғига ботирди-да, ўзи ғойиб бўлди. Бунга кўз олдимдаги гули сиёҳлар, кулга айланган майсалар гувоҳ. Будда ва Атиканингмуҳаббати битилган мактубларни ўчирайми? Ҳодисалардан хабар берувчи, яшил рангини йўқотган ўт-ўлан устига тупроқ ағдарамайми?

У эрта келган қариликми ёки боғимда узоқ туриб қолган кузмиди? Ёлғондан туш кўришни истайман. Ёзиш, хаёл суриш, ёлғонларни тугатиб, ҳақиқатни эътироф этиш вақти келди...

Ҳаммамиз мағлуб бўляпмиз. Будда кутулиш, Атика эса уни излаш йўлида... Мен эса ҳеч нарсани ўзгартиролмай, уларга гувоҳ бўлиб турибман, холос. Йўқолиб боряпман, лекин ўз сўзларим билан ёпган умид эшигини Атика келиб тақиллатишини кутаман. Будда билан учрашгани тўғрисида хушхабарлар келтирас деб кутишда давом этавераман. Шунда қайтадан ёзиш усули ҳақида ўйлайман. Узоқ йиллар аза тутишга мажбур қилган ёлғон усул тўғрисида хаёл сурайми?

Шунда онамнинг: “Бутун боққа қуёш тушяпти”, деб хурсанд бўлиб гапирганларини эшийтдим. Илгари сира бундай хушчақчақ гапирганларини эшиitmагандим. Шунда бўлган ҳодисаларни унутиш учун қалбга шодлик олиб киргани боққа чиқдим...



**Хорхе Луис БОРХЕС**

(1899–1986)

## ДЕНГИЗДАН-ДА ТЕРАН ХАР ДАҚИҚА

*Рус тилидан  
Турсун АЛИ  
таржимаси*

Жаҳон адабиётида ижоди ёруғ юлдуздек чарақлаб турган Борхес назмда ҳам ўзига хос ижод этиб, шеъриятни янгилаган шоирлардандин.

Бинобарин, 1920 йиллар Аргентинада шеърият дунёси мамлакат пойтахти Буэнос-Айреснинг Йўқсил ишчилар яшовчи хокисор Боэдо кўчаси ва Бадаевлат сармоядорлар умргузаронлик құлувчи мұхташам Флорида кўчаси номлари замирида қоқ икки лагерга бўлиниб кетган эди. “Флоридачилар” Европада кенг тарқалган Юксак поэзия – жимжимадорликка мойил бўлишса, “Боэдоичилар” “соф” ва “оддий” (сенсильизм) шеъриятни ёқлаб қалам тебратишарди. Бу гурухлар шундай бўлса ҳам, бир-бирига душманлик кайфиятига берилиб кетишимаган, ўзларини бир авлодга мансуб деб билишар, қолаверса, Аргентина деган диёр ўз маданияти билан уларнинг бошини қовуштирган эди. “Боэдоичилар” орасидан Альваро Юнке деган шоир чиққан ва “Дунёда ҳеч бўлмаганды битта камситилган ва хўрланган кимса бор экан, инсон ҳеч маҳал баҳтли бўла олмайди”, дея, ўз “кредо”сини эълон қилган эди.

“Флоридачилар”га мансуб бўлган Хорхе Луис Борхес ўз ижодини ўша кезларда бошлигани, маълум вақт шеърлар ёзганидан сўнг шоирликни ташлаб, носирликка ўтган, кейинчалик бутун дунёга танилган носир даражасига кўтарила билган.

Йигирманчи аср бошидаги чорак асрлик иқтисодий юксалиш, жамият ҳаётининг маълум даражада демократик тус олиши асосида шаклланган Хорхе Луис Борхес, тадқиқотчилар ёзишича, ижодкор зиёлилар орасида вужудга келган ниҳоятда мураккаб ва асабий вазиятга тушшиб қолади. Мамлакат тарихи ва бугунги куни унга кўп жиҳатдан охири ўйқулкан хатолар силсиласи, туганмас ва тушуниб бўлмас фожиадек туюларди...

Ана шундай бир шароитда Хорхе Луис Борхес кўплаб “изм”лар силсиласидан “ультраизм”<sup>1</sup> ўйналишини танилади. Борхеснинг ультраизм билан танишуви Испанияда, ўзи таълим олган Женевадан Биринчи жаҳон уруши бошланганидан кейин бу мамлакатга кўчиб келгач рўй берди. Ультраизм ўйналишидаги бадиий тафаккурда портловчи ва бир-бирига боғланмаган метафораларга мурожаат қилиш Хорхе Луис Борхесга маъқул тушди, ватанига қайтиб келганидан сўнгра ўзини Аргентина “ультраистлари сардори” деб эълон қилди. Бу бир тактик усул ўзига хос ҳийла ҳам эди.

<sup>1</sup> Манба: Поэзия Аргентины. М.: Издательство «Художественная литература» 1987.

<sup>2</sup> Ультраизм асосан, испания ва Лотин Америкасидаги испан тилли шеъриятнинг йўналиши ҳисобланади. Бу шеъриятда метафора асосий бадиий қадрият деб қабул қилинган.

Шунинг учун ҳам Хорхе Луис Борхес бу даврда яратилган асарларини китобларига киритмаган, айримларидан воз кечган, нашр қилдиromoқчи бўлса, жиддий қайта ишлаган эди.

Хорхе Луис Борхес жуда кўплаб халқаро адабий мукофотлар совриндори бўлган. Ҳатто 1970 йилда Нобель мукофотига номзод қилиб кўрсатилган, аммо Аугусто Пиночет сиёсатига ижобий қарашлари туфайли тақдирланмаган. Борхес 1986 йил 14 июнда Женевада вафот этди. 2008 йилда Лиссабонда шоурга ҳайкал ўрнатилди.

Таржимон

## ЁМФИР

*Бог узра майдалаб ёғмоқда ёмғир,  
Ховли саҳни сокин тозарган, ойдин.  
Балки тиниб қолди? Оқшом нам, дилгир,  
Азизларинг узра ёғгандир бетин.*

*Мавсум бузук ҳаво билан қайтмоқда,  
Хазина аталур безовта нигоҳ.  
Атиргул кўринар унга боқчандар,  
Атроф байрам мисол ранг-барангдир, боқ.*

*Тобора қоронегу дераза ортида  
Ёмғир эркалаган мўйқалам, ана,  
Қорайиб турадир зинапояда.*

*Чиринди исига тўйинган атроф.  
Тирик кишиим сасин туюман яна,  
Қайтиб келаётган отамники, ҳа.*

## “ЎН ЕТТИ ҲАЙКУ”ДАН

1

*Оқшом ва тоғлар.  
Нималарни менга қилдилар ҳикоя?  
Унутилди аттанг, барибир.*

7

*Шу кундан мен  
шахмат таҳтасидаги доналарга  
қўл теккизмадим сира.*

14

*Сўнаётган ёруғлик,  
сўниб бораётган салтанатми  
ёки ёнарқурт?*

## ХОВЛИЧА

*Оқиомда  
рангларин ўчирап толиққан ҳовли.  
Осмони фалакдан түлин ой  
кутадир беҳуда илк әхтиросларин.  
Кичик ҳовли, тошлоқ ирмоқдай  
нилий ранглар  
деразага сингишиб кетар.  
Сокин ва ёргүг юлдузлар оралаб  
қотиб қолди Абадият ҳам.  
шийпонча билан устунчалар оралығыда  
Сир тутилган дүстлик лаҳзаси ураверар жом.*

## ШАНБАЛАР

*(парча)*

*Унумилган соялари дала ҳовлиниң  
тақа-тақ беркитилган деразалари.  
Менинг нотинч күнглим кимсасиз уй бўйлаб  
сенинг тинчимас қалбинги  
излайди кўр-кўрона.  
Овунмас согинч узра қўяр узиб  
истак ила тортинчоқлик.  
Тун зимиstonи узра  
сенинг нурафшон ялангочлигинг чиқиб келар.  
Қалбга ўхшаб тобора оғриқдан қисилиб кетган  
жимлик қаърига сингийди икки тан, вужсуд.*

## XIII АСР ШОИРИ

*Кўз ташлар, қораламалар бошибоидоқ,  
Сонетнинг чўнг биринчи намунаси у.  
Гуноҳкор тўртлиқ, учликларга қарар,  
Ўз-ўзича қалам ёза олган-ку?*

*О, неchanчи сайқал бермоқда сатрга,  
Осудаланади... Ё салом товушин илгар,  
Нотании даҳшат аро шоир булбулнинг  
Асрлар оша сайрашини тинглар.*

*Ошно бўлган идрок ила ҳис этар  
Аполлон етказган хаёл далдасида  
Унга табаррук юзин очгай Архетин:*

Қирра-қирра биллур нигоҳини ҳам  
Умр бўйи қондириб бўлмайди, ёху,  
Лабиринтинг, Дедал, ё Сфінксинг, Эдип?

## БУЭНОС-АЙРЕС КЎЧАЛАРИ

Буэнос-Айрес кўчалари,  
Сиз – юрагим қоқ марказий нуқтаси.  
Пиёдалар шошилинч одимларидан азият чеккан  
мудроқ хиёбонлар эмас,  
ай сиз, чекка ҳудудлар сокин жсин кўчалари,  
сизга нотаниш дараҳтлар пакана пояси,  
шаҳар чеккалари,  
бунда қоп-қоронгу юпун кулбачалар  
елкасидан эзib босар Абадий макон,  
текисликлар ва осмон  
олис-олис кенгликларига гарқ бўлиб кетишидан  
тургандек чўчиб.  
Тирик инсон қалбин согинган барчага  
Бахт-саодат этарсиз ваъда:  
Чорраҳаларингизда тутинади дўст  
уйлар зиндонидан озодликка чиқсан тақдирлар.  
Хеч бўлмаса,  
Қайроқтош тўшалган кўксингиз узра  
адаишган умид дадил илдамлаб боргани учун  
эгилиб таъзим қиласман сизга.  
Эгри-буғри қайрилишиларингиз  
Осмон турфа шамолларида ҳилтираётган  
байроқларнинг ҳаприқишидек.  
Майли, менинг шеърларим дастасида  
раксга тушаверсин ўша байроқлар.

1964

1

Гўё сеҳрланган барчаси. Яна бир бора  
Бундайин чарогон бўлмас ой шундогам,  
Богни босган мудроқ. Ой эндиликда  
Кўзгу бор-йўги, ўтмии кўланкаси қора,  
Сўниш ҳовури. Ёнма-ён ёнаётган икки чеккам,  
Чалкашиб турган қўлларимдек... –  
Алвидо! Барчасига алвидо!  
Содик қолур хотира, согинч!  
Исталган ҳар қандай кимса (доим этарсан таъкид)  
Соҳиби бўлмаган бир лаҳзани йўқотадир, о,


Бироқ унум бўлган аъмолин ўрганиши миши  
Этгай насиб кучи етганларга муқаррар!  
Сени ўлдураплар биргина атиргул ила, ай,  
Титраб турган биргина торларда кадар.

2

Барча шодликлар ўтмишида. Нима ҳам дердик,  
Замона беҳисоб бойликлар ила тўла.  
Денгиздан-да теран ҳар дақиқа, бешак,  
Ҳам тушунарсиздир. Кун узун бироқ.  
Офтоб ботишидан бўлмайди қочиб!  
Колдиқ эса янада қисқароқ —  
Ўшал яширин ҳадя яқинроқ янада.  
Денгиз ва камон ўқлари ўзгача.  
Қайсики, бир куни бизни даволар  
Тундан ва муҳаббатдан, шубҳасиз.  
Белгилаб қўйилгай ҳар бир йўқотиши,  
Барча нарса бўлган, энди ҳар нарса жумбок.  
Фақатгина энди қалбингда қайғули қувонч,  
Бурчакларга бошловчи яна ўша эшик, боқ.

### ИМКОНИЯТДАН ТАШҚАРИДА

Верленнинг ҳеч мен эслолмайдиган сатри бор битта.  
Қайдадир, яқин орада  
энди мен ўтмайдиган бир кўча ҳам бор.  
Ҳатто ўз уйимда мени кўрмайдиган,  
катта қўзгу борлиги эҳтимол.  
Қай бир эшикни умрбодга ёпдим ортимдан.  
Кутубхонам китоблари орасида  
ўзгачаси бор битта.  
Уни ўқиши насиб этмайди менга ҳеч.  
Элликка кираман шу ёзда.  
Демак, ажал ҳам айтарли олисда эмас.



**Анатолий ДОМБРОВСКИЙ**

(1934–2001)

## АФЛОТУН ВА АРАСТУ

Қисса<sup>1</sup>

*Рус тилидан  
Амир ФАЙЗУЛЛА ва  
Маҳкам МАҲМУД  
таржимаси*

**К**ун шундай чўзилдики, гўё ҳеч қачон кеч кирмайдигандай эди, ҳолбуки ҳамма қош қорайишини кутар, кутганда ҳам, бетоқатлик билан кутарди, чунки Дионис шарафига бўладиган намойишни ҳамма бирдек кўришга муштоқ эди. Кун ботишига ҳали анча бор эди, минглаб афинаиклар эса ўйин-кулги ва сершовқин томоша бошланадиган Дирилон дарвозаси томонга, Ташқи Керамикага қаторлашиб кетганди.

Нелей ҳовлида, ошхона олдида мудрарди. Бармоқлари билан унинг бурнини қисиб, Фаний уни уйғотди. Дафъатан Нелей ўзини чўкиб кетаётгандек ҳис қилди-ю, дарров уйғонди ва Фанийнинг аҳмокона ҳазилини англаб, тутмоқчи бўлиб унга ташланди, бироқ Фаний тутқич бермади ва Нелей дарров чарчаб қолди. Ўтирида-да, хириллаб нафас олганча Фанийга муштумини дўлайтириди.

– Кетдик Ташқи Керамикага, – деди унга қах-қах уриб кулганча Фаний.  
– Кўзларингни арт.

Арасту билан Феофраст қувноқ-қувноқ гаплашганча ҳовлига чиқишиди.

– Герпиллидани йўқлаймизми? – сўради Феофраст Арастудан. – Уни ўзимиз билан олиб олсак, қалай бўларкин? Ҳойнаҳой отаси эшакда Дирилонга етиб олган бўлса керак.

– “Герпиллидани олиб кетишин-да ишқилиб”, – хаёлан маъбулларга мурожаат қилди Нелей, чунки у қизни ўз фарзандидай севарди, гўё қизнинг отаси сартарош Мидий эмас, унинг ўзидаи. У Герпиллидани биринчи марта кўрганида, кўнглидан дарҳол бундай гап ўтганди: агар маъбуллар унинг пешонасига хотин ва қиз беришганида, унинг қизи худди шу Герпиллидадек бўлар эди. Илгари у ҳеч қачон қиз тўғрисида ўйламас эди, Герпиллидани кўрди-ю, ўйлаб қолди. Ёш Герпиллида Арастуга ҳам ёқиб қолганди, чунки ўша кундан бери у фақат Мидийга сочини олдиради.

<sup>1</sup> Давоми. Бошланиши ўтган сонда.

“Герпиллида гўзал” – қиз борасида фақат шу гапни айтиш мумкин эди. Нелейнинг кўзи тушган бошқа барча Афина қизлари шунчаки сулув бўлса, Герпиллида соҳибжамол эди. Гарчи қиз отаси, сергап сартарош Мидийга дастёрлик қилса-да, аслида маликага ўхшаб ҳамма унинг хизматини қилишга арзир эди. Нелей шундай ўйлади. Арасту-ку буни амалда қиласр эди: сартарошхонага келганида у ҳар доим Герпиллидага совға келтиради. Арасту қизга совға қилган нарсаларни Нелей истаган вақтда битта-битта айтиб бера олади. Даставвал у Герпиллидага мовий белбоғча, кейин кўзгу, ундан кейин кумуш билагузук, кўзли тўғноғич, тилла занжир ва тилла узук, биттасидан атиргул, иккинчисидан заъфарон ҳиди анқиб турадиган иккита сирли кўза совға қилганди. Яқиндагина у қизга кўк камзул ва қизил ковуш совға қилди...

– Бўпти, – рози бўлди Арасту. – Герпиллидани ҳам бирга олиб кетамиз.

Энди Феофрастга фақат Помпил ҳамроҳ эди, Фаний уйда қолди.

– Герпиллидани чақириб юборарсан, – Помпилга буюрди Феофраст. – Сизларни Опетор емакхонаси олдида кутиб турамиз.

– Ана, – Нелейнинг олдида мақтана бошлади Помпил. – Мухим ишни топширади менга! Бундай ишни қилиш сенинг қўлингдан келиб бўпти: гўзал қизни уйидан фақат мен авраб олиб чиқа оламан.

Нелей эътиroz билдириб ўтирмади: Помпилга ҳақиқатан ҳам шундай қийин топшириқ берилганди, зеро у Мидийнинг уйига дарвозадан эмас, балки боғдан киришга мажбур эди. Бунинг учун эса баланд девордан ошиб ўтиши керак бўларди, чунки дарвоза каби боғ эшиги ҳам қулф эди. Кейин Помпил олдида янги қийинчиликлар турарди: уйнинг аёллар бўлмаси – гинекайга кириб олиш; уни ҳеч ким пайқамаслиги керак, акс ҳолда ҳолигавой. Мидийнинг хизматкорлари бадфеълиқда машҳур эдилар, дарвоқе Мидийнинг ўзи ҳам тез-тез уларни дўппослаб турарди. Кейин у гинекайдан баланд тош деворли эшиккача қайтиб келиши ва Герпиллидани кутиши лозим бўларди.

– Бир драҳма сеники, – ваъда берди Помпилга Арасту.

Буни эшитиб, Нелейнинг лунжи осилди: хожаси пул совурганда у ҳар доим тумшаяр эди.

Опеторнинг емакхонаси олдида одам кўп эди. Шаҳар девори ортига йўл олишдан олдин кўпгина афиналиклар пишлокли бўғирсоқ сотиб олиш ва бир кружка мусаллас ичиш учун бу ерга кириб чиқар эдилар, ахир олдинда уйқусиз тун кутиб турибди-да. Тўхтовсиз югар-югорлардан қизариб кетган Опетор у пештахтадан бу пештахтага ўзини урар, бақирав, қўлларини силкитар, оёқдан қолган сотувчиларни ҳайдар эди – савдо ҳар доимгидан қизғин эди.

Помпил ва Герпиллида узоқ кутиб қолишли. Гарчи Феофраст билан Арасту емакхонадан нарида, Помпеонни ўраб олган девор муюлишидаги Панафинеялар тантаналарига мўлжалланган ашқол-дашқоллар омбори ёнида туришса-да, уларни дарров пайқашди. Биринчи бўлиб Мақдуния проксени Никанор югурби келди.

– Хайрэ, Арасту. Суюнчи беравер, Арасту! – қичқирди у узоқданоқ – Филипп тахтга ўтирди! Филипп – Мақдуния шоҳи!..

– Шовқин солма! – қатъий оҳангда деди Арасту. – Одамлар мени Мақдуния фуқароси деб ўйлаши мумкин. Мен эса Стагираданман, фракияликман... Унутдингми, ё?

– Ҳа, ҳа, ҳа! – бош ирғиди семиз ва жонсарак Никанор. – Эсимда, эсимда... Аммо бу ғоят қувончли гап! Шундай қувонччики! Сен Филипп билан бирга катта бўлгансан, ахир...

– Албатта, хурсандман, – деди Арасту. – Бўлди, буни кўя тур, Никанор. Бу хабарни Афинада кўплар эшитганми?

– Кўплар эшитган, Арасту, кўплар эшитган! Кўпларнинг боши осмонда! Айтишларича, Демосфен бу янгиликни эшитиб, фазабдан ёқаларини йиртиби, Филиппнинг ота тахтига ўтиришига ёрдам берган Ификратнинг етти пуштига лаънатлар айтибди. Демосфен бу ҳақда: “Афина ўзига гўр қазиди”, деганимиш. Гўё Филипп Афинанинг душимани эмиш...

– Жим бўл, – деди Феофраст Никанорга. – Демосфеннинг ўзи келаяпти...

Демосфенга кўзи тушиши ҳамоноқ Никанор жуфтакни ростлаб қолди ва емакхонадан Дипилон томонга оқаётган оломон ичига кириб ғойиб бўлди.

– Хайр-э, Арасту! Хайр-э, Феофраст! – файласуфларга салом берди Демосфен. – Дионисга сизлар ҳам ҳамроҳлик қилмоқчимисизлар?

– Ҳа, – жавоб берди Арасту. – Фақат нигоҳимиз билан, Демосфен.

– Мен ҳам, – деди Демосфен. – Ҳолбуки, остимга эчки пўстаги солиб, эшакда савлат тўкиб кетишга шунчалик интиқманки... Кўй ва эшаклар подаси ичига афиналикларга насиб қилгани шу. Бугун Диониснинг ёғоч санамини эмас, Филиппнинг терисини...

– Филиппни нега бунча ёмон кўрасан? – сўради Феофраст Демосфендан.

– Чунки у ҳокими мутлақ, – жавоб берди Демосфен. – Бундан ташқари, уни Мақдуния тахтига қайтаргандарни ҳам биламан. Филиппга ёрдам бериш фақат бир нарсани англатади: Афина демократияси учун гўр қазилмоқда... Сизлар икковингиз метек-келгиндиарсиз, шунинг учун бошимиз устида турган оғатни сезмайсизлар...

– Филипп сенинг ёш мусаллас байрамингни ҳаром қилганидан афсусдаман, – деди Арасту Демосфенга. – Балки мусаллас кайфиятингни кўтарар? Опеторга кирмаймизми?

– Биласан, Арасту, кайфиятим мусаллас куйилиб тушадиган жойда уя қурмаган.

Улар бир-бирининг кўзига тик қараб тураган эдилар. Ҳар иккови ҳам бир-бирига синовчан тикиларди. Арастунинг кўзларида Демосфен нимани кўрмоқчи бўлганди? Гарчи Арасту Никанор келтирган хушхабар севинчини, Демосфен эса Филиппнинг ғалабаси ҳақидаги шумхабардан етган андухни беркитишга ҳаракат қилса-да, уларнинг ҳар иккаласи бир-бирининг кечинмаларидан воқиф эди. Арасту Демосфен олдида ўз севинчидан андишада эди, чунки Филиппнинг тахтга келиши Демосфеннинг буюк ва муқаддас орзузи – афиналикларнинг эркесварлик ва хурфиқрлилик орзузи илдизига болта уради. Демосфеннинг афиналиклар эркесварлиги ва хурфиқрлилигига бўлган муҳаббати буюк ва муқаддас, унинг ўзи шу эркесварлик ва хурфиқрлилик тимсоли эди.

Мана, энди унинг кўзларида мунг ва изтироб, чехрасида – аламли чарчоқ. Унга нима деб ва қандай қилиб далда бериш мумкин? Арасту Демосфеннинг бу курашда бой беришини, унинг қисмати – фожия эканини аллақачон англаб етган эди. Буни Демосфеннинг ўзи ҳам билишига Арастунинг иймони комил эди. Қаҳрамонлар қисмати аянчли, аммо гўзал бўлади. Бу ҳақда ўйлаш аламли бўлса-да, аммо ҳеч нарсани ўзгартириб бўлмайди.

Арастунинг қисмати – билим. Ишқ эмас, эҳтирос эмас, шижаот эмас, балки ҳақиқат йўлидан бориш. Шижаот гўзал нарса, аммо зарурият,

қонун ютиб чиқади. Қонун эса Демосфенга қарши эди, чунки Афинанинг шон-шуҳрати ва қудрати ўтиб бўлганди, чунки бошқа қудратли кучлар кўтарилиб келмоқда эди. Шундай бўлса-да, Демосфеннинг орзуси муқаддас бўлиб қолаверади...

– Филипп ҳақида сен нима дейсан? – сўради Демосфен Арастудан. – Сен уни яқиндан биласан-ку.

– У Мақдуния тахтига муносиб, – жавоб берди Арасту.

– Афиналиклар Филиппга муносиб, – аламнок жилмайди Демосфен. – Аммо у уларга қимматга тушади ҳали. Ҳамма базми жамшид қилаяпти, яйраб-қувонаяпти, ёрдамга чақирадиган одамнинг ўзи йўқ, – У яна Арас-туниг кўзига қаради. – Сизлар ҳам ёрдам беришга арзимайсизлар. Хайр.

– Хайр, – жавоб берди Арасту.

То Демосфен оломон ичига кириб кўздан йўқолмагунча у унинг ортидан қараб турди ва Феофрастга юзланиб деди:

– Борди-ю, яккаҳокимлик Афинада демократиянинг бошига етганда ҳам бунда Филиппнинг ўзи эмас, балки демократия учун курашишни ҳам, маблағ беришни ҳам истамайдиган афиналик мешқорин бойлар айбор бўладилар...

Демосфен кетди, Помпил ва Герпиллидадан бўлса ҳамон дарак йўқ эди. Арасту билан Феофраст ташвишлана бошлашди: Мидийнинг уйида Помпил бир балога йўлиқмадимикин?

– Нелейни сартарошга юборайликми? – сўради Феофраст Арастудан.

“Эй маъбудлар! – ўйлади Нелей. – Шунга йўл берманглар!”. Унинг Мидийникига боришга сира кўнгли йўқ эди: йўл ҳам узок, вазифа ҳам оғир – дарбондан Герпиллида қаердалигини, Помпил келган-келмаганини сўраб билиш. Борди-ю, Герпиллида уйда бўлиб, Помпил боғда қўлга тушиб қолган бўлса, Нелей ҳам насибасини олмай қолмайди.

Хайриятки, маъбудлар Нелейни аяшди: Арасту уни Мидийникига жўнатмоқчи бўлиб турган эди ҳамки, Помпил билан Герпиллида келиб қолса бўладими! Иккови ҳам кулар, тез юрганидан юзлари бўғриқиб кетган, ёшликлари ва чиройлари янада юзага қалқиб чиққанди. “Қиз тушмагур Помпил билан ўпишмаганмикин?” – Герпиллида ҳақида ўйлади Нелей, чунки Помпил жудаям хурсанд кўринмоқда эди. Герпиллида ҳам негадир Помпилга одатдагидан кўпроқ қараб-қараб қўймоқда эди – йигитнинг қуллиги эсида ҳам йўқ. Бироқ агар Феофраст, ўзи ваъда қилганидек, қачонлардир унга озодлик бергудек бўлса, Помпил зодагон одамга айла-ниши турган гап эди.

– Бўла қолинглар, дўстлар, – деди Арасту. – Найлар товуши қулоғимга чалинаяпти.

Улар одамлар оқимиға қўшилиб кетишиди. Оломон ичиди адашиб кет-маслик учун Арасту Герпиллиданинг қўлидан ушлаб олди... У қизнинг қулоғига энгашиб, нимадир деди ва Герпиллида шундай хандон отиб кул-дики, ёнма-ён кетаётган одамлар унга қараб жилмайиб қўйишиди.

– Маъбудлар, шу қизнинг баҳтини беринглар, – шивирлади Нелей. – Унинг хусни жамоли, хандон кулгиси, пок қалби учун абадий баҳт ила сарафroz этинглар...

Нелейнинг гапларини эшитгандай, Герпиллида унга томон бурилиб қаради ва табассум ҳадя қилди. Нелей хўрсиниб қўйди-да, яна бир карра унга баҳт тилади.

– Байрам намойиши бошлангани ҳамон Нелей Арасту билан Герпиллидани кўздан йўқотди – улар ранг-баранг либослардаги шовқинли оломонга қоришиб кетишганди. Бирмунча вақтгача у Феофраст ва Помпилдан ортда қолмасликка ҳаракат қилди, бироқ кўп ўтмай улар ҳам рақс тушаётган нимфалар ва менадалар<sup>1</sup> гирдобида кўздан йўқолишиди.

Қўшиклар, қах-қахалар, шодон қийқириклар, мусиқа, минглаб оёқлар дупури, минглаб кўзлар, минглаб жилмайишлар, ранг-баранг либослар, ниқоблар, қуёш, ёш баҳор майсаси – бу шундай сехрли хилқат эдики, ундан ҳар бир одамнинг боши айланар ва юраги гуп-гуп урар эди. Айниқса ёшлар ўзини бутунлай унугтган. Кексалар эса ўзларини ёшдай хис қиласар эдилар.

– Ниқобингни оч, сени бир ўпай! – қичқирди Нелейга фаришталардай кийиниб олган бир аёл.

Ўша аёл унинг олдига чопиб келди-да, соқолидан тортиб қўйди. Буни кўрганлар қотиб-қотиб қулишиди. Нелейнинг ўзи ҳам ёйилиб кулди. Кейин иккита фаришта унинг қўлидан тутиб, етаклаб кетишиди. Нелей базур юлқиниб чиқди-да, нафасини ростлаб, шаҳар дарвозаси томон шошилди: бундай байрам учун куч керак бўларди. Унинг қайтиб келганидан Тиманф суюниб кетди.

– Қани у? – сўради Нелейдан Арасту ҳақида.

– У ёқда, – камгаплиқда Тиманфга тақлид қилиб, Нелей қўлинин силкиб қўйди.

– Ичасанми? – сўради Тиманф.

Нелей бош иргади.

Тиманор унга нон ва мусаллас келтирди, унинг рўпарасига ўтириди-да, Нелейнинг ейиш-чишини томоша қила бошлади.

– Ўйни ўзи топиб келади, – деди Нелей ҳамон Арасту ҳақида ўйлаб.

Тиманф индамай уни маъқуллади.

– Бунинг устига ёнида Герпиллида бор.

– Э-ҳа, – деди Тиманф ва жилмайди.

Куёш ботди. Дараҳтзордан илк баҳор майсаларининг муздек ҳиди димоққа урди.

## ТЎРТИНЧИ БОБ

### Илдизлар ва бутоқлар

Дион уйининг чумоли уясидан фарқи қолмаганди; Сиракуза мустабиди таъқибларидан қочган сицилияликлар ҳар куни Дионни қуршаб олар, ундан химоя талаб қиласар эдилар, улардан энг қунтлилари ўзларининг зодагон ҳамюртларидан келтирган оғатлари учун қутурган мустабиддан ўч олишга – Сиракуза ёнига қўшин тушириб, Дионисий Иккинчини таҳтдан суриб ташлашга ундар эдилар. Гарчи жияни Дионисий бутун дунё олдида унга бўхтон қилган, ўзига қарши фитнада айблаб, Сицилиядан ҳайдаб юборган бўлса-да, Дион ҳеч бундай қадам қўйишга журъат қилолмас эди. Дионнинг энг яқин дўсти Афлотун олдида ҳам Дионисийнинг айби тоғдай эди: меҳмондўстликнинг барча қонунларини назар-писанд этмай, Афлотунга ўлдираман деб дўқ қилган шу Дионисий бўлади-да... Барибир ҳам васваса

<sup>1</sup> Нимфалар – юонон фалсафасида табиат маъбуналари, менадалар – маъбуд Дионис ҳамроҳлари.

ҳаддан ташқари катта эди: мустабид бадарға этган сицилияликлар, афтидан, шартта жангга ташланишга тайёр эдилар, бисотларидағи бойликлар эса сицилияликлар күшинига талай ёлланма аскарларни қўшиб олиш учун bemalol етиб ортар эди.

Дионнинг руҳий ҳолатидан Афлотуннинг кўнгли тинч эмасди ва у дўсти билан сухбатни деб Академияни тез-тез тарқ этмоқда эди. “Ҳар қандай зўравонлик – муқаррар ёвузлиkdir”, деган нақлни рўкач қилиб, Афлотун Дионни мустабид жиянини тахтдан ағдариш тўғрисидаги фикрдан қайтармокчи бўларди.

Сицилиялик қочоқлар Афлотуннинг Дионга таъсири кучлилигини билиб, файласуфни очиқдан-очиқ қоралар ва Дионни дадилроқ бўлишга чакирар эдилар. Булар бари Арастуга тинчлик бермасди. Афлотуннинг жияни Спевсип сицилияликлар тарафини олгач, у баттар ташвишга тушиб қолди. Спевсип ўз ихтиёри билан Сирақузага боришга, агар Дион қўшин билан Сицилия соҳилига келиб тушса, сирақузаликларнинг ўзлари бунга қандай қарашини билишга бел боғлади. Унинг маҳфий сафари бир неча ойгача чўзилди. Энди Афинага қайтгач, у фитначиларни Сирақуза деворлари олдига тезроқ олиб бориб ташлашни қаттиқ туриб талаб қила бошлади. Шу тариқа Афлотун Спевсипнинг режаларига ҳам тўскинлик қиласади.

– Сен Академия жамоаси ичига нифоқ солдинг, – деди бир куни Спевсипга Арасту. – Бу ҳам етмагандай, сен фалсафани бутунлай ташлаб қўйдинг, Спевсип.

– Тъянангнинг аввали кўпроқ сенинг ўзингга тааллукли эмасмикан деб қўрқаман, – жавоб берди Афлотуннинг қизиққон жияни. – Сирақуза ҳақидаги масала у ёки бу тарзда ҳал этилади. Аммо бу барча воқеалардан кейин нима қолади: шогирдлар сафига сен солган рахна қолади, вассалом.

– Нима тўғрисида гапирайсан ўзи? – сўради Арасту. – Айловинг асосга эгами?

– Ҳа! – жавоб берди Спевсип. – Яна бир гап, Арасту: сен машғулотларингни факат Афлотун ўз шогирдларини тўплаши мумкин бўлган хиёбонда ўтказа бошладинг. Қадимдан бу жой қутлуг саналиб келган. Ҳушёр бўл, Арасту.

– Ҳақиқатни ўрганиш тақиқланган жой йўқ, Спевсип, – жавоб берди Арасту. – Сицилияликлар Афлотунга қарши тиш қайраганлар, сен эса нутқларинг билан уларнинг оловига ёғ сепасан. Тилингни тий, Спевсип.

– Сен ҳам тилингни тий, Арасту. Агар билимда Устоздан ўзиб кетганман деб ўйласанг, қорангни ўчир.

– Бу гапни менга Устознинг ўзи айтсин, – жавоб берди Арасту.

Шу билан улар тарқалишди. Спевсип Афинага, Дионнинг олдига, Арасту эса ўз шогирдлари ҳузурига йўл олди.

Арасту Академия эшигига биринчи марта пайдо бўлганидан буён ўн йил ўтди. Инсон умрида ўн йил кичик муддат эмас. Пифагор ҳам ўргатгандики, ўн ракамида қандайдир мукаммаллик бор ва бу рақам ҳамма нарсанинг моҳияти бўлмиш сонларнинг бутун табиатини қамраб олади. Файласуф ҳаётида йиллар воқеаларнинг миқдори билан эмас, балки ҳақиқатни англаш даражаси билан ўлчанади. Мана, Арастунинг ўзи ўн йиллик шогирдликдан устозга айланиш учун етарли вақт деб тушунади.

У қилган ишлар, ҳарқалай, мақтовга арзиди: у ҳаётнинг маъно-моҳиятини, жисм ва руҳни ва ҳамма соҳаларнинг ўзаро боғлиқлигини кашф қилди. Дунёни бундай тушунишга етиб келиш осон бўлмади, аммо

бу янгича тушунишни ифода этиш ундан-да қийин кечди: Афлотунда ҳам, унга сажда қилувчиларда ҳам фикр ва эътиқод ўзгача эди. Агар бу одамлар Арастунинг душманлари бўлганда, иш осонроқ битарди. Аммо Арасту уларни севади. Гарчи ҳақиқат ҳам, дўстлар ҳам унга азиз бўлса-да, муқаддас бурч ҳақиқатни устун қўйишни амр этарди...

Тунда бошланган ёмғир ҳамон тинай демасди. Қаёққа қараманг, кўлмак, муздек шимол шамоли эсарди. Ҳамма совқотиб, чакмонларига ўранган. Эски гимназийдаги синфлар банд эди. Арастунинг шогирдлари йигиладиган пешайвоннинг устидаги бостиридадан ҳам чакка ўтиб ётарди, шунинг учун пешайвонда ҳам дарс ўтиб бўлмасди. Шунда Арасту барчани экседрага таклиф этди, экседра мана неча кундирки хувиллаб ётарди, чунки Афлотун шу кунларда Дионникида меҳмонда эди.

Толиблар экседрага кираверишда тараффудланиб қолиши: ўз толибларини бу ерга олиб келиш Арасту томонидан қилинган ҳайратомуз дадиллик эди. Бу ерда фақат Афлотун ва уннинг толибларигина шуғулланишлари мумкин эди.

– Бўла қолинглар! – деди Арасту ва экседра остонасидан биринчи бўлиб ҳатлаб ўтди.

Битта тақиқ бузилган эди: у ўз толибларини Афлотун экседрасига олиб кирганди. Иккинчи, овоза қилинмаган тақиқни бузиш қолганди: Афлотун таълимотига қарши бўлган ва асосий нарса – кўзга кўринадиган дунё ва хаёл қилинадиган дунёга, заминий ва самовий дунёга, бу дунёлар тўғрисидаги тасаввурлар ва билимларга дахл қиласидиган гапларни айтиш қолувди. Афлотун ўз шогирдларига икки олам бор деб уқтириб келар эди: самовий олам ва ер олами, соғ ғоялар олами ва дағал нарсалар олами, арши аълога кўтарилиган инсон қалбига ошкор бўлувчи ҳақиқий билимлар ва мана шу қалбга шу ерда, заминда аён бўлувчи жисмлар бор.

– Биз аллақачон ертўлалардан чиқиб олганмиз, – деди у толибларга юзланиб. – Бу ертўлалар – бизнинг жаҳолатимиз. Биз ерни, денгизни ва осмонни, чўққида сузиб юрган булатларни, тоғ тизмаларини кўриб турмиз, ёмғирнинг шовқинини, шамолнинг ғувиллашини эшитамиз. Дунёни ёритган, бутун осмон ва бутун ер бўйлаб нурини сочган қуёшдан тўлқинланамиз. Куёш ботиб кетгандан кейин эса, юлдузли ва ойдин кечалар намоён бўлади, олис-олислардаги ёритқичларни илғаймиз, уларнинг бир маромдаги ва ўзгармас рафторини кузатамиз. Биз гўзал оламни кўрамиз ва унинг улуғворлигидан ақлимиш шошиб, беихтиёр ўзимизга савол берамиз: бу барча улуғворликни ва гўзалликни ким яратган экан? Ахир буларнинг барини биз яратмаганмиз-ку. Унда ким яратди экан? Биз яратувчини қидирамиз-у, аммо тополмаймиз. Ўзимизга таскин бериш учун биз бошқа бир оламни ўйлаб чиқарганимиз – бу маъбудлар истиқомат қиласидиган жой бўлиб, у бундан-да улуғвор ва бундан-да гўзалдир, зеро унда маъбудлар яшайди-да. Шундан кейин биз дангасалар ўзимизга ўзимиз айтамиз: ҳақиқат бошқа дунёдадир, бу дунёда ҳақиқат йўқ. Аммо биз бу ерда кўриб турганимиз ёруғлик ҳам, жилва ҳам, гўзаллик ҳам, улуғворлик ҳам, уйғунлик ҳам наҳотки моҳиятдан, уруғдан, хаётдан, ҳақиқатдан мосуво бўлса? Сизга айтмоқчи бўлган гапим шу: йўқ, мосуво эмас!

– Тўхта! – экседра остонасида тўсатдан пайдо бўлган Спевсип қатъий оҳангда деди. – Бу ерга Устоз келаятилар, фақат унга тегишли бўлган бу жойни сен тарк этишинг керак.

– Мен Устознинг йўлларига маҳталман, – жавоб берди Арасту. – Ул зот нима десалар, ўшандай қилгум.

Афлотун шошмай кириб келди, хозир бўлганларга кўз югуртириди, устида асарлари боғлам-боғлам бўлиб ётган столга яқинлашди ва ҳеч кимга юзланмасдан деди:

– Биз аслида билган нарсаларимизнинг ҳаммаси бир вақтлар руҳимиз тангрига ҳамроҳлик қилганда кўрганларимизнинг аломатлариdir, холос. Шогирдларингга шундай деб таълим бораётибсанми, Арасту?

Арасту жавоб бермади. Афлотун унинг толибларидан эскедрани холи қолдиришни сўради.

– Сен ҳам боравер, жияним, – деди у Спевсипга.

Спевсип кетди. Шундагина Афлотун ўтириб, Арастуга юзланди.

– Эшишишмча, – деди у, – мен ёзган кўп нарсалар сенга маъқул келмаган эмиш, Арасту. Шу гап ростми?

– Устоз, – жавоб берди Арасту бироз сукут сақлаб. – Мана бу сарвга қаранг, унинг шохлари илдизига ўхшамайди. Аммо ҳеч ким уни илдизлар билан ҳамкорликсиз ўсган деб айтмайди-ку.

Афлотун ўрнидан турди, дераза олдига борди ва ёлғиз турган баланд, кўм-кўк сарвга тикилди. Сўнг Арастуга ўгирилди-да, жилмайиб, сўради:

– Ҳақиқат бутоқларда демоқчимисан?

– Бутоқлар қуёшга яқинроқ, Устоз, – жавоб берди Арасту.

– Ў ерда туриш хатарли: шамоллар, жазира маисиқ, яшин тушиши...

Булардан қўрқмайсанми?

– Йўқ, қўрқмайман.

– Унда гаплашсак бўлар экан. Аммо берган саволларимга шартта жавоб қайтариш шартни билан, Арасту. Менинг илдизларимдан озуқа олган ўша шох сен эмасмисан, шуни билмоқчиман.

Бу оғир сухбат эди. Узок сухбат бўлди. Дунёдаги нарсалар тўғрисида, жон ва маъбуллар тўғрисида, инсон мушоҳадалари ҳақиқийлигининг мезонлари тўғрисида, бутун борлиқ сабаблари тўғрисида ва фақат файла-суфларгина гапиришлари мумкин бўлган яна кўплаб нарсалар тўғрисида гап борди.

Спевсип Афинадан Академияга қайтиб келганида коронғу тушганди. Шивалаб ёмғир ёғарди. Даражат япроқларидан думалаб тушган йирик томчилар тўқилган хазонларда шитирлаб овоз берарди. Ҳаво совук эди. Уйига бир амаллаб етиб келиб, кийимларини қуруқлаб олган Спевсипнинг яна уйдан чиққиси келмаётганди. Аммо Афлотун билан кўришиш ва уни ўз қароридан воқиф этиш зарурати барibir тагин ёмғирга, муздек тун зулматига чиқишга мажбур этди. У Сицилияга Дион билан бирга кетишга азму қарор қилганди. Нима учун? Борди-ю, Афлотун шуни сўраб қолгудек бўлса – сўраши аниқ эди, – Спевсипи унга мана бундай жавоб беради:

– Гарчи Дион – Дионисий, мен эса – сен, Афлотун бўлмасам-да, фалсафа мустабиддан кўз-қулоқ бўлиб турмоғи керак.

Афлотунга бу сўзлар мойдай ёқади. Лекин Сиракузада фалсафа вакили бўлишга фақат у – Спевсип, Афлотуннинг жияни, қариганда суюнган тоғи, унинг меросхўри ва Академиянинг бўлажак эгаси лойиклигини Афлотунга тушунтириш Спевсип учун талай меҳнатга тушиши эҳтимолдан узок эмасди. Улар Дион билан келишиб кўйилган нарса – бу Кефиснинг серсоя

соҳилларида сайр қилиш эмас. Сицилияда уларни ғалаба эмас, балки ўлим кутаётгани эҳтимоли кўпроқ эди...

Спевсип хизматкордан Афлотуннинг ҳали ҳам Арасту билан бирга экседрада эканини билиб, ўша ёққа йўл олди.

Афлотун ва Арасту стол олдида ўтиришар, уларнинг чехраларини ўртадаги столда турган мойчироқ шуъласи ёритиб турарди. Қолган ҳамма нарса зулмат қаърида эди. Шу боис экседра остонасидан оҳиста ҳатлаб ўтган Спевсипни улар кўришмади. У Афлотун билан Арастунинг сухбатини тўсатдан узишга журъат этмади. Спевсип билан изма-из Нелей пайдо бўлди. У индамай скамейкага келиб ўтириди ва гаплашаётгандарга халақит бермаслик учун чурқ этмади.

Улар овозларини барадла қўйиб узоқ гаплашишди. Кейин бирдан жимиб қолишида-да, дераза ортида тўқилган япроқларга тушаётган ёмғир томчиларининг шитир-шитири қулоққа чалина бошлади.

– Ҳай аттанг! – хўрсинди Афлотун. – Коронғи, кеч, совуқ, ёмғир, куз, кексалик, мадорсизлик... Ҳадемай чироқнинг мойи ҳам тугайди. Ёмғир ёғаяпти, Арасту. Ёмғир ёғаяпти. Ҳа, бир нарса эсимга тушди. Бир куни ёмғирдан яшириниб, пичан ғарами остида ётганимда бияни эмайтган кулуни кузата бошладим. Бия уни нарилатишга ҳаракат қилган эди, кулун онасини бир тепди. Қулун онасини тепаяпти, Арасту. Бу сенга тааллукли. Сенга ва менга тааллукли. Бу ҳақда ҳали гаплашамиз. Бор энди.

Ўзининг келганини билдириш учун Спевсип йўталиб қўйди.

– Сени аллақачон кўргандим, – деди жиянига Афлотун. – Уйга чопиб бориб, ёмғирпўшимни олиб кел. Ёки битта яримтадан айттириб юбор.

Спевсип ёмғирпўшни ўзи олиб келди. Уни кийишда Афлотунга ёрдамлашар экан, деди:

– Дион Сицилия қирғогига қўшин ташлашга қарор қилганини биласан. Менинг ҳам Дионнинг ёнида бўлишимга изн бер. Ҳолбуки Дион мени эмас, ёнида сени кўришни истайди, Афлотун. У яна бир кур сендан илтимос қилди...

Афлотун елкасидан жиянининг қўлини олди-да, деди:

– Қасдма-қасдига бошқаларни чақиринглар. – Шундай дея у шифалаб турган тунги ёмғир остида остонаядан ҳатлаб чиқиб кетди.

– Агар сени экседрада фалсафа сўқиб турганингга яна кўзим тушгудек бўлса, бу ердан думингни туғиб кўяман! – деди Арастуга Спевсип.

Арасту кинояли жилмайди-да, Спевсипга бир оғиз жавоб айтмай кетди. У билан бирга Нелей ҳам кетди.

– Менга бирон нарса айтсанг-чи, – илтимос қилди Тиманф, Нелей бурчакдаги тўшагига чўзилгач.

– Нимани айтай? – хўрсинди Нелей. – Совқотиб кетаяпман, ухламоқчиман. Тун, ёмғир, совуқ...

– Нима бўлса ҳам-да, – деди Тиманф. – Қаерда бўлдинг, нимани кўрдинг, нима эшитдинг? Ахир кун бўйи саланглаб юрдинг-ку, қари бекорчи...

– Сен ҳам мендан бешбаттарсан, – жавоб берди Нелей. – Ҳозир экседрада эдим, хўжайиним билан Афлотуннинг баҳсини эшитдим.

– Нима тўғрисида баҳслашишди?

– Э, сенинг ақлинг етармиди.

– Тушунтиргин-да, – ўтинди Тиманф.

– Бўпти. Фақат битта шарти бор: эвазига Наксос мусалласи билан сийлайсан, бўлмаса ҳеч баданим илимаяпти, Тиманф. Сенда асал қўшилган Наксос мусалласидан борми?

- Топилади.
- Бор, олиб кел. Жиққа хўлман, қалтираб кетаяпман, касал бўлиб қолишим мумкин.
- Ҳозир, сабр қил.

Тиманф қазноққа йўл олди, узоқ вақт у ерда идишларни тарақ-туруқ қилди, ниҳоят қайтиб келди-да, Нелейга яқин келиб сўради:

- Мени кўраяпсанми? Қўлимни кўраяпсанми? Астароқ ол, тўкилиб кетмасин. Баҳор асали солинган тоза Наксос мусалласи.

Нелей қўлини чўзди, мусалласи косани пайпаслаб топди, тўшакка чўнқайди-да, бир қултум ютди.

- Ёнимга кел, – деди у Тиманфга. – Қизиқ, нега ўзинг ичмайсан?

– Ўрганмаганман, – жавоб берди Тиманф, Нелейнинг ёнига келиб ўтираркан. – Сизлар учун асраб қўяман, сен ва Арасту учун.

- Маза бўлди-да, – Нелей ширин мусалласдан яна бир хўплади.

- Исиндингми? – сўради Тиманф.

- Исиндим.

- Қани, энди сўзлаб бер, – тиқилинч қилди Тиманф.

– Нимани ҳам сўзлардим? Ўзим кўп нарсани тушунганим йўқ. Хуллас калом, бундай: ҳадемай бизни Академиядан хайдашади.

- Нега ҳайдашар экан? – ташвишланди Тиманф. – Нима бўлди?

- Шу бўлдики, бизнинг хўжайин ҳар гапда Афлотунга қарши чиқаверди.

Афлотуннинг эса жаҳди чиқди.

- Қандай қилиб? Нимада қарши чиқди?

- Ҳозир айтаман. Афлотун, масалан, айтадики, одам – бу арвоҳ.

- Қанақа одам? – сўради Тиманф.

– Ҳар қандай одам, хоҳ мен, хоҳ сен, хоҳ хўжайнимиз, хоҳ унинг, Афлотуннинг ўзи. Арвоҳ экан. Тушунаяпсанми? Ҳақиқий одамлар эса хув аллақаёқларда, осмону фалакда яшар эмиш. Масалан, сен осмону фалакда яшаркансан, бу ерда эса, менинг ёнимда сенинг арвоҳинг эмиш.

– Нималар деяпсан ўзи, ё тавба? – кўрқиб кетди Тиманф. – Қанақа қилиб мен арвоҳ бўларканман? Бундоқ мени туртиб кўр-чи!

- Барибир арвоҳсан. Арвоҳдек арвоҳ. Гап тамом. Вассалом.

- Қизиқ. Хўжайнимиз нима деди бунга? – сўради Тиманф.

– Хўжайнимиз бунга рози эмас. Хўжайнимиз айтадики, биз ҳаммамиз ҳақиқимиз, ҳеч қанақа арвоҳ-парвоҳ эмасмиз, дейди.

– Кўрқитмасанг-чи одамни, – ялинди Тиманф. – Ё кайфинг ошиб қолдими?

– Ана! – деди Нелей. – Ҳеч нимага ақлинг етмаслиги кўринди-қолди, Тиманф. Гапимга яхшилаб қулоқ сол: ҳақиқий одам бор, шу одамнинг арвоҳи бор. “Ҳақиқий одамни, – дейди хўжайнимиз, – унинг арвоҳи билан нима боғлаб турари, хўш?” Сенингча, нима боғлаб турари, қани, айт-чи. Ҳа, ўйла! Агар айтмасанг, яна мусалласга борасан.

– Булар бари нимага керак ўзи, Нелей? – сўради ҳанг-манг бўлиб қолган Тиманф. – Кимга керак бунақа гаплар?

– Арасту ҳам шунақа дейди: “Булар бари кимга керак? Бу ёқда биттасининг уддасидан чиқолмаяпмиз-у, сиз бўлсангиз, азиз Устоз, иккитасини ўйлаб топибсиз...”, дейди.

- Шунақа дедими?

- Худди шундай деди.

– Афлотун-чи?

– Ановингдан олиб кел, кейин айтаман... Айтмоқчи, кўп мусаллас ичган одам бир киши ўрнига иккитани кўриши турган гап.

Эрталаб Арасту Нелейни хат билан Мақдуния проксени Никанорга жўнатди. Ёмғир ва совуқни сўкканча Нелей бир неча соатдан кейин қайтиб келди ва Арастуга жавоб мактубини берди.

“Арастуга Никанордан саломлар, – деб ёзганди проксен. – Маълуминг бўлсинки, опанг Аrimnesta савдогарлардан сен учун муҳим хабарларни ва сенинг саховатли васийингдан мактуб илова этилган пул юборибди. Келиб, буларнинг барини ўзинг ол, чунки хабарлар ҳам ғоят муҳим ва пул ҳам ҳаддан ташқари кўп. Уни сенга Нелейдан бериб юбориш тўғри келмайди”.

Арасту анчадан бери опасидан хат олмаганди, пули ҳам тугай-тугай деб қолганди. Шу боис дарҳол Афинага йўл олди. У билан бирга бормаса ҳам бўлаверадиган Нелей барибир Арастуга эргашиб йўлга тушди, чунки қизиқувчанлик намчил куз ҳавоси ва йўли келтирадиган уқубатлардан устун келганди, ҳолбуки Арастунинг чолга раҳми келиб, сен бормай қўя қол, деб айтганди ҳам.

– Агар опанг юборган пул шунчалик кўп бўлиб чиқса, – улар Никанор-никига етгунча Нелей йўлда Арастуга қайта-қайта маслаҳатлар солар эди, – уй ва қуллар сотиб олиш керак. Чунки мен энди қариб қолдим, ошпаз Тиманфнинг ҳам қуввати кетган. Энди бизнинг сенга фойдамиздан зааримиз кўпроқ, Арасту. Афтингга бир қара: эт йўқ, қон йўқ, чунки меъдангда иллат бор. Иллат борлигининг сабаби шундаки, биз қилган овқатлар овқатмас, оби ёвғон, юқумсиз, Тиманфнинг ҳам боши касалдан чиқмай қолган...

Нелей бор гапни айтиётган эди. Аммо Арасту унга жавоб қилмади. Нима деб ҳам жавоб қиласарди: опасининг кўп пул юборганига у ишонмасди. Тўғри, Никанор аллақандай васий ҳақида сўз очганди. Қанақа васий экан у? Шу пайтгача Арастунинг битта ҳам васийи бўлмаган. Опаси унга ҳар замонда юбориб турадиган пуллар ҳам Эвбеяда онаси унга мерос қилиб қолдирган ердан келувчи арзимас даромад эди.

“Укажоним Арасту, меҳрибон опанг Аrimnesta сенга саломлар йўллайди, – деб ёзганди опаси. – Бутун Мақдуния бўйлаб ва ундан ташқарига ҳам сувдаги мавжлардек ёйилаётган баҳт муборак бўлсин! Унинг хушхабари сенга ҳам етиб борди. Суюн, укажоним, Арасту! Бизларни, синглинг Геро ва унинг яқинда дунёга келган фарзандини унутма. Геро унга Каллисфен деб исм кўйган, жиянингни унутма. Агар маъбудлар хоҳлашса, Каллисфен ўзингга шогирд тушади, укажоним, ўшандা ё уни ёнингга чақириб оласан, ё ўзинг киндик қонинг тўкилган Стагирага қайтиб келасан”.

Проксен Никанор азбаройи қизиққанидан тоқати тоқ бўлиб турарди. Арасту мактубни ўқир экан, у сал нарида, деярли нафас олмай ва Арастудан кўз узмай қараётганди. Аслида у Аrimnesta укасига нималар ҳақда ёзганини ва пергаментга<sup>1</sup> шоҳ қўли билан битилган нариги хатда нималар ёзилганини ҳам билар эди. У ёқдан келган сандиқчага ҳам аллақачон мўралаганди. Шундай бўлса-да, қизиқувчанлик балоси ёмон экан-да: бу барча янгиликлару инъомлар Арастуга қандай таъсир кўрсатишини кўришга ошикарди.

Опасининг хатини бир четга кўйиб, Арасту Мақдуния шохи Филиппнинг пергаментга ёзилган мактубини қўлга олди. Кўзларини меҳмонга тикканча

<sup>1</sup> Пергамент – хат ёзишга мўлжалланган, ишлов берилган тери.

Никанор бутунлай нафас олишдан тўхтаганди. Арастунинг лабларида та-бассум жилва қилганини кўриб, у енгил хўрсинди, энди севинчини дунёни бошига кўтариб, қичкириб изҳор этишга тайёр эди: буюк шоҳ Филипп ўғил кўрибди, исмини Александр кўйишибди, меросхўр дунёга келибди. Никанор энди энг аъло мусалласлардан ва энг тансиқ таомлардан келтиргани чопиш учун имога мунтазир турарди.

“...Ўзингга маълум, Арасту, бултур Этрурия шоҳининг қизи Олимпиадага уйланган эдим. Борди-ю, унинг қанақалигини таърифлаб берсам, менга ҳавасинг келган бўларди.

Уйланганимдан бир йил ўтгач, Олимпиада ўғил туғди – мана шу Александрни. Бу хабар менга яқинда зabit этганим Потидеядалигимда етиб келди. Бу хосиятли аломат, албатта.

Александр дунёга келган куни тун чоғи бир воқеа содир бўлган эди: Эфесда бир телба Артемида ибодатхонасига ўт қўйибди. Афинадагилар ҳам бундан боҳбар бўлишса керак. Мен сенга айтсан, Артемисионни эфеслик Герострат ёқиб юборган. У бирорлар шон-шуҳратини кўролмаслик ва одамлар асрлар давомида яратган нарсаларни йўқ қилишда машхур эди.

Фолбинларим бунда бир аломатни кўришибди, ўғлим Александр Эфесдан шарқ томондаги мамлакатларни босиб олар экан.

Яна кўпларнинг менга айтишича, Арасту, ўша бўронли куз тунида Пелладаги менинг кошонамга иккита лочин учеб келибди. Улардан бири бошини шарқ томонга, иккинчиси – гарб томонга буриб қўнибди. Александр чинқириб дунёга келганда, лочинлар ҳар бири ўзлари қараб турган томонга учеб кетибди. Ўғлимнинг буюк фатҳлар қилишидан башорат берган фолбинларнинг айтишларича, у шарқнигина эмас, балки ғарбни ҳам, яъни лочинлар учеб кетган мамлакатларни ҳам зabit этар экан.

Ўзинг биласан, Арасту, урушларни маъбуллар бошқарадилар. Улар нимани хоҳлашса, шу бўлади. Мен бир нарсани истайман: афиналиклардаги барча ҳикматлар сенга кўчиб ўтса, сен уларнинг барча илмларини мукаммал англаб етсанг дейман. Ўғлим улғайгач, сен, Арасту, унинг мураббийи бўлсанг дейман. Ўғлим сен яшаган даврда дунёга келганидан миннатдорман. Бор-йўқ умидим шундан иборатки, сенинг ғамхўрлигинг ва таълиминг уни бўлажак давлатга муносиб қилиб тарбиялай олсин.

Сенга бир сандиқча юборяпман, унинг ичидаги нарса ҳаётингни ёқимли ва маъмур қилгай. Александр вояга етиб, ҳикматни ўзлаштиришга қодир бўлганда бу сенинг чекингга тушадиган мукофотларнинг мингдан бир улуши, холос. Сенинг донолигинг эса ҳозирдан оғизга тушган. Дунёда энг кучли донишманд деб эътироф этилган Афлотун ҳам сени Академиянинг мияси деб таърифлаган эмиш. Билмадим, у шундай деганми ё йўқ. Аммо бошқалар сен тўғрингда айтган гапларнинг ўзиёқ – мен уларни ўз қулоғим билан эшитдим – мен, яъни сенинг дўстинг учун шарафдир.

Маъбулларга илтижо қиласманки, сени ўз паноҳларида сақлагайлар ва сени чорлаганимда уйимга олиб келиб қўйсинлар”.

– Никанор, – проксенни чақирди Арасту, Филиппнинг мактубини ўқиб бўлиб, – менга бу қадар саховат кўрсатаётган инсон кимлигини ҳеч ким билмаслиги керак.

– Ҳеч ким билмайди, – жавоб берди проксен.

– Чунки файласуфларнинг ҳикмати ҳаммага хизмат қиласади, аммо файласуфлар фақат ўйлайдилар, – қўшиб қўйди Арасту.

– Бу ёдимда қолади.

– Сандиқчадаги пулларни санаб чиққандирсан, хойнаҳой? – Ўзини хафа бўлганга солиб, Никанор бошини эгди. – Уй ва янги хизматкорлар олишга етадими ишқилиб?

– Етади, Арасту. Саховатпеша... – Никанор Филиппнинг номини зикр қилмоқчи эди, бироқ ўз вақтида хушини йиғди, – саховатпеша опанг чиндан маъбуллар ярлақаган банда экан: уй ҳам, кул-чўрилар ҳам, ҳаёт учун керакли бошқа ҳамма нарсани ҳам сотиб олса бўлади.

– Шуларнинг барини амалга оширишда менга ёрдам берасанми? – сўради Арасту.

– Сен ниманики айтган бўлсанг, ҳаммасини муҳайё қиласман, чунки буни менга валенеъматим айтмоқда...

Йигирма тўққиз – бу шундай ёшки, бунда файласуф бўлган эркак ҳам факат рухнинг мангулиги ҳақида ўйламайди. У замин узра инсонга ҳамроҳлик қилувчи севинчлар ва нохушликлар ҳақида ўйларди. Нохушликларни қандай четлаб ўтиш ва севинч устига қандай севинч қўшиш ҳақида ўйларди. У Мақдуния шоҳи Филиппнинг вориси Александр ҳақида ўйларди. Агар вақт тизгини унинг кўлида бўлганида эди, Александр билан учрашиш ва унинг устози бўлиш учун дунёни ўн йил олдинга олиб ўтган бўларди. Шунда Афлотун ҳам, Спевсип ҳам унга қаттиқ ҳаваслари келарди: у мустабидга эмас, балки мустабидлик ҳокимияти, шон-шуҳрати ва қулдорлик нашъаси қалбини ҳаромламаган, шоҳона таҳтнинг ёш ва беғубор ворисига, якка ҳокимга мураббийлик қиласарди. Шунда ҳаммаси кундай равshan бўлар эди: Афлотун Дионисий билан ҳамтовоқ бўлиб, Спевсип Дион билан оғиз-бурун ўпишса-да, улар эришолмаган нарсага у, Арасту эришар эди. У энг яхши давлат тузуми ҳақидаги фикрларга мосу хос бўлган дунёга ҳукмронлик қилувчи шоҳни тарбиялар эди. Мана шу фикрларни Арасту иложи борича Александрнинг қулоғига қўроғиндай қуяр эди. Бунинг учун Афлотундек Солон исми билан боғлиқ афсонани – Атлантидан ўйлаб чиқармаган бўларди. Қизиги шундаки, бу афсоналарга ишонадиганлар ҳали ҳам топилади. Дарвоже, бир вақтлар Арастунинг ўзи ҳам уларга ишонар эди. Афсуски, давлат ҳақидаги илм байрамона орзулардан туғилиши мумкин эмас. Ҳаётнинг ўзини ўрганиб, унинг тизгинини кўлга олиш мумкин, холос.

Доно ҳукмдор, буюк давлат, баҳтиёр ҳалқ. Буни идрок этиш файласуф учун олий лаззат, чунки ҳукмдорнинг донолиги, давлатнинг улуғлиги ва ҳалқнинг баҳти олий фалсафий орзунинг ердаги тажассуми.

Дам суюниб, дам ташвишланиб Арасту бундай фикрлар билан бир ё бир неча кун андармон бўлмади. Ҳамма нарса рисоладагидек бўлиши: йиллар тинч кечиши, Александр вояга етиши ва Филипп Арастуни Пеллага таклиф этишига шак-шубҳа қолмагани ҳақида ўйласа у суюнар эди. Гоҳо ҳар қандай кунда фалокат рўй бериши мумкинлиги ҳақидаги ўйлар мияга келганда унинг бадани жимирлаб кетарди: балки унинг ўзи ётиб қолиб, дунёдан ўтса-чи? Мана, ҳалитдан вужудида қандайдир толиқиш, дардни сезаяпти, бундан қутулишнинг иложи йўққа ўҳшаяпти; ёки ёш Александр бирдан касал бўлиб, ўлиб қолса-чи? Мақдуния салтанатида тўнтариш со-дир бўлиб, ҳокимият тепасига бошқа одамлар келса-чи? Александр билан Арасту ҳеч қачон кўришмаслиги учун етиб ортадиган минглаб мусибатлар

ёпирилиб келса-чи? Эртага қүёш чиқиши – бугунданоқ муқаррар, аммо Арасту билан Александрнинг ўн йилдан кейин кўришуви – аниқ ҳам эмас, ноаниқ ҳам эмас. Бундан келиб чиқадики, ўзининг баҳтли келажаги билан Афлотун олдида ҳам, Спевсип олдида ҳам ҳозирча мақтандай тургани маъқул, чунки баҳт бугуннинг ўзидаёқ баҳтсизликка айланиши мумкин. Амалга ошган ёки амалга ошиши қўлимизда бўлган нарса билангина мақтанса арзиди.

Модомики, шундай экан, ҳозирданоқ ўз меросхўрлари – шогирди ёки фарзанди тўғрисида ўйлаб кўрмаса бўлмайди. Жоннинг мангулиги таскин бўлса-да, аммо сендан кейин яшашга қолган барча одамлар учун у сенинг мангу йўқлигингдан бошқа нарса эмас.

У Гермийнинг жияни Пифиадани унга бериш ҳақидаги ваъдасини эслаб, мийигида кулди: одамлар ваъда беришда қанчалик сахийлар ва бу ваъдаларнинг қанчалик оз қисми ушалади! Киши тилини ақл эмас, ҳислар ишга солади, ўз ишини ато этаётганда фалак уларни ҳисобга олмайди. Бундан келиб чиқадики, файласуфларнинг яна бир муборак бурчи бор экан: одамларни ортиқча ташвишлардан ва бехуда интиқликлардан ҳалос этиб, ҳамма нарсани билиш, ҳамма нарсани олдиндан кўриш. Аммо барибир ҳалол файласуф – бу ҳамма нарсани олдиндан айтишга бел боғлаган кароматгўй эмас. Ҳалол файласуф бундай дейди: бу – эҳтимол, бу – бўлиши мумкин эмас, мана буниси эса – муқаррар. Инсон тақдирини хеч ким олдиндан айтиб беролмайди, осмон ёритқичларининг абадий айланиб туриши ҳамма нарсадан ҳам муқаррарроқ ҳисобланади ва демакки, вақт ҳеч қачон тўхтаб қолмайди, ёшлиқдан кейин кексалик келади ва барини олдиндан кўра билмоқ учун ёшлиқ йилларида бажариш керак бўлган ишларни амалга ошириш, мумкин бўлган ҳамма нарсани ўрганиш керак.

Арасту Афинада уй сотиб олди ва хизматкор ёллади.

Бундан хабар топган Афлотун ундан сўради:

– Энди ўз мактабингни очишга ҳаракат қилмайсанми?

– Йўқ, Устоз, – жавоб берди Арасту. – Сизнинг сўнгги нафасингизгача шогирдингиз бўлиб қоламан.

– Ундан бўлса, – деди Афлотун, – шогирдликда юриш вақтинг оз қолибди.

Дионнинг ҳалок бўлгани ҳақидаги хабар келганда Афлотуннинг башорати сал бўлмаса ўнгидан келаёди. Спевсипдан Дионнинг ўлими ҳақидаги хабарни эшишиб, Афлотуннинг чиқиб кетганини кўрган ким борки, ҳамма кекса Устознинг кунлари оз қолганини дилидан ўтказса-да, бир-бирига айтишга журъят этмади. Унинг боши кўксига осилиб тушган, елкалари чўккан, бели буқчайиб қолганди, оёқларини базўр судраб босарди. Бир неча кунгача у уйдан чиқмади, туз ҳам тотмади ва рўпарасида ётган мум тахтачаларга ҳам қўл урмади.

Бешинчи куни хузурига жияни Спевсипни чакирди-да, деди:

– Васиятим қаерга яшириб қўйилганини биласан. Шу васиятга кўра, сен схоларх этиб тайинланасан, мулклардан эса сенга ҳеч нарсани қолдирмайман, чунки сендан ҳам камбағалроқ одамлар бор: мулклардан бирини қариндош-уруғларимга қолдираман, қолганларини эса сен шундай тасарруф этгинки, дўстларим хоҳлаган вақтларида мусаллас ва нон оладиган бўлишсин. Чўри Артемидани озод этиб юбор. Бисотимда қиймати

унча баланд бўлмаган баъзи лаш-лушлардан бошқа ҳеч вақо йўқ. Академиядаги энг қимматбаҳо бисот – бу Арасту. У менинг таълимотим тагига сув қуяётгандек бўлиб кўринаётгандир сенга. Йўқ, у таълимотимни пухталаюпти, холос. Шуни доим ёдингда тут, Спевсип, уни экседрадан сиқиб чиқаришга бошқа журъат қила кўрмади... Ваъда бер...

– Ваъда бераман, – жавоб берди Спевсип.

– Ҳаммадан ҳам дўстликни қадрла ва эҳтиёт қил. Дўстликдан бошқа ҳеч нарса одамларни бирлаштиришга қодир эмас, Спевсип.

– Бу ҳақда айтиб эдинг, Афлотун.

– Бу ҳақда ҳар кун айтсанг ҳам кам. Ўлим олдидан факат дўстлар ҳақида ўйлаш мумкин бўлади, Спевсип.

– Ўлимнинг ўзи ҳақида ўйлаш вақти келдимикан, Афлотун?

– Мен ўлим ҳақида ўйлаётганим йўқ, Спевсип. Мен ҳар доим Дион ҳақида ўйлайман. У бўлса анави ёқда, – Афлотун ноаниқ қўл силкиб қўйди.

– Бир замонлар қалбим мени Дионнинг олдига, Олимпияга етаклаганини эсладим, у билан кўп йиллардан бери кўришмагандим. Мен кечаю кундуз юрдим, уни кўриш ва кучиш учун яна қанчалаб кеча-кундузларни ўтказдим, бегона ерлардан, бегона ўлкалардан юриб ўтдим... Охири биз учрашдик, Спевсип, ва кучоклашиб кўришдик. Ўша кундан баҳтлироқ кун бўлмаганди ҳаётимда. Энди бўлса Дион ўша ерда, файласуфларга янада яқинроқ ва биз бир умр киришга ошиқкан мамлакатда. Рост, Дион ўша ерда экан, менинг имиллашимга ҳожат бормикан?

– Кўплар ўша ёқда, Афлотун. Аммо дўстлар бу ерда ҳам ундан кам эмас.

Афлотун сукут сақларди. Сўнг Спевсипга юзини буриб, деди:

– Арастуни чақир.

– Яхши, – жавоб берди Спевсип, Афлотун нима учун унга тикилиб қараганини англаб: у Арастуни чақир деб қилган ўтинчи бўлажак схоларх чехрасида норозилик ифодаси пайдо қилмаганига амин бўлмоқчи эди. – Ҳозир чақираман, – деди Спевсип, одатдагидан кўра бироз шошиброқ ўрнидан туаркан. – У шу ерда, олдингга келаётганимда унга кўзим тушгандек эди. Арасту билан сұхбатинг чоғида мен қаерда турай?

– Бу ерда эмас, – жавоб берди Афлотун. – Сени ҳам ёлғиз чақирган эдим-ку.

Спевсип Арастуни кутубхонадан топди ва унга Афлотуннинг ўтинчини етказди.

– Чолни толиқтириб қўйма, – деди у Арастуга. – Чолнинг мадори йўқ ва мен билан васият хусусида гаплашди.

Арасту Афлотун хузурига шошилди.

– Менга айт-чи, Арасту, – деди Афлотун, Арасту унинг пойига келиб чўккач, – ўлганимиздан кейин биз қаерда бўламиз? Бу масалани ўзинг учун ҳал этганингда нима деб ўйлаганингни айт. Фараз қилки, сен гапирмаяпсан, балки ўйлаяпсан, ана шу ўйингни айт менга.

– Ҳатто энг хаёлпаст қадимги донишмандлар ҳам мангуллик ҳақида ғоят мавхум нарсани ўйлагандек ўйлашган, – жавоб берди Арасту.

– Мен ҳам жоннинг абадийлигига шубҳа қиласман демоқчимисан?

Афлотун чўри қизни чақирди-да, Арастуга ва ўзига мусаллас билан овқат келтиришни буюрди. Артемида айтилган нарсаларни олиб келгач, у яна Арастуга юзланди.

Сұхбат кеч тунга қадар давом этди, шу боис чўри Артемида бир неча бор мусаллас келтирди. Арасту кетгач, Афлотун дарров ухлаб қолди. Эрталаб

уйғонгач, ўзи ёқтирган анжир ва сут келтиришларини айтди. Нонуштадан күп ўтмаёқ у экседрага етиб келди... Ҳамма устознинг кексайиб қолганини пайқади, аммо унинг овози ўша-ўша тиниқ ва қатъий эди.

Пайт пойлаб туриб Спевсип Арастудан сўради:

– Афлотун билан алламаҳалгача нималарни гаплашдинглар? У нега бу қадар ўзгариб қолди?

– Ҳаёт ва ўлим ҳақида гаплашдик, – жавоб берди Арасту. – Зеро файласуфлар бундан бошқа нима ҳақида ҳам гаплашадилар.

– Хўш, қайси бири маъқул экан: ҳаётми ё ўлимми?

– Факат мусаллас яхши ёки ёмон бўлиши мумкин, Спевсип. Аммо утириклар учунгина яхши ё ёмон бўла олади. Ҳамма гап шунда, – кулди Арасту. – Ҳамма гап шунда, Спевсип.

Ёш Феофраст анчадан бери Арастунинг эътиборини тортиб келарди, ўзининг ўткир ва шиддаткор зехни, фикрининг тиниқлиги, баҳслардаги жонбозлиги-ю, қатъияти билан уни ҳайратга соларди, хоҳ қадимги қўлёзмаларни қўчириб ёзиш бўлсин, хоҳ турли мамлакатлардан келган савдогарлар ва денгизчилар ҳикоя қилган наботот ва ҳайвонот олами каталогларини тузиш ёки кутубхона китобларини рўйхатга олиш бўлсин, қаттиқ берилиб ишларди. Бунинг устига Феофраст хушрўй эди ва атрофдагиларнинг нигохини мудом ўзига тортарди, зеро гўзаллик доноликнинг энг буюк неъматидир. Дунёнинг ўзи ҳам гўзаллик қонунлари бўйича буюк зехн билан яратилгандек қўринарди... Феофрастни бошқа тингловчилар орасида ажратиб туришга Арастуни яна бир ҳолат мажбур этар эди: Феофрастнинг ўзи ҳам Арастудан узок-узок қўз узмай қараб қоларди, унинг нигоҳида Арасту айтган, ўргатган нарсалардан ҳайрат аниқ-ошкор қўриниб турарди. Қисқа қилиб айтганда, Феофраст Арастунинг суюкли шогирди бўлса, Арасту – Феофрастнинг жондек устози эди.

Улар нотик Демосфен Мақдуния шохи Филиппга қарши афиналиклар хузурида нутқ ирод этиб турганида агорада учрашиб қолишиди. Феофрастни Арасту оломон орасида кўриб, орқадан етиб борди-да, қўлини унинг елкасига қўйди.

– Нима деяпти? – сўради Арасту Демосфен борасида.

– Айтаяптики, Филипп Мақдуний шимолдаги қўшинлари: фракияликлар ва иллирияликларни бўйсундириб, қудратли қўшин тўплади, унинг ғалабалари ўткир мусаллас вахшийни маст қилгандай, уни ҳам маст қиласи; Филипп энди барча қўшни мамлакатларни босиб олиб, Фива ва Афинаға юриш қиласкан ва эллинларни қул қилиб, шўрини куритаркан...

Арасту йигитнинг елкасидан қўлини олди-да, унга қарамай деди:

– Демосфен – зўр нотик. Аммо афиналиклар тинглашни билмайдилар. Кўраяпсанми, улар ғала-ғовур қилишаяпти, ҳар ким оғзига келганини гапирайпти, Филипп эса янги-янги шамширлар ясаяпти. Улар ҳеч бўлмаса шуни ўйлашлари керак эди, аммо улар кайф-сафо-ю ўзларининг бачкана манфаатларидан бошқани билмайдилар. Бундай халқ билан Афина икки дунёда ҳам ўзининг илгариги улуғворлигига кўтарила олмайди. Уларни бўйсундириш учун кимдир келади ҳам. Факат бўйсундириш учун эмас, вайрон қилиш учун келади...

– Хатарли башорат, – деди Феофраст.

– Ахир Демосфен ҳам шу ҳақда гапирайпти-ку. Эшитиб кўр.

– Бўрон қўзғалаётганида, – беғам афиналиклар говурини босиб кетишга харакат килиб, Демосфен бор овози билан гапирарди, – ҳар ким у менинг даламни пайҳон қилмасин-да, деб ташвиш чекади. Ҳозир устимизга бўрондан ҳам даҳшатлироқ бир оғат бостириб келмоқда! Нега унинг олдини олишга шошилмаяпмиз? Мудхиш хатарга ким қаршилик кўрсатади, афиналиклар? Кўзингизни очинг! Қаранг, Филипп қадам-бақадам бизга яқинлашиб келаяпти, – давом этди Демосфен. – На Эллада ерлари, на ваҳшийлар ерлари унинг қорнини тўйғазолмай қолган! Бизлар бўлсак, лаллайиб турибмиз, тарқаб кетаяпмиз, ўзимизни қутқариш учун ҳеч нарса ўйлаб топмаяпмиз. Кейин бошимизни чанглаб, “Бундай бўлишини ким билибди?” деб фарёд солиб қолаверамиз. Токи кема сувда экан, маллоҳлар билан дарға ўз ишларини қилишлари керак бўлади. Аммо оқим бир олиб кетдими, барча уринишлар бир тийинга қиммат бўлиб қолади. Биз ҳам шундаймиз, Афина ахли. Токи оёқда маҳкам турган эканмиз, курашга тайёр бўла оламиз ва тайёр бўлишимиз керак. Шунда иттифоқдошларимиз ҳам биздан мадад олишга ишонади. Азиз фуқаро! Аждодларимиз бизга шонли хукуқни васият қолдиришган: ночорларга васийлик қилиш ва ҳимоя этиш. Бу хукуқни қон билан сотиб олганмиз. Номимиз шаъни учун бу хукуқни кўз қорачифидай асраримиз керак. Иттифоқдошларимизни ва ўзимизни қандай ва нима билан ҳимоя қилишимиз ҳақида ўйлашимиз керак!

– Бориб деворингни<sup>1</sup> қурсанг-чи, томоғингни йиртиб нима қиласан? – қичқирди Демосфенга оломон ичидан кимдир.

– Мана, – хўрсинди Арасту. – Уларнинг миннатдор бўлгани шу. Эҳ аттанг, нотик бўламан деган одамларнинг таҳкирига чидаши керак. Бу афиналикларнинг башараларига қараб, Феофраст, Демосфенни келажакда нима кутаётганини бемалол ўқиб олса бўлади.

– Ўқишга харакат қилиб кўр-чи, Арасту, – илтимос қилди Феофраст.

– Албатта, бу файласуфларнинг иши эмас, аммо уриниб кўрсак бўлади... Хов анави ўнг томонда турган вазмин барзангини кўраяпсанми... Демосфеннинг нутқини тинглаб, нималарни ўйлаётиби? У пулларини ўйлаяпти. Қандай қилиб бойиб кетишни ўйлаяпти. Демосфен эса девор қуришга, кема ясашга, килич қуийшга даъват этаяпти. Булар барчаси пулсиз бўлмайди-ку, тўғрими? Бу одамнинг эса пул бергиси йўқ. У Филиппнинг фуқароси бўлишга тайёр, фақат бойлиги ёнида қолса бўлгани. У таҳликали дамда Демосфенни сотиб кетади. Анави тиржайиб турган олифтани кўраяпсанми?.. Унинг дунёни сув босса тўпигига чиқмайди. Зиёфат егани бориш учун тезроқ қош қорайишига интиқ. Агар ҳар куни кечқурун зиёфат бўлса, у ҳар қандай ҳукмдорнинг оёғини ўпишга тайёр. У Демосфен устидан чақимчилик қилишга, сахий дўстлари талаби билан бўхтонлар ёғдиришга тайёр. Ҳа, Феофраст, Демосфенни сотадилар, у қаҳрамон сифатида ҳали кўп бўхтонларга ва ҳақоратларга дучор бўлади. Бу афиналикларнинг башарасидан шундок кўриниб турибди. Шукрки, файласуфларнинг қисмати ундоқ эмас, Феофраст. Кетдик бу ердан, – деди Арасту. – Афиналикларга қарашга уялиб кетаяпман. Оломонга сира ақл кирмади-кирмади.

– Қаёққа борамиз? – сўради йигитча.

– Хоҳласанг, Илис қирғоқларида айланамиз, хоҳласанг, Акрополга чиқамиз.

– Бўпти, – деди Феофраст.

<sup>1</sup> Демосфен Афина ва Пирей атрофига мудофаа деворини қуриш ишларига бошлиқ қилган кенгаш аъзоси эди.

Ҳаво очиқ бўлишига қарамай, кун рутубатли эди. Афина узра тоза ва муздек шабада елар, ўзининг енгил эпкини билан юзни сийпаларди, қуёш нурлари ер узра сочилиб, ибодатхоналарнинг оппоқ мармар деворларида, тош тўшалган йўлларда ва қуюқ соя ташлаб турган дарахт шоҳларида акс этганча яна тубсиз осмонга кўтариilar ва қолган-қутган тафтларини ўзи билан олиб кетар эди.

Улар сўқмоқдан Илис соҳилига тушиб келишди ва хилват жой топиб, сувнинг шундок лабида турган дарахт соясида ўтириши. Анҳор сокин оқарди. Унинг нариги соҳилидан, дов-дараҳтларнинг қоп-қора сояси орасидан бир вақтлар вайрон этилган ибодатхонанинг бир неча устуни оқариб кўринарди. Устунлар узра дараҳтлар учига илашиб қолгандай ўзининг тиниклиги ва нафис кўриниши билан киши нигоҳини тортганча оппоқ паға булут турар эди.

– Ана сенга гўзаллик рамзи, – деди Арасту, – ғамгин ва тантанавор, абадий ва оний, латиф ва англаб бўлмас гўзаллик рамзи.

– Сен айтган гаплар бевосита инсонга ҳам тааллукли бўлса керак, – деди йигитча.

– Инсонга дейсанми? Дарвоқе, шундай. У маъбуд олтин муҳрининг мумдаги изига ўхшайди. Қоялар сари чопган тўлқиндаги абадий қуёш жилваси. Минглаб томчилар, минглаб қуёш акси! Янада улуғворорқ, яна тантанаворрок! Аммо мана бу шаршара шовқини, шамол кўтарган оппоқ тўзон, дағал тошдаги нам из – кўзни қамаштирувчи зарралар ҳосил қилган ўша қуёш остида ҳаммаси фойиб бўлади, из ҳам, у ҳақдаги ҳар қандай хотира ҳам буғланиб кетади. – Феофрастнинг кўзлари ҳаяжондан чақнаганини кўриб, Арасту жилмайиб кўйди.

– Қандай гўзал, – деди йигитча, – Нега ҳар доим шундай бўлиб қолмайди-а?

– Шеърият – ҳаётники, донолик – ўлимники. Қадимгилар шундай дейишган. Ҳолбуки аниқроғи сал бошқача бўлиши керак эди: шеърият – бандаларники, фалсафа – ўлмайдиганларники. Сен сўраётган фарқ аслида мана шунда бўлиши керак.

– Файласуф инсон ҳақида нима дейди?

– Сен билган нарсани айтади: инсон ҳаёт ва онг ато этилган жисмдан иборат. Ҳаёт нима эканини, онг нима эканини билганимизда, биз шоир бўлиб қоламиз. Булар шунчалик буюк ва гўзалдирлар. Ҳаёт абадият сари интилади ва азоб чекади, ақл абадиятга эга бўлади ва хузур қилади, аммо улар бирлашгандарida азоб чекувчи, хузур қилувчи, ўладиган ва ўлмайдиган, севадиган ва нафрат қиладиган, бағритош ва меҳрибон, фоний ва боқий инсон вужудга келади...

– Муҳаббат – бу ҳаётнинг абадият сари интилишими? – сўради Феофраст. – Муҳаббат ўлимни бартараф этади, онг эса уни топади. Муҳаббат – онгнинг ўлими, онг эса – муҳаббатнинг ўлимими? Нима учун маъбудлар кўшилмайдиган нарсаларни бир-бирига кўшганлар?

– Мўъжизали ишларни қилиш фақат маъбудларга буюрилган, – кинояли жилмайди Арасту. – Уларнинг нега бундай қилишлари ҳақидаги саволга фақат уларнинг ўзлари жавоб берса олади.

– Ҳа! – деди йигитча. – Ҳа! – Унинг чехрасида шундай бир чирой, шундай бир ҳаяжон зоҳир бўлдики, Арасту буни биринчи марта кўриб турарди.

– Эҳ Феофраст, Феофраст! – деди Арасту. – Сенга ҳавасим келади:

ёшлигимни абадият ҳақида ўйлаб ўтказдим, ҳолбуки сенга ўхшаб ўзимда муҳаббатни намоён этишим керак эди... Севигига бўлган муносабатига қараб одам қарийди. Аммо онгга қараб ҳеч қачон қаримайди. Демак, ёшлик муҳаббатнинг бир шакли экан...

– Ҳа! – деди Феофраст – Ана, Помпил билан Герпиллида ҳам келиб қолдилар.

– Ол хазинангни, Арасту, – деди Помпил Герпиллидага қараб қўйиб. – У келадиган эмасди. Сен уни севмай қўйган эмишсан, чунки ярим йилдан буён унинг сандиқчасидаги ашқол-дашқоллар битта ҳам кўпаймабди.

– Унга қулок солма, – қўлини силкиди Герпиллида. – Қилган мәҳнати учун бир эмас, икки драҳма ундиromoқчи бўлган унинг ўзи-ку. Мен эса сени севаман, Арасту.

Дарё бўйи салқинлашиб қолгандан кейин улар Акрополга, Парфеноннинг олтинранг мармар биноси олдига кўтарилишди.

– Мана шу ерда тўхташ керак, – деди Герпиллидага Арасту, унинг қўлидан тутаркан. – Айнан мана шу ерда, токи Парфенон, Эрехтейон, Афина ва бошни мана бундок бурганда Одеон ва улар устидаги осмон кўриниб турсин, Афина Промахос найзасининг олтин учи иккинчи куёш бўлиб кўзни қамаштиурсин. Шу ерда тўхташ керак. Шунда барча чизиқлар, барча сонлар, – у Герпиллиданинг қўлини қаттиқроқ қисди, – барча муносабатлар ва мутаносибликлар, барча ранглар ва ёруғлик маркази, боши ва охири, манбаси ва жамланган жойи инсон ҳисобланмиш ўша улуғвор ва энг мукаммал уйғунликни ташкил этади. Биз айнан шу ерда тўхтадик. Ва айнан биз буни ҳозир тасаввур этиб турибмиз, – деди у овозини пасайтириб. – Гектин, Калликрат ва Фидий<sup>1</sup>, Аттика замини ва осмон, ўтмишга қаратилган вақт ва келажакка қаратилган вақт бу ерда ўзларининг маркази қилиб инсонни танлаганлар. Нуқтани эмас, маконни эмас, балки ўз мувозанатида борлиқ оламни тутиб турган инсонни танлашган.

– Сўзларингдан баданим жимиirlаб кетди, – деди Феофраст. – Аммо бунга қандай ишониш мумкин? Дунё мувозанати марказини қандай ҳисобкитоб қилиб чиқиш мумкин?

– Сен буни сезмаяпсанми? Сен ўлсанг, булар бари ҳалок бўлишини, сенинг кўзинг қамашса, ҳамма нарса зулмат қаърига маҳв бўлишини, бу уйғунлик ҳақида ўйлашдан тўхтасанг, барча алоқалар тит-пит бўлиб кетишини, оғзингга талқон солиб олсанг, барча маъбуллар ўлишини ҳис килмайсанми? Дунёнинг мана бу учиди – сен мувозанат марказисан, нариги учиди эса – ҳамиша зийрак онг.

– Бунақа нарсаларни ўйласам, қўркиб кетаман, – шивирлаб деди Феофраст.

Герпиллида юзини Арастунинг юзига босди. Сўнг ортга чекинди ва тескари ўгирилиб қўллари билан юзини беркитди.

– Нима бўлди? – ҳайрон бўлди Арасту, унга яқин бориб. – Нимадан бундай ҳаяжонга тушдинг?

– Сендан, – жавоб берди Герпиллида юзини очмай. – Мени айрилиқ кутмоқда.

– Ким билан айрилиқ? – сўради Арасту.

– Сен билан. – У Арастуга бир қараб қўйди-да, чопиб кетди.

<sup>1</sup> Гектин ва Калликрат – меъморлар. Фидий – ҳайкалтарош. Улар Афина Акрополидаги ибодатхоналар ва ҳайкаллар мажмуини барпо этган эдилар.

– Тўхта! Қаёққа? Шошма! – ортидан қичқирди Арасту. – Шошма!

Бироқ Герпиллида қайрилиб ҳам қарамади ва кўп ўтмай Пропилей устунлари ортида кўздан ғойиб бўлди.

Кекса Тимон жуда заифлашиб қолганди. Ҳозир ҳам эринмаган бандагина яқин бориб уни базўр кўра олар эди. Айнан шу нарса бекорчи афиналиклар учун уни янада бефаришта қилиб кўрсатиб қўйганди: бир карра кўришдими, тамом, шарти кетиб парти қолган қарияни яна бориб кўришдан кўлларини ювиб қўя қолишарди. Боз устига Тимон аввалгидек одамлар билан сухбатлашмас, юзини қуёш томон беткай қўйганча тош устида миқ этмай ўтирас ва чақирган овозга қайрилиб боқмасди. Унга жуда яқин борган ва қайта-қайта саволлар беравериб жонига текканларга у ҳамон кўхна қабристон харобаларида тўлиб-тошиб ётган тошларни гириллатарди. Икки одамни у, афтидан, қадам товушидан биларди: Афлотун ва Арастуни. Улар саломга оғиз жуфтлагунча бўлмай у пешвоз чиқиб келар ва улар томонга юзланганча кутиб оларди.

– Арастумисан? – сўради Тимон файласуф унга яқин келиб қолганида.

– Ҳа, Тимон.

– Салом, Арасту.

– Салом, Тимон. Мен сенга саватда овқат олиб келдим, бунда анжир, бўғирсоқ, мусаллас бор. Қани. Еб ол, ош бўлсин.

– Миннатдорман, Арасту. Ерга қўй. Аммо келганингдан ўн баравар миннатдорман.

– Афинага қайт, Тимон, – таклиф қилди Арасту. – Менинда яшайсан, у ерда ҳар доим нон ва мусаллас топилади сенга. Сен энди кексайиб, кучдан қолгансан. Бу ерда совуқ тунларнинг бирида жонинг узилиши мумкин...

– Ҳайвонлар чўлда, ўрмонда ўладилар, одамлар билан уларнинг иши йўқ, одамларнинг ҳам улар билан иши йўқ. Хуллас, сен айтган нарса табиатга зид эмас.

– Табиатга зид эмас, – унинг гапини маъқуллади Арасту овқатли саватни Тимоннинг оёғи остига қўяркан. – Аммо инсон табиатига зид. Сени ҳеч ким шаҳардан ҳайдаб солган эмас, сен бўлсанг қувғиндилардай ўлиб кетмоқчисан.

– Мен ўлмоқчи эмасман, Арасту, – эътиroz билдириди Тимон. – Қайтанга мен сени ҳайдаб солдим. Йўқ, мен Афинани мулкларимдан ҳайдаб солдим. Хўш? Топиб айтдимми, Арасту? Сўзларимда ҳали ҳам мазмун йўқ эмас-а?

– мийигида кулди Тимон.

– Шундай.

– Нега Афлотун қелмаяпти? – сўради Тимон. – У мени бутунлай эсидан чиқариб юборди. Ёки тафаккур шамширини қайрайдиган тошга ортиқ эҳтиёжи қолмадими?

– У бетоб, – жавоб берди Арасту. – У сенга ўхшаб кекса ва бетоб, Тимон.

– Дононинг ҳам, нодоннинг ҳам қисмати битта: ўтиб кетиш ва унутилиш, – хўрсинди Тимон.

– Мен узоқ сафар олдидан сен билан хайрлашгани келдим, – деди Арасту.

– Ердаги барча сафарлар қисқа. Бизни Аидга<sup>1</sup> олиб кетадиган сафаргина узоқ. Хўш, йўл бўлсин энди, Арасту?

– Пеллага, Тимон. Филипп Мақдунийнинг хузурига. Элчи бўлиб кета-etiбман аъёнларим билан...

<sup>1</sup> Аид – қадимги юнонларда дўзахнинг номи.

– Ҳа-а, – кулимсиради Тимон. – Сен ҳам киборлик орзуларига ошуфта бўлибсан-да. Сен ҳам Афинанинг ва бутун Элладанинг халоскори бўлмоқчи бўлибсан-да. Нега, Арасту? Шаҳарлар ва давлатларнинг ҳам умри бор. Мана, Афинанинг умри тугай деб турибди... Филиппнинг хузурига боришини ким маслаҳат берди?

– Виждоним, – жавоб берди Арасту.

– Туф! – тупурди Тимон. – Ортиқ гапирма!

Аммо Арасту гапида давом этди:

– Мен Филиппни билардим. Биз болаликда ва йигитлик паллаларимизда дўст эдик. У жizzаки ва қўпол, гап бойлик ва шон-шухрат ҳақида кетганда нафси ҳакалак отади. У кам ўйладиди, чунки умри қилич ўйнатиш билан ўтади. У бирин-кетин юонон шаҳарларини босиб олмоқда, жондек Стагирамни вайрон қилди. “Олтин эшакка эллинларнинг ҳар қандай шахри дарвозасини очади”, деган гап ўшандан қолган.

– Тўғри айтибди, – кулиб юборди Тимон. – Шундай замонлар келадики, Арасту, саркардалар шаҳар ва мамлакатларни босиб олмайдилар, балки сотиб оладилар. Худди қўй ва эшакларни сотиб олгандай... Сен нима қиласан, Арасту? Филиппни нима билан ва нимани деб тўхтатиб қоласан?

– Барча эллинлар сажда қиладиган нарсани вайрон этиб бўлмайди, Тимон. Афина бўлмаса, Эллада бўлмайди. Ҳар бир эллин – бу энг аввало Афина, гўзаллик, донолик ва асрлар оша бу ерда, Афинада қарор топган қонунлардир. Афинасиз эллинлар ваҳшийларга айланадилар. Уларнинг хикмат, илм ва санъатини ҳеч ким бир чақага олай қўяди, ҳеч ким, Тимон, эллин деса ҳамма юз ўгирадиган бўлади, ҳеч ким уларнинг маъбулларини писанд қилмайди...

– Нима бўпти? Нима бўпти, Арасту?

– Сен ё эллин эмассан, Тимон, ё буюкларимиз устидан кулаётибсан.

– Филиппга нима дейсан? – сўради Тимон.

– Турли далил-исботлар билан унинг ҳовуруни туширмоқчиман.

Тимон индамади. Арасту изоҳлади:

– Афиналиклар уни куч билан енгмасликлари керак, чунки бундай кучнинг ўзи йўқ, уни ақл билан енгиш керак.

– Қандай қилиб?

– Филиппнинг ўзини ақли, ҳақиқий эллин қилмоқ керак, гўзал Элладанинг ҳомийиси ва ҳимоячисига айлантирмоқ керак.

– Кеч, – деди Тимон. – Кеч, чунки эллинлар ақлдан жудо бўлганлар, Филипп эса қудратли бўлиб олган. Афиналикларнинг ўзлари Филиппнинг кўлига қилич берди. Бунинг учун Ификратдан<sup>1</sup> миннатдор бўлсинлар.

– Модомики, Филипп Афина қиличини олишга азм қилган экан, Афина хикматини нега олмасин?

– Ўзинг айтдинг-ку, у кам ўйладиди, умри қилич ўйнатиш билан ўтаяпти деб.

– Барibir унинг қошига бораман, – деди Арасту. – Демокрит хотинингдан маслаҳат сўрагин-да, айтганинг тескарисини қил, деган. Афиналиклар сенинг маслаҳатларингга ҳам шундай қараш керак дейишади: сен ҳақиқат шамширини қайрайдиган тошсан.

– Афлотун нима маслаҳат берди сенга? – сўради Тимон. – Албатта, Филиппнинг хузурига боришинг керак дегандир.

<sup>1</sup> Ификрат – афиналик ҳарбий саркарда, Мақдунияда ўзаро урушлар юзага келганда Филиппнинг онаси Эвридика ундан ёрдам сўраган ва у Филиппнинг тахтга ўтиришига сабабчи бўлган.

– Ҳа, у фалсафа гўзалгина эмас, фойдали ҳам бўлиши керак, деди.

– Кекса хаёлпаст, тузатиб бўлмас хаёлпаст! У одамларни лафз йўлга солди, деган гапга ҳали ҳам ишонади. Аслида одамларни очлик йўлга солади. Қўлидан қурол олганга Филипп ош-нон беради, эркин афиналиклар эса кўлида бир бурда нони бўлган ҳар қандай одамни талайдилар... Мана сенга ҳақиқат, Арасту.

...Ҳар доимгидек, Ксенократ хомуш ва тунд эди. Илгари сукутга бир соат бағишлаган бўлса, энди кун бўйи чурқ этмасди. У муттасил кеч келарди: элчихона ходимларининг барчаси оёққа турганида, у ухлаб ётар, ҳамма уйқуга кетганда эса, у ҳали ҳам ўзининг йўл анжомлари билан овора бўлар, чироқ ёруғида ўтириб олиб, нималарнидир пишиллаб ғудранган ва бошқаларнинг ухлашига халақит берганча ёзгани-ёзган эди. У секин овқатланар, секин юрар, секин гапирав, бир тўхтамга секин келарди, гоҳида эса умуман бир тўхтамга келмай, елка қисиб қўяр ва сукут сақларди.

Пеллага, Филиппнинг хузурига йўл олган элчихона аъзолари Ксенократдан норози эдилар; ундан нолирдилар, кўпинча ўзаро гаплашганда улар билан бирга афиналиклар Ксенократни юбормасликлари керак эди, ахир унинг тепса тебранмас эшак ва тилсиз ҳайкалдан нима фарқи бор, дер эдилар.

Факат Ксенократнинг одатларини азалдан яхши билган Арастуగина унга дўстона муомалада бўлар ва бошқалар олдида уни ҳимоя қиласди, йиғинларда ёрдам берарди, шоширарди, бошқалар бош тортганда, у билан сухбатлашарди. Афлотун Ксенократ ҳақида уни доим ниқтаб турмаса бўлмайди, дер эди ва Арасту унинг учун шу никтов бўлиб хизмат қиласди. Арасту ҳақида эса Афлотун унга жилов уриш керак дерди. Арасту учун шундай жилов Ксенократ эди. Арасту Ксенократни ҳатто яхши кўрарди. Ксенократнинг очиқкўнгиллиги, мустақиллиги ва ҳалоллиги унга ёқарди. Унга ёқмайдиган томони Ксенократнинг мудом тунд юриши эди. Афлотун ҳам шу иллатини унга эслатган пайтлари бўлганди ва: “Хариталарга садақа бер, Ксенократ! Токи улар сенинг қовоғингни очиб, одамбашара қилиб қўйишин”, дерди.

Афлотун бетоб бўлгандан буён Арасту бошқа ҳеч ким бу сўзларни Ксенократга айтишга ботинолмасди. Арастудан бошқа ҳеч ким билан Ксенократ дардлашишни эп кўрмасди.

Афинадан Пеллагача бўлган йўл узоқ эди. Афиналик элчилар дам олгани кўплаб шаҳарларда тўхташди. Сафарнинг дастлабки кунларида Филипп билан бўлажак учрашувларга оид сухбатлар жонли ва узун бўлар эди. Сафар охирига келиб, улар камдан-кам ва руҳсиз кечадиган бўлиб қолганди: Филипп ҳақида, Мақдуния ҳақида гапиравериш ҳамманинг жонига текканди, ҳеч ким биронта янги гап айта олмас ҳам эди – ҳамма кўнглидагини айтиб бўлганди. Фақат Ксенократ бундан мустасно эди.

Ойдин кеча. Ксенократ ва Арасту афиналик элчилар тунаган, кўнган уй ёнида, боғда ўтирап ва Олимпнинг ойдинда олисдан оқариб кўриниб турган чўққисини томоша қиласди. Одатдагидек, иккаласи ҳам жим эди.

Чигирткалар чирилларди. Боғнинг тош девори устидан югуриб ўтган тунги калтакесаклар майда тошчаларга урилиб кетар, тошчалар қоронгида шитирлаб, ўтлар устига тўкиларди. Ҳали қош қораймай чиккан ой энди ғарбда, Олимпнинг устида осилиб турарди. Тоғ чўққиси товланиб турса-да,

этаги зим-зиё қоронғулик ичида эди. Ой ҳам, Олимп ҳам осмонда сузид юрганга ўхшарди.

– Маъбуллар ҳақида ўйлајапсанми? – сўради Арасту Ксенократдан, жавоб олишга заррача умид қилмасдан. Сўраганининг боиси шу эдик, унинг ўзи аждодлар шу тоб чўққисига жойлаган маъбуллар ҳақида хаёл суроётган эди; чўққининг эртакнамо гўзаллиги ва ойдин кечаларда ундан чиқадиган сирли ёғдуларни кўриб, одамлар ҳайратдан ёқа ушлаган бўлишса, ажаб эмас.

– Йўқ, – деди Ксенократ. – Мен Филипп ҳақида ўйлајпман.

– Оббо! – ҳайрон бўлди Арасту. – Нималарни ўйлајапсан у ҳақда?

Ксенократ узоқ сукут сақлади ва Арасту саволини тақрорлашга оғиз жуфтлаган ҳам эдик, Ксенократ тилга кирди:

– Мен унга: “Афинага кўз олайтирма! Сен у ерда дўст тополмайсан!” дейман.

– Бори шуми?

– Бори шу, – хўрсинди Ксенократ.

– Аммо Афинада Филиппнинг дўстлари йўқ эмас, – эътиroz билдириди Арасту. – Филипп Афинанинг душмани бўлганидан, дўсти бўлгани тузук. Дўстлик – душманликдан кўра ҳамиша яхши. Шундай эмасми?

– Шундай эмас, – жавоб берди Ксенократ. – Карға калҳат билан, капитар мушук билан, қўзичоқ бўри билан, доно нодон билан, яхши одам ёвуз кимса билан дўстлашолмайди...

– Бу шу пайтгача сен айтган барча жумлалардан энг узуни бўлди, Ксенократ, – кулди Арасту.

– Гапни бурма, – жиддий оҳангда деди Ксенократ. – Ёки ўткинчи тинчликни деб озод Афинани Филиппга сотишга тайёрмисан? Мен сизларнинг сухбатларингизни эшитдим. Сизлар Филиппдан инсоф қидирайпсизлар, аммо ичингиздан биронтангиз Афина тақдири учун чинакамига куйиб-пишмаяпсиз.

– Демосфен билан қачон дўстлашиб қолдинг? – сўради Арасту.

– Ҳакиқат билан қачон хайр-маъзур қила қолдинг? – ўз навбатида сўради Ксенократ.

Ксенократ ва Арастуни Академиядаги йигирма йил, Афлотун, фалсафага муҳаббат, Гермий билан дўстлик бирлаштиrsa, Филипп уларни ажратган эди.

Арасту Академия ҳақида, энди унинг схолархи Спевсип бўлгач, гарчи Афлотун ҳам ҳаёт бўлса-да, Арасту ортиқ Қефис соҳилига боришни хоҳламаслиги ҳақида, уни Атарнеяга таклиф қилаётган Гермийни тез-тез эслаётгани, агар Ксенократ майли деса улар ўша ёққа, Гермий қаноти остига бирга боришлари мумкинлиги-ю, ўз мактабини очиши ҳақида сўзлаб кетди.

– Мен ҳозир кўпроқ шулар тўғрисида ўйлајпман, – тан олди Арасту. – Уйланиш ҳақида ўйлајпман. Гермий жияни Пифиадани менга тан маҳрамликка беришни ваъда қилган. Мен ҳам бир вактлар унга уйланаман деб кўйган эдим...

– Филиппга сен нима дейсан? – сўради Ксенократ.

– Эй маъбуллар! – деди Арасту. – Мен Филиппнинг эсдан чиқарай дебман-ку! Дарвоқе, сен билан нима ҳақида гаплашаётган эдик, Ксенократ? Наҳотки Филипп ҳақида бўлса?

– Аввал саволимга жавоб беришинг керак! – талаб қилди Ксенократ.

– Яхши, яхши! – аччиғи чиқди Арастунинг. – Мен Филиппга ҳар бир эллин учун муқаддас ҳисобланган Афинани эсингдан чиқар дейман.

– Зўр, – деди Ксенократ скамейкадан кўтаришлар экан. – Албатта шундай деб айт. Атарнеяга эса сен билан бирга бораман, аммо Афлотун ўтгандан кейин. Спевсип жонимга тегиб кетди.

Пеллагача икки кунлик йўл қолганди.

Арастунинг келганидан Филипп чин дилдан суюнди. У билан қучоқлашиб кўришди, кўксига босди. Унинг шарафига зиёфат берди, мусаллас дарё бўлиб оқди, дастурхонларга ноз-неъматлар сиғмай кетди. Арасту менинг қадрдон ва азиз дўстим деб ҳамманинг кўз ўнгидага бор овоздини кўйиб гапирав, асқия қилас, тинмай кулар ва кўкрагига уриб мақтанаради. Афина элчиларининг келиши шарафига бағишиланган тантаналар бир неча кунгача давом этди. Шундай кунларнинг бирида Арастуни қучоқлаб, Филипп уни энагалар ўғли Александрни ўйнатиб юрган боққа олиб чиқди.

– Қара, – ўзини босолмай деди Филипп, ўғлини кўрсатиб. – Бу менинг меросхўрим. У мендан кўра ақллироқ ва кучлироқ бўлади. Ақлли дейишининг сабаби шуки, унинг устози сен бўласан, Арасту, кучли деганим боиси шулки, мен унга қудратли давлатни ва ундан-да қудратли қўшинни қолдираман.

Саккиз яшар Александр ўйинчоқ қиличи билан ўт ва гулларни чопар экан, бир зарб билан бир нечта гулни ёки йўғон пояни чўрт узганида, мақтov кутиб кўз қири билан отасига қараб кўярди...

– Бу ёққа кел-чи, Александр, – чақирди болани ота.

Александр қиличини қинга солди-да, катталарнинг олдига чопиб келди.

– Бу машхур файласуф, – Филипп унга Арастуни таништириди. – У Афинадан келган.

– Биламан, – Александр меҳмонга тик қараб кўйди. – Сен Арастусан.

– Ҳа, – жавоб берди Арасту, Александрнинг нигоҳи ёшига нисбатан оғир ва пурмъонолигини ўзича қайд этиб. – Сен эса Александр...

– Александр Мақдуний, – Арастунинг гапига тузатиш киритди таҳт вориси, – Сен билан сухбатлашиб, Афина ҳақидаги ҳикояларни тингламоқчиман. Ундан кейин, одамлар яшайдиган ернинг катталиги қандайлигини билгим келади.

– Буни билиб нима қиласан? – сўради ўғлидан Филипп.

– У жудаям кичкина эмасмикан деб кўрқаман, – жавоб берди Александр.

– Сиз, отажон, мен қўлимга қилич олгунимча уни забт этишга ултурасиз.

Филипп қорнини ушлаганча қаҳ-қаҳ уриб кулди. Кейин Арастудан бир неча марта қайталаб сўради:

– Қалай бизнинг ўғилча? Ақлли-а, тўғрими?

– Ҳа, – босиқлик билан жавоб берди Арасту. – Ҳа, у ақлли. – Шундай деди-да, Филипп билан асосий масалани муҳокама қилиш мумкин бўлган кун ва соатни кутиб қолди.

Филипп эса гўё шу муҳокамадан қочгандек Арасту билан сухбатни жиддийлаштириб ўтирмади, унинг кўплаб саволларини бу қулоғи билан эшишиб, наригисидан чиқариб юборар экан, ўзи ва қадрли меҳмон учун тинмай мусаллас буюрар эди. Филипп унга отхонасини, аскарларини, ҳазиналарини кўрсатди, ўйингоҳда элчилар шарафига машқ мусобақалари уюштириди, театрда томоша ташкиллаштириди, у ерда ҳам машшоқлар, хонандалар ва шоирлар ўз ҳунарлари билан мусобақалашдилар.

– Шодиёналар ҳам одамни чарчатар экан, – тан олди Арасту Филиппнинг хилватда у билан гаплашишдан атайлаб ўзини олиб қочаётганини англаб. – Аполлон байрами ва Афлотуннинг туғилган куни яқинлашиб

келаяпти... Мен Афинада бўлишим керак. – Шундай дея у Филиппга саволомуз қараб қўйди.

– Бўпти, – мийигида кулди Филипп. – Бўпти, дўстим, – такрорлади у хўрсишиб. – Менинг истагим битта: бутун Эллада қўшинига қўмондонлик қилиш, уни ёмон кўрганим форсларга қарши жангга ташлаш; улар менга зимдан қотилларини юбориб, шарқдаги мамлакатимга сира тинчлик бермаяпти. Бунда менга маъбуллар ёрдам беради. Улар ақллидирлар, Арасту, мени Афинани вайрон этишга гиж-гижламайдилар... Бор гап шу, Арасту. Сен берган саволларга, қилган илтимосларингга ва огоҳлантиришларингга берадиган бор-йўқ жавобим шу. Демосфенга айт, бозорчи шаллақиларга ўхшаб сўкинавермасин, исмимни булғаламасин. Бизларнинг тақдиримиз маъбуллар қўлида. Аммо сенга ишониб топширадиган бир вазифам бор, Арасту, – ўғлимнинг тарбияси... Мен йўл қўядиган хатоларимни шу билан тузатишинг мумкиндири, балки. Имкон топганингда келгин...

Афинада Арастуни иккита қайгули хабар кутмоқда эди, Афлотун шогирдининг қайтиб келишини кутмасдан вафот этганди, севимли устозининг қайтиб келишини кутмасдан Феофраст ҳам кетиб қолганди. Спевсип Арастуга деди:

– Афлотун ўзининг туғилган куни шарафига уюштирилган базми жамшидда ҳаётдан кўз юмди.

– Феофраст нега Академияни тарк этди? – сўради Арасту.

Спевсип бир нарсани қидиргандек индамай эксадрада кезинарди, сўнг Арастунинг олдига келди-да, унинг кўзига қараб деди:

– Тўғрисини айтсам, Феофраст мени севмасди ва мендан кўркарди. Мен схоларх бўлганимдан кейин эса...

– Навбат менга келгани қўриниб турибди, – деди Арасту.

– Энди Афлотун йўқлигига сен Академияни ташлаб кетолмайсан! – эътиroz билдириди Спевсип. – Мен Афлотунга сўз бергандимки...

– Нима деб сўз бергандинг?

– Гарчи мен схоларх бўлсам-да, Академиянинг ақли – сенсан, Арасту. Жон бераётиб Афлотун шундай деди.

– Йўқотишлар донишмандларни руҳий чўққиларга кўтаради, Спевсип. Сендан миннатдор эмасман, аммо сенинг ақлимга бўлган ишончинингни қадрлайман, – деди Арасту.

Улар қучоқлашиди. Қайғунинг хусусияти шунаقا – у одамларни яқинлаштиради. Аммо қайғу ўтиб кетади.

## БЕШИНЧИ БОБ

### **Митилена. Феофраст**

Арасту ва Ксенократ ҳали қуёш чиқмасдан аввал савдогар Лахетнинг кемасида Пирейни тарк этдилар. Савдогар Лесбос оролига зайдун ёғи олиб бораётган эди. Улар икки ҳафта денгизда сузуб, учинчи ҳафтада Митиленага етиб келишди. Бу ерда уларни ярим йил аввал Афинадан Лесбос оролига келган Феофраст кутаётган эди.

Феофраст гоҳ Арастуни, гоҳ Ксенократни қучоқлар, бахтиёргидан боши осмонда эди. У ҳаяжонланиб, азиз устозларини қаёққа ўтказишни, нималар билан меҳмон қилишни ўйлаб жони ҳалак эди. У меҳмонларга меҳр кўрсатиб, шодлигидан кўзига ёш олди.

– Ўтган ой Лесбосга келган кемада, устоз Арасту, сизнинг мактубингизни олиб келишган эди. Ксенократ икковингиз Митиленага бориб қоламиз, деб ёзибсиз. Ўшандан бери ҳар куни соҳилган келиб, сизларни кутаман. Ҳар куни... – Феофраст шодлигидан нима қилишни билмай, яна меҳмонларни қучоқлар эди.

Аммо, афсуски, Феофраст устозлари билан сұхбатга тўймай қолди. Меҳмонлар уч кунгина бу ерда бўлиб, тўртинчи куни, ҳаво очиқлигига Атарнеяга, Гермий хузурига йўл олдилар. Атарнея бу ердан унчалик узоқ эмас, ҳаво очиқ пайтларда соҳили кўриниб ҳам туради.

Арасту ва Ксенократ Атарнея ва Асс мустабиди Гермий юборган триера-да йўлга чиқдилар. Уч қатор эшкакчилар бошлиғи – триерарх ёрдамчисига секин буйруқ берар, ёрдамчи баланд овозда эшкакчи кулларга буйрукни етказар, улар най жўрлигига эшкак эшар эдилар. Триеранинг тумшуғидаги мис зирҳли тараф учи күёшда ялтиради.

Кема палубасида Арасту ва Ксенократ учун иккита юмшоқ курси ва стол қўйилган, столдаги дастурхонда сархил ноз-неъматлар муҳайё эди. Тўрт кул оқ парда тутиб, меҳмонларни күёш тифидан асраб турар эдилар. Иккита ёш канизак дастурхонга мевалар, таомлар кўяр, хумдондаги Лесбос майига асал ва сув аралаштириб турар эдилар

Арасту ва Ксенократ Афинани тарқ этишдан афсусланмаётган эдилар. Афлотун вафотидан сўнг Академияга схоларх бўлиб олган такаббур ва ҳовлиқма Спевсип ўзини Афлотундан кейинги биринчи файласуф деб билар, муаллим ва талабаларга қўпол муомала қиласар эди. Илм-фанда Спевсипга нисбатан Арасту ва Ксенократ анча кучли эдилар<sup>1</sup>.

Афиналиклар Ксенократни Пеллага элчилар қаторида борганида музокараларда фаол қатнашмади, нутқлари билан Филиппга таъсир кўрсатмади, умумий сұхбатларда иштирок этмади, давлат маблағини совурди деб айблади. Бу айловларни ноҳақ деб билган Ксенократ бунга қарши шундай деди:

– Элчилардан кимлар унинг пулига учеб сотқинлик қилганини подшоҳ Филиппнинг ўзи яхши билади. У мени ҳеч бир бойлик билан гапига кўндиrolмаганини ҳам билади.

Арасту дўсти Ксенократни ҳимоя қилди, ундан айловни олиб ташладилар, лекин у афиналик давлат арбобларидан хафа бўлди ва ўз юрти

<sup>1</sup> Таржимонлар изоҳи: таҳминан II-III аср юонон муаллифи Диоген Лаэртий Афлотуннинг истеъодли шогирдларидан бири Ксенократ ҳакида бундай ёзди: "...Ксенократ устози Афлотундан сира айрилмасди. Афлотун Сицилияга, мустабид Дионисийга насиҳат қилиш учун борганида Ксенократ у билан бирга эди. Мустабид Дионисий Афлотунни ўлумга ҳукм қилмоқчи бўлганида Ксенократ "Аввал мени ўлдиринглар" деган ва мустабид қарорини ўзгартирган эди". Диоген Лаэртийнинг ёзишича, Афина кенгаши Макдунния подшоҳи Филипп ҳузурига элчилар юборганида фақат Ксенократ унинг зиёфатларига қатнашмаган, совгаларини қабул қилмаган. Кейинчалик Филиппнинг ўғли Александр Ксенократга кўп тилла тангалар юборганида у озгинасини олиб, қолганини қайтариб юборган ва сенинг кўшинингга кўпроқ пул керак, деган экан.

Ксенократ фалсафа ва шеърият билан шуғулланган. Асарлари: "Табиат ҳақида" 6 китоб, "Донишманлик ҳақида" 6 китоб. "Баҳт ҳақида" 2 китоб, "Озодлик ҳақида", "Дўстлик ҳақида", "Бойлик ҳақида", "Давлат ҳақида", "Қараша-қаршилик ҳақида", "Эҳтирослар ҳақида", "Тақдир ҳақида", "Мардлик ҳақида", "Рӯҳ ҳақида", "Санъат ҳақида", "Тушуниш ҳақида" 8 китоб, "Бахсоли масалаларни ҳал этиш" 10 китоб, "Пифагор масалалари", "Холатлар" 20 китоб, "Александринг ҳокимияти ҳақида" 4 китоб ва бошқалар. Афина кенгаши Ксенократни солиқларни тўламагани учун қул бозорига кўйган. Дмитрий Фалерий (Александр Макдунний вафотидан кейинги Афина ҳукмдори) уни сотиб олиб, озод қилган. Ксенократ Афлотун академиясига Спевсипдан кейин, Арасту Макдунияда эканлигига 25 йил раҳбарлик қилган.

Халкедонга қайтишга қарор қилди. Аммо Арасту уни Атернеяга, Гермий хузурига бирга боришга кўндириди. Арасту Афинадаги уйини сотди, қулларидан фақат Тиманф ва Нелейни олиб қолди. У Нелейни Эвбеяга яқин Каристада кемадан тушириб, марҳума онасининг уйида яшаётган синглисингнига жўнатди. Камгап, “соқов” Тиманф эса кетишлидан учтўрт кун аввал вафот этди. “Энди мени ҳеч ким гапиртиrolмайди” – унинг сўнгги сўзлари шундай эди.

Ксенократ дўсти Арастуга гумонини айтди:

– Гермий ўша биз билган Гермийми, ё мустабид бўлиб, ўзгариб қолганмикин? Дўстликимиизни унумтаганмикин? Мустабид бўлган одам соғдиллигини йўқотади одатда. Дўстларни эслаш бошқа, дўст бўлиб қолиш бошқа...

– Борганимизда кўрамиз, – деди Арасту. Унинг ҳам кўнглида шундай гумонлар бор эди. – Замона ҳам одамларни ўзгартиради. Мабодо у ўзгариб қолган бўлса ҳам ажабланмаймиз.

Дўстларини кутиб олиш учун Гермий бир кун аввал Атарнеядан Ассга келди. У дўстларини сабрсизлик билан кутарди. Бутун Эллада донишмандларининг етакчилари сифатида шон-шуҳрат қозонган Арасту ва Ксенократнинг келиши фуқаролари олдида Гермийнинг ҳам шуҳратини оширап ва унга кўп шодликлар келтирап эди. Одатда мустабидларнинг дўсти бўлмайди, аммо Гермийнинг дўстлари бор эди. Одатда мустабидлар билан ҳеч ким баҳслашмайди. Гермийнинг дўстлари у билан баҳслашар эдилар. Одатда мустабид ҳеч кимдан, ҳеч бир байрамдан хурсанд бўлмайди. Гермий учун эса дўстлари Арасту билан Ксенократнинг келиши хурсандчилик, чинакам байрам эди. Гермий фармони билан Ассда азиз меҳмонларга кенг, ҳашаматли уй, Арасту ва Ксенократ талабалар ва дўстлари билан сухбат қилиши учун ўриндиqlар кўйилган сокин хиёбонлари бор катта боғ тайёрлаб кўйилган эди. Гермий давлат ишидан бўшаган вақтларида бу ерга келиб, дўстлари билан юксак ва мангу масалалар ҳақида сухбатлашмоқчи эди. У дўстларини Атарнеядаги саройига ҳам таклиф этиш ниятида эди албатта, аммо давлат ишлари билан уларни кўп чалғитмоқчи эмасди. Ассда эса майда икир-чикирлар, турли ўткинчи ташвишлардан йироқ соғ руҳ учун қизиқарли мангу фалсафий масалалар муҳокама килинар эди. Афлотун Академиясини Афинада ботаётган қуёши бу ерда – Ассда чараклаб чиқиши учун Арасту ва Ксенократнинг донишмандлик мактаби очилмоқда эди.

Гермий кўпчилик мулозимлари, амалдорлари билан Асс бандаргоҳига келиб, кемадан тушаётганида халойиқ жўр бўлиб, уни шарафладилар:

– Гермийга шон-шарафлар! Германийга шон-шарафлар!

Кўп ўтмай Арастуни ва Ксенократни олиб келган триера Асс бандаргоҳига бир стадий яқин келиб қолганида икки донишмандни оломон жўр бўлиб шарафлади.

Келган кема зинаси олдида меҳмонларни кутиб турган Гермий ҳокимлиги, улуғлиги эсидан чиқиб, зинадан югуриб палубага чиқди ва дўстларини кучоқлаб кутиб олди. У хурсандлигидан ҳам кулар, ҳам йиғлар эди...

– Паҳлавон бўлиб кетибсан, – деди у Ксенократни кучоқлар экан. – Жиддий қарашингдан кўркиб кетдим...

– Сен бўлсанг жуда озиб кетибсан, рангинг оқарган, касалмисан?

Гермий бу гапга хафа бўлмади. У Арастуни кучоқлар экан:

– Сен ростдан Арастумисан? Кичкина бола эдинг, энди эса бутун Элладага шон-шуҳрат келтирган донишманд бўлибсан, қойилман, – деди.

– Соҳилга тушайлик. Бизга мулкингни кўрсат, – деди Арасту ҳам уни кучоқлаб.

Бандаргоҳдан хизматчилар Арасту ва Ксенократни иккита замбилга ўтқазиб, кўтариб борардилар. Гермий эса юганларининг тилласи қуёшда ярқираган ўз отида уларнинг ўртасида борарди.

Гермий бу йўлни Гомер қандай таърифлаб ёзганини эслатди:

– Гомер “Асса қараб юрсанг, ўлим чегарасига тезроқ етасан”, деб ёзган. Отахон Гомер бу тик йўлдан ўзи юрган бўлса керак, уни лаънатлабди. Сизлар ҳам, дўстларим, вақти келиб мени лаънатласангиз шон-шуҳратим янада ошарди. Асс сизларнинг келганингизни шарафлаб, байрам қилмоқда.

Ростдан ҳам шундай эди. Гермий меҳмонларни қаерга бошлаб борса, уларнинг шарафига томошалар, ўйинлар ўтказилди. Кутимаганди Арасту касал бўлиб қолди. Қорнида кучли оғриқ пайдо бўлди. У Тиманфдан ўрганиб олганидек, ўзига шифобахш гиёҳлардан дамламалар тайёрлади. Гермий унга ўзининг табибларини юборди, аммо Арастунинг дардини Гермийнинг жияни Пифиада даволади.

Пифиада чўрилари билан кириб келганида Арасту боғдаги ёнғоқ дарахтининг соясида ётган, қорни оғриётган эди.

– Хайрэ, Арасту, – деди қиз бемор ётган жойда тўхтаб. – Мен, Пифиада, сени кўришга ва соғлигингни сўрашга келдим. Гермий айтдики...

Арасту қизнинг гўзаллигидан ҳаяжонга тушиб, тили калимага келмай қолди. Қиз сўзини давом этди:

– Гермий айтдики, у сенга берган ваъдасини унутмабди.

– Қанақа ваъдасини?

– Билмадим. Буни менга айтмади, – кулиб, деди Пифнада ва беморга яқин келиб, кўзини катта очиб қаради. – Сен, Арастусан, тўғрими?

– Тўғри. Сен ўзинг кимсан?

– Мен Гермийнинг жияни Пифиадаман.

– Ёшинг нечада? Сир бўлмаса?

– Гуллар факат очилганда чиройли. Қизлар ҳам факат гул очган ёшлиқ чоғида чиройли бўлади. Ўзинг неча ёщдасан?

– Файласуфлар қаримайди, мангу ёш бўлади.

– Мен сенинг уйингни, боғингни кўрмоқчиман. Файласуфлар уйи деганлари шу ердами?

– Ҳа, шу ерда. Тўғри айтишибди.

Кувноқ қиз билан боғда ва турли хоналарда айланиб юришганида Арастунинг оғриғи ўз-ўзидан йўқолди. У касаллигини эслаганида аллақачон соғайиб қолган эди.

Пифиада Файласуфлар уйига яна бир неча марта келиб кетди. Ҳар келганида Арасту:

– Гермий қани? Нега келмаяпти? Уни кўрсанг айтиб қўй. Мен унинг ваъдасини бажаришини сабрсизлик билан кутаман, – дерди.

Қиз амакисининг ваъдаси Арастуни унга уйлантириш эканлигини билиб олган эди. Пифиада тақдиридан хурсанд, буюк донишманднинг севимли ёри бўлиш улкан баҳт эди. Арасту уни севиб қолган, қиз ҳам уни севарди.

Ксенократ дўстининг севгилиси билан овора бўлиб, фалсафани ташлаб қўйишини истамасди. Лекин дўстига гапи таъсир қилмагач, охири қўл силтади.

– Ошиқ файласуф ошиқ эфеб каби телбадир, – деди у. – Барча ошиқлар азалдан шеър ёзадилар. Сен ҳам шеърларингни буюк фалсафий фикрлар, ҳақиқатлар ёзиладиган пишиқ пергаментларга эмас, мумланган тахтачаларга ёки папирузларга ёзсанг яхши бўларди.

– Севги ҳақиқатлари ҳам мангу яшайди, – эътиroz билдири Арасту. – Токи инсон бор экан, муҳаббат ҳам бор.

Ассда фалсафа мактаби ташкил этиш билан асосан Ксенократ шуғалланди. У Файласуфлар уйида Асс ва Атарнеяда топиш мумкин бўлган барча китобларни тўплади. Файласуфлар уйининг низомини ёзи, юзга яқин толиблар билан сухбатлашди, улар билан машғулотларни бир ўзи бошлаб юборди.

Гермий давлат ишлари билан бандлиги сабабли, кам келарди. У Ксенократнинг дарсларини икки марта тинглади, қолган вақтларида Арасту билан унинг тўйи ҳақида сухбатлашарди. Гермий фақат бир марта Арасту ва Ксенократ билан давлат ишлари ҳақида сухбатлашди. Ўз давлати учун ёзган бошқарувга доир қонунларини дўстлари баҳолашини истарди.

– Давлат қонунларини баҳолаш учун, бу давлатда фуқаролар қандай яшаётганини билиш зарур, – деди Арасту. – Қонунлар баъзилар учун яхши, баъзилар учун ёмон бўлиши мумкин. Солон<sup>1</sup> Афина қонунлари кўпчилик фуқаролар учун яхшилигини мақтаган эди. Агар қонунлар фуқароларнинг ҳаётини яхшилашга ёрдам бермаса, уларни халқ қабул қилмайди. Яхши қонунлари бор давлатда бошига қайғу, кулфат тушган одамга ҳамма ёрдам беради. Қонунлар жамиятни ҳимоя қилиши зарур. Афсуски, мен ҳали бундай меҳр-шафқатли халқни ҳам, бундай халқни ҳимоя қилувчи қонунларни ҳам кўрмадим.

Бу фикрларга Ксенократ эътиroz билдири:

– Янгича қонунлар халқнинг ҳаётини яхшилаши мумкин. Устозимиз Афлотун яхши қонунлари бўлган ажойиб давлат намунасини кўрсатиб берди-ку<sup>2</sup>.

– Тўғри, – деди Арасту. – Аммо бу қонунларга фуқаролар қанчалик амал қиласди – шуни билиш керак. Масалан, қулларни озод қилиш ҳақида қонун чиқариш мумкин. Аммо агар қуллар ва қулдорчилик бўлмаса, биз бу ёққа келган триерамизда ким эшкак эшарди? Эшкакчилар бўлмаса, кемамиз денгизда писта пўчоғидай тўлқинларга ўйинчоқ бўлар эди. Давлат ҳам қулларсиз ана шундай ахволга тушиб қоларди. Шу сабабли биз қулларни озод қилиш ҳақидаги қонунни ҳам, бошка яхши қонунларни ҳам чиқаролмаймиз. Устозимиз Афлотун ҳам “Дарёлар тескарисига оқизилсинг” деган қонун чиқармаган, агар бундай қонун чиқарилганда ҳам дарёлар тескарисига оқмас эди.

– Қулчилик дунёни вайрон қиласди, – деди Ксенократ тундлашиб.

– Демократия дунёни вайрон қиласди, – деди Гермий.

Арасту бу иккала фикрга қўшилмади:

– Дунёни бойлар ва камбағаллар борлиги, бир тўда бойлар неча минглаб камбағалларнинг ҳаққини ўзлаштириб олгани вайрон қиласди. Бойлар янада бойииди, камбағаллар янада камбағаллашиб, гадоларга айланади. Мана шунга йўл кўймайдиган адолатли қонунларни ўйлаб топиш керак. Гермий, сенинг қонунларингни тўйдан кейин кўриб чиқаман.

<sup>1</sup> Солон (тахм. эр. авв. 638-559 йилларда яшаган) – афиналик сиёсат арбоби, шоир ва файласуф.

<sup>2</sup> Афлотуннинг “Давлат” ва “Қонунлар” асрлари кўзда тутилмоқда.

Кузда камтарона тўй бўлди. Афина одатларига кўра, оқ рўмол ёпинган, гулчамбар таққан келинни соябон аравада янгалари куёвнинг уйига яқин жойга олиб келиб, беркитиб қўйишар, куёв уни излаб, ёлғондакам жанг қилиб ва совға-суюнчилар бериб, “күткариб” оларди. Арасту бу одатни қисқартириб, Пифиадани даст кўтаради-да, аёлларнинг қий-чуви остида куёв учун ясалган уйга олиб кетди. Тўйда буюк файласуфни кўриш учун оқиб келиб, икки кўчани тўлдирган халойик куёвни излар эди. Файласуфни кўрганлар хурсанд бўлдилар, кўролмаганлар армонда қолдилар.

Арасту келинни ёниб турган ўчоқ олдига олиб келди, Пифиада кафтини олов тафтига тутди. Бу энди унинг ўчоқ маъбудаси ҳимоясида бўлишини билдиради. Улар ясатилган дастурхондаги тўй учун тайёрланган нон ва пишириқлардан татиб кўрдилар. Сўнг Каллироя тоғидаги булоқдан узунчоқ кумуш кўзаларда олиб келинган муқаддас сувда юзларини ювдилар. Сўнг барча элладаликлар удумига кўра, тўй шовқин-суронидан олис, ичкари хонага кириб кетдилар.

Арасту тўйдан кейин ҳам анча вақтгача фалсафа ишларига аралашмади, гўзал Пифиаданинг қучоғидан чиқмади. У Пифиада шарафига муқаддас меҳроб ясад, ибодатхоналарга хайр-эҳсонлар қилди. Арасту яна дўсти Гермий ва авлодларини шарафлаб мадҳиялар ёзди. Фақат ишқ оламида яшади.

Ксенократ дўстини неча бор огоҳлантириди:

– Арасту, сен телба бўлиб қолибсан. Асс аҳолиси устингдан кулмоқда. Мен ҳам жуда норозиман. Мен бу ердан кетаман.

– Жуда яхши, – деди Арасту. – Кетсанг кетавер. Ҳаммангиз менинг баҳтимга ҳасад қилябсизлар... Кетавер...

Бу суҳбатдан хабар топган Пифиада эрига шундай деди:

– Мен яқинда туғишига тайёрланиш учун кетаман. Дўстинг Ксенократ кетиб қолса, ёлғиз қоласан...

Арасту дўстини излаб елиб-югурди, аммо тополмади. Ксенократ оҳанрабо тошлари сирини ўрганиш учун Магнесияга кетган эди. У Арастунинг хизматкорларига бундай гапни айтиб қўйинглар дебди: “Аҳмоқ оҳанрабо тошлар бир-бирига интилади, оқил одамлар эса бир аёл сабаб, жанжаллашиб, бир-биридан узоклашади”.

Гермий келиб, Арастуни Атернеяга, Мақдуния элчилари шарафига берилаётган зиёфатларга таклиф қилди. Ксенократ кетиб қолганидан кейин Арастунинг кайфияти унчалик яхшимас, зиёфатга ҳуши йўқ эди. Аммо Гермий “Бормасанг бўлмайди”, деди. Арасту Атернеядан уч кунда қайтиб келди ва хотини билан маслаҳатлашиб, Магнесияга Ксенократни излаб кетди. Аммо уни тополмади.

Ксенократ Магнесиядан Измирга, ундан Афинага йўл олган экан. У Арастуга қисқа мактубида бундай дебди: “Мен Афинага қайтмоқдаман. Ассдаги шогирдларимга ҳам устозлик қил. Агар шон-шуҳратинг Афинага етиб борса, буни таклиф деб қабул қиласман ва ёнингга қайтаман”.

Арасту хотинини Атернеяга жўннатиб, ўзи Файласуфлар уйидаги ишларга шўнғиди. Гермий ҳам унинг фалсафий суҳбатларини эшитиш учун келиб турди. Пергам, Скепсис, Митилена донишмандлари Ассга, Арастунинг Файласуфлар уйига меҳмон бўлиб кела бошладилар. Севимли шогирди Феофрастнинг келгани Арастуни жуда севинтириди.

Арасту шогирдини кучоқлар экан:

– Кел, энди сира ажралмаймиз, деб аҳдлашайлик, – деди.

– Яхши, – деди Феофраст, – агар бу қўлимииздан келса.

– Қўлимииздан келади, – деди Арасту.

Ассадаги Файласуфлар уйи ва донишманд Арастунинг асарлари, шоншухрати бутун Элладага тарқалди. Асса янада кўпроқ шаҳар-давлатлардан юксак мартабали меҳмонлар келадиган бўлди. Улар ўз ватанларига қайтиб, Арастунинг донолиги учун, Гермийни эса фалсафага ҳомийлик қилгани учун мақтаб, шарафлар эдилар.

Пифиада жуда хурсанд эди. “Одамлар сендей дўсти бўлгани учун Гермийга ҳам ҳавас, ҳам ҳасад қидмоқдалар”, – дерди у.

Улар киз фарзанд кўрдилар.

– Қизимизга қандай исм қўямиз? – сўради Пифиада.

– Мен билган энг чиройли исм – Пифиада, – деди Арасту.

Арастунинг Ассда, Гермий хузурида машхурлиги овозаси Мақдуниягача, Филиппгача етиб борди. У бир мактубида “Арасту, агар Гермийнинг ҳомийлигидан зериксанг, менинг ҳузуримга кел, дўстим Гермийга ҳасад қилаюпман”, дебди.

Арасту Филиппнинг мактубини Гермийга кўрсатди. У хавотирланиб сўради:

– Ростдан ҳам, менинг ҳомийлигим сени зериктирдими?

– Йўқ, – деди Арасту. – Мен фақат Филиппга ростдан ҳам дўстмисан, демоқчи эдим.

– Ҳа, дўстман, лекин якинимда Эрон бор, Артаксеркснинг саркардаси Мемнон бор, мен у билан ҳам дўст бўлишим зарур. Афина ҳозир унчалик қудратли эмас, Филипп эса чиндан ҳам қудратли.

– Родослик Мемнон нимага келибди?

– У мен билан дўстлашмоқчи. Мен йўқ дейолмайман, чунки унинг ортида Эрон, Артаксеркс бор. Мемнон сенинг довруғингни эшишибди, сен билан сұхбатлашмоқчи.

– Бемалол. Унинг мақсадини ҳам билиб оламиз. Лекин сен ҳам биласанки, Филипп Мақдуния байроби остида барча Эллада давлатларини бирлаштира олади. Бундай қудратли иттифоқ жуда зарур. Аммо Филипп жуда кўпол ва таккабур. Унинг доно вазири ё устози ҳам йўқ. Аммо унинг ўғли Александр бор. У ҳали ёш ва уни мардликка, доноликка, адолатни севишга ўргатса бўлади.

– Яъни, сен Мақдунияга кетмоқчисан?

– Ҳозир эмас. Эҳтимол, бир ё икки йилдан сўнг кетишимга тўғри келар. Сен, Гермий, ўша вақтда менга рухсат беришинг зарур.

– Тушунаман, – деди Гермий маъюсланиб. – Сиёсий вазият яқин дўстларни ҳам бир-биридан узоқлаштиради.

Арасту Эрон саркардаси Мемнон билан сұхбатлашаётган вақтида югуриб келган Феофраст унга Ксенократ келаётганини айтди.

– Ксенократ келдими? – Арасту шошиб ўрнидан кўзғалди. – Зевсга шон-шарафлар бўлсин! Қани у, қаерда?

– У бандаргоҳдан шаҳар томон келмоқда.

– Мен уни кутиб олишим керак, – деб Арасту саркарда Мемнон билан хайрлашди. – Эртага сұхбатимизни давом эттирамиз.

– Мен аввал Гермийга ҳавас қилаётгандим, – деди Мемнон. – Энди Ксенократга ҳавас қилаюпман.

Арасту отидан сакраб тушиб, Ксенократ билан қучоқлашиб кўришди.

– Сен чақирганинг учун келдим, – деди Ксенократ.

– Чақирдим, – деди Арасту дўстини маҳкамроқ қучоқлар экан.

– Сенга Спевсипдан, Демосфендан, Герпиллидадан, Никанордан саломлар келтирдим.

– Герпиллида дейсанми? У мени ҳамон эслар эканми?

– У сени севади, – деди Ксенократ.

Дўстлар отга минмадилар. Ксенократ пиёда юришни хоҳларди.

– Гомер Ассга пиёда борган экан. Биз ҳам унинг изидан бора қолайлик.

Арасту хизматкорларига отларни олиб кетишни буюрди.

– Пифиада соғ-саломатми? – сўради Ксенократ.

– Энди уйимда иккита Пифиада бор: аёлим ва қизим.

– Иккаласига меҳринг бўлинар экан-да?

– Йўқ, меҳрим учинси-да.

– Учинчи ким экан?

– Фалсафа, – деди Арасту. Сўнг сўради:

– Афина соғ-саломатми?

– Афина – касал, – деди Ксенократ. – Мешқорин бойлар Филиппни кутмоқдалар. Камбағал ва гадолар бойларни лаънатламоқда ва Демосфенни нутқларини тингламоқда. Нотиқ Эсхин Демосфени сўқмоқда. Машхур ҳалқ маталидаги каби: “Шон-шавкатли афиналиклар қурдатда тенгсиз, гуноҳкор афиналиклар гуноҳда тенгсиз. Аттика заминида энг тотли асал ҳам, энг кучли заҳар ҳам бор”.

– Академия Афлотун даври қайтиб келади, деган орзу билан яшамоқда. Афлотуннинг шогирдлари энди ҳаётни шарҳламай, Афлотун асарларини шарҳлаш билан машғул.

– Тушларни шарҳлаётган эканларда. Дунё ларзада, буюк ўзгаришлар арафасидамиз. Сен билан биз бу алғов-далғовларни, бўрон, довулларни кўрамиз. Дунё қай аҳволда бўлса ҳам биз файласуфлар халқларга ёлғонлар қайси, ҳақиқатлар қайсилигини ўргатишимиш зарур. Одамлар ўзгарган, парчаланган ҳақиқатларни бирлаштириб, бутун ҳақиқатни кўра билишлари керак. Бизнинг асарларимиз шу ҳақда. Ўзимиз қабрда ётсак ҳам фалсафий фикрларимиз дунёни тўғри йўлга бошлайди. Одамлар парчаланган, бир-бирларига душман давлатларда эмас, балки ёлғонлардан ҳақиқат устун келган янги дунёга қадам қўядилар. Бизнинг меҳнатимиз, майли, мана шу тикка йўл каби оғир, мاشаққатли бўлсин. Аммо, йўл охирида бизни қанотли отлар кутиб туради.

Ксенократ бир зум тўхтаб, юқорига қаради, у ерда ростдан ҳам уларни отлари кутиб туришарди.

– Ҳозирги айтганларингни ёзиб қўйиш керак, Арасту, – деди Ксенократ таъсиrlаниб. – Гомернинг сўзларидан кам эмас бу сўзлар.

– Бу қисқа нутқни сенга бағишладим, Ксенократ, – деди Арасту. – Ҳа, фақат сен учун бўлсин бу сўзлар.

Эрон саркардаси Мемонон бир неча ойдан сўнг Ассга, Файласуфлар уйини кўришга келди. Совғага Бобил донишмандларининг ҳикматлари ёзилган бир неча ўрам пергаментни олиб келди. Гермийнинг меҳмондўстлигини мақтади. Уни ва барча файласуфларни Сузага таклиф этди, уларга ўз кутубхонасини ва осмондан тушган тошлар – метероитлар тўпламини кўрсатишни ваъда қилди.

– Эронга борайлик, – деди Гермий дўстларига. – Эрондаги бу мартабадаги битта дўст бутун бошли қўшинга тенг...

– Йўқ, – деди Арасту. – Бормаймиз. Мен унинг болдай ширин гаплари-га ишонмайман. Унинг дўстлиги ва саховати – душман найранги. Унинг кўзларидан макр, сўзларида заҳар бор.

– Ҳаво айнигани сенга таъсир қилдими? – ажабланди Гермий. – Қизалоғинг касал. Филиппга мактуб ёзганингдан Ксенократ хафа... Мемнонга нега ишонмайсан? Сизлар бормасангиз якка ўзим бораман.

– Ихтиёр сенда, боргинг келса боравер. Лекин менинг сўзларимни унутма. Менинг бирор маслаҳатимни олмасанг, мен ҳам Филиппнинг таклифига рози бўламан. Демак, сен – Сузага, мен – Пеллага жўнайман. Қизчам соғайиши билан кетаман. аммо сен Мемнонга кўп ишонаверма.

Бир ҳафтадан сўнг Гермий Эрон саркардаси саройига кетди. Афина кенгаши уни хоинга чиқарди. Афиналиклар Арастунинг ҳам душман Мақдуния тарафдори деб, ўлимга хукм қиласар эдилар. Энди Арасту Мақдуния пойтахти Пеллага қочиши зарур бўлиб қолди. У Феофрастни топиб “Ксенократ иккалангиз Файлусуфлар уйидаги китобларни ва жиҳозларни тахлаб, ўраб, боғлаб, тинчроқ жойга олиб кетинглар” деди.

– Гермий билан орангиз бузилдими? – сўради Феофраст.

– Йўқ, – деди Арсту. – Аммо, Гермийга ҳам, бизга ҳам ўлим хавфи яқинлашди.

Германий Мемноннинг саройига бориши билан, ушланиб, қўл-оёғи кишиланди ва Артаксеркс хузурига олиб борилди. Артаксеркс уни Мақдуния подшохи Филипп билан Эронга қарши иттифоқ тузгансан, деган айловлар билан дорга осишга хукм қилди.

Ўша куни ёқ Гермий қатл этилди. Бу хабар уч кунда Атарнеяга етиб келди. Яна уч кундан сўнг Мемнон бошчилигига Эрон қўшинлари Атарнея ва Асса бостириб кирдилар.

Феофраст устози Арастуни ва Ксенократни Митиленада қолдиришга роса ҳаракат қилди. “Бу ерда аввалгидан ҳам катта ва чиройли Файлусуфлар уйи очамиз, менинг бойлигим етарли”, деди. Аммо улар бу таклифга кўнмадилар.

– Йўқ, – деди Арасту. – Мени Филипп чақирмоқда.

– Йўқ, – деди Ксенократ. – Мен Афинага қайтаман.

Митиленадан аввал Арастунинг кемаси йўлга чиқди. Ксенократ дўстини кузатишга келмади.

Ксенократ Феофрастга тушунтириди:

– Филиппнинг дўсти Афинанинг душманидир. Устозинг Арасту Пеллада шон-шуҳрат қозонгандан кейин ўзинг нима қиласан, Феофраст?

Феофраст кўнглидагини Ксенократга айтмади. У “Мен Митиленада қоламан”, деди. Аммо Ксенократ тушган кема Афина сари йўл олгач, Феофраст Митиленадаги китоблар, қўллэзмалар, зарур жиҳозларни йигиштириди ва бир неча ҳафтадан сўнг Пеллага, устози ёнига етиб келди.

**Филипп ва Александр**

Арасту Пелладада, Филипп хузурида иззат-хурматда яшар экан, нима учундир, Афинадалигида ёввойи Тимоннинг ўлими олдидан йифлаганини эслади.

– Нимага йифлаяпсан, қария Тимон? – сўраганди ўшанда Арасту. – Ахир сен учун Афина ҳам, ҳаёт ҳам ўйлашга арзимас эди-ку?

Тимон бошини тошга қўйиб ётган еридан олисдаги Афина деворлари, Акропол бинолари қуёш нурларида яркираб кўринарди.

– Мен ҳаётдан кўз юмаётганимга эмас, ватаним Элладани энди кўролмайман, деб йифлаяпман. Эҳтимол, энди Элладага бир гиёҳ, гул, тикон ёки пашша бўлиб қайтарман. Унда Элладани қандай кўраман?

– Аҳмоқона саволим учун мени кечир, – деди Арасту.

Қария Тимоннинг Афина халқидан кўнгли қолгани бежиз эмасди. Афиналиклар арзимас душмани – Локрида аҳлини жазолаш учун Мақдуния подшохи Филиппни ёрдамга чакирдилар. Буларнинг душманлиги бесабаб эмасди. Локридаликлар Дельфадаги Аполлон ибодатхонаси қарашли ерларни тортиб олиб, коҳинларини дўппослаб, урганлар. Аввалроқ, шу ибодатхона коҳинлари Локрида заминида баъзи йилларда ҳосил унмай, қаҳатчилик бўлган вақтида уларнинг энг яхши ерларини арzon-гаровга сотиб олганлар. Локрида аҳолисига ёмон, тошлок ерлар қолган. Локрида аҳолиси бундан ғазабланиб, Аполлон ибодатхонаси руҳонийларига ҳамла қилганлар. Тўғри, Локрида аҳли айбдор, лекин уларни жазолаш учун Филиппдан ёрдам сўраш афиналикларнинг аҳмоқлигидан бўлди. Филиппга Локрида аҳолисини жазолаш учун ҳозир Пелла кўчалари ва майдонларини тўлдирган жангчиларнинг ўндан бирини юбориш етарли эди.

– Бундай катта қўшин билан Эронга юриш қилсак бўлади, – деди Александр устози Арасту билан суҳбатда.

Отаси ҳарбий юришга Александрни ҳам жалб этганди. Шу сабабли Александр жангларда қаҳрамонлик кўрсатишни ўйлаб, ховлиқиб юарди. Арастунинг дарсларини ҳам тингламай кўйди. Отасидан рухсат олиши билан Александр дўстлари Певкет, Гефестион, Клит, Каллисфен ва Кратерни сафига олди. Александр суюнар, Арасту куйинар эди. Чунки, айёр ва маккор Филипп жуда катта қўшин билан фақат Локридани жазолаш билан чекланмасди. У бутун Эллада давлатларини эгаллашни кўзлаётган эди. Демосфен нутқларида афиналикларни шу фалокатдан огоҳлантираётган эди.

“Филипп Афинага қўшин киритади”. Бу фикрдан Арастунинг уйкуси қочди. У эрта тонгда туриб, Миеzадан Пеллага йўл олади ва Филипп билан шу ҳақда гаплашади. У Арастунинг гапига қулоқ солмаса-чи? Александр бош қўмондон бўлиб қолса, эҳтимол, устознинг гапини тинглар.

Эллада шаҳар-давлатлари умуний душман Филипп эканлигини билганида яна бирлашиб, қаршилик кўрсата олар эдилар. Аммо Афина аҳли ва бошқа эллинлар бундан бехабар, кайф-сафога берилган эдилар. Айёр Филиппга худди шу керак эди. Отаси ўрнида Александр бўлганидими? У ёшлик ғайрати, ақл-заковати билан барча Эллада давлатларини ягона кудратли салтанатга айлантира оларди. Арастунинг бутун орзу-умиди

шунда эди. Гермий қатли учун форслардан қасос олиш ҳам фақат Александринг кўлидан келарди.

Арасту Дельфадаги Аполлон ибодатхонаси майдонида Гермийга ҳайкал ўрнатди ва унинг шоҳсупасига “У очиқ жангда енгилмади, уни макр-ҳийла билан ўлдирдилар” деб ёздириди.

Арастуни Филипп ҳузурига қўймадилар. У саркардалари билан кенгаш ўтказаётган эди. Александр ҳам кенгашда экан. Арасту вақтдан унумли фойдаланиш учун синглиси Геронинг ўғли, жияни Каллисфенга панд-насиҳат қилмоқчи бўлди. Улар боқقا кириб бир курсида ўтиридилар.

– Сен синглимнинг ўғли, қондошимсан, Каллисфен. Александринг буюк юришларида қатнашиб, тарихнависи бўласан. Мен шу кунларда Александр билан бир умрга хайрлашаман.

– Нима учун? – ажабланди Каллисфен.

– Мен Александрга билиши керак бўлган барча билимларни ўргатиб бўлдим. Энди сен доимо унинг яқинида бўласан. Унинг мардлиги, фазилатлари ҳам, ҳовлиқмалиқ, манманлик, қизиқонлик, жаҳлдорлик каби нуқсонлари ҳам бор. Чексиз ҳокимият, кон тўкиш, доимий ғалабалар инсон феълини ўзгартиради.

– Тоғажон, – деди Каллисфен. – Кайфиятингиз бузилган кўринади.

– Йўқ, – деди Арасту. – Кайфиятим жойида.Faқат сени турли хавф-хатардан огоҳлантиришим керак. Каллисфен, сен билан менинг томиримизда шифокорлик маъбути Асклепий қони, Александринг томирида Геракл ва Ахиллнинг қони бор. Александринг ғазабини келтирувчи сўзлар айтма. Мендан аввал ҳам кўп файласуфлар подшоҳларга панд-насиҳат қилган. Сиракуза мустабиди Дионисий Биринчи маслаҳатчиси Афлотунни қул килиб сотиб юборган. Дионисий Иккинчи Платонни ўлдиришига сал қолди. Хуллас, ҳали ҳеч бир файласуф подшоҳларниadolatli ва маърифатли қилолмаган. Аммо, мен Александр шундайadolatli ва маърифатли подшоҳ бўлишини орзу қиласан... Унинг тарбияси учун қилган меҳнатларим зое кетмас деб умид қиласан, лекин кўнглим ғаш...

– Александр келяпти, – севиниб ўрнидан турди Каллисфен.

Шоҳ саройи томонидан хурсанд дўстлари қуршовида Александр келаётган эди. Арасту унинг ҳурматига ўрнидан турди. Александр устозини кучоқлаб кўришаркан, севиниб:

– Кенгаш бир қарорга келди! Эртага сафарни бошлаймиз! – деди, аммо устозининг кўзидағи ғашликни сезиб ажабланди: – Устоз, сен бунга хурсанд эмасмисан? Сен ҳам биз билан борасан. Яқинда мен отлик қўшинларга қандай етакчилик қиласан...

– Сен, Александр, авваллари ҳам Миезадаги сабоқлардан қочиб, ҳар нарсага ўзингни ураддинг. Мен абадий айриқ олдидан сенга сўнгги насиҳатларимни айтгани келдим.

– Ундей эмас, устоз, биз айрилмаймиз. Faқат хайрлашамиз. Майли, шу бугуноқ барчамиз Миезада бўлиб, сафар олдидан зиёфат қиласиз.

Дўстлари Александрни қувватлаб ҳайқиришди:

– Найчи нозанинларни ҳам чақирамиз!

Арасту ёшларнинг ғала-ғовури тинишини кутди ва сўзини давом эттириди:

– Мен ҳам зиёфатларингда қатнашсам бўлади. Аммо, Александр, ёлғиз ўзингта май мастилигидан аввал гувоҳларсиз айтадиган гапларим бор.

Александр ва дўстлари бу гапни унча хушламадилар.

– Майли, – деди Александр. – Розиман, майсиз ва гувоҳларсиз гаплашамиз. Аммо, шундан кейин, – деди қувониб, – май ва найчи нозанинлар бўлади!

Стримон дарёси соҳилида бунёд этилган нимфалар боғи гўзалиги, соқинлиги билан жаннатни эслатарди. Арасту Макдунияга келиб, Фалсафа мактаби учун жой сўраганда Филипп унга шу боғни кўрсатган эди. Бу мактабда Арсатудан сабоқ олган болалар муқадас ҳовузларни ва зилол сувли жилғаларни, дараҳтзорларни кўриб, вазмин, ўйчан бўлиб қолар эдилар. Бу ерда Арастунинг ўзига ҳам овози секин, тантанавор, улуғвор янграётгандай туюларди.

У боғда, суюнчиқли узун курсида Александрни кутираб ўтирас экан, салқин дараҳтзорда турли қушларнинг бир-бирига жавобан сайрашларини тинглаб, ҳовуз сувида акс этган, ботаётган қуёш шафагини томоша қилиб, Александр билан бўладиган сухбати ҳакида ўйларди.

– Салом, устоз, менга айтишларича, отам насиҳатларингни тингламай, сени хафа қилибди, – деди Александр. – Мен отам учун сендан узр сўрайман.

– Бўлиб туради. Филипп маст эди, мени танимади ҳам.

– Ҳа, отам юриш ҳакида қарор қабул қилинганини нишонлаб, кайфсафо қилмоқда...

– Нима қарор қилдингиз? – сўради Арасту.

Александр узун курсига, устози ёнига ўтирди ва унга яқин сурилиб, ундан миннатдорлигини изхор қилди.

– Устоз, кўп йиллар сендан сабоқ олиб, улғайдим. Аммо, ҳали сендан ўрганадиган нарсаларим кўп эди. Устоз, сен менга Эллада тарихини, Эрон тарихини, географияни, астрономияни, эстетикани, сиёsat илмини, шеъриятни, мантиқ-фикрлаш ва баҳслашув санъатини, олий фан – фалсафани ўргатдинг. Отам мени дунёга келтирди, сен менга дунёни ўргатдинг.

– Буни билганингдан хурсандман, раҳмат ва шукrona айтаман. Аммо бундан кейин сенга ҳаётнинг ўзи устоз бўлади. Қалбинг – дарё, ақлинг ўткир бўлсин. Донолик нурлари фақат сайқал топган, тиниқ ва тоза кристалда ярқирайди. Сен ҳам ақлингга сайқал бер, уни зангрлардан тозала. Сен – якка ҳукмдор, монархнинг ўғли, мантиқий фикрласак, бўлғуси якка ҳукмдорсан. Аммо, бошқа якка ҳукмдорлардан фарқли ўлароқ, сен фақат олий ҳукмдор бўлиш билан чекланмай, илму-фан, санъат билан, фалсафа билан шуғулланасан...

– Ҳа, устоз, барча фанлар ҳам керакли, аммо фалсафа – барча фанларнинг подшохи экан.

– Шундай, – маъқуллади қулимсираб Арасту, қўлидаги мис шарда акс этган ўз юзига қарап экан. Александр ҳам энгашиб, шарда устозининг бурни ва оғзи катта кўринганини пайқаб, кулиб юборди. Александрнинг шардаги акси ҳам ундан қолишмас эди.

– Устоз, қўлингдаги шарни кўриб, кўнглимга ажойиб бир фикр келди. Шар – мангулик ва мукаммаллик рамзи. Устоз, сен фалсафанг, илминг билан бутун дунёни забт этсанг, сенинг шогирдинг бўлган мен ҳам бутун дунёни эгаллаб, ўз мулкимга айлантирсам бўлади-ку! Ўзинг айтар эдинг, бир новда бу йил гулламаса, умуман гулламайди, дейолмаймиз. Баъзи новдалар минг йилда бир гуллайди. Мен ҳам минг йилларни олдиндан қўрмоқчиман.

– Ёшлик шуниси билан гаройибки, унда туғилган фикрлар яхшиликками, ёмонликками, билиб бўлмайди.

– Устоз менинг бу фикрим яхшиликка хизмат қиласди. Мен бутун дунё мамлакатларини бўйсундиришни, шаҳарларга ўт қўйишни эмас, балки бир хукмдор қўл остида бирлаштиришни ўйламоқдаман. Мен бутун дунёга ягона ва мукаммал шакл бермоқчиман.

– Бу – чин инсонга муносиб фикр, – деди Арасту.

– Маъбулларга муносиб фикр эмасми?

– Якка хукмдор маъбуллар ва коинот ўртасида туради. Якка хукмдор нима қиласа ҳам коинот жим туради.

Александр ҳаяжон билан деди:

– О, кўнглимда ҳозир даҳшатли қудрат туғилмоқда. Коинот менга бу-юради, мен халқларга буюраман. Мен Коинот ва халқлар ўртасида ҳакам бўламан.

Шундай деб, Александр устозини маҳкам қучоқлади.

– Бас энди, – деди Арасту. – Сен билан хайрлашув олдидан битта илтимосим бор. Барча илм-фанлар, санъатлар, фалсафа макони бўлган Афинани авайла.

Александр анча вақт ўйланиб турди. Сўнг сўради:

– Устоз, менинг ваъдамга ишонасанми?

– Ишонгим келади, – деди Арасту. Александр устозининг кўнглини тинчитмоқчи бўлди:

– Ваъда бераман, Афина ахли мени яхши кўрадиган бўлади. Майли, устоз, хайлайлик. Мен шошиб турибман! – кулимсиради Александр. Устози Александрнинг бу кулимсирашида маккорлик, шафқатсизлик яши-ринганини биларди.

– Хайр, – деди Арасту ва юзини ўгириди. Устоз Александрнинг ваъдасига ишонмади.

Мақдуния подшоҳи Филипп қўшинлари Фермопилани эгаллаб, у ердан Локрида аҳлини жазолаш учун Дельфага ёки Мемфисга юриш ўрнига Фокидага юриб, Элатияни босиб олгани, Фива ҳамда Афинага йўлга чиққани хабарини эшитган Арасту тезда Пелладаги уйини бўшатиб, кўч-кўронини йиғишириб, хотини ва қизалоғи билан она юрти Стагирага йўл олди. Бу Мақдуниядан қочиши демак эди. Аммо, асосий гап бунда эмас, балки Филипп йўлидаги давлатларни забт этиб, Афинага бостириб кирса, афиналиклар назарида Александрнинг устози, Филиппнинг дўсти бўлган Арасту ватан хоини бўлиб қоларди. Филиппнинг Афинага юриши Арастунинг жуда ёмон, қалтис вазиятга солиб қўйди. Шундай вазиятда Арастунинг Мақдуния пойтахти Пелладан қочишини афиналиклар Филиппнинг босқинчлилигига Арастунинг даҳли йўқ экан, деб тушуниши мумкин эди. Арастунинг Филипп ўғли Александрга фалсафани ўргатиши Афина фалсафа мактабининг куч-кудратини кўрсатарди.

Стагирада Арасту отамерос уйига жойлашди. Бу ерда опаси Аримнеста яшар эди. Ёш Пифиада билан Аримнестанинг ўғли Никанор ҳам тез келишиб кетдилар. Арасту умрида биринчи марта дам олиш учун бўш вақтга эга бўлди. У бўш вақтини мазмунли ўтказганидан роҳатланарди. Донишманд учун пулдорлик, мансаб, ҳокимият каби ўткинчи неъматлар эмас, рух гўзаллиги, маънавий баркамоллик каби мангу неъматлар аҳамиятли

эди. Бемаъни ўткан узок умрдан сермазмун ўткан бир йил яхши дер эди у. Хослар учун ҳақиқатни аниқлаш гўзал ҳаёт эди. Осмон ажойиб. Коинот ва уни англайдиган Ақл ажойиб эди.

Арасту Стагирада қизалоғи Пифиадани ва жияни Никанорни сайрга олиб чикар, уларнинг ташвиши, ғалваси ҳам оғир келмас эди. Иккала бола “Бу нима? У нима?” деб минглаб саволлар билан Арастунинг бошини гангитар эдилар.

Болаларнинг саволларига жавоб бериш баҳонасида Арасту бир йил давомида ҳайвонларнинг ҳаётини яхшилаб ўрганди. Бу соҳада у кўрсичқоннинг кўзи борлигини кашф этди. Кўрсичқон ер остида доим қоронғида яшаб, кундузги ёруғдан маҳрум бўлиб, кўзларини ишлатмагани сабабли кўр бўлиб қолган экан. Барча ҳайвонлар ва инсонлар учун кўз жуда муҳим аъзо. Аммо, күёш ёруғлиги бўлмаса, кўз ҳеч нимани кўролмайди.

Отаси Никомах унга табобатни ҳам ўргатган эди. У бу соҳада анча кашфиётлар қилди.

Бир сойнинг қирғоғига яқин ҳовузчада Арасту сом балиқ увулдириқ ташлаб, эллик кун пойлаб ётганини, увулдириклар майда балиқчаларга айлангач, она болаларини эргаштириб бу ердан кетганини кўрди. Демак, балиқлар ҳам ўз увулдирикларининг балиқка айланишини онгли равишда кутар экан.

Онг нима ўзи? Хусусан инсон онги. Ёруғлик бўлмаса кўз кўрмаганидай, ақл бўлгани билан онг бўлмаса, ақл ва билимлардан фойда йўқ. Инсон хулқида ақл муҳимми, дил, кўнгил муҳимми? Кўнгил неъматлари бўлмаса, фазилатлари бўлмаса, инсон ақлий қобилияtlарини заарарли мақсадга, ёмонликларга сарфлайди.

Тошлар, маъданлар, ўсимликлар, ҳайвонлар, инсонлар – моддий мавжудотларнинг бир-биридан жиддий фарқланувчи гурухлари. Тошларда, маъданларда ўсиш қуввати, озиқланиш қувватлари бор, аммо ўсимликлар ҳайвонлардай эркин ҳаракат қилолмайди. Инсонларда эса бу қувватлардан ташқари фикрлаш ва сўзлаш қувватлари ҳам бор. Яъни, инсон фикрловчи ва сўзловчи мавжудот. Жон, нафс, рух маъданларда ҳам, ўсимликларда ҳам, ҳайвонларда ҳам бор. Аммо инсон руҳи жуда мураккаб. Асослар, сабаб ва оқибат, умумий тушунча – категориялар ҳақиқатни билишга хизмат қилади. Давлат, сиёsat инсонларнинг турли гурухларга бирлаштиради ва ажратади. Адолат нима? Давлат бор жойда адолат ҳам, адолатсизлик ҳам бор. Мақдуния подшоҳи Филиппнинг Элладага кўшин билан хужум қилиши унга зарурият ҳам, эҳтиёж ҳам эмас эди. Бу ўз номи билан – босқинчилик. Афиналиклар иттифоқчилари Коринф, Фива қўшинлари ватан ҳимояси учун отландилар. Аммо Филипп қўшинлари қурол ва сон жиҳатидан кўплиги ва жангарилиги боис Афина ва иттифоқчиларни мағлуб этди. Херонея водийсида бўлган катта жанг шундай якунланди. Каллисфен Стагирага онасини, яъни Арастунинг синглиси Герони кўришга келиб, Херонея жангига тафсилотларини гапириб берди. Кейинроқ Александр ҳам ўз мактубида Херонея жангига отлиқ кўшинга қандай моҳирона раҳбарлик қилганини, шу вақтгача ҳеч кимга енгилмаган Фива фалангасини тор-мор келтирганини ёзибди.

“Александран Арастуга салом, – деб ёзганди у. – Энди айта оламанки, мен эллинларни енгдим, улар форсларни енгган эдилар. Демак мен форсларни ҳам енгаман. Биламан, бу ғалаба ҳам яқин.

Устоз, сен эришган ғалабанг шундан иборатки, Макдуниянинг бирорта ўқи ва найзаси Афина деворларига караб отилмади.

Филипп ўзини Элладанинг гегемони деб эълон қилди. У Фивада ҳарбий гарнizon қолдириб, Пеллага қайтиб келди. Ҳозир Пеллада базму зиёфатлар авжида, навбатдаги жанг бошлангунича кайфу-сафо давом этади.

Мен, устоз, бир нарсадан қўрқаман. Филипп бутун дунёни эгалласа, менга ҳеч нарса қолдирмаслигидан ташвишдаман”.

Бир йилдан сўнг Коринфда барча юонон полисларининг вакиллари йигинида Филипп Макдуний барча эллинларнинг стратеги<sup>1</sup> қилиб сайланди. У Форс юришига тайёрлана бошлади. Аммо у Макдуниянинг қадимий пойтахти Эггада зиёфат вақтида фитна ва қасос сабабли ўз тансоқчиси Павсаний томонидан ўлдирилди. Тарихда ўтган барча мустабидлар ва монархлар шундай ўлим топадилар. Александр Макдуния монархига айланди.

Филиппнинг ўлими ҳақидаги хабар шамол тезлигига Афинага ҳам етиб келди. Демосфен бу хабарни энг аввал эшитганлардан бири бўлиб, шодлиги чексиз эди. У ҳатто яқинда қизчаси вафот этганини, шу кунларда мотам либосида эканлигини унутгандай эди.

Демосфен Филиппнинг ўлими ҳақида хабарни эшитган заҳоти эгнидаги мотам либосини ечиб, байрамона кийим кийди, бошига ранг-баранг гуллардан чамбар қўндириди. Ҳолсизланган жисмига қувват бўлсин деб, бир қадаҳ май ичди. Чиройли хассаларидан бирини олиб, сояли уйидан қўёшли қўчага чиқди. Унинг яқинда қизчаси ўлганини билганлар тез хурсанд бўлаётганини кўриб ажабланар эдилар. У агорадан ўтиб, Булевтерийнинг янги биноси зиналаридан кўтарилиб, Беш юзлар Кенгаши мажлисига кирди. У кирган вақтида депутатлар Эгей денгизида Афина савдо кемаларининг сузишига рухсат сўраш ҳақида Филиппга юбориладиган мактубни қизғин муҳокама қилаётган эдилар. Мотамда бўлган Демосфенни бундай байрамона кайфиятда кўриб, ҳамма жим бўлиб қолди. Ҳеч ким уни бундай байрамона ҳолда кўришни кутмаган эди.

– Зўр гапни эшитинг: Филипп Макдуний ўлдирилди!

Депутатларнинг бу хабардан хурсандчилиги ҳам Демосфеннидан кам эмасди. Демосфен ўзи ҳам бу хабарни энди эшитгандай йиғлаб юборди, гапиролмай қолди.

Шовқин-сурон тинганида Демосфен ўзига келиб, деди.

– Филипп ўлгани ҳали бизнинг нажотимиз эмас, унинг ўғли Александр борлигини унутмайлик.

Мажлис аҳли яна қайфуга ботди. Демосфен депутатларнинг кўнглини кўтариш учун деди:

– Аммо Александр отаси Филиппдай айёр ва маккор эмас, у ҳали жуда ёш, еб-ичишни, базм-зиёфатларни яхши кўрадиган бир гўдак, болакай! У, Макдуниядан ташқарига чиқолмайди! Афина аҳли, севининг! Биз энди озодмиз!

Аммо Демосфен янглишаётган эди. Александр, у айтганча гўдак, болакай эмасди.

Арасту Беш юзлар Кенгашида Демосфен айтганларини Александр эшитиши билан Афинага қўшин суришини билгани учун, бу хавфнинг

<sup>1</sup> Стратег- йўлбошчи.

олдини олиш мақсадида тезликда Пеллага йўл олди. Аммо у кеч келганди. Александр Афинага қўшин тортиб келмоқда эди. Арасту шогирдини Фивага яқин жойда, чодирида учратди ва сўради:

– Қаёққа бораяпсан, Александр?

– Мен Афинага, Демосфенга болакай эмаслигимни кўрсатиб қўйиш учун бормоқдаман.

– Қизишмасанг, ўзингни боссанг яхши бўларди.

– Қандай қилиб ўзимни босаман. Бу ҳақоратга чидаб бўлмайди. Мен Афинани вайрон қиласман!

– Эфесда Артемида ибодатхонасига ўт қўйган Геростратдай ёмон отлиқ бўлиб шухрат қозонмоқчимисан?

– Мен Афинани забт этсам, Эллада шаъни учун, Ксеркс келтирган вайроналиклар учун форслардан қасос оламан. Мен Афинани жаҳоннинг пойтахтига айлантираман.

– Бу сенга бир баҳона. Хайрлашайлик.

– Шошмай тур, устоз. Аввал бир саволимга жавоб бер: агар мен Афинага юриш қиласам, сен ким томонда бўласан?

– Ёшим ўтган, соғлигим ночор бўлса ҳам, агар сен Афинага юриш қиласанг, қўлимга қилич олиб, Демосфен ёнида туриб, Афинани ҳимоя қиласман.

– Кетавер, устоз, билганингни қил. Аслида учрашмасак бўларкан. Сендан жангчи, мендан файласуф чиқмайди. Пешонада борини кўрамиз...

Арасту она юрти – Стагира га қайтди. Александр Афинага хужум бошлиш олдидан мудофаачиларга жангиз таслим бўлишни таклиф этди. Афиналиклар унга элчи юбориб, таслим бўлишганини етказдилар.

– Тасодиф маъбуди Тихе афиналикларни, мени ва Арастуни хижолатдан халос қилди. У Афина аҳлини – менинг қиличимдан, мени устозимнинг таъна-дашномидан, Арастуни – ўз шогирдидан юз ўгиришдан сақлаб қолди. Тихега шон-шарафлар бўлсин! Аммо Демосфенга айтиб қўйинглар: У мотам либосини ечишга шошмасин...

Александр Пеллага қайтиб келганида уни қўнгилсиз хабарлар кутарди. Шимолда Фракия халқи исён кўтариби. Фива аҳли эса ёш подшоҳ Александр Фракияда ҳалок бўлди, деган ёлғон хабаррга ишониб, бош кўтариб, Филипп замонида қолдирилган Мақдуния гарнizonини қириб ташлабди. Афинадаги ноиб Антипатр исёнларни бостиrolмагани учун Александрнинг ғазабланишидан қўрқиб, Афинани ташлаб кетибди.

Александр қўшини билан ўн икки кунда Фракиядан Фермопилага етиб бориб, фиваликларнинг илғор қисмларини мағлуб этиб, Фивага кириб, барча уйларга ўт қўйди. Фақат буюк шоир Пиндар яшаган уйга тегмади. Фива аҳлидан ўн икки минги қатл этилди, ўттиз минги қул қилиб сотилди. Эллада ҳалқлари бу шафқатсизликдан даҳшатга тушдилар.

Арасту норози бўлиб хат юборди: “Мен сени Элладанинг отаси бўлиб, ғамхўрлик қиласан, деб тарбия қилгандим. Сен нималар қилябсан?”

Александр жавоб мактубида ўзини оқлади:

“Ота ғамхўрлик қилиши учун фарзандлар одобли бўлишлари керак”.

## ЕТТИНЧИ БОБ

**Арасту ва Александр Макдуний**

Арасту кўп йиллар Макдунияда яшаб, Филиппнинг ўғлига устозлик қилиб, эллик ёшида Афинага қайтганида йигирма икки яшар Александр ўттиз беш минг пиёда ва беш минг отлиқ кўшинга бошлиқ бўлиб, Шарққа, Эрон тарафга бораётган эди.

Афиналиклар Арастуни совуқ кутиб олдилар. Сабаби аниқ – у Афинани босиб олган душман – Александрнинг устози эди. Академия боғи файла-суфлари, Афлотуннинг шогирдлари Арастуга хурмат билдирилас эдилар. Спевсип вафот этган, схолархлик Ксенократга қолган эди.

Арастунинг Афинага келишидан факат бир шогирди – Феофраст беҳад мамнун эди. У бир йил аввал Афинага қайтганди. Феофраст стагиралик алломанинг шогирди ва яқин дўсти эканлигини ҳаммага маълум қилди, Арастунинг барча илмий, фалсафий изланишларида бор куч-ғайрати билан ёрдамчи бўлди. Арасту аввал унинг уйида яшади. Кейинроқ шу шогирди ёрдамида Ликабет тоғи этагида бўлган гимнасийга қарашли уйлардан бирини сотиб олди ва ўз фалсафий мактаби – Ликейни ташкил қилди. Ликейнинг соя-салқин боғида қушлар сайрап, айвон-равоқларда ва хиёбонларда фир-фир шабада гуллар атрини сочар, ташқи оламнинг шовқин-сурони мактабга етиб келмас, роҳат-фароғат хукмрон эди. Лекин баъзан кечалари Арастунинг қулогига олисда кечаётган қирғин-барот жанглар, қилич-қалқонлар жарангি ва отларнинг кишинаши эшитилиб қоларди...

Александр устози олдидағи бурчи, вазифаларини унутмади. У тез-тез мактублар ва энг қимматлиси – қадимий пергамент китоблар, папирус битиклари ўрамлари, маъданлар ва ўсимликларнинг намуналарини, Миср ва Форс олимлари таърифлаган турли касб-хунарлар, санъатлар ва ҳайвонларнинг тавсифларини, шифобахш гиёҳлар ва гулларнинг уруғларини юбориб турди. Бир марта Александр устозига каттагина маблағ – бир неча талант олтин, кумуш юборди ва хатида бундай деди: “Устоз, сенинг ўз мулкинг, хўжалигинг йўқ, дарс берганинг учун пул олмайсан. Бу талантлар билан ўзингга яхшиижодий шароит яратиб ол. Бошқа илтиносларимни ўзинг биласан: кўхна дунё кашф этган барча илмларни, ихтиrolарни, фалсафий оқимларни ўрганиб, тартибга солиб, энг яхшиларини келажак авлодга мерос килиб қолдир”.

Арастунинг асл мақсади ҳам шу эди, бу мақсадни у Александр айтмасидан аввалроқ ўйлаб кўйганди. У шу вақтгача қадимги файласуфлар, замондошларидан Афлотун ёзиб қолдирган барча меросни, яна ўз кўзи билан кўрган, ақли билан топган барча билимларни рад этиб бўлмас, чин ҳақиқатларни тўплаб, яхлит ҳолга келтирмоқчи эди. У кўхна дунё охирлаб қолганини, қирғинлар, бало, оғатлар, ёнғинлар бағрида янги дунё туғилаётганини хис этар эди. Кўхна дунё асрлар, минг йиллар давомида топган донолик, ҳикматлар йўқолиб кетишидан кўрқарди. Уларни турли гард-ғуборлардан тозалаб, ўз кўли билан янги оламга топширмоқчи эди. Унинг энг улуғ орзуши шу эди.

Арасту қолган умрини шу ишларга бағишлади. Кечаю кундуз унинг кўлидаги Мемфис шакарқамишидан ясалган қаламининг сиёҳи қуримади. Ликей кутубхонаси тўлиб тошди. Йил сайин шогирдлари, ёрдамчилари

кўпайди. Баъзи шогирдлари Академия равоқларидан Арасту мактабига кўчиб ўтган эдилар. Арасту ҳам устози Афлотун каби оддий экседра қуриб олган, унда қатор узун курсилар, устоз учун стол, стул, деворда оқ доска ва баланд тагликда бронздан ясалган Ер шари бор эди. Бу ерда Арасту қадимий ва янги фалсафадан хабардор юқори курс талабаларига эрталаб дарс берарди. Оқшомлари эса Ликей Аполлони ибодатхонаси туташган боғ айвонларида ўн-ўн беш афиналик ва хорижлик фалсафа ихлосмандларига риторикадан<sup>1</sup> сабоқ берарди.

Барча инсонлар бирор мақсадга эришиш, бирор вазифанинг аҳамиятли, муҳим эканлигини исботлаш учун риторика илми қонун-қоидаларини билиши зарур. Нутқ турлари мақсадларига, вазифаларига қараб фарқланади. Барча одамлар турли мақсадларни кўзлайди. Мақсадларнинг энг юксаги – баҳт-саодатга эришиш. Аммо ҳақиқий баҳт-саодат нималардан иборатлигини тушуниб олмоқ керак. Донолар фикрича, баҳт-саодат – насл-насаб тозалиги, яхши, соғдил дўстларнинг кўплиги, бойлик, одобли, ақылни фарзандлар, неваралар, хотиржамлик, узоқ умр, соғлик, гўзаллик, файрат, иззат-хурмат; шон-шуҳрат, муваффакият, куч-қудрат, мансаб, хокимиёт демакдир.

Арастуда шулардан қайсилари бор? Насл-насаби табобат маъбути Аскленийга бориб тақалади. Аждодларидан бири, табиб Махаон Спарта подшохи Менелайнинг танасидан ўқни суғуриб олган. Яна бир аждоди Гиппократ эди. Арастунинг отаси Никомах эса Филиппнинг отаси Аминтанинг шахсий табиби эди. Арастунинг ўзи табиб бўлмаса ҳам, аждодларига муносиб шон-шуҳрат қозонди. Демокрит айтган эди: “Табиблар инсон танасини, файласуфлар эса унинг руҳини даволайди...”

Яхши дўстларнинг кўплиги, шогирдларнинг кўплиги. Бу жиҳатдан Арасту жуда баҳтли. Булар орасида Феофраст энг севимлиси, қадрлиси.

Авлодлари, фарзандлари кўплиги билан Арасту мақтанолмайди. Биргина фарзанди – қизи бор. Яна раҳматли опаси Аримнестанинг ўғли, жияни Никанорни онаси вафот этганидан сўнг ўғил қилиб олди.

Аёллар учун баҳт-саодат – гўзаллик, камтарлик, меҳнатсеварлик. Пифиада бу уч фазилат соҳибаси, демак, у баҳтли. Эркаклар учун баҳт-саодат – қад-қомат, куч-қудрат, эпчиллик, камтарлик ва жасорат. Никанорда бу фазилатларнинг ҳаммаси бор. Унга ўсиб, улғайса яна бошқа фазилатлар ҳам кўшилади.

Арастунинг ўзи йил сайин кўпроқ қарииди. Қарилик агар узоқ давом этса ва ташвиш, азоблари бўлмаса, шу ҳам баҳт-саодат. Гомер шу ҳакда ёзган:

*Гам-кулфат ўтиб кетса ҳам шодланур одам,  
Дарбадарлик тугаса, чидаса борига ҳам.*

Ха, ғам-кулфатлар ҳам, шодликлар ҳам ўтиб кетади. Фақат кексалик ўтиб кетмайди. У тобора забтига олади – бунда ўлим яқинлиги асосий ташвишга айланади, яна турли касалликлар қўшилади. Қарилик келгунича, инсон барча яхши ният, мақсадларини бажариб улгурса, бу яхши қариликдир. Деярли барча қариялар инжиқ ва қўрқоқ бўлиб қолади, улар ёшлар ёқтирган кўп нарсаларни хушламайдилар. Улар келажак умиди билан эмас, ўтмиш хотиралари билан яшайдилар. Кўнгил билан эмас, ақл билан иш кўрадилар. Кўп қариялар тунд ва қўпол бўладилар.

<sup>1</sup> Риторика – нотиқлик илми.

Аполлон ибодатхонасига кўп келиб турувчи тингловчи Эвномга бу гаплар ёқмади:

– Бас қилинг, устоз, қарияларни ёмонламант. Ўзингиз ҳам қарияпсиз. Биз ҳам қариймиз. Ёшлар ҳақида сўзланг.

– Ёшлик-бебошлиқ, – деди Арасту. – Улар ақл билан эмас, ҳис-ҳаяжон, эҳтирос билан яшайдилар. Ёшлар қизиққон, тез хафа бўлади, тез жаҳли чиқади, иззат-хурматни, ғолибликни яхши кўради. Улар келажакда баҳтли бўлишга умид ва ишонч билан яшайдилар. Ёшлар уятчан ва жасур. Ёшларнинг бир камчилиги – меъёрни билмай, ҳаддан ошадилар. Улар етти донишмандан бири Хилоннинг “Хеч бир ишда меъёрдан, ҳаддан ошманг” деган маслаҳатига амал қилмайдилар. Севса, қаттиқ севади, ёмон кўрса жуда ёмон кўради. Ёшлар кўп нарсаларни билмаса ҳам, биламан деб ўйлайдилар. Шу сабабли кўп ишларда ҳаддан ошадилар. Ёшлар кўпинча такаббурлиги сабабли адолатсиз, ноҳақ ишлар қиласидилар. Яна улар ишонувчан, кўпларни мард ва олижаноб деб ўйлайдилар. Ёшлар ҳазил-мазахни ҳам яхши кўрадилар. Ўткир гап айтиш ҳам аслида такаббурликнинг сайқалланган туриди.

– Болалик, ёшлик ва етукликни Солон бошқача тушунтирган, – деди яна ўша қизиқувчан талаба Эвном. – У айтганки, етти ёшида боланинг янги тиши чиқади, иккинчи етилиқда – ўспиринлик, учинчисида – балоғат, тўртингисида – етуклиқ даври келади, бешинчисида оила қуради, олтинчи-сида тафаккури етилади, еттинчи ва саккизингисида ақл-идроқи ва нутқи чархланади, тўқизингисида жасорат ўрнини донишмандликка бўшатади, ўнинчи етилиқда эса ажал яқинлашади. Афлотун ҳам “Қонунлар” асарида шу ҳақда ёзган. Устоз, шу ҳақда сиз нима дейсиз?

– Ёшлиқда, Эвном, фазилатлар кўп ва иллатлар ҳали жуда кам бўлади. Ёшлиқдаги озгина иллатлардан ҳам тарбия ёрдамида қутулиш мумкин. Қариганда эса инсон шунчалар кўп иллат орттирадики, улардан қутулиб бўлмайди. Ёш ўтган сари одамнинг ақли кўпаймайди. Ўқимаган қарияларга нисбатан, ўқиб, илм-маърифат олган ёшлар ақллироқдир. Билим олиш, ўқиш, ўрганиш ёшлиқда ҳам, қариларда ҳам фойдалидир. Инсон учун яхши қарыш доно, илм, маърифатли бўлишдир...

Арасту тингловчилар билан боғнинг олис хиёбонларида сухбатлашаётган вақтида уйидан бир қули келиб, унинг хотини вафот этганлигини айтди. Пифиада узоқ вақтдан бери касал эди, охирги кунлари аҳволи янада оғирлашганди. Аммо Арасту хотини бу қадар тез ўлади деб ўйламаганди. Сўнгги дақиқаларда хотинининг ёнида бўлмагани, ҳатто хайрлашолмай қолгани унинг учун жуда аламли эди. Ўлим, яқин одамнинг ўлими олимни ҳам гангитиб кўйиши табиий.

Арасту бир куни тингловчилари орасида Мақдуния подшоҳи Александрнинг Афинадаги ноиби Антипатрни кўриб қолди. Сухбат охирида Арасту ўзи унинг олдига бориб сўради:

– Сени бу ерда биринчи кўринишим, тансоқчиларинг ҳам йўқ. Тинчликми ўзи?

– Тансоқчиларим бор, факат улар кўринмайди. Мен соқчиларсиз Афинада бир қадам ҳам юролмайман.

– Демосфен эса бир ўзи юради. Сенга қийин, Антипатр.

– Шундай дейишади, лекин мен Демосфен билан кўришмайман. Бу ерга нима учун келганимни айттай. Иккаламизнинг шогирдимиз Александр баъзи

ишлиарда сендан норозилигини билдириб қўйишни сўради. Фақат хослар, подшоҳлар билиши керак бўлган сирли билимларни хаммага ўргатаётган эмишсан.

- Гапингга яхши тушунмадим, Антипатр? – ажабланди Арасту.
- Яххиси, бирор кун уйимга борсанг бу ҳақда бемалол гаплашиб оламиз.
- Ҳозир борсам бўладими?
- Ҳа, ҳозир вақтим бор.
- Жуда соз.

Афинада шу кеча Антипатр уйида икки дўст дастурхон устида узоқ сухбатлашдилар. Иккаласи қўпни кўрган, иккаласининг ҳам хотини вафот этган эди, шу сабабли улар ҳаёт ва ўлим, диний эътиқод, Эллада аҳли, Александр Шарққа силжиб, Ҳиндистонга юриш бошлагани, Афина ва Мақдуния муносабатлари, файласуфлар ва лашкарбошилар ҳақида сухбатлашдилар. Ҳар бир мавзуда гап айланиб, Александрга тақаларди.

- Ўйлашимча, Александрнинг шуҳрати сени янада машҳур қилмоқда.
- Ундан эмас, Антипатр. Фалсафа подшоҳларга муҳтоҷ эмас, подшоҳлар фалсафага муҳтоҷдор.

– Сен, Арасту, варварлар<sup>1</sup> Александрни Тангри деб, унга сифинишини маъқуллайсанми?

– Бу варварларнинг ихтиёри, Антипатр. Аммо Александр буни рад этиши зарур эди. Унга Тангри бўлиш нимага керак бўлиб қолибди?

- Бутун дунёни ўз қўлостида бирлаштириш учун.
- Менимча, Антипатр, ақлли йўлбошчилар ўзини Тангрига тенглаштиромайди. Фақат ўз ёвузликларини яширувчилар Тангриликка даъво қиладилар. Шу даъвони рад этган Клитни, Граника жангидаги уни ўлимдан сақлаб қолган Клитни ҳам Александр ўлдириди...
- Сен Демосфен каби фикрлаяпсан, Арасту...
- Сизлар Демосфенга Гарпалнинг хазинасини совурди деб, тухмат қилдинглар. Демосфен ҳозир қаерда? Соғ-омонмикан?
- Ҳа, Демосфен соғ-саломат, хавфсиз жойда – Эгинада.
- Ҳозир ҳалол одамларга кун йўқ бўлиб қолди.

– Бу масалада тортишмаганимиз маъқул, Арасту. Мен сени Александрнинг шон-шуҳратидан фаҳранади деб ўйлар эдим. Энди билсам, Александр сенинг дардинг экан...

Шундан сўнг Антипатр нима учундир Гермолай исмли ёш аскар Александрга сунқасд қилгани ҳақида сўзлади. Вокеа бундай бўлибди: Александр ўқ узмоқчи бўлиб турган тўнғизни Гермолай аввал отиб қўйипти. Бу беодблиги учун ёш аскарни жазолабдилар. Ўзини айбисиз ҳақоратланганига норози бўлган Гермолай бир неча дўстлари билан Александрга сунқасдни режалаштирган. Аммо фитначининг шерикларидан бири бу сирни Александрга етказган. У фитначиларни тутиб қат этган...

– Бу гапларни нима учун менга айтаяпсан? – хушёр тортди Арасту.  
– Фитначи Гермолай сенинг жиянинг Каллисфен билан яқин дўст экан. Гермолай бир куни ундан “Машҳур одам бўлиш учун нима қилиш керак?” деб сўраганида Каллисфен “Машҳур бўлиш учун машҳур одамни ўлдириш керак”, деб жавоб берипти.

– Каллисфен бундай дейиши мумкин эмас. Мен уни биламан. Александр яхшилаб суриштиради ва Каллисфенни жазоламайди. Антипатр, мени

---

<sup>1</sup> Варварлар – қадимги Гречияда маданиятдан орқада қолган чет элликларга берилган ном.

Александринг ўзини Тангри деб эълон қилишидан ҳам кўра уришнинг кўп йилларга чўзилиши ташвишга солмоқда. Адолатли уруш тинчлик ўрнатиш учун бўлади. Демак, бу бошқача уруш экан. Бу уруш билан жуда кўп мамлакатларда, чексиз худудларда тинчлик ўрнатиб бўлмайди. Мабодо, бу уруш тугаса ҳам, биз, фолиблар бу қадар қурдатли салтанатни адолатли бошқаришга кучимиз етмайди. Бундай салтанат, Антипатр, узок яшолмайди. Бир куни кулайди. Эллада ҳам вайроналар остида ҳалок бўлади. Антипатр, сен билан мен насиҳатларимиз билан тарбия қилган шогирдимиз, жуда ҳаддидан ошиб кетди. Инсон ўзининг инсонлик ҳаддини билиши керак...

Арасту уйига қайтиб, Антипатр олиб келган Александринг мактубини ўқиди. Унда қуйидаги сўзлар бор эди:

“Александр Арастуга соғлик, омонлик тилайди. Сен, устоз, фақат хос одамлари даврасида ўқиш мумкин бўлган илмларни ҳалқقا ўргатиб, хато иш қилибсан. Мен фақат ҳарбий куч-қурдатда эмас, балки барча олий илмларда ҳаммадан кучли бўлишни истайман. Олий билимларни ҳаммага ўргатаверсанг, бизнинг бошқалардан фарқимиз қолмайди-ку? Хайр”.

Арасту бу мактубга қандай жавоб ёзишни ўйлаб юрганида жияни Каллисфеннинг ўлими ҳақида хабар келди. Олис Сўғдиёнада Александр ўз тарихчиси Каллисфенни фитна ташкил этишда айблаб, ўлимга ҳукм қилган эди. Бу хабар Каллисфен қатл этилгандан беш-олти ой кейин етиб келган бўлса-да, Арасту бу даҳшатли воқеани ҳозир, кўз ўнгидаги содир бўлганидай, қаттиқ қуюнди. “Александр синглимнинг ўғлини менинг хурматим учун ҳам кечирмабди!” деб ўйлади Арасту. Унга бу хабар икки жиҳатдан қайғули эди. Биринчидан, Александр Шарқ ҳалқлари қонини тўқавериб, феъли ўзгарибди. Иккинчидан, устозининг насиҳатларини менсимай, унга хиёнат қилибди. Арасту кўнглида илк бор машҳур шогирдига хурмат ўрнида нафрат уйғонди.

Аслида Александрга суиқасдга Каллисфен аралашмаган эди. Бу ҳақда Арастуга Александр бошлаган урушларда ҳалок бўлган бир шогирдининг отаси гапириб берди. Бу мақдуниялик ота ва ўғил Александринг яқин хизматчилиридан экан. Унинг ўзи Арастуни излаб келди. Каллисфен ўлими хабарини эшитгач, орадан бир ҳафта ўтиб Арасту Ликейда эрталабки дарсни тутатиб, уйига қайтаётган эди. Ўз исмини ҳам айтмаган нотаниш одам унга мурожаат қилди:

– Александр жиянинг Каллисфенни ўлимга ҳукм қилган базмда мен ҳам бор эдим. Истасанг бўлган воқеани айтиб бераман.

Арасту ўйлаб ўтирмай, рози бўлди ва нотаниш кишини шаҳардан четроққа, Илис анхори соҳили томонга бошлади.

– Мана бу арчазор сўқмоқдан юрайлик, одамлар учрамайди бу ерда,  
– деди Арасту. Сўнг нотаниш кимса Александринг айғоқчиси бўлиши мумкинлиги эсига тушиб, ҳушёр тортди. У тўхтаб:

– Сен кимсан ўзи? – деб сўради.

– Мен сени Мақдунияда, Миеза боғида, нимфалар айвонида болаларга дарс бераётганингда кўп учратганман. Сен Александр билан бирга Каллисфенга, Гефестионга, Каллипга сабоқ берардинг. Шулар орасида менинг ҳам ўғлим борлигидан баҳтли эдим. Шу болаларнинг ҳаммасини

Александр аҳмокона қирғин-баротларига ўзи билан олиб кетди. Жуда кўп истеъоддли йигитлар жангда нобуд бўлди. Агар маъбуллар Александрни ҳам ўлдирсалар, адолатли иш бўлур эди...

– Менга бундай сўзларни айтишга қўрқмайсанми? – сўради Арасту.

– Йўқ. Каллисфен қандай ўлганини эшитсанг сен ҳам Александрга ўлим тилаб коласан.

– Александр уни зиёфат вақтида ўлимга ҳукм қилди, дедингми?

– Шундай. Александр Сўғдиёна князи Оксартнинг соҳибжамол қизи Роксанага уйлангани шарафига зиёфат бераётган эди.

– Ўлимга ҳукмлар энди зиёфатларда чиқариладиган бўлдими?

– Ўн йиллар аввал Филипп ҳам тўй вақтида ўғли Александрга қилич ўқталган эди.

– Мен у тўйда йўқ эдим. Сўғдиёнадаги тўйдан гапир.

– Тўйда маъбуллар шарафига май ва мой сепиб, қурбонлик қилингач, файласуфлардан Анаксарх биринчи бўлиб сўз олди ва барча меҳмонларни шарқона одатга мувофиқ илоҳ Александрга сажда қилишга таклиф этди. Бу аслида учига чиқкан хушомадгўйлик эди. Абдералик Анаксарх эсингдами?

– Давомини айт, – деди Арасту хўрсиниб.

– Форслар ва мидияликлар Александрнинг таклифига қарсак чалдилар. Шунда Каллисфен ўрнидан туриб: “Анаксарх дўстимиз ва йўлбошчимиз Александрни биздан узоқлаштириб, форслар ва мидияликларнинг маъбуллари қаторига қўшиб қўймоқда”, деди.

– Яхши айтибди, – деди Арасту кулимсираб. – Каллисфен ноқулай бўлсаям, тўғри фикрни айтган.

– Каллисфеннинг сўзларини эллинлар ва мақдунияликлар маъқуллаб, қарсак чалдилар.

– Александр-чи, у нима деди?

– У индамади. Лекин базм охирида у Каллисфенни ўпмай хайрлашди. Александр дўстларидан хурсанд бўлса ўпиб хайрлашади, хафа бўлса, ўпмайди.

– Буни менга айтган эдилар. Демак, шу нарса ўлимга ҳукм экан-да?

– Каллисфен бундай ўйламади. У “Мен фақат бир бўсани йўқотдим”, деб ҳазил қилди. Аммо у ҳаётини йўқотган эди.

– Демак, бу ҳали ўлим ҳукми эмас экан-да?

– Александр ўлим ҳукмини дарҳол чиқармади. Шу базмдан кейин Каллисфеннинг дўсти Гермолай Александр мўлжалга олган тўнғизни отиб қўйди. Шунда Александр жаҳл билан Гермолайнин дарра билан урдирди ва отини тортиб олди. Гермолай бу ҳақоратга чидолмай, дўстлари билан Александрга суиқасд тайёрлади. Александр буни билиб қолиб, Гермолайнин ва дўстларини қатл этди. Ана ўша вақтда у Каллисфеннинг базмдаги нутқини, форслар ва мидияликлар учун Тангри бўлишига тўсқинлик қилганини эслаб қолди. Гермолайнин Александрга суиқасд қилишга Каллисфен қайраган деб айблаб, уни ўлимга ҳукм қилди.

– Уни қийнаб ўлдиришдими?

– Ҳа, қийнаб ўлдиришди.

– Каллисфеннинг айби ўйқлигини кўпчилик билармиди?

– Биларди, аммо жим эди.

– Ҳеч ким уни ҳимоя қилмадими?

– Александрнинг ғазабидан ҳеч кимни ҳимоя қилиб бўлмайди.

– Ёш Гермолай ўз шаънини ҳимоя қилибди-ку.

– Оқибати нима бўлди? Ўлим, ўлим ва яна ўлим. Александр ўлим маъбути бўлиб қолган.

Устознинг маслаҳатларига қулоқ солмган шогирд, файласуф, дошишманлардан билим, маърифат олмаган подшоҳ қилмишлари учун келажак авлоднинг олдида жавоб беради. Макдуниялик нотаниш киши навқирон ўғлидан айрилганидан, уни Александр ўлдирганидан куюниб, “Бу ўлимларга чек қўйиш учун, Арасту, сен заҳар тайёрлаб, Александрнинг ҳаётига нукта қўйишинг керак” деди. Аммо мақдуниялик жангчи ўз исмини ҳам, ўғлининг исмини ҳам айтмади.

Арасту содик шогирди Феофрастга бу сухбатни айтиб берди. Шогирдининг “Энди нима қилмоқчисиз? Заҳар тайёрлайсизми?” деган саволига “Фалсафа ҳеч кимни заҳарламайди, у фақат одамийликка чақиради” деди.

– Мен унинг ёнига бораман, Феофраст. У инсонлигини унугибди. Маъбуд бўлмоқчи. Ёки инсонларнинг инсонга ўхшамайдиган янги тури пайдо бўлдимикин. Ёки, инсон руҳига ажиналар, девлар кириб олдимикин? Бундай одамни соғайтиришга фалсафанинг ҳам кучи етмайди, деб кўрқаман. Шундай кучли қурол ҳам бу дард олдида заифлик қилса-я?

– Фалсафа кучли қуролга аланиши учун, устоз, уни уч-тўрт одам ўрганиб қолмай, минглаб, миллионлаб одамлар ўрганиши зарур. Гарчи геометрияда бир тўғри чизиқ минглаб чизиқларнинг эгрилигини кўрсата олса ҳам...

Мақдуниялик нотаниш одам яна икки марта келди. Аммо Арасту касаллигини айтиб, у билан гаплашмади, тўғриси, сухбат қилишни истамади. Чиндан ҳам бу қайғули хабарлар уни касал қилиб қўйди. Шу сабабли, Бобилга боришга, Александрни кўришга ҳоли етмади. Умри поёнига етаётганини сеза бошлади ва буни фақат Феофрастга билдириди. Доимо бемор устози ёнида энага каби ўтирган Феофрастнинг гўё бундан бошқа иши йўқдай эди. Арасту не-не буюк орзу-умидлар билан тарбия қилган подшоҳ Александрнинг ёвузлашиб, умидларини оқламаганидан эзиларди. Феофраст устозини бундай тушкунликдан куткариш учун унинг жуда кўп буюк асарлар ёзганини эслатиб, асарлари рўйхатини тузиб, ўқиб берди:

“Адолат ҳақида” – тўрт китоб, “Шоирлар ҳақида” – уч китоб, “Давлат арбоби” – икки китоб, “Риторика” – уч китоб, “Невъматлар ҳақида” – уч китоб, “Баҳсли масалалар” – икки китоб, “Этика” – бир китоб, “Биринчи аналитика” – саккиз китоб, “Иккинчи аналитика” – икки китоб, “Табиат ҳақида” – уч китоб, “Софист”, “Менексен”, “Базм”, “Севги ҳақида”, “Бойлик ҳақида” “Рағбатлантириш”, “Рух ҳақида” – уч китоб, “Метафизика” – ўн икки китоб, “Категориялар”, “Герменевтика”, “Топика” – саккиз китоб, “Софистик раддиялар ҳақида”, “Физика” – саккиз китоб, “Осмон ҳақида” – тўрт китоб, “Метеорология” – тўрт китоб, “Пайдо бўлиш ва йўқолиш ҳақида” – икки китоб, “Никомах этикаси” – ўн китоб, “Катта этика” – икки китоб, “Сиёсатшунослик” – саккиз китоб, “Поэтика”, “Ҳокимият ҳақида”, “Тарбия ҳақида”, “Роҳат-фароғат ҳақида”, “Бир юз эллик саккиз хил давлат тузуми ҳақида”...<sup>1</sup>

Феофраст рўйхатни охиригача ўқиб бўлиб, деди:

– Устоз, сиз жуда кўп ва буюк асарлар ёзгансиз.

<sup>1</sup> Бу рўйхатни бошқа манбаларга қараб, тўлдирдик (тарж.).

– Тўғри айтасан, жуда буюк бўлмаса ҳам, муҳим масалалар ҳақида ёзганман. Аммо кўнглим сезаяпти, бундан кейин жуда нотинч, низо-жанжалли, қирғин-барот урушларга бой вайрона замонлар келади. Бу асарлар ана шу замонларда йўқолиб кетишидан кўрқаман, Феофраст. Сендан ягона илтимосим – шогирдларимизни ва китобларимизни турли фалокатлардан, ёнғинлардан асрашга харакат қил. Файласуфлар бир-бирини қўллаши зарур. Устозимиз Афлотун ҳам шундай дерди. Аввалги файласуфлар, Афлотун ҳам бутун инсоният ҳаётидаadolat, ҳақиқат, тинчлик, меҳр-муҳабbat, яхшилик ғалаба қилиши учун курашганлар, аввалгилар бу курашда енгилган бўлсалар, кейинги файласуфлар бу курашни давом эттирганлар. Faқat донишмандлар, файласуфларгина халқларгаadolat ва ҳақиқат, баҳт-саодат нималигини тушунтира оладилар...

Бу баҳор қария Арасту ҳаётига баҳт-саодат олиб келди. Ёши олтимишдан ўтганида, ёшлигиде севган соҳибжамол Герпиллида Арасту хонадонига баҳордай кириб келди. У баҳор билан бирга донишманд қалбига кўм-кўк майсаларни, гул-чечакларни, борликни тозаловчи ёмғирларни, паға-паға оқ булатларни, ғир-ғир эсган шабадани, юлдузли, ойдин кечаларни олиб келди. Бу гўзал аёл Арасту ётган хонага баҳорнинг ilk гулларини олиб кирди, деразаларни очиб, тоза ҳаво киритди, қушларнинг сайрашига эътиборини қаратди. Арастунинг қалбига бу гўзал аёл билан бирга олис ёшлиқдаги баҳтиёр лаҳзалар, севинч, шодликлар қайтиб келди.

Арасту ёшлиқ даврини, ёш Герпиллида ва Феофраст билан Парфенон олдида туриб, оламнинг маркази ва коинотнинг мангулиги ҳақида, ўзлари ҳақида тўлиб-тошиб гапирганини эслади.

Қария Арасту аввал Герпиллидани танимади. Феофраст айтганидан кейин таниди.

– Мен бетоблигимда шогирдларимизга қараб турибсанми? Чамамда узоқ вақт хушсиз ётганга ўхшайман. Тўғрими?

– Кеча нима бўлганини эслайсизми, устоз? – сўради Феофраст.

– Қандайдир ёш аёл келиб, менга аччиқ дамлама ичирди, жуда аччиқ...

Кеча шундай бўлганмиди?

– Бу – кечаги эмас, ўн етти кун аввалги воқеа. Аччиқ дамламани сизга Герпиллида ичирган.

– Қайси Герпиллида? Мен уни танийманми?

– Таниганда қандоқ? Уни ёшлигинингизда севиб қолган эдингиз. Қақирайми? Кўриб танирмикансиз?

– Қақир. Бир вақтлар Герпиллида исмли қизалоқни яхши танир эдим.

Гулдаста кўтарган гўзал бир аёл кирди, салом бериб, каравоти четига ўтириди, яшноқ гулдастани беморнинг кўксига қўйди. Арасту гулдастани олиб, ҳидлади ва аёлга узоқ қараб қолди, сўнг деди:

– Эсладим. Герпиллида, сени эсладим.

– Мен эсам, Арасту, сизни ҳеч қачон унутмаганман.

– Сен тез кетиб қолмайсанми?

– Қанча вақт тур десангиз ўшанча турман.

Герпиллида яна уни парвариш қилишда давом этди. Бир неча қундан сўнг Арасту кўнглидаги гапни айтди.

– Герпиллида, доимо ёнимда қол.

Аёл қўли билан юзини яшириб, йиғлаб юборди.

- Нимага йиглаяпсан?
- Кўп йиллар сизсиз яшаганимга, сиз билан эса кам яшшимга йиглаяпман.
- Бу гапни нега аввалроқ айтмадинг? Бирга йиглар эдик, – кулмсиради донишманд.

Арасту соғайиб, оёққа турди. Парфенонни кўришга бирга бордилар.

- Бу ерда ёшлигимида айтган гапларингиз эсингиздами?
- Эслайман, лекин ўша вақтдаги каби жўшқин айттолмайман. Бунинг зарурати ҳам йўқ. Афина Промахос наизасининг олтин учи қўёш нурларида ярқираши ҳозир мени ҳаяжонга солмайди. Ҳозир менинг хаёлларим жуда узокларга,adolat, ҳакиқат яшайдиган жойларга кетиб қолган. Мени нима ўйлантиради, айтами, Герпиллида? Замонлар ўтиб, Ер юзида барча қашфиётлар йўқ бўлиб кетса, уларни билимларсиз яна тиклаб бўлмайди... Ёки одамлар ёввойилашиб кетса, яна маданиятли инсон бўлиш учун кўп минг йиллар ўтади... Барча мавжудотлар ҳакида ўйлаш зарур. Бу билимларни ҳозирнинг ўзида бутун Ер юзи ҳалқларига тарқатиш керак. Ана шунда вайроналар, култепалар ўрнида яна боғлар, қаср, маънавият хазиналари қайта тикланади...

Бу фикрларга Герпиллида эътиroz билдириди:

- Ҳозир ҳам Ер юзи обод-ку? Обод шаҳарлар, дала, боғлар яшнамоқда, одамлар хотиржам меҳнат қилмоқдалар. Ёнғинлар алангаси, қиличлар жаранги йўқ. Ақл-идрок бизни буюк, муқаддас ҳакиқатларга бошлайди. Ақл ва кўнгил бирлашса, инсонлар камол топади.

Куёш уфқка бош қўйди. Акрополда одамлар сийраклашди. Оқшом тунга алмашди. Афинада базм, ўйин-кулги, севги қўшиклари, туғилиш ва ўлим, умид ва қайгу, кўнгилли ва қўрқинчли тушлар билан тўла тунги ҳаёт бошланди. Майдонлар ва хиёбонлар кезган одамлар ўз уйларига қайтдилар. Аммо бу уйларда ҳам ором, тинчлик йўқ эди.

– Биз ҳам уйга қайтамиз, Герпиллида, – деди Арасту. – Ҳаётимизнинг янги даврига қадам қўйдик. Мен бундан хурсандман.

- Яна бир нималарни айтинг, – қистади Герпиллида севинч билан.
- Истасанг, айтавераман... Сен келиб, бузилган кўнглимни обод қилдинг. Бизга энди ёшлик қайтмаса ҳам, мен ўзимни баҳтли ҳис қилмоқдаман. Салқинлик берувчи шабаданинг қувватини қара. Эрехтейон олдидаги кекса зайдун дарахти яна янги шох-бутоклар чиқарган. Зайдун биздан минг йил кўпроқ яшайди. Кумушранг барглари шамолда тебранади. Сен мени ажойиб жойга бошлаб келдинг. Акрополь – дунёнинг маркази бўлмаса ҳам Фидий, Иктин, Калликрат каби меъморларнинг дахоси билан бино бўлган. Инсон бу гўзалликлардан бир олам завқ олади.

Арасту умрининг охирида Герпиллида келиб, соғлиги ҳам анча яхшланди. Энди у ёлғиз эмасди. Яна ҳаракатчан, ғайратли бўлиб қолди. Гапириб, ўйлаб, ёзиб чарчамасди. Бир ишдан дам олса, иккинчисини бошларди. Аммо, ҳаёт қувончлари ҳам яқинда тугаши уни хафа қиларди. Яшнаган майсазорлар, муаттар, анвойи гуллар, сайроқи қушлар – барча гўзалликларни бошқа кўрмаслик, эшитмаслик вақти яқинлашмоқда эди. Яхшиямки, умрининг охирини оқкўнгил, соҳибжамол Герпиллида безаб турибди. Яқинда у билан ҳам мангуга хайрлашади. Усиз бу аёл қийналиб қолмасмикин...

Аввал лашкарбоши Гефестионнинг ўлими ҳақида хабар келди. У Александрнинг қадрдон дўсти эди. Александр ғазабланиб, “ён дўстимни даволай олмадинг”, деб табиб Главкни ўлдирибди, Гефестионни жангда ярадор қилган мидияликларнинг бутун бир қабиласини қириб ташлабди. Мусиқани, ўйин-кулгини таъкиқлабди. Форсларга ўхшаб, отларнинг ёлини қирқибди, яқин атрофдаги шаҳар-қалъаларнинг минора ва шинакларини буздириб ташлабди. Дўстининг дабдабали дағн маросимига ўн минг талант кумуш ва тилла сарфлабди. Гефестионнинг жасадини ёкиш маросимига минг тўсиндан иборат эхром қурдириб, кўп хушбўйликлар сепиб, дўстини унинг устига ўзи кўтариб олиб чиқибди. Ўзи машъала тутиб, эхромни ёндирибди. Ёғочлардан иборат эхром уч кеча-кундуз ёнибди. Александр уч кеча-кундуз гулхан ёнидан кетмабди...

Бир неча ойдан сўнг эса Афинага бутун дунё ҳукмдори, Зевс-Амон ўғли, Александр Макдунийнинг ўлими ҳақида хабар келди. Александр аслида Филипп ва Олимпиаданинг ўғли эди...

Бу хабарни бир неча кунгача Арастуга билдирамай туришди. Аммо, мишишлар унинг қулоғига етди. Феофрастдан сўради:

– Ким ўлибди? Ҳамманинг оғзида шу гап? Ё мен ўлдимми?

– Сиз эмас, Бобилда Александр ўлибди.

– Афинада не аҳвол?

– Жарчилар халқни Кенгашга чорламоқда. Халқ қувғиндаги Демосфенни ватанига қайтаришни талаб қилмоқда. Леосфен Александрнинг ноиби Антипатрга қарши урушга тайёргарлик кўрмоқда. Ҳамма мақдунияликларнинг асоратидан кутуламиз деб шодланмоқда.

– Сен ҳам, Феофраст, хурсанд кўринасан?

– Албатта. Устоз барча эллинлар хурсанд. Афина озод бўлади.

– Озодлик – буюк неъмат, Феофраст. Аммо ҳар қандай озодликнинг замини мустаҳкам бўлиши керак. Ана, итлар ҳам эркин, аммо дуч келган одам уларни тепади.

– Устоз, сиз Александрнинг ўлимидан хурсанд эмасмисиз? Ундан нафратланаётган эдингиз-ку? У Каллисфенни ноҳақ ўлдирган. Александр Каллисфен учун сизни ҳам жазоламоқчи эди.

– Жазоламоқчи эди? Мени-я?

– Ҳа, сизни. У дўстларига ёзган мактубларида сизни Каллисфен фитнаси учун жазолайман, деб ваъда қилган. Буни сизга айтмай юрган эдик. У сизни ерга уриши учун Ксенократга эллик талант мукофот юборган. У сизни фитначилар тарафдори деб ўйлаётган экан.

– Ундай бўлса афиналиклар мени Александрнинг одами деб жазолашибдан ҳавотирланмасам бўларкан-да?

– Устоз, сиз Александрни яхши кўрармидингиз?

– Александрни янги дунё бунёдкори деб яхши кўрган эдим. Унинг ўлимидан хурсанд эмасман. Сен хурсанд бўлавер. Мен ҳам яқинда сафарга йўл оламан.

– Қанақа сафарга, устоз?

– Яқинда билиб қоласан...

Фалсафа мактаби – Ликей синфлари, кутубхона, боғ ва хиёбонлар хувиллаб қолди. Одамлар нотиқлар нутқ сўзлаётган Афина шахри майдонларига ошиқарди. Беш юзлар Кенгаши ҳар куни мажлис қилар, нотиқлар майдонларда кундузи ҳам, кечаси, ой ёруғида ҳам Булевтерийдан Элевси-

нийга, у ердан Тесей ибодатхонасига, у ердан Панафинеялар майдонига, у ёқдан Акрополга, у ердан Пирейга кўчиб, воқеаларни муҳокама қилар эдилар.

Беш юзлар Кенгашини чақиравчи пританларга, қозиларга, ҳокимларга, коҳин-руҳонийларга, маҳбуслар ва жаллодларни назорат қилувчи Ўн бирлар ҳайъати аъзоларига ишлар кўпайганидан кўпаяверди.

Афиналиклар уйқуни ҳам, байрамларни ҳам, тўйларни ҳам унугиб, мамлакат, давлат, ватан тақдирини ўйлар эдилар.

– Ликейда ҳеч ким қолмади. Ҳатто Феофраст ҳам қаёққадир йўқолди. Бу фалокат, Герпиллида. Аммо менга яна яхши.

– Нимаси яхши? Кун бўйи ёлғиз боғ айланасиз. Ўқимайсиз, ёзмайсиз. Ҳатто мен ҳам ёрдам беролмаяпман...

– Сен энг ажойиб ёрдамчисан, Герпиллида. Сен мени яна ҳаётга қайтардинг, яхши-ёмон кунларимда ёнимда бўлиб, далда бердинг. Кошки, баҳтли ҳаётимиз узокроқ чўзилса... Дарвоқе, Афина билан хайрлашув вақти келди. Сен ҳам тайёрлан, Герпиллида. Уй бошқарувчини Пирейга, кема ёллашга жўнатдим. Эвбяега кетамиз, эҳтимол доим энди ўша ёқда яшармиз...

– Кутубхонамизни олиб кетмаймизми?

– Йўқ, уни Феофрастга қолдирамиз.

– Уйимизни сотмаймизми?

– Йўқ, унда Феофраст яшайди.

– Шогирдлар-чи?

– Улар сиёsatга қизиқиб кетдилар.

– Шошмасак бўларди. Антипатр Фессалиядан кўшин билан келаётган экан...

– Унга Леосфен қаршилик қиласди... Бу саркардалар Афина тақдирини ҳал қилгунча, афиналиклар менинг тақдиримни ҳал қилиб қўйиши мумкин. Уларни тушунаман. Улар босқинчи ҳукмдор билан яқин бўлган одамлардан шаҳарни тозалашни истайдилар. Озодалик ҳавоси одамни маст қиласди.

Яrim кечада Феофраст келиб, устозини уйғотди.

– Сиз афиналиклар ҳақида тўғри айтган экансиз. Икки кундан сўнг баси-левс<sup>1</sup> “Арасту иши”ни кўриб чиқиб, сизни имонсиз деб, қонун ҳимоясидан чиқарар экан. Бу эса ўлимга ҳукм дегани.

– Мен қайси ишим билан имонсизлик қилибман?

– Кенгаш аъзоларидан кимдир Атарнея мустабиди Гермий шарафиға мадҳия ёзганингизни эслаб қолибди. Шу сабабли сизни Гермийни маъбуд Аполлонга тенглаштирган, бу эса маъбудларга қарши иш, деб ҳукм чиқарибдилар.

– Бошқа тузукроқ баҳона тополмабдилар-да. Агар излашса топишарди. Мен барча маъбудларни тан олмай, фақат ҳақиқатга ишонганман. Мен шундай бир одамни тарбияладимки, унинг олдида барча маъбудлар – Афина ҳам, Аполлон ҳам, Зевс ҳам ҳеч ким бўлиб қолди. Мени шу сабабли жазоласалар адолатли бўлур эди. Лекин афиналикларнинг мақсади – мени фақат ўлдириш эмас, шаънимни ерга уриш, оёқости қилишдир. Афиналиклар Сукротни ҳам, Фидийни ҳам буюк ишларига ҳасад қилиб, оёқости қилдилар. Мен уларга яна бир марта фалсафани ерга уриб, жиноят қилишларига йўл қўймайман...

<sup>1</sup> Басиlevs – Афина Кенгashi бошлиғи.

Пирей соҳилига тонгда етиб келдилар. Бу ерга бири отда, бири аравада минг-минглаб одамлар ошиқмоқда эдилар. Устоз Феофрастдан сўради:

– Булар ҳам биз каби қоюқларми?

– Йўқ, булар барчаси Демосфенни буюк қаҳрамон сифатида кутиб олиш учун келмоқдалар.

– Афиналиклар Демосфенни Александрнинг хазиначиси Гарпалнинг эллик талант маблагини ўғирлашда айблаб қамаган эдилар-ку?

– Демосфенни қамоқдан қочириб, қутқарганлар ҳам афиналиклар.

– Афиналикларнинг меҳри ҳам ўзгариб тураркан-да.

Демосфен келиб, Пирейга триерадан тушган вақтида Арасту, Герпиллида, кичик Пифиада ва Никанор Эвбеяга борадиган кемага юклари билан чиқиб олган эдилар.

Халқ Демосфенни шовқин-сурон билан шарафлаб кутиб олаётганини кўриб, Арасту ҳам севинди. Демосфен кема зинасидан тушиб соҳилга қадам қўйиши билан минглаб ёшлар уни кўтариб, Афинага қараб юрдилар.

Арасту шогирди Феофрастга кўнглидаги айтди:

– Аввал қувилган Демосфенни ҳозир ҳалқи шарафланмоқда, мен эса бу ердан шармандаларча қочаябман. Бундан чиқди, Феофраст, ҳалқ учун ҳақиқат, ҳикматдан кўра озодлик азизроқ экан. Аммо бир замонлар келадики, озодликни топиш учун ҳақиқатни билиш кераклигини тушуниб қоладилар...

Кема дарғаси йўловчиларни шоширди.

– Тезроқ хайрлашинг! Йўлчи шамол биз учун эсмоқда.

Ёлғиз қолаётган Феофраст йиғлагудек эди:

– Энди нима қиласиз, устоз? Энди қаҷон курашамиз? Афинага яна келармикансиз?

– Билмадим, Феофраст. Китобларни асра. Ўзингни асра. Дўстларни асра. Бугун мен Демосфенга ҳавас килдим. Вақти келганда у ҳам менга ҳавас қиласи. Дўстим Феофраст, яхши қол!

– Яхши боринг, устоз!

Арасту ва Демосфен Пирейдаги ғойибона учрашувдан бир йил ўтиб, деярли бир вақтда, Эллада ерларига куз барглари тўкилган, қалин туманлар тушган ойда вафот этдилар. Иккаласи Афинадан узоқдаги оролларда, Арасту – Эвбеяда, Демосфен Калаврия оролида, бири касаллик заҳридан, бошқаси ўзи қамиш қаламида яшириб, асраган заҳарни ичиб, ҳалок бўлдилар. Улар бир-бирларининг ўлимидан хабар топмадилар. Аммо иккаласи ўлими олдидан Афина тақдирини ўйладилар. Мақдунияликлар Демосфен яширинган Посейдон ибодатхонасини қуршаб олган вақтида, у душманга асир тушмаслик учун ўз ихтиёри билан заҳар ичди.

Арасту ўлими олдидан ётган жойидан туриб ўтириб:

– Ҳой, ким бор? Мана бу сўзларимни ёзиб олинглар: “Мустабид подшоҳга маърифат бериш керакмас. Ҳалқа маърифат бериш керак. Бу сўзларимни ёзиб кўйинг!” – деб ҳайқирди.

Герпиллида хонага югуриб кирганида устоз тилдан қолган, жони узилган эди. Буни билиб Герпиллида ҳушидан кетди. Уни ҳушига келтирғанларида ундан устознинг охирги сўзларини сўрадилар. У эслай олмади ва йиғлаб юборди...

## Ян ПАРАНДОВСКИЙ

(1895–1978)

## СҮЗ КИМЁСИ<sup>1</sup>

*Рус тилидан  
Мирзаали АКБАРОВ  
таржимаси*

### ЯШИРИН ИТТИФОҚЧИ

Адабий асар жамиятдан ташқарида мавжуд бўлмайди. Албатта, унинг нутқ қобилиятига эга фикрловчи одамлар мухитидан чиқарилган ёлғиз шахс томонидан яратилишини тасаввур қилиш мумкин, бироқ бу шу қадар фавқулодда ҳолат бўлардики, у билан ё фантастлар ёки патологик ғалатиликларни тадқиқ этувчи кишилар шуғулланади. Башарти ўз кечинмалари ва мулоҳазаларини ёзма шаклда абадийлаштирас экан, на маҳбус, на таркидунёчи зоҳид жамиятдан ташқарида бўлолмайди: биринчиси унга қайтишга умид қилса, иккинчиси – ҳатто ундан умрбод юз ўтирганда ҳам – ёзганларининг ахир бир кун топилиб, ўқиб чиқилиши учун бўладиган имкониятлар билан ҳисоблашади. Иов жар тубидан туриб, одамларни ёрдамга чақирган экан: “Ким менинг сўзларимни ёзib олишнинг уддасидан чиқади! Ким уларнинг китоб саҳифаларига кескич қалам билан ўйиб ёзишишини таъминлай олади...” Робинзон кимсасиз оролда кундалик юритган пайтда дунёдан узилмаган, чунки у ўзини кишилик жамиятига қайтарадиган келажак билан бирга яшаган, лекин шундай бўлса ҳам, Робинзон ҳам ўзининг ушбу умидидা, ҳам ўз ёлғизлигини тасарруф этиш усулида – ғирт уйдирмадан бошқа нарса эмас. Чунки ҳақиқий Робинзон, яъни унинг прототипи Селькирк ёлғизликдан шунаёнги азоб чекканки, наинки ёзиш ҳақида ўйлаб юрган, балки гапиришни ҳам унутиб юборган. Кучли графомания<sup>2</sup> ҳолати факат руҳий касалликлар шифокорларигагина маълум, унда қандай ўқувчи ҳақида гап бўлмасин, фикрдан тўла узилган холдаги ёзиш жараёнининг ўзи мухим ҳисобланади.

Эълон қилиш учун мўлжалланмаган деб номланадиган нарсалар ҳам бор, булар: шахсий, интим эътирофлар, қайд, ёзув, ёзма хотиралар, хатлар ва ҳ. к. Аммо сир-синоатлар фош бўлиш учунгина мавжуддир. Ёзувчиларнинг вафотидан сўнг, уларнинг қоғозларини нашр этиш таловчиларга хос китоб босиш пайдо бўлиши билан бошланган, деб ўйлаш нотўғридир; эрамиздан аввалги I асрдаёқ, Цицероннинг хат-хабар ва ёзишмалари

<sup>1</sup> Охири. Бошланиши ўтган сонларда. Манба – Алхимия слова. Москва, “Правда” 1990 год.

<sup>2</sup> Графомания – ёзишга ўта ишқибозлик, ёзувчиликка беҳуда уриниш. – Тарж.

ҳаммага ошкор қилинган. Хат – хоин: кимки унга ўзининг ўй, фикрларини ишонар экан, уларнинг сир сақланишига умид боғламаслиги лозим. Ҳатто дастлабки хомаки лойихаларнинг ҳам хавфсизлиги таъминланмаган, улар тадқиқотчининг эътиборини жалб қилиши ва у ёзувчининг обрўсини тўқадиган сирларини, масалан дейлик, бошқа бирорвларнинг фикрларини ўзлаштириб олганини билиб олиши баробарида кутилмаганда бунинг тескариси – хаёлий, фаразий айб, гуноҳлари оқланиши ҳам мумкин. Бунга бир мисол. Юзеф Биркенмайер Сенкевичнинг ёзувларини бир сидра қўздан кечириб, шу нарсани исботлади, “Ўқ ва тиф” муаллифи аввал асарларни ўқиб чиқиб, сўнгра фикр-мулоҳаза юритган, ҳолбуки, уни бу асарлардан бехабарликда ноҳақ айблашган.

Бас, шундай экан, эътирофлар, юракдаги, кўнгилдаги гапларни очиқ-ойдин айтиш, дилдан дардлашишлар, эзгу ишлар ва иллатлар, ўз виж-дони билан ҳисоблашиш, мукаммаллик сари олиб борадиган йўлдаги изланишлар ёки дўстлар ва таниш-билишлар тўғрисидаги аччиқ, зардали танбеҳ, фикр ва мулоҳазалар ҳақида нимаям дейиш мумкин – жамиятдаги бекамикўст жонкуярлик ва хайриҳохликлар учун яширин, маҳфий реванш! Мазкур ёзувларнинг сири ва дахлсизлиги ёзувчининг қай даражада маълум ёки машҳурлигига боғлиқ: агар у ўргача даражадан юқори бўлса, бу қоғозларга албатта қандайдир қизиқувчан ёки очкўз одамнинг кўл чўзиши турган гап. Тўғри, Польшада бундай ҳужжатларнинг хавфсиз бўлишига умид боғлаш мумкин, чунки уларга кимнингдир назари тушгунча орадан юз йил ўтади, улар кўпинча ахлатхонада йўқ бўлиб кетади ёки ўзларининг “етимлик” қисматига чек кўядиган ҳарбий ёнғинларни кутиб ётади. Фақат кейинги вақтда Польша қўллётмалар фондида уруш йилларидағи даҳшатли вайронагарчиликлардан мўъжиза туфайлигина омон қолган мемуарларни кенг миқёсда эълон қилиш бошланди ва бу хайрли ишлар ҳар тарафлама маъкулланишга лойикдир.

Мутлақ самимият деган гап бўлмайди. Қалам саҳифа ўртасида бир эмас, бир неча бор тўхтаб қолади, ёлғон дод туширмаган сўзларга қараётган кўзлар келгусида қачонлардир ушбу саҳифалар узра энгашадиган ёт, бегона, номаълум шахс шарпасидан бир марта эмас, бир неча марта чўчиб, ваҳимага тушади, – ички овозга гулу солиш учун бундай рефлексиянинг бир лаҳзаси кифоя қиласи. Биз одамлар билан шунчалик яқин алоқада бўламизки, улар бизни шу қадар пухталиқ билан кузатадилар, бизга тинглаб қулоқ соладилар, ҳаттоқи бутунлай ёлғиз қолиб, кўлга қалам олганимиз заҳоти, буларнинг барчаси уларга бирпаста маълум бўлади-қолади. Бир вақтлар семинария ўқувчиси бўлган Ренанга, ҳали адабиёт билан машғул бўлмаган, Сен-Сюльписдаги ўз ҳужрасида ташки дунёдан холи, интим кундалиги саҳифалари узра мук тушиб ўтирган пайтлари гўё елкаси оша авлод-аждодлар ушбу саҳифаларга қараб тургандек туюлган экан.

Кундалик юритган ёзувчилар ўзларининг барча сирлари ошкор бўлишини олдиндан билиб, тақдирга тан беришган. Гўё ўзлари ўз кўнгиллари билан яккама-якка сухбатлашашётгандай туюлиб, бундай хомхаёлдан воз кечишган ва оммавий иқрор йўлига ўтишган. Адабий истиғфор ўзининг мустаҳкам анъаналарига эга – улар Марк Аврелийнинг “Мулоҳазалар”и ва авлиё Августиннинг “Иқрорнома”си билан бошланади. Жан Жак Руссонинг “Иқрорнома”си эса Августин “Иқрорнома”сидаги тўла итоаткорлик ва тавба, пушаймонларни калака қилиш асносида соxта экслибиционизм

намунасига айланган. Руссо ҳаётлигига ўз “Икрорнома”сини нашр эттирган, унинг ушбу жанрдаги давомчилари эса вафотларидан кейин бўладиган публикацияларни кутиб ўтирамай, масалан, Гонкур укаси билан олиб борган кундаликнинг бир неча жилдини ҳаётлигига ёқ эълон қилган. Бизнинг давримизга келиб, Ян Лехонь, Жюльен Грин, Франсуа Мориак, Поль Клодель, Шарль Дюбо ҳам худди шундай қилишди. Натижада интим кундалик айниқса, Францияда тенгхукуқли адабий жанрга айлангач, у ерда ҳатто бу борадаги энг яхши асарлар учун мўлжалланган мукофот ҳам таъсис этилди. Мактубда ўз аксини топган барча нарсалар муаллифдан қатъий ажralишга ва санъат асари сифатида мақтов ва танбеҳлар, дабдаба ва унутилиш оламига даҳлдор бўлишга интилади.

Жюльен Грин томонидан жилдма-жилд эълон қилинган кундалик ёзувчининг деярли ҳар кунги ёзувларидан ташкил топган. Муаллиф уларни танлаётиб, муҳим нарсаларни аҳамиятсизларидан устун қўймаган: унинг учун энг асосийси – “соф ҳақиқат” бўлиб, бу ҳақдаги охириги сўзни вафотидан кейинги нашр учун қолдиради. Гарчи у ҳақиқат учун эҳтиросга берилган бўлса-да, бу унга ўз устидан назоратни йўқотишга ва бошқаларни танқидий баҳолашга халал бермайди. “Мен, – дейди у, – ҳеч бир ёзувчининг кундалигини билмайманки, токи унда ҳақиқат охиригача айтилган бўлсин. Энг самимий, соғдил кишилар ҳам фақат ярим ҳақиқатнигина айтишга журъат қиласидилар, холос”. Ҳақиқатан ҳам, ҳеч ким бундан ортиғига қодир эмас: инсон ҳеч қачон ҳам дилидагини, ҳам тилидагини айтишга ботина олмайди. Кимга бўлса ҳам. Бу ҳаттоқи, одамнинг ғашига тегадиган дараҷада нокамтар Поль Леотанг ҳам насиб этмаган.

Яқин кишилар ҳақидаги фикр нафақат интим ёзувларда қаламни са-мимият уяладиган сўзлардан чалғитади, балки яқин кишининг кўланкаси ёзувчининг эълон қилиш учун мўлжалланган асарларини янаем кўпроқ даражада бошқариб, ўз қўлида тутади. Мехр-муҳаббат шеъриятга илҳом бағишилар экан, у ҳамиша севимли кишини назарда тутади, ҳис-туйғулар, вазият, ҳолатлар, образлар, иборалар, гап тузилишини айтиб туради ва шу йўл билан бирдан-бир, ягона ўқувчига мўлжалланган асарлар юзага келганки, гўё ҳар бир сўз фақат унинг учун айтилгандай туюлади, унинг табассумини, кўз ёшларини, қучофини кутади, ҳатто фақат иккаласи учунгина тушунарли бўлган алоҳида интим иборалар билдиримай кириб келади, улар бир-бирига истак, интилиш, муҳаббат билан йўғрилган сўзлар камалаги оша қараб завқланадилар. Ҳар қандай инсоний яқинлик, садоқат, меҳрибонлик туйғуси (баъзан оналар ўз ўғилларининг ижодига уйғоқ, бедор назар ташларкан, бевосита аралашмасалар ҳам, аммо биргина сукутлари билан номатлуб, номақбул, ёқимсиз фикр-хаёллардан фориғ этадилар) асарга таъсир кўрсата олади, шунингдек, бошқа туйғулар – раҳм-шафқат, ачиниш, кўнгилчанлик, ҳатто кўрқув ҳам шундай кучга эга. Пшибишевский иккинчи хотинидан (унга бир марта кўзи тушган одам Пшибишевскийни тушунган ва уни деярли оқлаган бўларди) кўрқкан ва “Замондошларим” деб номланган китобида Дагне шахсияти ва хотирасини қоралаб ёзган. Император, қирол, князъ қачонлардир шундай ҳокими мутлақ ва тўғри маънодаги мустабид, айниқса, агар у маълумотли бўлса, зулми оғир бўлган; ҳомий ҳам золим, зулмкор бўлиши мумкин эди, чунки унга на дадил танбех, на қўпол муомала қилиб бўлмасди.

Ёзувчининг очиқ-ошкоралигини унга шунчаки таниш бўлган одамлар ҳам босиб туради, булар – у бориб турадиган дўстлари, танишлари, бир-бируни озми-кўпми биладиган, муқаррар кўришиб турадиган муайян шахслар даврасига мансуб кишилардир. Сент-Бёвнинг Шатобриан ҳақидаги илк мақолалари ўта ошириб юборилган мақтovлардан иборат бўлган, мадам Рекамъенинг чиройли кўзларига маҳлиё бўлганиданми, мунаққид узил-кесил фикрий хукмни кейинга қолдиради: кучли, қудратли хонимни хафа қилиб бўладими, ахир ўзи унга қарам бўлса? Аммо кейинчалик ушбу тор тушунча ва туйғулар олами аста-секин емирилиб, барҳам топгач, Сент-Бёв юзингда кўзинг борми демай, Шатобриандан барча безак, зийнатларни “си-дириб” олиб ташлайди ва собиқ энг яхши кўрган кимсасининг ачинарли, аянчли қуп-қуруқ скелетини шафқатсизлик билан ўз ўкувчиларининг янги авлодига кўз-кўз қилиб, ҳавола этади.

Қариндош-уруғлар, туғишган, яқин кишилар ва таниш-билишларнинг сирдош давраси наинки босиб, тийиб, тўсқинлик қилиб туради, балки ёзувчига босим ўтказиб, унга мавзуларни ҳам айтиб туради, унинг ижодий жараёнига ўзи ўйлаганидан ҳам кўра кучлироқ таъсир ўтказади. Агар бошқача бўлгандага эди, ҳар хил “муза” ва “эгерия”лар тўғрисида бунчалик кўп гапирилмаган бўларди, бироқ бунинг тескариси ҳам содир бўлиб туради: ҳеч нарсага қарамай, аксига олиб, ўчакишиб ёзиш ҳам мумкин. Атрофдаги яқин кишиларнинг муайян муҳитидан зардаси қайнаб, жаҳл отига минган ёзувчилар қанча! Улар – чидаб бўлмайдиган, манфур, жирканч, лаънатилар – муаллифга бутун дунё ўкувчиларини алмашган, сўз беайб ёзувчилар қалбини ғазаб-ла алангалатиб, улардан ўзи учун қасос олган. Архилоҳ қайнатаси билан жанжаллашиб қолиб, заҳарханда шеъриятнинг ўзига хос жанрини яратган экан. Шунчаки атрофдагилардан кўра, ёзувчи ўз дўстлари, ҳамкаслари, рақиблари билан янаям яқинроқ алоқада бўлади – ва бундай “уруғ-аймоқ” кўпинча хоҳ адабий салон, қаҳвахона ёки муайян адабий гурӯҳ бўлсин, ёзувчига нисбатан ўз зулмини ўтказиш пайида бўлади, бундан эса фақат ё қочиб ёки алоқани батамом узиш орқалигина кутулиш мумкин.

Хозиргacha биз қанақадир кичик оилавий гурӯҳ, давра ҳақида сўз юритдигу, лекин асосий фигура – ҳақиқий китобхонни анча узоқ куттириб қўйдик, бинобарин, у киноявий таъриф-тавсифларга муҳтоҷ эмас ва адабий асарлар билан мuloқot қилган пайтларида муаллиф учун кўринмас, узоқ ва номаълумлигича қолган бўлишига қарамай, ўзининг ўкувчи деганномига бутунлай ҳақли равишда сазовор бўлган. У сирлилиги билан хавотир уйғотувчи номаълум кўчада, кичик шаҳарларда, овул, қишлоқларда яшовчи адресат, китоб витриналари олдида бир зум тўхтаб ўтадиган йўловчи, бўш вақтларини хиёбондаги ўриндиқда, вагонда, каравотда ўтириб, китоб мутолаасига бағишлайдиган кимса. Хўш, ким у, яширин иттифоқчими ёки душман?

Китобхон, ўзи билмаган ҳолда, китоб унга етиб бормасидан анча олдинроқ, унинг ҳаммуаллифи ҳисобланади. У иккиланишлар, курашлар ва ижодий фикр, ғоялар ечими ҳал бўлаётган дамларда муаллиф билан бирга яшайди. Муаллиф унинг ўзига қараб турган нигоҳини сезади, кулги ёки кўз ёшларини кутади, агар унинг чехрасида сабрсизлик, норозилик ёки ғазаб аломатларини пайқагудай бўлса, чекинишга ҳам тайёр туради, баъзан эса бундай ташки белгилар муаллифни руҳлантириб юборади ва

у ўқувчининг жигига тегиб, жаҳлини чиқара бошлайди. Кўзга кўринмас китобхон, гарчи у ўзига хос хусусиятларга эга бўлмаса-да, бироқ унинг дин, эътиқод, мазҳаби, фуқаролиги, миллати, келиб чиқиш ва насл-насаби, ёши, фуқаролик ҳолати, мулкдорлик цензи, жинси кўрсатилган шахсий гувоҳномаси бор. Баъзи бир ёзувчилар фақатгина аёллар, хотин-қизларни мўлжаллаб ёсалар, бошқалари – ёшлар, зиёлилар, дехқонларни кўзлаб ижод қиласидилар. Уларнинг ҳис-туйғуларини, тушунчаларини англашга харакат қиласидилар, борди-ю монелик қилмоқчи бўлишса, буни улар билан хисоблашиб, ўй-фикрларидан узоқлашмаган ва ўз ният-мақсадларини бузиб кўрсатмаган ва ўз ўқувчиларининг идрок қилиш хусусиятларидан четга чиқмаган ҳолда амалга оширадилар.

Бундай махфий битим адабиётда маълум бир йўналиш, интилиш ёки муайян бир синф вакилларининг асрлар оша устунлиги ёки хукмонлигини таъминлай олади. Поляк адабиётида дворянлар табақаси узоқ вақт ана шундай имтиёзга эга бўлиб келди. Унинг ҳаётий идеалларини, симпатия ва антипатия туйғуларини, Польша ва унинг тарихи ҳақидаги тасаввурларини ушбу табақага мансуб бўлмаган, аксинча, унга душманлик руҳидаги ёзувчилар яратган. Бошқа даврларда ёки бошқача жамиятларда ана шундай ҳак-хукуқлар шахарлик мешчанларга, ҳарбийлар, дехқонлар, руҳонийлар, амалдорлар тоифасига берилган. XIX асрда китоб босиш маданияти юксалиши билан китобхонлар оммаси фавқулодда кўпайиб, турли соҳаларга бўлинишлар рўй берди ва шундан буён ёзувчи олдида танловнинг катта имкониятлари пайдо бўлди – у ўз китобини кимга хоҳласа: хоҳ жамиятда ўз мавқеига эга кишиларга ёки омадсизларга бўлсин, хоҳ билимли ёки оми одамларга бўлсин, йўллай олади, хоҳлаган ижтимоий синфларга ёки сиёсий эҳтиросларга хизмат қила олади. Мана шундай хилма-хил манзаралар замирида бир қарашда торгина кўринган, аслида эса хийла кенг, каттагина, масалан, “тутуриқсиз, саёз, bemaza адабиёт ўқувчилари” деб аталмиш гурухни ҳам учратиш мумкин.

Китобхонларнинг танлаб олинган маълум бир тоифасига дарҳол бехато йўл топа оладиган, ўта эҳтиёткор, зийрак ва сезир бошловчи адиблардан ташқари қолган барча ёш, фикр-хаёли бир ерда бўлмаган, аммо ўзига ортиқ даражада ишонгандарни адабиётга тусмоллаб, таваккалига интиладилар. Уларнинг биринчи китоби – тундаги қичқириқ, уни ким эшитади ёки ким жавоб беради, буни ҳатто бошловчи ёзувчининг ўзи ҳам билмайди. У сукутдан бошқа ҳамма нарсани ҳисобга олиб кўяди. Наҳотки, бамисоли чумоли уясидек ғиж-ғиж одамлар орасида уни тинглайдиган, тушунадиган, ёқтирадиган бирор кимса ёки бир ҳовуч хайриҳоҳ топилмаса, бу унинг ўзига ақлга тўғри келмайдиган, фавқулодда ҳодиса бўлиб кўринади. Ва айнан мана шу иложсиз нарса ечими бирданига ҳал бўлади. Сэвиж Лэндер ўзининг илк китобчасидан атиги икки нусха сотишга муваффақ бўлган – бирини Колъриж, бошқасини – Квинси сотиб олади. Сэвиж Лэндер ўзини ёлғиз ҳис қилмаслиги учун шунинг ўзи кифоя эди. Кўшимча қилиб айтиш лозимки, бу аристократнинг етарли маблағи бўлиб, у одамларнинг лоқайдлигига шундай лоқайдлик билан жавоб қайтариб, такаббурона сиполик йўлига ўтвонади.

Инсонни ўзининг бутун ҳаёти мобайнида баҳога, баҳоланишга бўлган зориқиши қийнаб келади. Унинг ҳар қандай, ҳаттоқи энг арзимас ҳатти-харакати ҳам, фикр билан боғлиқ зигирча сўз ҳам ўз баҳосини олишга инти-

лади. Ўзини ўзи эътироф этиши уни ҳеч қачон қониқтирмайди, унга бошқа одамлар томонидан бериладиган баҳо керак. Бундай хоҳиш эса ўйинчоклар билан овунадиган болага хос. Аммо ўз ижодига берилган баҳога нисбатан локайд ёзувчини тасаввур қилиш даҳшатнинг ўзгинаси, бундай одам ўзининг чорасиз ёлғизлигини қай гўрга, қайси одамсиз биёбонга кўмган бўлиши мумкин! Ёзувчи – кенг микёсда танилган инсон, бу туйғуни у анча юқори даражада ҳис этади. Бир неча маъқулловчи овозлар бу зориқиши қондиролмайди ва у ҳам худди Гётега ўхшаб, агар миллионлаб ўқувчиларга умид боғлай олмас экан, унда ёзишдан маъни йўқ, деб ҳисоблайди. (Эндиликда биз яхши биламизки, Гёте ўз даврида бунга бемалол умид қила олган. Лекин шу билан бирга баъзи бир далиллар ҳам мавжуд: биринчи жаҳон уруши арафасида китоб дўконларидан “Фарбу Шарқ девони”нинг илк нашрига оид нусхаларини топиш мумкин бўлган, иккинчи нашри эса орадан ярим асрдан кўпроқ вақт ўтгач, чиқкан. “Херманн ва Доротея” ҳам яхши сотилавермагач, ношир Фивег харидорларни совғалар билан қизиктиришга ҳаракат қилган.)

Уларнинг сони эса мингтага ҳам бормайди. Жимлиқ, жавобсизлик иродаси сустларни синдиради, қатъиятли тиришқоқлар эса таслим бўлмай, Стендаль каби ўз йўлидан сабот билан олға бораверадилар: унинг “Мухабbat ҳакида”си атиги бир неча нусха сотилган эди, холос. Энди эса ўша нашр харидорларининг деярли ҳар бири маҳсус монографияга сазовор бўлиб турибди. Кўпчилик ёзувчилар ваҳимали сукунатни тушунишга ва ундан ўзлари учун сабоқ олишга ҳаракат қиласидилар. Бальзак уни оммавий жимжитлик хатоликдан олиб чиқмагунга қадар, Вальтер Скотт каби “олтин кони”га ўзини уриб, ўз ўқувчиларини дастлаб трагедия ва тарихий романлар билан забт этган эди.

Драматург ўз томошабинлари билан юзакироқ бўлса-да – юзлари, имишоралари, ташқи қиёфаларига қараб – танишиши ва агар ўзи истаса, спектакль кунлари уларнинг бевосита таассуротлари ва ҳатто антрактлар чоғида ўз пьесаси ҳақидаги сухбатларни ҳам эшитиши мумкин. Ёзувчи эса ўз ўқувчиларини ҳеч қачон кўрмайди ёки уларга камдан-кам ҳолларда рўпара келади. Улар хат ёзиб муносабат билдиради, лекин хатларни ҳам энг журъатлилари ёзади. Китобхонларга ғалати тортичоқлик хос ва улар муаллифга мактуб ёзгунга қадар, орадан йиллар ўтиб кетади. Муаллиф ноҳақ,adolatsiz ва ҳақоратли хатлардан ташқари қолган барча мактубларни миннатдорлик билан қабул қиласиди. Ахир бу ёзувчи учун ўзига хос воеа, чунки номсиз китобхонлар оммасини ўраб олган туман ичидан бирдан кимнингдир исми, хонаси ёки уйи пайдо бўлади. У ерга унинг сўзи етиб борган, уни севишидаи ва қадрлашади, ёзувчига ҳатто бегоналар ҳаётига разм солиши учун имконият ҳам беришади, бу нарса баъзан бетакаллуф ва кескин тарзда содир бўлиши ҳам мумкин. Ёзувчини ўзи ҳеч қачон кутмаган овозлар ҳайрон қолдиради, унинг олдида гўё узок-узоклардан келган одамлар пайдо бўлади ва унга янги фикр, ғояларни айтиб, унинг қаламига мансуб китобнинг мухимлигини, ҳар бир сўз учун масъулиятини таъкидлайдилар. Баъзан хат ёзишишлар бошланиб кетади, сўнгра бир-бирлари билан танишишиб, дўстлик ришталари боғланади ва бу алоқалар ҳатто эҳтиросли мухаббатга ҳам айланиши мумкин. Ганская хоним айнан шу йўл билан Бальзак ҳаётига кириб келган.

Ёзувчиларни, айниқса, улар орасидаги баландпарвоз муваффакиятга интиладиганларни кўпинча китобхонга хушомад қилишда айблашади. Ёзувчи шуҳрат қозониб, машхур бўлдими, тамом, у ўзининг қаламкаш ҳамкаслари ва танқидчиларнинг ҳурматидан маҳрум бўлади. Адабий давраларда катта ададларни одатда муаллиф асарининг тўлиқ сифатсизлигига ишонарли далил сифатида қабул қилинади. Бундай мулоҳазани, ўт-олов ёшлардан ёки иши юришмаган омадсизларданми, кимдан чиққанлигидан қатъи назар, рад этишдан маъни йўқ. Лекин нима бўлгандаям, ўқувчилар доирасининг янада кенгайиши ёзувчининг ўз-ўзига нисбатан талабчанликни ошириш ўрнига, аксинча, камайтиришига туртки бўлиши аниқ.

Кўриниб турибдики, бу ерда масала ўйлаганимиздан кўра хийла мураккаброқ. Адабий асар яратоётганда дунёни ўзига хос ҳис этиш тийғусини бошқа одамларга ҳам етказиш ният-мақсади ёзувчини сўзнинг коммуникатив имкониятлари чекланганлиги билан ҳисоблашишга, ифода усулига нимаики ён бермаётган бўлса, барчасидан воз кечишга ва бу ишни яхшиси, рамзларга ишониб топшириш ёки шама, ишоралар шаклида амалга оширишга мажбур қиласди. Агар Браунингга ўхшаган “оғир шоир” ўзининг руҳий ҳолати ҳақида бир гуруҳ ёшларга хабар берадиган шифрдан фойдалана олса ва бунинг “калити” ёшларга ҳам маълум бўлса, машхур ёзувчи бу ҳақда ҳатто орзу ҳам қилолмайди. У ҳамма нарсада оддий китобхонга аниқ ва тушунарли бўлишга интилади. Нодир, камёб, фавқулодда сўзлардан фойдаланишни, ҳаддан ташқари жимжимадор, тамтароқли муқоясалар қўллашни ўзига раво кўрмайди, ўзгача, ғайриоддий, айниқса, теран ва мураккаб интеллектга, ўта оғир ва нозик руҳий ҳолатга эга ва мураккаб эмоционал ҳиссиётларга қодир бўлган ҳамда ҳаётда фавқулодда вазиятларга тушиб қоладиган қаҳрамонлардан ўзини олиб қочади. Бошқача қилиб айтганда, ёзувчи сийқаликнинг бутун юкини ўзига олишга мажбур ва баъзан уни чиндан ҳам қаҳрамонона кўтариб юради.

Охирги жумла ёзувчининг вафотидан кейин топиладиган қоғозлар етказидиган таъсирли, кўнгилни эритадиган, кутилмаган воқеаларни ёдга солади; тугалланмай ташлаб қўйилган эсселардан, йўл-йўлакай айтилган фикр, мулоҳазалардан, қисқача қайд, хотиралардан унчалик талабчан бўлмаган ўқувчи ва томошабинлар учун мўлжаллаб ёзилган оммабоп романлар ва театрбоп пьесалар муаллифининг кутилмаган парвозларини ва у ердаги ёлғизлиқдан ўз муҳлислари томон тушиб келганини билиб оламиз. Ва бундайин қурбонлар бойлик меҳроби учунгина келтирилган экан-да, деб ўйлаш хатто бўлур эди, чунки уларни кўпинча бенуқсон олижаноб ният-мақсадлар: маърифатпарварлик ва инсонпарварлик ғоялари такозо этган бўлади. Элитар ва одамларга аралашмайдиган, дамдуз адабиёт ўчоқлари мақтанадиган сийқаликка муросасизлик аслида санъат софлиги тўғрисида оқилона ғамхўрлик қилиш ўрнига кўпроқ бехуда, бўлмагур, маъносиз гаплардан иборат ва айни чоқда мазкур эстетларнинг<sup>1</sup> бағритошлигидан ҳам дарак беради. Сийқаликнинг муайян бир улуши наинки муқаррар, балки ҳатто кенг оммага қаратилган ҳар қандай асар учун ҳам зарурдир. Эпопеяни Рембо ёки Маллармега хос бадиий усуллар билан ёзиш мумкин эмас. Данте ўзининг бутун поэтик интизоми ва принципиаллигига қарамасдан, жаннатнинг шаффофф қасрини одатдаги, кундалик дунёвий нафас билан янгилаб, жонлантироқ учун оддий терциналарга мурожаат қиласди.

<sup>1</sup> Эстет – эстетизм тарафдори. – Тарж.

Аммо – бу ҳақда, афсуски, камдан-кам эслашади – камтарлик қилиб, ўта моддий, амалий рухда ёзадиган муаллифлар ҳам бор. Адабиёт оламида ниҳоятда камёб бўлган бу яхши фазилат ўз намояндадарига эга ва улар орасида гоҳ-гоҳ Болеслав Прус каби жозибадор нимб (ёғдусимон айлана – муқаддаслик рамзи)дан мунааввар бўлганлар ҳам учраб туради. Ўзининг кўпгина ўқувчиларидан кўра донороқ, ақллироқ ва билимдонроқ бўлган Прус ҳеч қачон улардан ажралиб турмас ва уларга тенгга тенг каби, хайриҳоҳлик ва ҳурмат билан мумомала қиласр эди. У ўзининг ҳатто энг ювош, итоаткор қаҳрамонларига нисбатан ҳам худди шундай муносабатда бўларди. Баъзан ўз имкониятингдан пастрок ёзишингга ҳам тўғри келаркан.

Машхур ёзувчиларни кони ақл, доно деб ўйлаб, уларга ортиқча баҳо бериш ярамайди, кўпинча уларнинг айтиб бўлганларидан ташқари ортиқ сўзлайдиган гаплари ҳам қолмайди. Китобхонлар фикрига кўра, Сенкевич бундан бир неча йиллар муқаддам Польшада бир жилд кичик асарлар тўплами нашр қилингандан сўнг, жуда кўп нарса йўқотган. Тўпламдан ёзувчининг оммавий чиқишлар чоғида сўзлаган нутқ матнлари, интервюлардаги саволларга қайтарган жавоблари ва кичик мақолалари ўрин олган бўлиб, уларда қаҳрамонлари – Кмициц ва Володиевскийлар тилидан эмас, балки ўз номидан гапирган. Шу аснода унинг янги, теран ўз сўзини айтишга ноқобиллиги тўла сезилиб қолган. Унинг асарларидан танлаб олинган “олтинга тенг фикрлар” – йиртма тақвимда акс этган ҳикматлардир. Реймонт бунақанги нарсаларни топиб гапиролмасди.

Флобернинг ўз асарларидан ташқарида қанчалик гўл, содда бўлганини билсангиз эди! Пруст унинг муқоясаларини кўздан кечираркан, улардан биронтаси ҳам ўз романидаги персонажларнинг ақлий даражасидан ўтолмаслигига амин бўлган. Агар биз Флобернинг хат-хабар, ёзишмаларига эга бўлмаганимизда, бу ҳали унчалик ишонарли далил бўла олмас эди. Адабиётдаги энг нафис мактублар турига мансуб бўлган, сўз учун унуглилар кураш ва санъатга бўлган эҳтиросли муҳаббат акс этган мазкур хатлар айни чоқда мукаммал жумлалар уйғунлигига тааллуқли бўлмаган барча нарсаларга хос фикрларнинг қашшоқлиги, ўй, мулоҳаза ва қарашларнинг соддалиги билан кишини ҳайрон қолдиради.

Ўта сезигир, зийрак ёзувчилар ҳам борки, улар жанрлар, мавзулар ва услубни хилма-хил қилишга тиришадилар. Флобер ўз табиатининг икки ёқламалигидан фойдаланиб, тизимли равишида “хосил алмashiши”га эриша оларди: дам реализмга шўнғиб кетса, дам фантастика билан яшар эди. Ташаббускор мадам де Кайаве Франсни “Қизил нилуфар”ни ёзишга унданб, сўзида қаттиқ туриб олган, хонимнинг фикрича, дўстининг адабий фондида “дунёвий роман” ҳам бўлиши лозим, акс ҳолда у ҳақда “эрудицияни эрмак қилишдан бошқа ҳеч вақо қўлидан келмайди” деб ўйлашлари мумкин экан. Конрад ўз ижодининг энг сўнгги даврида денгиз тематикаси-ни кўйиб, ўзининг илк романларидан анча узоқлашиб кетган ва ўз ижодий ва тасаввур кучини тўла ишга солган ҳолда бошқа мавзуларга қўл урган. Тематика ва жанрлар хилма-хиллигини суиистеъмол қилиб, дам романдан драмага, дам эсседан лирикага сакраб, кўчиб юриладиган бўлса, йўлдан бутунлай адашиб, ушбу жанрларнинг ҳар бирида ҳам муваффақиятсизликка учраш мумкин.

Ҳаёти бошдан-оёқ бир текис ва силлиқ кечган, бир хил маслак, эътиқод ва идеалларга мувофиқ равишида ўтган ёзувчи камдан-кам топилади. Акс-а-

рият кўпчилиги турли хил ўзгаришларга дучор бўлади. Масалан, тинчлик, хотиржамлик, ҳаловат, қувноқлик, шахвоний ҳис бирданига йўқолиб, одам оғир ўй, хаёлларга, ғам-ғуссага, дилгирликка берилади, ҳаёт лаззатларидан воз кечиб, ҳаётида қийин дамлар бошланади. Бундай ҳолатга тушган ёзувчи ўзи шу пайтга қадар хузур бағишлиб келган ўқувчиларига ортиқ умид боғлай олмайди, уларнинг жуда озчилиги унинг ижодидаги ўзгаришларни тўғри қабул қилиб, аввалгидек содик қолади, аммо шунинг баробарида у бошқа муҳлисларнинг эътиборини қозонади. Шунингдек, руҳий ҳолатида ва турмуш тарзида ҳам жуда чукур ўзгаришлар содир бўлади: ёзувчи бошқа динни, ўзгача ижтимоий мафкуруни қабул қилиши, илгарилари ўзини узокроқ олиб юрган сиёсий ҳаётда иштирок эта бошлайди. Ўзгариш узок давом этган жараённинг охирги даври бўлиши, шу билан бирга – ўз-ўзидан ёки бошқа одамлар, маълум бир воқеаларнинг таъсири остида бирданига рўй бериши ҳам мумкин, улар ёзувчини танлов қабул қилиб, мустақил қарор чиқаришга мажбур қиласди, агар вазият босими демаса, улардан жон-жон деб бўйин товлаган бўлар эди. Бўлиб ўтган ўзгаришлардан сўнг, ёзувчи энди аввалги ўқувчилари ҳақида ортиқ ўйламайди, балки янгиларини қидира бошлайди. Борди-ю у машхур бўлса, эскиларини ҳам йўқотмайди, аммо улар энди уни рағбатлантирмайди ёки тийиб ҳам туришмайди. Честертон католиклик мазҳабига ўтгандан сўнг, унинг аҳволи худди шундай кечган.

Франция адабий ҳаётида Дрейфус иши тарихи жуда қизиқ ва унга ҳалихануз катта эътибор қаратиб келинмоқда, чунки уни деб, атоқли ёзувчиларнинг бутун бир гурухи дафъатан бир-бирига душман бўлган икки лагерга ажралиб қолади. У ерда иккиланишлар, хавотир ва дадил, қатъий қарорлар, жасорат билан бир қаторда эҳтиёткорлик, эски муҳит билан алоқани узиш ва янгисига ўтиш билан боғлиқ ҳатти-ҳаракатлар кафтдагидек кўриниб туради. Кўпсонли мемуарлар туфайли биз худди самимий нутқни тинглгандай, эртага ўз нашрларини, ҳамкорлик қилиб турган журналларини, азиз меҳмонлари бўлган уйларни ва ниҳоят, – илгариги ўқувчиларини йўқотишлари кутилган кишиларнинг фикр, ҳаёлларини деярли топгандай бўламиз. Биз икки палласида маълум ўтмиш билан номаълум келажак тебrаниб турган тарозини кўрамиз. Гоҳо ижод ҳарактерини батамом ўзгаририб юборадиган танлов натижалари ҳам кўриниб турадики, бунга Жюль Леметрни мисол қилиб келтириш мумкин.

Анатоль Франснинг Клод Авелин томонидан ишлов берилган “Яхши замонлар сари” номли тўпламининг биринчи жилди муаллифнинг давр муҳити акс этган қатор маколалари ва нуткларидан иборат бўлиб, “адабий стратегия” деб аташ мумкин бўлган тушунчанинг ёрқин намунаси сифатида хизмат қиласди. Ҳурфикр ва тараққиёт тарафдори бўлган Франс узок йиллар давомида ўзининг ҳақиқий фикр ва қарашларини улардаги радикализм ва кескинликни юмшатиб турувчи турли хил ниқоб ва либослар остида яшириб келишга мажбур бўлди. Кибрли киноя, кесатиклар ва (факат зоҳиран) кўнгилчан скепсис<sup>1</sup> ҳатто Франс ҳар ҳафта ўз фельетонлари билан қатнашиб турган консерватив руҳдаги “Temps” – “Вакт”ни ҳам заррача хижолат қилмайди. Унинг очиқ, самимий ёзилган “Шаҳар қайрағочлари остида” номли илк китоби босилиб чиққач, Фаге: “Enfin!” дея бежиз хитоб қилмаган. Эҳтиёткор скептик<sup>2</sup> ниҳоят, замонавий ҳаётнинг кескин муҳитига шиддат билан отилиб, унга ҳамла қилганди.

<sup>1</sup> Скепсис – ҳар нарсага шубҳа билан қараш. – Тарж.

<sup>2</sup> Скептик – ҳар нарсага шубҳа билан қаровчи. – Тарж.

Романинг айрим боблари икки йил мобайнида “Echo de Paris” – “Париж акс садоси” саҳифаларида босилди, бироқ улар бутун роман ҳақида тўғри тасаввур ҳосил қилиш имконини беролмади, асар ниҳоясини эса анча узқ кутишга тўғри келди. 1896 йилнинг 24 декабрида Франс Академияга сайланади. Орадан йигирма кун ўтгач, аллақачон тайёр бўлган, лекин шу пайтгача муаллиф томонидан ушлаб турилган “Шаҳар қайрағочлари остида” романни алоҳида китоб шаклида дўконларда пайдо бўлди. Ҳали ҳайрат хитоблари тўхтаб улгурмай, Академиянинг юксак минбаридан туриб, Франснинг илк овози жаранглади: у Арманистонни ҳимоя қилиб чиқди. Олти ёшлигида туғилган орзуси – Академия билан боғлиқ ижтимоий фаолиятининг ўттиз йиллик даври ана шундай бошланди. Унга сайланган лаҳзадан бошлаб, ўз фикр, мулоҳазаларини очиқ-ойдин айтишга журъат этди. “Ўзинг фойдали ва адолатли деб ҳисоблаган нарсанг ҳақида очиқ-ойдин гапира олиш имконияти – бу жуда катта қониқиш!” – дея енгил тин олган эди у “Жанна д’Арк ҳаёти”га ёзган сўзбошисида. Ногаҳоний ўзгариш минглаб одамларни ҳайратга солди, қаҳр-ғазаб, нафратга тўла хитоблар янгради, аммо Париждан ташқарида уларни деярли ҳеч ким эшитмади. Ўзига янги тарафдорлар орттиаркан, Франс олдингилариниям йўқотмади, чет эл эса унга ҳатто вафотидан кейин ҳам содик қолди.

Ҳамонки, “чет эл” сўзини тилга олдимми, энди унга бир оз тўхталиб ўтиш лозим бўлади. Ушбу сўз ҳар доим ҳам бир хил маънони англатмаган. Юнон-рим дунёсида, Рим империяси даврида, очиғи, ҳеч қандай чет эл мавжуд бўлмаган: ҳеч ким ўз асарини алоҳида гурухлар ёки қандайдир хитойликлар учун мўлжаллаб ёзмаган. Икки тил – юонон ва лотин тиллари – фақат юонон тили кўпроқ, ўша даврнинг бутун китобхонлар оммасига хизмат кўрсатган. Мазкур ўқувчилар учун ажнабийлар, масалан, ўша замонларда ёқ ўз адабиётига эга бўлган бирдан-бир, ягона халқ – яхудийлар ҳам асарлар ёзишган. Искандариялик Филон, Иосиф Флавий барчага ўз мамлакатлари ҳақида, унинг тарихи, анъаналари ва адабиёти тўғрисида маълумот беришга ҳаракат қилишган. Икки аср олдин ўз мамлакати учун худди шундай ишни бобиллик Берос ҳам қилган эди.

Ўрта асрларда лотин тили сарҳад билмаган, миллий эмас, балки умумевропа миқёсида фикр юритган гуманистлар даврида ҳам худди шундай бўлган. Петраркага бир куннинг ўзида ҳам Париж, ҳам Рим шеърий чамбар тақиб, эҳтиром кўрсатган. Клеменс Яницийга Болонъяда гулчамбар тақишган. Гуманистларнинг асарлари қайси миллатга мансублигидан, муаллифнинг қаерда яшасидан қатъи назар, ҳаммаёқда бирдай босилган. Инсонпарвар ёзувчи ватандош ўқувчи учун эмас, балки ўзига интеллектуал яқин бўлган китобхон учун ёзган, унинг кимлиги ва қаерданлиги муҳим бўлмаган.

Миллий адабиётлар юксалиб, римликлар юононларнинг қизиқиши ва мақтoviga сазовор бўлиш учун юонон тилида, юононлар эса, Полибий каби, римликларни “мўлжалга олиб” асарлар ёзган ўша ўтган замонларни жонлантириб, ҳаётга қайтарди. Ажнабий китобхоннинг таъб-дидини, унинг типажини<sup>1</sup> аниқлаш қийин эмас эди. Янги замоннинг баъзи бир адабиётлари ушбу китобхонни ўз она тилларининг кенг тарқалганлиги туфайли ҳеч қандай қийинчиликсиз, осонгина забт этишган. Бунга ҳаммадан ҳам аввал француз тили муваффақ бўлган. Француз тилида XIII ва XIV асрларда ҳатто

<sup>1</sup> Типаж – бирор образ яратиш учун намуна бўлиб хизмат қиладиган шахс . – Тарж.

чет элликлар (Марко Поло, Брунетто Латини) ҳам ёза бошлаган, келгусида унинг қаторига итальян ва испан, кейинчалик эса – инглиз (XVIII ва XIX асрлар оралиғида) ва ўтган юзийилликда дунё саҳнасига чиқсан немис тиллари келиб қўшилган. Қолган бошқа барча адабиётлар эса, хорижлик китобхонни фақат таржималар воситасида забт этишларига тўғри келган.

Инглиз ва француз ёзувчилари чет эллик ўқувчига шунчалик кам эътибор қаратадики, уни деб ўз асарларида бирон нимани ўзгартириш ҳақида ўйламайдилар ҳам. Баъзида алоҳида ҳисоб-китоб тақозоси, масалан, кенг китобхонлар бозорини қўлга киритиш билан боғлиқ бўлган истисноли ҳоллар ҳам учраб туради, бунга бир неча ўн йиллар олдинги Германияни мисол қилиб келтириш мумкин ва балки яқин келажакда ўзининг оҳанжамадор бестселлерлари билан Америка ҳам унинг ёнидан жой олса ажабмас. Бунда албатта, Нобель мукофоти ҳам рағбатлантирувчи омил бўлиб хизмат қилиши шубҳасиз.

Бошқа мамлакатларнинг ёзувчилари, чет эллик китобхонларга йўл очилди дегунча, уларнинг таъб-диди, урф-одатлари билан жиддий ҳисоблашишга киришадилар. Ёзувчи муайян, масалан, тор миллатчилик руҳидаги, ўз мамлакатининг тарихи ва урф-одатлари билан боғлиқ мавзулардан, композиция ва услубнинг, ходисалар ҳамда одамларни руҳий-ахлоқий жиҳатдан баҳолашнинг маълум бир усусларидан онгли равишда ўзини олиб қочади. Мен бир поляк ёзувчисини танирдим, у ўз асарларининг таржима қилинишини олдиндан билгач, қийин талаффуз қилинадиган фамилиялардан, мураккаблаштирилган имлодан қоча бошлади, фабула<sup>1</sup> ҳақида-ку, гапирмаса ҳам бўлади, у маҳаллий колоритдан шу қадар маҳрум қилинган эдики, муаллиф ҳатто поляк табиат манзараси ҳам халал бермасмикин, дея иккиланишгача бориб етганди. Бунақангি мослашувчилик, замонасозлик оқибатида ҳолландиялик таниқли бир адиба билан рўй берган шармандали ҳолатларга тушиб қолиш ҳам ҳеч гапмас, у чорак аср мобайнида хотин-қизлар озодлиги ва ҳақ-хукуқлари учун курашиб, немис китоб бозорини забт этгач, уни Ҳитлер ҳукмронлиги даврида бой бериб қўйишдан қўрқди шекилли, аёл тимсоли – ибратли она, ҳафсала билан, тиришиб пайпок ямаётган уй бекасини зўр бериб мақтай бошлаган.

Юқорида қўлланилган “адабий стратегия” ибораси, бу – мажоз, истиорадир. Ягона муаллифларни ташаббускор дея атаб, адабий гурухларни отрядларга, уларнинг фаолиятини эса – ҳарбий экспедициялар ёки кампанияларга ўхшатган ҳолда уни ривожлантириш мумкин. Бунда ҳеч қандай янгилик йўқ, чунки адабиётга оид бундай ҳарбий атамашунослик илгарилари ҳам, гуманистлар ва айниқса – Наполеон бургутлари қанотларининг шувиллаган овозларига йўғрилган романтиклар томонидан ҳам бажонидил қўлланиб келинган. Ўшанда душман қалъалари қамал қилиниб, шиддатли хужумлар натижасида жанглар (“Эрнани” учун бўлган машҳур муҳораба ҳам) ғалаба билан тугаган, курашчан, жанговар романтикларнинг луғати эса, порох билан тўлдирилган эди. Уларнинг Мицкевич, Гюго сингари ўз саркардалари бор эди, – кучлироқлари бор кучи сон ва сершовқинликдан иборат бўлган кучсизларини қўллаб-қувватлаган. Романтиклар дадил ва жасур эдилар, улар шавқ-завқ, ғайрат ва иштиёқ уйғотар, бу эса уларнинг ўзига рух бағишлиар эди. Ушбу воқеа адабий жанглар майдонидаги охирги

<sup>1</sup> Фабула – бадиий асарда тасвиrlenган воқеалар занжири. – Тарж.

йирик кампания эди, барча кейингилари эса, бу қадар на қанот қоққан, на қулоч ёза олган.

Кўринмас иттифоқчи – китобхон – ўзи англамаган ҳолда адабий асар устидан хукм юргизади. Адабий жанрлар тақдирини, бирини маъқулласа, бошқасини тан олмай, ҳал этади, мавзуларни мажбуран қабул қилдиради ёки рад этади, композицияга аралашади, персонажларга таъриф бериб, уларнинг диалогларини, сўзларини айтиб туради. Монархия давридаги француз адабий салонларининг накадар зулмкор, насрдаги беўхшов иборалар, ғализ, палапартиш гап тузилишларига қанчалик бешафқат бўлганини шеърлардаги биронта ҳам сифатнинг отдан ажралиб, кейинги шеърий сатрга “сакраб” ўтишга журъат қилолмаганидан ҳам билса бўлади:

*Наҳотки у келган бўлса? Яширин  
зина бўйлаб...*

Виктор Гюгонинг исёнкор ва дадил “Эрнани”си ана шундай бошланади.

Романтизм мазкур “тойиб кетган” шеър билан “яхши муомала”нинг қонун-қоидаларига қарши чиққан. Лекин буни томошибинлар залининг ярми олқишлиар билан кутиб олган – янги иттифоқчилар ўзлари ҳақида шундай маълум қилганлар ва шу дақиқадан бошлаб, уларни лирик асарлар муаллифлари, драматурглар ва романнавислар эътиборга олиб қўйишган. Польшада бу воқеа ўн йил олдинроқ содир бўлган. Янги иттифоқчиларнинг катта куч эканлиги маълум бўлди. Романтик ёзувчилар ўз шон-шуҳратларининг ярмиси учун завқ-шавққа тўла ўқувчилардан қарздор эдилар, бу иштиёқ ижодкорларга жасорат, ижодий куч-ғайрат, бекиёс сермаҳсуллик баҳш этар ва улар қалблари қувончга тўлиб, янги foялар, янги шакллар сари ошиқардилар.

Адабий асар тингловчилар ва китобхонлар учун мўлжаллаб ёзилади. “Ўзим ва Музалар учун куйлайман” – ушбу формула ҳар доим “чунки” деб бошланадиган қўшимчага эга бўлади. Ёзувчи ўзи ва музалар учун ижод қилишига иқрор бўлса, унга ҳар гал мана шу “чунки” – таъна, гина-кудурат, айблов ва қаҳр-ғазаб, нафратнинг бошланиши ҳамроҳлик қиласи. Ҳар бир киши одамларнинг қулоқ солиб, уни тинглашларини истайди, кимки буни тан олгиси келмаса, у ё ўзини ўзи алдайди ёки ўзини яхши билмайди. “Ўзи учун ёзиб-чизиш”, бу – ҳафсаласи пир бўлган, ихлоси қайтган қари кизларнинг имтиёзидир, лекин ўзларига қолса, кимнинг олдида бўлмасин, атиросун ва ландрин ҳиди анқиб турган, даста-даста қўлёзмалар солинган кутини жон-жон деб очишдан ҳам қайтишмайди.

Аччиқ алам ёки кўнгил қолиши ҳатто буюк ёзувчини ҳам “ўзи учун ижод қилиш”га ўтишга мажбур қила олади. Фредро билан ҳам шундай бўлган, у ўзининг янги комедияларини эълон қилишни ва саҳнада қўйишни тўхтатиб қўйган; “...чунки ҳозир мен фақат ўзим учун ёзяпман”, – деб таъкидлайди у ўзининг “Учга уч” деб номланган хотиралари якунида.

Флобер ўзининг ilk китобчаси – “Бовари хоним” чиқар-чиқмас, ҳаётига бехосдан кириб келган ўзгаришдан ҳайрону лол бўлиб қолган. Уни ёзаётан пайтидаги бир-бiri билан дам-бадам алмашиниб турган омад ва мағлубиятлар, кўтаринкилил ва тушкунлик асносида насррий маҳоратини ошириб бораркан, у ўзини озод, эркин ва мағрур ҳис қилар, ундан ажралгач, яширинган пана жойидан чиқиб, ўқувчилар кўз олдида ҳозир бўлгандан

сўнг, ўзини гўё сотилган қулдек ҳис эта бошлайди. Ёзувчиларни азал-азалдан қийнаб келаётган барча даҳшатлар унга шиддат билан ёғилади: хайрихоҳ маслаҳатгўйлар, цензура ва суд, танқидчилар ва китобхонлар, қаноат ҳосил қилмаганлар, афтини бужмайтириб, қийшанглаганлар ва ҳар хил мазах қилувчилар ҳамда ҳазилкаш ва масхарабозлар. Флобер табиатан ва турмуш тарзига кўра одамови эмасми, ўз атрофида тўсатдан пайдо бўлган ур-ийқит, тўполнонга сира чидай олмайди. Агар янайм кўнгли нозикроқ ва асабийроқ бўлгандами, қолган асарларини эълон қилишдан ўзини тийган бўлар эди, бинобарин, ранжиган, хафа бўлган, ўта таъсирчан дилетант кўпинча шундай қилишар, ёзган нарсаларини вафотидан сўнг нашр этиш учун қолдиришар, бироқ уларни одатда ўшанда ҳам умидсизлик кутар эди.

Бундан йигирма аср муқаддам шундай дейилган: “*odi profanum vulgus*” ва ўшандан буён ўтган кўплаб юзийилликлар мобайнида ёзувчилар “қора ҳалқ”ни менсимай келишган. Бироқ ҳали ҳеч ким гўё факат аҳмоқлардангина иборат бўлган оломонни назар-писанд қилмасликда мақтов йўли билан иш кўрмаган. Бу – ёзувчи руҳий ҳолатининг энг ёқимсиз, ярамас хусусиятларидан биридир. Кимки агар ўз ўқувчиларини иззат-хурмат қилмас экан, у ўзини ҳам, ўз асарларини ҳам ҳурмат қилмайди. Ва бундан ташқари, ўз асарининг айнан унинг сўзини макон ва замонлар оша олиб ўтадиган номсиз эстафета туфайли қандай кўпайиб, бойиб боришини, қай тариқа янгича маъно ва моҳият, куч-қудрат касб этишини ҳам англай олмай, фикр ва тасаввур қашшоқлигига дуч келади. Аммо “қора ҳалқ”га бўлган бундай нафратнинг кўпинча сохта қиёфа, снобизм (қуруқ олифтагарчилик) ва бошдан-оёқ ёлғондан бошқа нарса эмаслиги тез аён бўлади; айниқса, ўз нафратини ўқувчини мақтаси орқали намойиш қиладиган ёзувчилар аслида бундай мақтовга бошқалардан кўра, ўzlari кўпроқ ташна бўлишади.

Санъат асари – ишонч, эътиқод ва жасорат хужжатидир. Уни жамоатчилик ҳукмига ҳавола қилаётганда, кўйилган ушбу қадамнинг барча оқибатларини қабул қилишга тайёр турмок лозим бўлади, улар баъзан фақат янги, тажрибасиз ёшларнингин довдиратиб кўймайди. Муаллиф ҳар бир янги китоби чиккан пайтда ўша илк нашр чоғида ҳис қилган ваҳима, ҳавотирларни яна қайта бошдан кечиради. Ҳатто адабиётдаги мустаҳкам, барқарор мавқе ҳам, қозонилган таникли ном ҳам бу ҳавотирларни заррача юмшатолмайди. “Эҳ, азизим, – деб ёзган эди 1908 йилда Конрад Голсуорсига йўллаган мактубида, – ўзимга ўзим: буёғи қалай бўларкин, деган саволни берган чоғимда, мени қанчалик кўркув босишини сен тасаввур ҳам қилолмайсан. Умид, ишонч билан шубҳа-гумон ўртасида тўлғаниш азобидан кўра қийинроқ нарса бўлмаса керак ва бу масала, яширмайман, ҳаёт-мамот масаласига тенгdir. Ҳатто шундай дамлар бўладики, кўркув миямдан барча фикрларни суғуриб чиқариб ташлайди”. Ёзувчи ўзининг янги чиққан китоби ўқувчи томонидан худди аввалгилари каби, ўшандай хайрихоҳлик билан кутиб олиниб, эътиборсиз қолдирилмаслигига ҳеч қачон ишончи комил бўлолмайди, кексайганда эса, ҳатто энг йирик ёзувчиларнинг ҳам улардан юз ўгирадиган янги авлодга хос ётсираш аламини тортмасликларига ҳеч ким кафил бўла олмайди. Адабий ҳаёт, бу – бамисоли жанг, мусобақа, беллашувлар ва ҳавф-хатарга тўла майдон. Шунга қарамасдан, башарти бу майдонга юраксиз ва қўрқоқлар ҳам тушгудай бўлса, бунинг боиси шуки, ғалабага бўлган зўр иштиёқ улардаги кўркув

ҳиссидан устун келган. Бу ҳолда эришилган ғалаба албатта шон-шуҳрат, пул, имтиёзни англатмайди, балки кураш инсон қалбларини забт этиш учун, кенг ҳалқ оммаси орасидан ўша – ўз фикр ва орзу-умидларингни ишониш мумкин бўлган бир неча ўқувчилар ортириш учун олиб борилади.

Юқорида баён этилган мулоҳазаларимизда биз ёзувчиларни сиёсий арбоблар билан тенглаштиришга анча яқин бордик ва энди бундай муқоясадан бўйин товлаб бўлмайди. Албатта, бу ўхшашлик унча тўлиқ эмас, лекин уни тан олмасликни адабиёт тараққиётини билмаслик ва унинг минг йиллик тарихи билан ўта юзаки ва содда танишиш деб аташ мумкин бўлур эди. Сиёсатчилар каби, кўпчилик ёзувчилар ҳам гурухларга, ҳозирги пайтда айниқса, уларнинг энг кучлисига умид боғлашади, бу эса муваффақиятга эришишда кўмак беради. Бу одатда биргина совуққон ҳисобкитобнинг ўзидан келиб чиқмаган: бунда ҳамма нарсани ёзувчининг келиб чиқиши, насл-насаби, тарбияси, ҳис-туйғулари ва ўзи улғайган муҳитда шаклланган маслак, эътиқоди ҳал қиласи. Сиёсатдан фарқли ўлароқ, адабиётда кўпроқ гурухлар билан бирдам ва ҳамфир бўлган, ҳокимиятга эга бўлмагани ҳолда бироқ яширин кучга эга ва ўз олдига адолатли мақсадлар қўйган инқилобчи ёзувчилар майдонга чиқади. Адабиётда авантюристлар ҳам учрайди, улар дастлаб ёлғиз ҳаракат қиласидар, лекин аста-секин уларга яқин бўлган безовта, беором қалб соҳиблари келиб қўшилади ва ўз йўлбошчилари атрофига кучли дружина бўлиб жисплашадилар.

Ўз олдиларига ўқувчилар оммасининг кўнглини топиш ва уларга ёқишини мақсад қилиб қўйган ёзувчилар учун тўла конформизм (мослашувчанлик) ва замонасозлик қоида ҳисобланса, чинакам буюк адиллар учун бу – истисно саналади. Жонли тасаввур ва безовта тафаккур гоҳида ўз даври ва муҳити билан ихтилофга киришади. Уларни ижтимоий тузум ёки урф-одатлар, дин, яшаш усули қониқтирамай қолади, улар қолоқликка қўнижмайди ва қотиб қолган доктриналарга қарши исён кўтарадилар. Ғалаба ёки мағлубият эса, ёзувчи қарши курашаётган ҳодиса кўпчиликнинг самимий садоқатига сазоворми-йўқми ёки фақат фаолиятсизликка ёпишиб олишганми, ана шунга боғлиқ. Масалан, Польшада агар кимдир ҳалқнинг олий мақсадларига қарши чиқадиган бўлса, унинг хоин деган номни олиб, оммавий нафратга дучор бўлиши аниқ. Замондошларнинг ҳукмрон гуруҳи идеалларини жорий этадиган ёзувчининг ажойиб намунаси сифатида Миколай Рейни мисол қилиб келтириш мумкин. Дворянлар табақасига чинакам содиқлиги учун унинг кальвинизмга<sup>1</sup> мансублигини ҳам кечиришган.

Муаллиф билан асарга хос ўқувчилар таркиби ҳар хил бўлади: у бир ҳовучгина элита ёки муайян ижтимоий гурух билан чекланиши ёки ҳатто бутун ҳалқ (бу жуда кам учрайди)дан иборат бўлиши ҳам мумкин. Китобхонлар оммаси айрим, алоҳида шахслардан ташкил топади ва уларнинг ҳар бири турлича ҳис-туйғу ва тафаккурга эга бўлади, аммо ҳаммаси жамоа психологияси қонунларига бўйсунади. Денгиз каби сермавж, бекарор ва ўзгарувчан бу омма бўрон ва довулларга дучор бўлади, унда тезоқар, шиддатли оқимлар билан бирга жимжитлик, сукунат паллалари ҳам борки, ҳатто ўшанда ҳам тўлқинлар ҳаракатдан тўхтамайди. Ва ҳар бир адабий ҳодиса мана шу тўлқинлар измида ўйинчоққа айланади. Бироқ ўқувчилар оммасининг муҳокама, мулоҳазалари ва эмоционал таъсирланишини та-

<sup>1</sup> Кальвинизм – насроний дини мазҳабларидан бири, француз теологи (илюхиётчи) Жан Кальвин томонидан асос солинган. – Тарж.

сарруф этувчи кучлар автоном эмас: улар жамият нимаики билан яшәётган бўлса, барчасига боғлиқ, қарам, тобедир. Дин, сиёсат, ижтимоий тузум, иктиносидиёт, урф-одатлар ва айни чоқда икlim, ер, тупрок, ирқ ва ҳатто озиқ-овқат – буларнинг барчаси ўқувчининг таъб-диди ва хайрихоҳлиги, мойиллигига таъсири қилади.

Бир қадар мистицизм улушига эга бўлган, “замон рухи” деб аталадиган нарса шу тарикә юзага келади. Эндиликда “замон рухи” тушунчалик долзарб эмас, лекин тилга олинмаётган бўлса, бу унинг мавжуд эмаслигини ёки ўз аҳамиятини йўқотган деган маънони билдирамайди. У тиришқоқ амалдор томонидан тузилган, ўзи қабул қилиши лозим бўлган кишилар рўйхатини ҳар кун эрталаб телба золим каби чиқинди сават-часига улоқтиради, бунинг ўрнига ҳушига келган одамни қабул қиласиди; аҳмоқ билан икки соат беҳуда валақлашиб, вақтини чоғ ўтказади, доно эса кечгача кутишга мажбур бўлади, шундайм уни паришонхотирлик ва очик-ошкора зерикиш билан атиги бир дақиқа тинглайди, холос. Бундай зулмкор замон рухи – ҳозирги кунда бутун жамиятни, хоҳ биргина мамлакат доирасида бўлсин, хоҳ битта қитъя ёки маданиятга эришган бутун дунёда бўлсин, чулғаб олаётган масала ва муаммолар мажмуидан бошқа нарса эмас. Бундан ташқари, замон рухи мана шу жамиятнинг дилидаги барча орзу-умидларини ва интилишларини ҳам ўз ичига олади, бу шундай бир пинҳоний портловчи моддаки, адабий асар учкун бўлиб, инсон қалбларини аллангалатиб юбориши мумкин.

Бу – одамлар ўйлаганидан ҳам кўра тез-тез содир бўлиб туради, аммо адабиёт тарихи уларнинг фақат баъзи бирлари билангина шуғулланиб, ёзиз боради, холос, каттагина қисмини эса уятчанлик билан сукут сақлаш илиа ўтказиб юборади. Руссо ёки Вальтер Скоттнинг қувончли қабуллари ҳақида, Ренаннинг “Иисус ҳаёти” ёки “Quo vadis” ҳақида мамнуният билан монографиялар ёзилади, лекин айтайлик, Жорж Онэ ёки Гелена Мнишекка бағишлиланган худди шунга ўхшаш монография унинг муаллифини фақат кулги бўлишга олиб келган бўлар эди. Ахир, у ёки бу муаллиф томонидан эришилган ютуқларнинг ҳали ҳал этилмаган жумбоқларини аниқлаш учун адабиёт ертўлаларига тушиб, коғоз титишининг нима кераги бор. Ҳомернинг боқийлиги олдида бош эгамиз ва бундан таажжууга тушмаймиз, аммо Софокл хусусида “ўйлаб, ўйимизнинг охирига етолмаймизки”, номаълум трагиклар афиналик томошабинларни қандай қилиб забт этишгану, “Антигона”нинг гениал ижодкори кўпинча уларга биринчилик ва мукофотларда ён беришга мажбур бўлган. Ва баъзи бир воқеаларни, ма-салан, қандайдир диакон<sup>1</sup> Араторнинг “Апостол (ҳаворий)ларнинг қилган ишлари”ни шеърга айлантириб, “Сан Пьетро ин Винколи” соборини бир хафта мобайнида тўлдириб ўтирган жуда кўпсонли тингловчилар хузурида ўқиб бергани ҳақидаги далилнинг нима учун солнома сахифаларига киритилганини умуман тушунтириб беролмаймиз. Ўша замонларнинг ақлий йўналишлари, таъб-дид, қизиқиш, иштиёқ ва ўйсун, услубларини ҳеч ким аслига келтириб, тиклай олмагани каби, буни энди бизга ҳеч ким изоҳлаб бера олмайди.

Маълум бир даврдаги адабий ҳаёт ўзининг шиддатли ва беқарор, ўзгарувчан оқимида тарих ҳаддан ташқари аниқлик ва пишиқ-пухта муфассаллик билан тасаввур этиб, тиклайдиган нарсалардан бутунлай фарқ

<sup>1</sup> Диакон – православ черковида руҳонийларнинг куйи унвони. – Тарж.

қиласи. Тарихчи чизган сурат доимо соддалаштириш, уйдирма ва ясама вазиятдан иборат бўлади. У баъзи бир тафсилотларнигина тасвиirlаб, қолган бошқа қўпини эътиборсиз қолдирапкан, худди портретдаги юз ифодаси, агар ундан ўткинчи, бироқ жўшқин, кучли эҳтиослар, ташвиш ва хавотирлар туфайли тушган ажинлар тўри ўчириб ташланса, бузилгани каби, давр қиёфасини бузиб кўрсатиб, нотўғри талқин қиласи. Адабий асарларнинг тақдирини кўзлаб олиб борилган жанглардан иборат “ўша кундаги энг муҳим воқеалар”га замондошлар баҳосини олдиндан белгилаб берган минглаб майда-чуйда далиллар беихтиёр назаримиздан четда қиласи.

Китоб қандайдир узок келажакда эмас, балки босилиб чиққан куннинг эртасига ёк, ўз муаллифига итоат қилмай қўяди. У бошқа оқил, доно, олим одамларнинг мулкига айланади ва улар туфайли муаллифни ё кўкка кўтаради, ё ерга уради. Худди ўша асарнинг ўзи гоҳо бир-бирига мутлақо ўхшамайдиган гўёки минглаб асарларга эврилади. Ўқувчи зеҳни ўткирлиги, ўқимишлилиги, ақл-заковатига караб, китобдан ўзини мафтун қилган нарсани олади, бу эҳтимол, жуда кам – ҳаммаси бўлиб, биргина тушунарли ва эсда қолган жумла ёки аксинча, мутолаа қилинган асарнинг ҳажмидан ортиқ даражада кўп бўлиши ҳам мумкин. Кант Жан Жак Руссонинг “Эмиль”ини ўқишга шу қадар берилиб кетганидан, ўзининг ҳар кунги бир хил вақтдаги сайдига чиқишини унутиб қўйган экан. Ҳатто шаҳар ратушасининг соатларидан ҳам кўра аникроқ иш юритишга одатланган бу гениал файласуф шубҳасиз, Руссо қаламига мансуб “Эмиль”га қараганда анча кенгроқ ва теранроқ тафаккурга эга бўлган ва мазкур китобнинг бутун ҳошияларини ўз фикр, мулоҳазалари билан тўлдириб ташлаган. Улуғ мутафаккирлар ва ёзувчиларнинг ўқилган китоб ҳақидаги қайдлари, фикр, мулоҳазалари ва сухбатларидан уларнинг биргина таҳлили ушбу китобларга гўё бургут қанотларини баҳш этгандек бўлиб қўринади.

Муаллиф ўз китобидан ўқувчининг нималарни ўқиб билиб олишини олдиндан сезмайди, ҳар бир ёзувчи китобхонлардан кўплаб хатлар олади ва улар ўзларининг кутилмаган даъво, талаб, шикоят ва таъна, гиналари билан уни довдиратиб қўядилар. Энг камтар ўқувчи бегона матн орасига ўз дилидагини ёзиб қўшиб қўйишдан ўзини тийиб туролмайди. Гарчи ўзлари буни эътироф этишини ёқтирасалар-да, мунаққидларнинг ахволи ҳам шу. Танқидчи-импрессионистлар қолганларга қараганда самимироқ бўлишган, уларнинг қироли Анатоль Франс ўзининг танқидий мақолаларини “қалбимнинг китоб дунёси бўйлаб саргузаштлари” деб атаган! Адабиёт тадқиқотчилари адабий асарни гўёки бекамиқуст, холисона таҳлил қилишга қодир эканликлари ва унга ўзларидан шахсий хеч нима қўшмасликлари ҳақидаги хато фикрдан воз кечсалар яхши бўларди. Агар китобга ўз замонасидан ташқарига чиқиш насиб этгудай бўлса, у ҳар бир кейинги даврда бошқача, гоҳо буткул фантастик ҳаёт кечирган ва биринчи ўқувчилардан ҳеч ким уни таниёлмай қолган бўлар эди. Мазкур китоб нафақат олис, балки бизга яқинроқ бўлган асрлардаги ўз замондошларида қандай таассурот қолдиришини энг ҳалол, виждонли тадқиқотчи ҳам тасаввур қиломайди.

Ўзининг келгусидаги тақдир-қисматидан қатъи назар, китоб энг аввало, ўз даврининг маҳсули ҳисобланади: у шу давр учун ёзилган, унга минглаб ришталар билан боғланган ва мана шу давр қўпинча унинг келгуси тақдирини олдиндан ҳал қилиб қўяди. “Menin aeide, thea...” – “Газабни,

о маъбуда, тараннум этгил...”, ушбу унутилмас сўзларни биринчи бўлиб эшигтан номаълум тингловчилар ўз завқ-шавқ, хурсандликлари билан Ҳомерга бокийлик ато этишган, орадан бир ярим аср вақт ўтгач эса, уларнинг авлодларидан чиқсан ҳукмдор Афин Пизистрат “Илиада”нинг асил матнини сақлаб қолиш учун зарурий чора-тадбирлар кўрган.

Асарнинг асосий оҳанги билан бир қаторда унинг ўша қўшимча, иккичи даражали оҳангларини ҳам ҳис қилишга фақат бугунги кун қодир ва уларни аниқлаш келажак шархловчиларини мушкул аҳволга солиб қўйиши мумкин. Бироқ сўнган акс садога қулоқ солиш бефойда. Келажак авлодлар учун рангиз, туссиз туюлган сўзлар ўз даврий муҳити ичра учар юлдузлар каби ёлқинланиб ёнган. Бу айниқса, ўз даврининг долзарб муаммоларига бой асарлар, жумладан, Аристофан комедияларида яққол кўзга ташланади. Бугунги кунда биз унинг комедиялар оламига кечиккан меҳмонлар каби қадам қўярканмиз, унинг ажойиб, сехрли томошаларидан атиги икки-уч саҳна кўринишларигагина дуч келамиз ва уларнинг жозибадорлигидан бирбутун ҳолда қанчалик ранг-баранг, шукуҳли ва дабдабали бўлганини ҳис қиламиз, ваҳоланки, мушакбозликдан йиғиштирилмаган декорациялару, бир ҳовуч ракеталар қолган, холос. Аристофан нафақат драматург, балки самимий лирик асарлар муаллифи ҳам бўлган, зеро, у бугун бизларни ўз ватандошларини кулдиргани каби кулдиролмаса ҳам, ҳар ҳолда чукур хаяжонга солиши мумкин.

Қайси китобнинг ёнидан замондошлар лоқайд ўтиб кетадиган бўлса, келажак авлодларнинг ҳатто энг қизғин эътирофи ҳам бундай китоблар баҳорининг бой берилган лаҳзаларини қайтаролмайди. Адабий солномаларда Словацикӣ ва Норвид сингари ўз даврида тан олинмаган ва унутилган муаллифларнинг узун рўйхати сақланиб келади. Уларнинг давр ёлқинидан аланга олган ижоди соф, қизғин ва жўшқин бўлган пайтда етказилган зарар ўрнини энг сўнгги тантаналар ҳам тўлдиролмади. Ўз вақтида аниқланмаган ва рад этилган гўзаллик – бамисоли завол топган чашма. Эски бут, санамлар узра тирилган Лазарь каби, ярим асрдан сўнг қабрдан бош кўтарган Норвидни шарҳ, изоҳларга кўмиб ташлашди, у энди поляк шеърияти ва тафаккури учун ҳеч нима қила олмасди, агар Мицкевичнинг бронза шеъри билан Залескийнинг қувнок, жарангдор поэзияси даври бўлганда, бошқа гап эди.

Словацикӣнинг ўз замондошлари томонидан тан олинмаганига янаем кўпроқ афсусланасан, киши. Польшанинг биринчи ҳақиқий драматурги саҳна учун ишлай олмади, пьесаларининг театрда қўйилганини на ўзи, на замондошлари кўрди ва уларни ҳеч ким ўқимади ҳам, охир-оқибат бу ёлғиз ижодкорнинг ғайрати, хафсаласи совиди, сўнаётган ёлқин охирги марта “ялт” этиб кўринди – Микеланжелонинг “Қуллар” номли поэтик версиясида, гарчи охирига етказилмаган бўлса-да, ажойиб, самимий, жозибали фрагментлар шаклида намоён бўлди. Словацикӣнинг эътироф этилмагани поляк драмаси ривожининг манзарасини бузади, агар у Словацикӣ театри белгиси остида ва унинг фаол иштирокида кечганда, қандай қиёфа касб этган бўлишини тасаввур қилиш қийин эмас.

Стендалнинг ҳали туғилмаган ўқувчиларга ўйллаган дохиёна мурожаатлари кўнгилга чукур таъсир қилиб, меҳримизни қўзгатади, аммо ушбу қалб нидосининг бутун фожиавийлигини камгина одам англайди. Унда ўз даври томонидан рад этилган асарларнинг умидсиз фарёди, чорасиз нолалари акс

этган. Адабий асар ўз даври, замонаси олдида улкан мажбуриятларга эга ва бунга халал берадиган барча нарсалар ўта заарли ва айбланишга лойиқdir. Бироқ ёзувчи билан давр ўртасидаги низо, ихтилофнинг келиб чиқишига ёзувчининг ўзи ҳам айбдор бўлиши мумкин – буни ўзларига эътиборсизлик ва қадрига етмасликни далил қилиб келтириш билан оқламоқчи бўлишади. Шу ўринда беихтиёр яна Словаккийни эсга оламиз. У ўз ёшлиги ҳақидаги ажойиб, жозибадор шеърларни, улар ҳақиқатан ҳам гўзал шеърлар эди, ўзи билан чет элга олиб кетади ва уларни деб, у ерда поляк мұхожирлари билан аразлашиб қолади, улар 1830 йилги қўзғолонда курашган ва мағлубият алами боис, ўзларининг бебаҳт, омадсиз қисматлари-ю, рўёбга чиқмаган орзу-умидларидан бошқа ҳеч нима ҳақида ўйлашни ҳам, гапиришни ҳам истамаган одамлар эди. Улар шоирнинг “Роҳиб”ини, “Гуго”, “Илон”ини ҳам, бемаврид байронизмини, шунингдек, ўзининг кузатувчан ва хаёлчан болалиги ҳақида ҳикоя қилувчи “Тафаккур соати”ни ҳам қабул қилишмади. Шу тариқа унинг ризқ-рўз каби ҳаётий зарур бўлган сўзларини эшитмасликка кўникишди, натижада ижоди айни тўлиб-тошган ўша пайтда уни ҳеч ким сезмади, пайқамади, қадрламади ҳам.

Бунақанги ҳолларда айниқса, танқидчиликнинг сўқирлиги одамга ёмон таъсир қиласи. Поляк танқидчилиги учун Словаккий билан Норвидни ўз вақтида пайқамай, ўз устидан ўзи чиқарган ҳукмдан оғирроқ жазо йўқ. Босилиб чиқсан китобларга танқидчиларимиз томонидан ўз вақтида етарлича баҳо берилмагани билан боғлиқ бундай мисолларни кўплаб келтириш мумкин. Бунинг сабаблари эса турлича: нотўғри тушунчалар, сохта, салбий фикрлар ва ёмон ният, асарни санъат маҳсули сифатида баҳолай олмаслик, ўша даврдаги ҳукмрон трафаретларга берилганлик ва ҳ. к. Гошиньский-нинг ўйламасдан, енгилтаклик билан ёзган биргина мақоласи буюк поляк комедиографи Александр Фредро қаламини ишдан чиқарди.

Танқид, танқидчилик ўз намояндлари туфайли адабиётнинг бир қисми ҳисобланади; улар томонидан бағишлиб ёзилган, китоблардан ортикроқ бўлган асарларни мисол қилиб келтириш мумкин. Танқид адабиётга боғлиқ, чунки адабиёт унинг учун материал манбаи саналади. Танқид адабиётни тадқиқ этади, изохлайди ва унга баҳо беради. Баъзида у ёзувчи билан китобхон ўртасида воситачи сифатида камтарона вазифа билан кифояланса, баъзан судья, ҳакам сифатида ҳукм чиқаради. Кейинги ҳолат унинг ўз этимологияси билан боғлиқ: унинг номини белгилаган феъл – krinein “айбламоқ, суд қилмоқ, ҳукм чиқармоқ” деган маъноларни англатади. Танқид сўзи ўз моҳиятига кўра юнонларга бориб тақалади. Узок ўтган замонларда, эрамиздан аввалги VI асрдаёқ, ақидапараст, доим тирноқ остидан кир излайдиган танқидчиларнинг ҳомийси колофонлик файласуф Ксенофан Ҳомерни “диний тушунчалар софлиги” йўлида айблаб, коралаб келган. Бугунги кунда барча замонлар ва халқларга мансуб танқидбозларнинг эпоними<sup>1</sup> бўлган Зоил ҳам Ҳомерга қарши тиш қайраб юрган. Бу homeromastiks, яъни “Ҳомернинг офати” ўшандан буён ўзининг “севимли усули”ни ишга солиб, поэма қаҳрамонлари ва воқеаларини мазах қилиб, улар устидан кулиб келган. Зоилдан ушбу “усул”ни ўзлаштириб олган юзлаб фельетончилар ўзларининг асосчиларига ҳатто миннатдорчилик ҳам билдиrolмайди, чунки унинг ҳақида ҳеч нарса билмайдилар.

<sup>1</sup> Эпоним – қадимги Грекияда тўққиз архонт (олий мансабдор шахс)нинг биринчиси, ийл унинг номи билан ифодаланган, бу ерда: ўз номини бирор кимга берувчи маъносида.

Дунёда ҳар бир нарсадан, ҳаттоки Овидийнинг “Севги санъати”дан ҳам одоб-ахлоқ қидирган ўрта аср танқидчилари нинг уруғ-авлодлари халиям йўқ бўлиб кетмаган. Одамлар эзгу ишга қараганда гўзалликка камроқ мояйлдирлар ва бу эзгулик фақат фойдани кўзламаса агар, унда ҳеч қандай ёмон томони йўқ. Кўп даврларда адабиёт ўзининг фойдали эканини дастак қилиб, китобхонни, жамоатчилик фикрини ўзига жалб этишга ҳаракат қилган. “Фойдали”, “керақли”, “мақсадга мувофик” сингари сифатлар китоб номларида кўриниб турган ва ҳозирги пайтда кинотеатрларнинг афишаларида учрайдиган шов-шув бўладиган сифати томошабинларга қандай таъсир қиласа, китобхонларга ҳам шундай ҳаяжонлантирадиган даражада таъсир қилган. Насиҳатгўй “фойдали” сифатидан таъсирланадиган киши “сенсацияли” сўзига учадиган одамдан ахлоқий жиҳатдан юқори туради деб ҳисоблайди ва у ҳақ бўлса ажабмас.

Танқид ривожланган, юксалган кўпгина адабий жанрларга қараганда ёшроқ, танқид улар ҳақида ёзмасдан анча олдин бу жанрларда дурдана асарлар яратилган. Аммо кейинчалик ҳам танқид – ҳар ҳолда бизнинг нуқтаи назаримизда, – вақти-вақти билан “үчиб”, жимиб кетган ва бутун бир адабий даврлар уни деярли билмаган пайтлар ҳам бўлган. Ахир, XIX асрга қадар Польшадаги адабий танқид ҳақида нимаям дейиш мумкин? Танқидчилик анъаналари ва танқидчининг бой тажрибасини биз Францияда кўришимиз мумкин, лекин у ерда танқидий фикр, мулоҳазаларнинг баъзи бир турлари, шакллари учун имкон бўлмаган, чунки китоб муаллифига нисбатан доимий равишда одоб саклаш мажбурий бўлиб, адабиёт чегарасидан ташкаридаги шама, ишора, луқмалар фақат норозиликка ёки кулгига сабаб бўлган, холос.

Ёзувчиларни танқид камдан-кам ҳолларда қониқтиради ва танқид буни уларнинг ўзларини ҳаммадан ақлли, билимдон фаҳмлашлари билан изоҳлайди. Албатта, ижод ўша пайтга қадар номаълум бўлган жон, рух, ҳис-туйғуларни, гўзалликни ҳаётга чорлаш қобилияти эканини инкор қилиб бўлмайди, қолаверса, сўз устидан хукмронлик ва сўз воситасида эришилажак ғалаба – буларнинг барчаси афзаллик, устунлик, фавқулоддалик, қадр-қиммат, обрў-эътибор, яхши хислат ва фазилатлар туйғусидир, дейишга асос бор. Адабий дурданалар антологиясини тузиш мумкин ва унинг муҳташам саҳифаларидан Ҳорацийнинг “Exegi monumentum” – “Мен ҳайкал барпо қилдим...” деган сўzlари ва Мицкевичнинг “Импровизациялар” деб номланган шеърлари ўрин олишга ҳақлидир, бироқ баъзи бир “тан олинмаган даҳолар”нинг қичқириқларига, ўзига бино кўйган искеъдодсизларнинг, серишва укувсиз, нўноқларнинг ҳар доим ҳам кулгили бўлмаган, балки гоҳида ачинарли овозларига нисбатан жиддий муносабатда бўлмоқ мушкул.

Ёзувчини айниқса, унинг асари билан ўқувчи-танқидчининг зўр бериши, тиришиши ўртасидаги номутаносиблиқ ранжитади. “Уни бир ўтиришда, бир неча соат ичида ўқиб чиқдим!”. Ўз китоби ҳақида шундай сўзларни эшифтгач, қайси ёзувчи азобдан титраб, сапчиб тушмайди дейсиз. Мақтов тарзида яхши ният билан айтилган ушбу сўзларда, не тонгки, шафқатсиз киноя, пичинг мужассам. Бир неча соат ичида! Бунда юзлаб, минглаб ижодий соатларнинг кулини кўкка совурган шиддатли алангани кўрасан. Ҳатто танқидчининг ошириб юборилган мақтоваиди ҳам, ёзувчи унинг китоб саҳифаларидан сакраб чопиб ўтиб кетганини кўриб, билиб, ўз аламини

яшира олмайди. “Фақат биргина илтимосим бор, – деб ёзган эди Монте-скье “Қонунлар моҳияти”нинг муқаддимасида, – аммо у рад этилмасми-кин деб қўрқаман: токи ҳеч ким китобни тез ўқиб чиқиб, йигирма йиллик меҳнат устидан шоша-пиша хукм чиқармасин”. Унинг илтимоси бизнинг замонамиздагина бажарилди. Фақат классиклар ёки уларга тенглаша олган йирик сўз усталаригина фавқулодда диққат-эътиборга умид боғлашлари мумкин, мунаққидлар улардаги ҳар бир сўзниң туб моҳиятига чукур кириб борадилар. Аммо бу ерда танқидчи адабиётшуносга жой беради. Ҳозирги замон ҳатто ўзининг буюкларини ҳам паришонхотирлик, эътиборсизлик билан тинглайди.

Конрадда шундай бир ибора бор: “Ўз кўнглининг танқид оламидаги саргузаштларига жудаям хурсанд ва жудаям хафа бўлиб қарамайдиган ёзувчи – яхши ёзувчидир”. Демак, бу ҳолда “яхши ёзувчи” – нафақат маҳоратга эга, балки тўғри, ҳалол, ўз қадр-қийматини биладиган, уни сохта камтарлик билан камайтиrmайдиган ва манманлик или ошириб ҳам юбормайдиган одам. Унинг ёзувчилик вижданни ҳамиша хотиржам, кимнингдир масъулиятсизлик билан айтган фикри ёки хукмига ўйланиб, бошини оғритмайди. Муаллиф ўз асарида ўзини хўжайнинг ҳис қиласи, аммо ўз мулкининг чегараларини бетакаллуфлик билан бузишларини ёқтиrmайди ва аллакимларнинг панд-насиҳатларига ҳам тоби-токати йўқ. Ёзувчини ҳеч нарса танқидчиларнинг айниқса, на билим, на маданият ва на истеъод билан мустаҳкамланмаган “устозларча” насиҳатгўйлигичалик газаблантиrmайди.

Готье “Мадемуазель Мопэн”га ёзган сўзбошисида танқидчиларнинг ёзувчилар назарида кечирилмас бўлиб кўринган деярли барча гуноҳларини бирма-бир санаб ўтган. Орадан юз йил ўтгач, башарти бугунги кунда уни сўзбоши корректураси мабодо кўлида бўлганда, унинг мазкур филиппика (фош қилувчи нутқ)га ҳеч қандай ўзгартишлар қилишига тўғри келмаган бўлар эди. Ва биронта ҳам ёзувчи уни бунга даъват қилмаган, аксинча, баъзи бирлари ҳатто яна бир нималарни қўшимча қилишни таклиф этган ҳам бўларди. Ўтмишда ёзувчилар ўз танқидчилари билан дуэлда олишган, маҳфий суратда ёлланма қотилларни юбориб, уларни ўлдирмаса ҳам, лекин яхшилаб дўпослашларини тайинлашган, аччиқ сўзлар билан лаънатлаб, ғамгин, қайғули бокийликка дучор бўл деб карғашган: ундайларнинг исмлари Вольтернинг китобларида кўп учрайди. Афсус, янги Кастильоне пайдо бўлиб, ҳурматли ва бенуқсон танқидчининг нафис таърифини қилиб берганда, яхши бўлар эди.

Оскар Уайльдинг “Танқидчи санъаткор сифатида” деб номланган диалоги мана шунга ишора эди, унда “қийин масала”, яъни танқидда санъат асаридан бошқа ҳамма нарсани топиш мумкинлигига шама қилинади. Уайльд ўзига замондош бўлган, айниқса, унга ҳеч қаҷон рўйхушлик бермаган газета танқидига месимай қараган, у ўқувчилар билан иттифоқ тузган ва улар унга шу қадар катта шон-шуҳрат келтирганки, охир-оқибат танқидчиларнинг таслим бўлишларига тўғри келган ёки ҳеч бўлмаганда, овозлари учган. Бундан фойдаланиб, энди Уайльд қиёфасида буюк ёзувчи-ни кўрган одамлар гапира бошлашган ва бу узоқ давом этмаган. Шахсий фожиага учрагандан сўнг, Уайльд номи Англиянинг адабий мухитидан ғойиб бўлди ва лаънатланди. Эндиликда унинг номи яна қайтадан жарангламоқда ва танқидчилар асарларининг янги нашрлари ёки пъесаларининг қайта

тикланиши муносабати билан у ҳақда ёзганда, унга ҳушёрлик ва одоб билан баҳо бериб, ўзларининг йўл қўйган эски хатоларини оқламоқдалар.

Китобхон ёзувчи қаламини йўналтирас экан, худди театрдаги томошабинга ўҳшаб, ўзини билдирамайди, – биринчиси ўз мавжудлигини китобнинг сотилган нусхалар сони билан ёки қўл тегизилмаган адад орқали маълум қилса, иккинчиси – тўлиқ ҳолда келиш, олқишлир ёки ҳуштак чалиб, пьесага норозилик билдириш билан ифодалайди. Танқидчи эса ёзувчига бевосита ва тўғридан-тўғри мурожаат қиласди. Ёзувчи ўз танқидчиларини ҳар доим ҳам шахсан бўлмаса-да, лекин ҳеч бўлмагандан ташки кўринишига қараб билади, ҳар ҳолда уларнинг фикр, қарашлари, олдиндан пайдо бўладиган тушунчалари унга яхши маълум. Танқидчилардан кимлар унга қарши, ким ёнини олади, буни у олдиндан сезади. Ким билан кўпроқ ҳисоблашиши ёзувчининг характер кучига боғлиқ, чунки унга шараф келтирадиган душманлар билан бир қаторда захрини сочадиган мухлислар ҳам учраб туради.

Башарти адабиётнинг маълум бир даврида буюк танқидчи, яъни юксак маданиятли, қайнок қалб, қизғин ва жўшқин тасаввур, ёқимли завқ-шавқ, ғайрат, иштиёқ, жозибали ақл соҳиби бўлган самимий инсон ҳозир бўлса, у шубҳасиз, ўзига замондош ёзувчиларнинг китоблари ҳақида ўз фикрини билдиради ва у албатта, номаълум китобхонлар оммаси фикридан ажраплиб туради. Ёзувчи билан танқидчи ўртасида қалин, яқин дўстлик юзага келиши ва танқидчи ёзувчининг “мудрок” имкониятларини уйғотиши ҳам мумкин – Конрадга Ричард Кёрл худди шундай фойдали таъсир кўрсатган. “Варшава кутубхонаси” журналинг мухаррири Ҳенкелнинг бу борада қанчалик мухим роль ўйнаганини билсангиз эди! Ўзининг оддийгина ишхонасидан туриб, у кўплаб китобларнинг тақдирига бош-қош бўлган ва уларнинг орасида бир қанча дурдона асарларни учратиш мумкин.

Бироқ ҳеч кимнинг маслаҳатини қабул қилмайдиган, ўзига ишонган, бегона, ёт фикрлар таъсирига бериilmайдиган ёзувчилар ҳам бўлади – улар бу гапларни инсинуация<sup>1</sup> деб ҳисоблаб, қаҳр-ғазаб билан норозилик билдирган бўлардилар. Ва бу жуда ахмоқона иш бўлур эди. Қандай қилиб ҳеч ким ўз овозини билмаслиги мумкин (уни магнитофон тасмасидан эшитганингда, қанчалик ҳайратга тушасан!), чунки овоз ташки акустикадан бутунлай фарқ қиладиган ички акустикага бўйсунади, шунга ўҳшаб ёзувчи ҳам ўз асарини ярататганда ҳамма нарсани ҳис қилиб, фикрлаб, нималар киритилмай қолди, ҳаммасини кўриб туради. Ҳар бир жумланинг узун ва ўзига яраша бой тарихи бор ва уни таҳлил қилиб, тушунтириб бериш мумкин, лекин қоғозда тугал ва ўта қиска, ихчам шакл касб этгач, жумла ёт, бегона онгда ўзининг бутун дастлабки ва goҳo ўта ёрқин ҳаётини аслидай тикланишини таъминлай оладиган ҳар қандай имкониятлардан маҳрум бўлади. У муаллиф тинглаётган симфония ўрнига барча қолганлар учун ёлғиз аккорд<sup>2</sup> бўлиб янграй бошлайди. Бизнинг яратган нарсаларимизни бошқа одамлар бизларга қараганда ўзгача тинглайдилар ва тушунадилар ва шу боис мазкур икки хил англаш ўртасидаги тафовутни зинҳор ўқувчининг бефаҳмлигига йўймаслик керак.

Адабий архивларда китобхонларнинг фикр ва мулоҳазаларидаги тушуниш ва самимиятни сезган ва уларнинг таъсири остида ўз асарларини тўла итоаткорлик билан қайта ишлаган буюк ёзувчиларнинг ҳайратланарли даражадаги камтарликлари ҳақида гувоҳлик берувчи кўплаб хужжатлар

<sup>1</sup> Инсинуация – тұхмат, бұхтон, иғво, қитмирлик. – Тарж.

<sup>2</sup> Аккорд – бир неча товушнинг ҳамоҳанг бирлиги. – Тарж.

сақланади. Биргина сўздан – унинг номаълум ўқувчига ёки таниқли танқидчигами – айнан кимга тегишли эканини ва нималар таклиф қилинаётганини: асарга муаллифнинг ўйлаб қўйган ният, режалариға зид бўлган унсурларни қўшиш ёки мазкур ният, режаларни янайм яхшироқ ва мукаммалроқ тарзда ифодалаш ҳақидами, буларнинг барчасини дархол билиб олиш мумкин. Ёзувчи учун ўқувчининг китобга нисбатан тўғри, ҳалол ва дўстона ёндашувигина қимматли ва қадрлидир. Бироқ шундай бўлишига қарамасдан, баъзан ҳатто ғирт душман одамлардан ҳам бир нималарни ўрганиб олиш мумкин.

Китобхон муаллифни унинг ўз қаҳрамонларига ўхшатишга мойил бўлади ва уни уларнинг орасидан қидиради, гоҳида адашади, баъзан эса ҳатто топишга ҳам эришади. Буни ўз китобини кўплаб ижобий ҳам салбий персонажлар билан тўлдириб ташлайдиган ёзувчиларга нисбатан амалга ошириш жуда қийин кечади. Бальзакни ўз қаҳрамонларининг тумонат оломони орасидан ёки Шекспирни ўзи яратган қироллар, севишганлар, қизиқчи, масхарабозлар, бекорчилар ва қароқчилар ичидан ким ҳам қидириб топа оларди? Бунинг учун бир тўда сарой амалдорлари орасидан шаҳзодани таниб, ажратта олган Жанна д'Аркнинг ўтқир кўзлари керак бўлади. Кўпчилик Ҳамлет, бу – Шекспирнинг ўзи деган фикрдан сира қутуолмайди. Айрим ҳолларда муаллифни осонгина таниб олиш мумкин, масалан: жаноб Бержере образида ҳамма Анатоль Франсни дарров таниган, ҳатто Бержере исми, Рене – Шатобрианнинг синоними бўлгани каби, муаллиф билан маънодош сўзга айланган.

Агар муаллифни персонаж қиёфасига қараб топиш қийин бўлса, буни ижодида устунлик қилаётган оҳанг ёзувчи характерининг ифодаси деб ҳисоблашади: Рабленинг мечкай, ичкиликбоз ва ахлоқсиз одам бўлганига ҳеч ким шубҳа қилмаган. Ўшанда Рабле – XVI асрнинг энг ақлли ва ўқимишли кишиларидан бири сифатида – ўзининг қўпол ва дағал ўй, фикрларини “уятсиз, беадаб ва семиз” Маршо хукмронлик қилган бадиий жиҳатдан бўш асарлардан олинган чиройли либослар билан бекитиб, хаспўшлаган. Ҳудди ўша даврда Монтењ ўзининг дабдабали портрети устида ишлаган ва деярли ҳеч нарсани яширмаган, ўз иллатларининг – беозор камчиликлар эканини, камчиликлари эса ўзига шу қадар азиз, қадрли ва ёқимли бўлганидан уларни фазилатлар қаторида қабул қилиш мумкинлигини билдиришга, тушунтиришга ҳаракат қилган. Руссо эса бу борада катта-катта қадамлар ташлаб, анча илгарилақ кетган, у дастлаб “Янги Элоиза” ва “Эмиль” туфайли одамларга, дунёга нафосат ва эзгулик тимсоли бўлиб қўринди, сўнг эса уни, атиги шама, ишоранинг ўзи ва ўз ҳаёти ҳақидаги самимий ҳикояга айлантиришга аҳд қилди; “Икрорнома”да у ўзини келажак авлодлар олдида қандай намоён бўлишни истаган бўлса, шундай тасвирлаган. Аммо у барча кутича, ғаладонларни, жавонлар, архивлар ва фуқаролик ҳолати ҳужжатларини қайд этиш китобларини титкилаб, ковлаштирувчи тарихчиларни ҳисобга олмаган, ўй-хаёл, тасаввуридаги душманларнинг тухмат ва маломатларига васваса жазавасида қарши кураш олиб бораркан, юз, икки юз йилдан сўнг, унга номаълум, нотаниш одамлар томонидан ўз портретига шу қадар жиддий путур етказилиши етти ухлаб тушига ҳам кирмаган.

Романтизм айниқса, ўқувчиларнинг ўз севимли муаллифларини уларнинг услубларига кўра тасаввур қилишдан иборат кўнгил эҳтиёжларини

қондиришга ҳаракат қилган. Байрон барчани киноя, пичинг, дилгирлик, завқ, эҳтирос билан ниқобланишга, иблис тожидаги нурлардан бир чимдим юлиб олишга, денгиз қароқчиси, рицарь сирли шаҳзодага, Каин ва Дон Жуанга айланиб, ўзи ҳақида ўзи гапиришга ўргатди, бу ҳақиқатан ҳам нафақат бўйи етган сентиментал қизлар, балки кексаяётган Гёте учун ҳам сехрли, фусункор поэтик ходиса эди. XIX асрнинг охирларида ўзини хурмат қиласиган шоир, табиат унга мустаҳкам соғлиқ ато этган бўлишига қарамасдан, сил қасаллигига чалинишга ёки ҳеч бўлмагандан, сил қасаллиги билан оғриган беморга, сунъий воситалар ёрдамида бўлсаем, худди гўрдан чиқсан мурдага ўхшаб, рангпар бўлиб юришга мажбур эди: бунинг учун лимонни ўн-ўн бешталаб ютар, сирка ичар, уйқудан воз кечар, овқатга эса қўзлари билан еб қўйгудай бўлиб, суқланиб қарааш билангина кифояланарди. Вазни юз килограмм тош босадиган лирик шоирни фақат юморист тушидагина кўриши мумкин эди. Эндилиқда шоир учун бўрон, довуллар, қайгули, ғамгин ёлғизлик, қаттиқ жазавага ва қасалхонага тушиш шарт эмас. Ҳозирги вақтда жиддийлик, вазминлик, осойишталик, мустаҳкам ва соғлом ақл-идрок ёқади ва ижобий таъсир қиласи, ёзувчи китоблар билан, кексайган пайтда эса – кўпсонли оила аъзолари билан овуниши мумкин. Клоделнинг то учинчи авлодига қадар бир неча ўнлаб қариндош-уруғлари қуршовида тушган фотосурати муҳлислари учун кутилмаган совға бўлиб, уларнинг меҳрини товлантириб юборган.

Баъзан қувноқ ва бир қадар енгилтак, бемулоҳаза ниқоб ортида муҳим ва диққат-эътиборга лойиқ нарсалар яширган бўлади. Китобхон ёзувчиidan рух улуғворлигини, олижаноблик, журъат, жасорат, мардлик, адолат, файрат-шижоат, яхшилик, самимиликни, яъни инсониятнинг олий мақсад, юксак орзуларини ифодаловчи эзгу амалларни кутади ва ижодий сўз мана, неча минглаб йиллардан буён ана шу мақсадларга хизмат қилиб келмоқда. Нафакат буюк дурдоналар, балки камтарона аҳамиятга эга бўлган асарларнинг кўпчилиги ҳам барча даврларда ва барча ирқлар учун мана шундай талабларга жавоб беради. Халқ таъзим қилиб, тан берган ва фахрланадиган адабий асарлар орасида обрў-эътиборга эга бўлмаган, маслаксиз, эътиқодсиз “асар”ларни учратиш амримаҳол, – Аретино ҳамиша ёки тўғрироғи, қаламидан қироллар қалтираган пайтларда муттаҳам бўлган.

Ёзувчини ҳаётда шахсан кузатиш имконига эга бўлмаган ўқувчи уни китобларига разм солиб қидиради, оммавий чиқишилар қилган пайтларидан сарасоф солиб, кузатади. Баъзи бир истисноларни хисобга олмагандан, ёзувчи ўз ижодида ҳаётдагидан кўра яхшироқ бўлади, – нима учун баъзи бир истиснолардан ташқари деяпман, чунки Стендалга ўхшаган ўжар ва қайсар, ғалати, қизиқ табиатли кишилар ҳам учраб туради. У ўзини ҳаммага беадаб ва ахлоқсиз одам қилиб кўрсатган, аслида эса одобли ва олийжаноб инсон бўлган. Мицкевич ўзининг бир шеърида барчага баравар тааллуқли ҳақиқатни шундай ифодалайди: “Кун бўйи яхши яшаш китоб ёзишдан ҳам кўра қийинроқдир”.

Адабиёт ҳамиша инсонга ўзининг камчилик ва нуқсонларини енгиб ўтишда ёрдам беришдан иборат ўз юксак миссиясини адо этиб келган. Бу – у ёки бу даврда қабул қилинган урф-одатлар билан ҳам, одоб-ахлоқ принциплари билан ҳам боғлиқ эмас, чунки ёзувчилар кўпинча ҳатто ўз даврининг урф-одатлари ва айниқса, олий одоб-ахлоқ қонунига зид бўлган принциплар билан курашиб келишган ва бунинг учун улар таъқиб

қилинган: ўзларини суд қилиб, китобларини гулханларда ёқишиган, фақат кейинчалик авлодлар бу қурбонларнинг ёвузлик эмас, балки эзгуликка хизмат қилганига ишонч ҳосил қилишган. Ёзувчилар ҳамиша инсоний виждоннинг муносиб ифодаловчилари бўлган. Озодлик ва адолат каби муайян идеаллар теграсида адабий асарларнинг ажойиб ансамбли – кўпгина асрлар бош эгиб, тан берган предмети ва фахр-ифтихори жам бўлган. Аянчли инсон тақдирига бағишлаб, қанчадан-қанча ҳамдардлик, раҳм-шафқат гекзаметрлари битилган, Ахилл билан Приам ўтасидаги тунги сухбатнинг абадий шукухи акс этган “Илиада”дан тортиб, Европа адабиётининг энг юксак саҳифалари ҳамда Шарқнинг барча адабиётлари ана шундай ҳаётбахш туйғу билан йўғрилган.

Ёзувчига унинг ижод дамларида эшитилиб турадиган қандайдир ички бир овоз бор, бу – огоҳ ва талаб қилувчи овоздир. Ёзувчи, таъбир жоиз бўлса, номаълум эртанги кун томон оқиб бораётган инсоний дарёга сўз тўрларини ташлайди, бу тўрга илингандар ўз тақдирлари ҳақида сўзлаб беради ва ушбу ҳикоя бир дақиқа овунтириши ва ўша заҳоти унутилиши, эҳтимол, кўп йилларга ё ҳатто бир умрга эсда қолиши ҳам мумкин. У қарашларни ўзгартириб, ишонч уйғотади ёки уни йўқотади, огоҳлантиради, сергаклантиради, безовта қилади, умид бахш этади ёхуд умидсизликка солади. Ёзувчи яратган образлар оламга, ҳақиқий мавжуд бўлган одамлар орасига кириб бориб, оломон билан аралашиб кетади ва ибрат, намуна, ўгит, панд-насиҳат ва ҳаётнома бўлиб хизмат қилади. Улуғ ёзувчиларнинг ўзлари яратадиган жон, руҳлар учун уларни идрок этиб, қабул қиласидаги инсонлар олдидағи мастьулият ҳисси шу қадар улканки, у ижодкорларни табарруклик шуъласи или мунаввар айлади.

Ёзувчи ҳақида унинг асарлари таъсири остида шаклланадиган фикр ҳаттоки ижодкор характерини ўзгартириб юбориши ҳам мумкин: у ҳолда қўрқоқ фуқаролик жасоратини намоён қилса, кучсиз одам сабот-матонат кўрсатиб, “ватан” деган сўзнинг бутун салмоғини, аҳамиятини дилдан ҳис этади, ҳолбуки бу унинг учун шу пайтгача услубий безакдан бошқа нарса эмас эди. Ёзувчининг ўз обрў-эътиборини, қадр-қиммати ва фазилатлари ни саклаб қолиши учун кучи етмай қолганда, унга ўз номи билан боғлиқ жамият туйғуси ёрдамга келади. Ва у ўзининг яширин иттифоқчисидан кута оладиган олий кўмак ҳам шунда мужассамдир.

## ШОН-ШУХРАТ ВА БОҚИЙЛИК

Шон-шуҳрат ҳақида орзу қилмаган ёзувчи бўлмаса керак. Фақат ўрта асрларда номсиз, номаълум китоблар учраб турар, уларнинг муаллифлари ўзларининг кимлигини билдирамасдан, китоб сўнгигида худога тавалло қиласар ёки китобхонларга тоат-ибодатлари чоғида дуо қилиб қўйишларини сўраб, мурожаат этишарди. Гуманистлар шон-шуҳратга ўчликда ҳатто антик давр ёзувчиларидан ҳам ўтиб кетишиди, уларнинг ажойиб плейдасидан биринчи бўлиб, инсонпарварлик ғояларининг ҳомийиси Петрапка хали ҳаётлигига даёқ катта шон-шуҳратга эришган эди.

Петрапкага Римда бўлиб ўтган гулчамбарлар тақиши, иззат-икром, ҳурмат-эҳтиром кўрсатиш маросими мисли кўрилмаган тантанага айланиси кетган. Бу – мангу шаҳарнинг таназзулга юз туттган даврига, Рим папаси

Авинъонда турган пайтга тўғри келган. Кўчалар қаровсизликдан хароб ахволда, вайронага айланган черковларни ўт босиб ётар эди. Шунда бирдан зимистон ёришиб, чор-атроф ёрқин нурларга тўлади, Капитолийда ийғилганлар улуғ шоирни кутлаб, муборакбод этишади, бу билан варварлар дунёсига ижодий меҳнатнинг – буюк тантана эканлиги эслатиб қўйилади. Петрарка туғилган юрт – Ареццода шаҳар маъмурлари унга шаҳарликлар томонидан асраб-авайлаб сақланаётган ўз уйини кўрсатишади. Петрарка тўхтаб ўтган Бергамода қандайдир нотаниш заргар шоир тунайдиган хонани олтин суви юргизиб, зарҳаллаб чиқишини буюради. Папа, императорлар, қироллар, унвонли аслзодалар уни ўз саройларига чорлашар, у билан хатлар ёзишиб, сухбатини олишга мунтазир эдилар. У Венецияда дожнинг<sup>1</sup> ўнг томонидан жой олиб, керилганича савлат тўкиб ўтиради. Уни бир марта гина кўриш учун узок-узоклардан кўплаб зиёратчилар келишарди.

Бундай катта шон-шуҳрат фақат ёлғиз хизматлару даҳоликдан дарак бермасди, балки бу воқеа – доимий назорат талаб қиласиган кенг кўламли тадбирларнинг натижаси ҳам эди. Петрарканинг мактубларида буни тасдикловчи далиллар бор ва у ўз обрў-эътиборига путур еткизмаган ҳолда ўзини оммалаштиришни, одоб-ахлоқ чегарасидан чиқмай, ўз дўстларидан фойдаланишни ҳам ўрнига кўярди. Аммо баъзан ўзи учун хийла номақбул бўлган келишув, муросаларга ҳам кўниб кетаверарди, масалан, бераҳм ва маккор Висконтилар саройида яшаб, ўзига содик Боккаччонинг хафсаласини пир қилган эди. Энг охирги асрларда кўплаб гуманистлар Петрарка шон-шуҳрати билан тенглашишга муваффақ бўлган бўлишса, Эразм Роттердамский ундан ҳатто ўзиб кетди, чофи. У ўз даврида муҳим аҳамиятга эга шахс бўлиб, папа, қироллар ва кардиналларга мактублар ёзар ва шу тариқа уларнинг хурматини бажо келтирасиди. Гуманистлар эришилган шон-шуҳратдан моҳирона фойдаланиб, қадимгиларнинг ўгит, васиятларига амал қилишарди – Цицерон кўпчиликка бир нималарни ўргата олган эди.

Қадимги Римда адабий асар учун кенг, равон йўл очилмаган эди. Унинг қўллўзма нусхада тарқалиши муаллифдан анчагина моддий харажатлар талаб қиласи ёки фойда кетидан қувган кўчириб берувчи котибларнинг қурбонига айланарди. Муаллиф учун югур-югур, ташвишлар кўп бўларди: у аввало, ижарага хона топиши, қўллўзма ўқишини тинглашга рози бўлган одамларни тўплаши, сўнг тингловчилар унинг асарини оммавий йифин, анжуманларда мақташлари учун зиёфат ташкил килиб, уларни мазали таомлар билан сийлаб, кўнглини олиши зарур эди. Август замонида адабий зиёфатлар кенг тарқалган ходиса эди. Хўжайнининг – зиёфат берувчининг шеърий асарлари сингари, кўпинча овқатларнинг сифати ҳам паст бўлар, натижада бу нарса ҳажвичиларнинг назаридан четда қолмас эди. Худди шу даврда илк адабий салонлар пайдо бўлиб, гуллаб-яшнайди, келгусида турли шакл-шамойилларга эврилиб, саройларда поэтик турнирлар ташкил этиш билан ўрта асрдан ўтиб олгач, сўнг гуманистларнинг йифинларига ва ниҳоят, француз адабиётининг ҳар бир даври эга бўлган адабий салонларнинг юлдузларига – энг истеъдодли кишиларнинг ажойиб гурухларига айланади ва бу юлдузлар ҳалиям сўнмай, бугунги кунда ҳам порлаб турибди. Яъни, улар шон-шуҳат қозониш бўйича кампанияларнинг бош штаблари бўлиб, мукофотлар ва орденлар, илгариги хайр-саҳоват ва мол-мулклар билан

<sup>1</sup> Дож – ўрта асрларда Венеция ва Генуяда республика бошлигининг унвони.

алмашинган сердаромад енгил ишлар, ноширлар ва театр директорлари билан фойдали шартномалар ҳамда нуфузли журнallарнинг таҳририятлари ва ниҳоят, Академия томон йўл ана шу салонлар орқали ўтарди. У ерда аёллар хўжайин бўлган ва бугунгача ҳам ўз тароватини йўқотмаган кўплаб гулчамбарлар уларнинг чиройли ва чаққон қўллари билан тайёрланган.

Шон-шуҳратга эга бўлиш йўлида зўр бериб тиришишда Европа адабиётида Вольтернинг олдига тушадигани бўлмаса керак. Тўғри, унга бунинг учун икки вазият қулай имконият туғдирган: француз тилининг куч-қудратли жозибаси ва ўша даврда ёзувчи ўз овози туфайли эришадиган обрў-эътибор. Ўшанда энди-энди “тишлари” чиқа бошлиган матбуот репортёrlари ўрнига, Вольтер ёзувчилар, элчилар, барча мамлакатларнинг аслзодалари ва монархлари хизматидан фойдаланган. У сиёсий қароқчиларни ҳам ҳеч иккilanмай, мақтовларга қўмиб ташлар ва бунинг эвазига уларнинг ҳомийлигини қўлга киритарди. Ўз ҳалқи ва ўз даврининг буюк намояндаси, у камдан-кам одамга насиб этадиган ана шундай улуг бахтга сазовор бўлди. Ундан кейин бундай қудратли қалам соҳиби бўлиш ҳеч кимга, ҳатто Гёте ва Байронга ҳам насиб қилмаган.

Адабиёт юлдузи ҳозирда анча хира тортиб қолди. Ёзувчилар қачонлардир ўз истеъодлари туфайли барча табақалар ва ҳамма унвонлардан юкори турган бирдан-бир, ягона инсонлар бўлишган. Одамлар уларнинг хурматини жойига қўяркан, келиб чиқиши, насл-насабидан қатъи назар, аввало, инсон қадр-қимматига хурмат бажо келтирадилар. Ҳамма нарса (ҳатто капитанлик унвони (mansabi) ҳам) келиб чиқищ, насл-насабга боғлиқ бўлган даврларда, кимнинг даҳолиги замона зўрига тенг бўлса, ўша улкан ижтимоий нуфузга эга бўла оларди. Наполеонни нафақат қозонган ғалабалари учун, балки дунёдаги азалий тартиб-қоидаларни яксон қилгани учун ҳам улуғлашган, у эски, чириган сулолаларни ағдариб ташлаб, уларнинг ҳаробалари ўрнида ўзининг империясини барпо қилди ва эзилган, тинкамадори қуриган ҳалқларга ичиқоралик илиа йўғрилган қониқиш онларини ҳадя этди: агар таъбир жоиз бўлса, қуий табақадан, оддий ҳалқдан чиққан одам шажараларнинг йўсун билан қопланган, моҳ босган пергаментларини топтаб, поймол қилди.

Наполеонга қойил қолган ва айни чоқда уни ўз рақиби ва шон-шуҳратига соя солган киши сифатида кўролмаган Шатобриан қуидагича ўй, мuloҳазалар билан ўзини овутарди: “Адабий шон-шуҳрат, бу – ҳеч ким билан баҳам кўриш мумкин бўлмаган бирдан-bir, ягона шон-шуҳратдир. Жангчиларнинг қаҳрамонликлари ва муваффақиятларига ҳамиша хурмат бажо келтириш мумкин, Ахилл ёлғиз ўзи эмас, балки ахеаликларнинг ёрдами билан трояликлар устидан ғалаба қозонган, лекин Ҳомер бирон-bir кишининг кўмагисиз “Илиада”ни яратди ва биз Ҳомерсиз Ахилл ҳақида ҳеч нарса билолмаган бўлар эдик”.

Шатобриан томонидан айтилган фикр адабиёт дунёси каби кўхна: ушбу дунёда ҳамиша тарихни “ясаш” ҳар қандай аҳмоқнинг қўлидан келади, аммо унинг ишлари, ҳатти-ҳаракатлари, фаолиятини тасвирилаш учун эса буюк инсон бўлиш керак, деб ҳисоблаб келинган. Сўз боқийлиги фаолият боқийлигидан кўра шак-шубҳасиз, аниқроқ экани хусусида ишонч билдирган барча даврларнинг овозлари антологиясини тузиш қийин эмас. Бунга мисол сифатида биргина Бэкон овозини келтириш кифоя: “Шундай қилиб, биз ақл ва билим обидаларининг куч ва қўллар яратган ёдгорли-

кларга қараганда қанчалик мустаҳкамроқ эканини кўриб турибмиз. Ахир, Ҳомер шеърлари йигирма беш асрдан кўпроқ вақт ўтяттики, ҳали биронта ҳам бўғин, биронта ҳам ҳарф йўқотмай, яшаб келмаяптими, бу орада эса сон-саноқсиз саройлар, ибодатхоналар, қасрлар, шаҳарлар таназзулга юз тутиб, ер юзидан йўқ бўлиб кетмадими? Энг сўнгги асрлардаги қироллар ва бошқа буюк шахслар каби, Цезарь, Искандар, Кир ҳайкаллари ва суратларини аслидай тасвирлашнинг имкони йўқ, инсоний фикрлар ва инсоний билимларга хос образлар эса китобларга ўзгармас тарзда, абадий акс эттирилган, вақт уларга зиён етказолмайди, улар ҳамиша барҳаёт...”

Бугунги кунда дилгир Рене ҳам, Веруlamлик донишманд ҳам бошни айлантирадиган, фавқулодда сиёсий мавқе, мартаба, мансабларни, бундан ҳам кўра, кутилмаган рақобатчилар – киноюлдузлар, боксёrlар, атлетларни кўрганда, аччиқ аламли дақиқаларни ҳис қилган бўлишарди. Уларнинг автографлари катта бувилари шоир имзосини орзу қилган бўйи етган қизларнинг альбомларини тўлдириб турибди.

Ҳатто яшин тезлигидаги муваффақият муқаддаслаштирилган принцип хисобланадиган Америкада – ва айникса, дунёнинг қолган қитъаларида шон-шуҳратни сабр билан кутадиган, унинг келишини ўзлари тезлаштирилган ёзувчилар бор. Улар ўз олдиларига кўйган мақсадлари улуғликка, буюкликка олиб боришини ўзлари билмайдиган оғир, босиқ, вазмин, камтар, камсуқум, таъсирчан, нозик, сезигир, ювош, заҳматкаш, фидойи, шон-шуҳрат, иззат-икром ва ҳурмат-эҳтиром учун югур-югур қилиб, ўзини хўрламайдиган мағрур инсонлардир, холос. Тақдир уларнинг орасидан баъзи бирларини танлаб олиб, кечиккан, аммо улуғвор шон-шуҳрат ато этади, у ўзининг аччиқ қисматидан худкушлик билан кутулмоқчи бўлган омадсизларга ҳам меҳрибон ва илтифотлидир. Марсель Швоб ўз жонига қасд қилмоқчи бўлади, уни кутқариб қолишгач, шундай дейди: “Мени ҳаммадан ҳам кўра қийнаётган нарса – ўзимнинг омадсизлигим эмас, балки мендан баттарроқларнинг муваффақиятидир”.

Ёзувчи тирик экан, у ҳаракат қилаверади: ўз танқидчилари билан ғижиллашади, уришади, талашиб-тортишади ёки уларни назар-писанд қилмайди, у тирик экан, охирги сўзни айтмаганига ҳали ҳам умид қилиши, исталган дақиқада аввалги энг яхши китобларига тенглаша оладиган ёки улардан ҳам мукаммалроқ бўлган бир нима яратиши мумкин, унинг тириклар оламида ҳозирлиги ҳурматга лойиқ, уни ҳеч ким “йиқитишга” ошиқмайди, ёши ўтиб борган сайин ўзининг адабиётда тутган ўрнидан кўнгли хотиржам бўлиб бораверади, чунки ҳар бир авлод ҳурмат-эҳтиромларга кўмилиб юрадиган ана шунақанг “несторлар”га – басавлат, фариштали, истараси иссиқ қарияларга эҳтиёж сезади, зоро, ёшлар бундай ҳурмат-эҳтиромларга ҳасад қилишмайди, чунки бу каби кутловларни ўзларининг мақтовга лойиқ, ҳурматга сазовор кексаликларининг тимсоли сифатида қабул қиласидилар. Бироқ тириклигига гулчамбарлар тақиб, ҳурмат-эҳтиром кўрсатилган ёзувчи вафот этган заҳоти ўзига хос маҳшаргоҳга тушади ва унутилишга маҳкум этилмаса агар, маълум бир вақтдан сўнг у ердан бир амаллаб чиқиб олади. Адабий уfkнинг баъзи бир машхур юлдузлари ҳали сўниб улгурмай, жазога тортилдилар: Анатоль Франс дағн қилинаётган куниёқ “Cadavre” – “Мурда” номли рисолада беобру қилинди.

Аммо шунда вафот этган ёзувчининг содиқ мухлислари ёрдамга шошиладилар. Унинг ижодини ўрганиш бўйича жамиятлар тузилади, кўргазмалар

ташкил қилинади, тантанали сессиялар ўтказилади, кўчани марҳумнинг номи билан атайдилар, у яшаган уйда хотира лавҳаси ўрнатилади, унинг номидаги стипендиялар таъсис этилади, исми эса адабий муассасалар ва мактабларнинг фасадида кўзга ташланиб туради, хат, ёзишмалари, кундаклари, вафотидан кейинги турли хил хужжатлари нашр қилинади, хуллас, ёзувчиға нисбатан диққат-эътибор сусайгудай бўлса, унга ҳартарафлама қизиқиш уйғотиш чора-тадбирлари кўрилади, ҳатто ижодини тадқиқ қилиш учун журналлар пайдо бўлади. Францияда бунақангি оиласи ҳурмат-эҳтиромнинг шакл ва усуллари тўлиб ётиди, назаримда, уларнинг жуда жозибали бир нимаси бор шекилли: бъязи бир ёзувчилар, тириклигига ўзининг дағн маросимини ўтказган Карл V га ўхшаб, олдиндан, ҳали ҳаётлигига ёки бу ҳақда ғамхўрлик қилиб, тараддуд кўриб қўядилар. Саксон ёшли бир қариянинг ўз ҳаёти ва ижоди ҳақида жаноб Амруш олдида истиғфор келтирганини радиодан эшишиб, ҳайрон қолдик, бу бизга Гёте ҳаётидан олинган машхур талабалар латифасини эслатди. Худди ўша муаллифнинг эълон қилинган Поль Клодель билан ёзишмаларини ўқиб, очиғи, янаям ҳайрон бўлдик, уларнинг ҳаётлигига бўлиб ўтган интим воқеалар шу қадар очиқ баён қилингандики, бу нарса ҳатто вафотидан кейинги нашр учун ҳам фойдадан холи бўлмас эди. Жюль Ромен эса ўз-ўзини олдиндан адабийлаштириш мақсадида “*Cahiers des hommes de bonne volonté*” – “Яхши ниятли кишилар дафтари”ни ташкил қилган, бу Бальзак ва Пруст вафотидан сўнг, уларнинг ижодини ўрганиш учун чоп этила бошлаган мажмуалар хилидаги даврий нашр эди.

Адабий ҳаёт замонавий дунёда ҳаддан ташқари сершовқин бўлиб қолди, бошқача қилиб айтганда, “ўта тўйиниб” кетди. Босмахоналар томонидан кунига жуда катта миқдорда китоблар бозорга чиқарилади, реклама ушбу китобларни шундай мақтайдики, бу борада тўғри, холисона фикрга умид қилиш қийин. Мазкур мавзу бўйича аниқ ва асосли шарҳ тайёрлай оладиган мутахассислардан ташқари, ҳеч ким шахсий мутолаа учун китоб танлаш юзасидан хукмфармолик қила олмайди. Китоблар орасида ярим аср яшаб, уларга қизиқиш, севиш, завқланиш мумкин, аммо шунга қарамасдан, минглаб турли хил сабабларга кўра, бизнинг қизиқиш ва билимлар доиранизга кирмай қолган дурдона асарларгача етиб бориш мушкул. Ҳар бир адабиётнинг аслиятини кузатиб бориш имкониятига эга бўлиш учун ҳеч ким шунчалик кўп тил билмайди. Пайдо бўлаётган таржималарда эса фавқулодда англашилмовчиликлар, ҳеч қандай изоҳлаб бўлмайдиган ўзига хос терсликларнинг мавжуд бўлиши табиий, шу боис энг яхши ва энг муносиб асар нашрига умид боғлаб бўлмайди. Масалани китоб ноширининг фойда, текин даромадга ўчлиги, муаллифнинг эпчиллиги, уддабуронлиги ва умумий вазият ҳал қиласи. Аксель Мунте ёки Оссендовский сингари муаллифларнинг халқаро китоб бозорида эришаётган ютуқларига ҳеч қандай оқилона изоҳ топиб бўлмайди. Характер жиҳатидан уларга яқин, услугуб ва мазмуни бўйича анча яхшироқ бўлган минглаб китоблар сояда қолиб, номлари тилга олинган муаллифларнинг асарлари эса иккала ярим шар мамлакатларида яшовчи китобхонлар эътиборини, уларнинг ўз адабиётларига зарар етказиб бўлсада, жалб қилишга эришди. Ўтаётган ҳар бир ҳафта ана шундай кутилмаган янгиликларни олиб келади. “Ҳафта” деганимнинг боиси, француз даврий матбуот нашрларидан биридаги кўнгилсиз руқн эсимга тушиб қолди: “*Le livre de la semaine*” – “Ҳафта китоби”. Ҳафта – мана сизга замонавий адабиёт

бокийлигининг мезони! Эҳтимол, ҳали бу вақт бўлаги ҳам кўплик қилиб, тез орада: “Le livre du jour” – “Кун китоби” ва ниҳоят, “Le livre de la derniere hewše” – “Сўнгги соат китоби” деб ўқиб қолсак ҳам ажабмас.

Ўзимга келсақ, иш, ташвиш бошдан ошиб ётиби. Ҳар куни почта менга буюк адабиётлар мамлакатларида чиқадиган ҳафтанома ва ойномалардан ташқари, Австралия, Янги Зеландия, Ямайка, Жанубий Африка сингари мамлакатларнинг кўплаб даврий нашрларини ҳам келтириб беради ва мен уларни мажбурият юзасидан ўқиб чиқаман, шунда шунақсанги кўп фамилиялар учрайдики, уларнинг ҳар бири ўз асарларини, ўз хизматларини далил қилиб келтиришга ҳақлидир. Ҳиндистон каби улкан, ахолиси кўп, минг йиллик анъаналар ва номлари ажойиб бир неча ўнлаб тиллардаги адабиётларга эга мамлакатлардан келадиган журнallарнинг таассуротлар юкини эса асти қўйинг. Фоят жиҳдий эътибор ва энг зўр хотираю ҳам буларни қамраб ололмайди, модомики, бу чакалакзор, чангальзорларда исм ва номлардан нари ўтиб бўлмас экан, унда хотираю эътибордан нима фойда? Ҳар йили ёзув столимга жуда катта, улкан жилд “Index Translationum” – барча ирқ, ҳалқлар ва тилларга мансуб китобхонлар оммасини забт этаётган минглаб муаллифлар яшаб, ижод қилаётган дунёнинг ҳамма мамлакатларида ўтган йил давомида эълон қилинган таржималар библиографияси келиб тушади.

Халқаро адабий конгрессларда ҳам хаёлга нохуш ўйлар келади. У ерда биз атоқли, ҳатто машхур ёзувчилар билан учрашамиз, баъзи бирлари билан шахсан танишиб, сухбатлар қурамиз, кейинчалик ҳатлар ёзишамиз, агар бизга тушунарли тилда ёзилган бўлса, бир-биримизга муаллиф нусхалари – китоблар тортиқ қиласиз, аммо буларнинг барчаси баҳтли тасодиф бўлиб қолади, – бирдан қандайдир фикр, мулоҳаза қизиқтириб қолгудай бўлса, дафъатан ўзаро хайриҳоҳлик пайдо бўлади ва бу бизнинг қизиқишимиз ва ҳурматимизга сазовор бўлган кўпсонли кичик доиралардан бирига чукурроқ кириб боришимиш учун имконият яратади, бироқ – афсус! – унча арзирли бўлмаган минглаб бошқалари эса, шундок ёнгинамиздан ўтади-ю, ғира-ширада кўздан ғойиб бўлади-қўяди.

Бу орада эса ўзларини тинглаб, эътироф этишлари учун курашаётган сон-саноқсиз ёзувчилар ичида ҳар бир даврнинг унугтилмай қолиш баҳтига муяссар бўлган ўз мумтоз кишилари бўладики, улар адабий оқиб бораётган оқимга юқоридан қараб турадилар. Тантанали йиғилишлар ва кенгашлар билан бир қаторда адиларнинг таваллуд айёмлари ва вафоти муносабати билан ташкил қилинадиган юбилей ва маросимларда ана шу ёдгорликлар ёзувчиларга ҳурмат-эҳтиром кўрсатишга бўлган ишончни мустаҳкамлаб, қўллаб-кувватлаш билан бирга, кўплаб хато ва адашишларга ҳам сабаб бўладилар. Бронза ёки мармар ҳайкалларга қараб туриб, мангу адабийлаштирилган бу инсонларни тириклигига рўшнолик кўрмай, таъкиб, кувғинлар остига олинган, тошбўрон қилинган деб, деярли ҳеч ким ўйламайди, нафрат туфайли содир бўлган бундай ёвузыклардан улар фақат ўлиб қутулган. Халқ улуғлаб кўкка кўтарган бу бокий инсонларнинг қачонлардир оломон орасида туртиниб-суртиниб, навбат кутиб турганларини, трамвайлар, омнибусларда<sup>1</sup>, учинчи класс поездларда юрганларини, ундан илгарироқ замонларда эса қирчанғи от қўшилган очиқ енгил араваларда аянчли тарзда тебраниб, силкиниб ёки виқор билан пиёда йўл босгандарини, бир кунлик куч-қудрат ёки шу қадар ўткинчи салобатдан кибр-ҳаволанган

<sup>1</sup> Омнибус – кўп ўринли киракаш извощ – Тарж.

манман, такаббур, нотавон, ялтири-юлтири кимсаларнинг ҳатто номларини ҳам билмай, уларга кареталарда лой сачратиб ўтиб кетганларини эсласанг, бу аллақандай ғалати, ғайритабии, хунук кўринади. Адабиёт осмонининг ўз Лазарлари бўлади ва улар бой-бадавлат одамларга бармоқ учиди томчи сув бериб, уларни ҳам бокийликка эргаштирадилар.

Қабр одамни улуғлайди, қабрга кирган ва жамият кўз ўнгига янада улғайган ёзувчиларни санаб, саноғига етиш қийин. Жеромскийнинг қабрини “Polonia Restituta” – “Тикланган Польша” ордени лентаси безаб турибди, аммо бу лента ўз халқининг бутун аламларини ва барча орзу-умидларини ўзига сифдиролган юраги уриб турган кўксини тириклигига ардоқлай олмади.

Вафот этиб кетган ёзувчиларга хурмат-эҳтиром кўрсатиш азалий анъ-аналар или муқаддаслаштирилган турли хил шакллар билан ифодалана-ди. Ёдгорликлар уларнинг энг қадимиylаридан хисобланади ва ҳозирги вақтда биронта мамлакат йўқки, шиддат билан илгарилаётган замонавий ҳаёт оқимига шохсупадан қараб турган ўзининг буюк ёзувчиларини ёдга олмаган бўлсин. Бироқ қилич ёки салтанат ҳассаси шарафига ўрнатилган ҳайкаллар билан солиширганда, ёзувчиларга қўйилган ёдгорликларнинг озчиликни ташкил этишини сезиши қийин эмас. Ёзувчилар хотирасини агадийлаштиришнинг энг яхши усули, бу – улар туғилиб ўсган, яшаб ижод қилган уйларида хотира лавҳаси ўрнатишидир. Кўпинча улар кайсири шаҳарда ҳатто қисқа муддат бўлган бўлса ҳам, бу ҳақда муҳтасар маълумот берувчи лавҳачалар ўрнатилган бўлади, масалан – Мицкевич Римда, Гёте – Krakowda ва х. к. Флоренция мармардан ясалган ёдгорлик лавҳалари билан безанган ва кўча муюлишларидан “Илохий комедия” терциналарининг акс садоси эшитилиб туради.

Аммо ёзувчи хотирасининг энг муқаддас жойлари – уларнинг уйлари ва мозорларидир. Мабодо ҳақиқийлари сақланиб қолмаган бўлса, уларни рамзий ёки афсонавийлари билан алмаштиришади ва одамлар буни худди аслидай қабул килаверади, Вергилийнинг Неаполдаги мозори ҳам шундай. Ўтган қадим замонлардан фиръавнларнинг эҳромлари, цезар-ларнинг<sup>1</sup>, турли шоҳлар, подшоларнинг мақбаралари сақланиб қолган, галикарнаслик Мавзолнинг<sup>2</sup> исми шу хилдаги қабр ёдгорликлари учун умумий ном бўлиб хизмат қилган. Бироқ Греция ва Римга бокий шон-шуҳрат келтирган кишиларнинг қабрларини излаш бехуда иш бўлур эди. Улар яшаган уйларнинг қаердалиги фақатгина мункиллаган йўл бошловчи қарияларнинг тасаввурида сақланиб қолган бўлса ҳам ажаб эмас, уларга Демосфенни Афинанинг исталган овлоқ кулбаларидан бирига қўчириб обориб, “жойлаштириб” қўйиш ҳеч гапмас. Аммо ўрта асрлардан бошлаб, Данте, Петрарканинг қабрларига гулчамбарлар қўйиш имкониятига эга бўла бошладик ва ундан кейин қаторасига барча мамлакатлардаги шоир ва файласуфларнинг агадий оромгоҳлари ҳам назарда тутиладиган бўлди. Дастлабки оддий қабрлар дабдабали тоштобутларга кўчирилди, Мицкевич ва Словакий қабрлари Вавелга келтирилиб, уларга Париждаги Пантеон ёки Лондондаги Вестминстер каби маҳсус қабристонлар ажратилди.

Лекин шунга қарамасдан, вафот этиб кетган ёзувчиларнинг қабрларидан кўра уйлари хийла кучли таассурот қолдиради. Улар гоҳо шу қадар асраб-авайлаб сақланадики, гўё уй сохиби ҳозиргина ташқарига чиқиб кетгандай

<sup>1</sup> Цезар – қадимига Римда: императорлар унвони. – Тарж.

<sup>2</sup> Мавзол II (эр. ав. IV аср) – Кичик Осиёдаги Кария давлатининг подшоси.

туюлади. Франснинг Бешеллеридағи хонаси шундай кўринишга эга, ундағи ёзув столи устида сўлғин Лярусс ва пресс-папъега кўзингиз тушади, унда Франс томонидан истиконда турадиган гоз патлари билан ёзилган сўнгги харфларнинг излари қолган. Салгина суреба кўйилган оромкурси ҳам шу ерда, гўё ёзувчи атиги бир дақиқа аввал ўрнидан тургану, чиқиб кетгандай таассурот уйғотади. Баъзи бир уйлар, масалан, Мицкевичнинг Парижда, Гётенинг Ваймарда, Толстойнинг Ясная полянада яшаган уйлари музейларга айлантирилган. Ўз табиий муҳитидан бошқа жойга кўчирилиб, қайта тикланганлари эса нохуш манзара касб этади, бунга мисол қилиб, Стриндбергнинг Стокгольмдаги музейга бутунлигича кўчирилган иш кабинетини келтириш мумкин. Польшага келадиган бўлсақ, бу борада афсуски, етарлича ғамхўрлик қилолганимизча йўқ. Тўғри, Каспрович яшаган Харенда ва Жеромскийнинг Наленчеводаги “ёғоч уйи” авайлаб сақланмоқда, бироқ миш-мишларга кўра, Вола Окшайскаядаги Сенкевич туғилган уй деярли вайронага айланган, Крашевскийнинг Варшавада, Мокотовскаядаги уий эса давлат томонидан муҳофаза қилинадиган бинолар рўйхатига киритилишини кутиб ётганмиш. Поляк адабиётининг асосчилари бўлган ёзувчиларимизнинг уйлари сақланиб қолмаган: улар ёнғинлар, урушларнинг курбонига айланган, бутунлай унутилиб кетганлари ҳам бор.

Муаллифлар билан бир қаторда уларнинг асарларидағи қаҳрамонлар хотираси ҳам сақланиб келинади, баъзан улар яшаган уй-жойлар шартли равища қайта тикланади: масалан, Тобосодаги Дульцинея уйи, Шерлок Холмснинг Лондонда – Бейкер-стритдаги хонаси ёки улар яшаган деб тасаввур қилинган уйларда хотира лавҳалари ўрнатилади – Варшавада Вокульский ва Жецкийнинг шундай лавҳалари бўлган. Адабий асарларнинг муаллифлари билан ёнма-ён персонажларига ҳам ёдгорликлар ўрнатилади – Дон Кихот, Krakovda Гражине, Гайд-паркда Пэн, Сент-Мари де ла Марда Мирейя Мистраль ва тосканиялик ва ҳатто Вуврда маҳаллий майфурушларга ёқиб қолган Бальзакнинг Годиссарига атаб қўйилган ҳайкаллар бор. Улуғ ижодкорлар хотирасини абадийлаштиришнинг таъсирчан мисоллари ҳам учраб туради, Булон ўрмонида Шекспир боғи бор, у ерда Шекспир пьесаларида тилга олинадиган дараҳтлар ва гуллар ўсади. Вафот этиб кетган буюк ёзувчиларни чукур хурмат-эҳтиром билан ёд этиш борасида олижаноб инсон хотираси қилаётган барча ишларни санаб тугатиш қийин, баъзан бу билан авлодлар ота-боболар олдидағи ўз бурчларини адо этаёт-гандек кўринади.

Ёзувчи ҳаёт экан, уни шошилинч ишлар ва ташвишлар кўмиб ташлайди, хозирги замон уни энг муҳим ва кечикириб бўлмайдиган юмушлар билан шуғулланишга мажбур қиласди. Ёзувчи ҳаётлигига – инсон, яъни ўғил, эр, ота, ижара ўтирувчи, солиқ тўловчи, фуқародир. Жамоат ташкилотлари, сиёсий партиялар, дин, эътиқод, мазҳаб – замонавий ҳаётнинг барча сонсаноқсиз пайпаслагичлари уни ўраб-чирмаб олиб, мустақиллигининг ҳар қандай кўринишига қаршилик кўрсатишга ҳаракат қиласди. У албатта ҳар доим кимнингдир ғашини келтиради, ранжитади, хафа қиласди, ғазаблантиради, доимо кимгадир халақит беради, сояси билан қуёшни тўсиб, кимнидир ўсгани қўймайди ва ҳамиша унинг олдида кечикириб бўлмайдиган вазифалар пайдо бўлади, эртага уларни ҳеч ким эсга олмайди, аммо бугун улар ошиғич қарорлар талаб қиласди, башарти унинг томонидан эътиборсизлик ёки менсимаслик аломатлари сезилса, ўйламай ножўя

сўз айтвортса ёки эҳтиёtsиз қадам ташласа тамом, у атрофдагиларнинг ғазабига дучор бўлади. Баҳс-тортишувларда кимнингдир ёнини оларкан, у бошқача маслак, эътиқоддаги кишилар билан аразлашиб қолади: чунки ҳатто энг адолатли фикр бўлган тақдирда ҳам, бирорларга чидаб туришлик камдан-кам учрайдиган ҳодиса ҳисобланади. Буларнинг барчаси суронли, қизғин, жўшқин даврларда, ўзгаришлар ва кескин бурилишлар замонида энг охирги шаклда ўз ифодасини топади, ижтимоий ҳаёт тинч, сокин, уйғун ва ҳамоҳанг кечаетган, эҳтирослар қайнаб-тошмаган бошқа даврларда эса ёзувчи, гарчи унга менсимай муносабатда бўлишса ҳам, атрофдагиларнинг фикрига нисбатан ҳеч нима йўқотмайди. Аксинча, бу унинг обрўсини ошириши мумкин. Аммо энг тинч, осойишта пайтларда ҳам ёзувчи агар шуҳратпаст, иззатталаб, ичиқора, баҳил, ҳасадгўй ва фитна, найранглар билан машғул бўлса, албатта замондошларнинг кескин норозилигига учрайди. Агар у ўзининг олижаноб тафаккур ва сўз оламидан мосуво бўлиб, бузук ишқибозликлар дунёсига шўнғиб кетгудай бўлса, бундай ёмон одатлар ижодкорни ўз домига тортиб кетади.

Ёзувчи вафотидан сўнг, агар у чиндан ҳам авлодлар хотирасида яшашга муносиб бўлса, унинг номи мана шу паразит флорадан жуда тез фориф бўлади. Қиёфасининг ташқи кўриниши аста-секин соддалашиб, туб моҳияти бир неча жумла, баъзида икки сўз, ҳатто биргина сифат билан ҳам ифодаланиши мумкин. Ва ёзувчи улуғ ҳамда мураккаб шахс сифатида энди қандайдир жарангдор афоризм шаклида боқийлик, абадийлик сари йўл олади ва уни авлодлар ҳаяжон билан, иззат-икром, ҳурмат-эҳтиром билан ва эҳтимол, лоқайд тақрорлаб юришади. Адабиётнинг бутун дахмасини устига қадими портретлардаги сўзлар ёзилган лента каби, енгил-елпи ва шошилинч чизиқлар тортилган, ёзувчининг туб моҳиятини белгилайдиган эпитетдан иборат кўланка, шарпалар эгаллаган.

Кўчаларнинг муюлишларидағи лавҳачалардан бизларга боқиб турган, маъносини қомусий луғат ёрдамисиз англаб бўлмайдиган қуп-қуруқ номлардан маъюслик нафаси уфуриб туради. Афинада фақат антик дунё ишқибозларигагина маълум бўлган сон-саноқсиз номлар билан тўлиб кетган бутун бошли кварталлар бор. Парижда жойлашган хонадонлардаги унутиб юборилган исмларни абадийлаштирувчи лавҳалар олдида одам саросимага тушиб қолмаслиги учун жиiddий, пухта эрудиция зарур бўлади. Франция Академиясидаги қачонлардир “умрбоқийлар” савлат тўкиб, тантанавор ўтирган, улар хотирасига атаб литания (католиклар ибодати)лар ўқиладиган ҳар бир кресло олдида чуқур ғамга ботмай иложингиз йўқ.

Зотан, Европа маданияти хотираси ҳаддан ташқари тўйиниб кетган. XIX аср унинг зиммасига барча даврлар ва халқларнинг номларидан иборат улкан юкни ортиб қўйган. XIX асрда коммуникация воситаларининг яхшиланиши, маданиятли инсонлар ўрнашиб жойлашган, бошқа маданиятлар билан алоқага киришган қитъалар ўртасидаги ўзаро фикрий алмашувлар уфқларнинг янада кенгайишига олиб келди. Шу пайтгача мисли кўрилмаган қизиқувчанлик маданиятли инсон ақл-тафаккурини бир-бирига зид бўлган турли хил қарашлар, санъат шакллари, ифода усувлари ва гўзалликни идрок қила оладиган ва тушунадиган қилиб қўйди. Илгариги даврларда барча нарсалар биргина, масалан, дейлик, миллий ёки диний нуктаи назарга бориб тақалган. Ўрта асрларда диний ақидалар билан боғлиқ бўлмаган адабиётга деярли ҳеч қандай эътибор қаратилмаган. Гуманизм учун антик

дунё ва унга тақлид этишнинг ўзи кифоя қилган. Француз классицизми эса айрим эстетик идеаллар билан қаноатланар эди. Фақат XVIII аср охирларига келиб, Шекспир томонидан “ўлганларни тирилтириш” гояси каби ходисаларнинг юзага келиши ёки антик дунёнинг янгиланган концепцияси санъатни тушуниш соҳасида янги давр бошланишидан дарак берди. Бутун XIX аср нафақат замонавий адабиёт, балки ўтмиш адабиётини ҳам ҳормайтломай ўрганиш шиори остида ўтди ва ҳар қандай географик кенгликлар миқёсида нимаики яратилган бўлса, барчаси ўрганиб чиқилди. Умумбашарий маданият пантеонида бир қатор кўчиб юришлар ва жой ўзгартаришлар рўй берди. Кўплаб илгариги улуғ шахсларнинг аҳамияти камайиб, унтилиб кетган ва ҳатто шу пайтгача номаълум бўлган кишилар эса танилиб, машхур бўлиб кетди. Гўзал, оригинал, санъаткорона барча нарсаларга бўлган ғоят завқли муносабат ҳам “Нибелунглар”, ҳам “Шоҳнома”, ҳам “Маҳобҳората” ва “Илоҳий комедия”ни ўзига олиб, бир бутун бўлиб бирлашди. Хитой, япон, хинд драмалари Европа саҳналарида кўйилди, ўша пайтгача ўз чегаралари билан чекланиб қолган ёки узоқлигидан ҳеч ким етиб боролмаган майда миллатларнинг лирика ва прозалари учун кенг йўл очилди. “Прерафаэлитлар<sup>1</sup> иттифоқи” улуғ ёзувчилар ва рассомларнинг юбилейларини нишонлаш учун тақвимлар тузди, бу одат кўпгина давлатларга ёйилиб, урф бўлди ва эндиликда иккала ярим шар мамлакатларида ҳам Аристофан, Цицерон ёки Вергилийнинг минг йиллик юбилейларини тантанали нишонлаш мумкин ва ҳатто дунёга унчалик танилмаган ижодкорлар ҳам шундай шон-шарафга ҳақлидирлар.

Саналар, номлар, асарларнинг юки ана шу тарзда кўпайиб боради ва уни ҳаракатга келтириш тобора қийинлашаверади. Ўнлаб мутахассислар доимий тарзда кўпайиб бораётган монументал жилларда “дунё адабиёти” манзарасини акс эттириш йўлида куч-ғайратларини бирлаштирумокдалар. Иттифоқо, кўлимга бир китобча тушиб қолди, 1900 йилда чиқсан мазкур нафис, бежирим жилд 200 саҳифадан ошмайди, унда муаллиф адабиётнинг эллик асрлик тарихи ҳақида қисқача маълумот бериб, Миср, Бобил ва Хитой давлатларидан тортиб, то Тинч океан ва Атлантика океанига қадар, бутун ер юзини қамраб олган эди. Эслашимча, поляк адабиётига ҳаммаси бўлиб атиги ўн сатр ажратилган эди, холос. Умуман олганда, ушбу китобча худди улкан мерос ҳақидаги тилхатга ўхшарди ва назаримда гўё баҳтиёр меросхўр имзо чеккач, бемалол тонгги газетани ўқиши мумкиндек туволди.

Шунингдек, рўзномада ҳам шунга ўхшаш маълумотни, аниқроғи, адабиётнинг йигирма асрлик сарҳисобини учратиш мумкин. “Britain Today” – “Буюк Британия бугунги кунда” журнали қачонлардир ўз ўқувчиларига эрамизнинг биринчи асридан бошлаб ўтган даврдаги энг яхши қирқта китобни номма-ном айтишларини сўраб, мурожаат қилган. Сўровномага бутун дунёдан жавоблар келган ва мана натижаси: биринчи ўринда “Дон Кихот”, иккинчи ўринда – “Уруш ва тинчлик”, “Гулливер саёҳатлари” ва “Хўрланганлар” – еттинчи, “Бовари хоним” – ўн биринчи, “Кандид” эса ўн еттинчи ўринни олган. Тўртинчи ўнликнинг энг охирига “Уч мушкетёrlар” аранг сиғиб қолган, аммо на Бальзакка, на Стендалга ҳеч қандай ўрин берилмаган. Поляк ёзувчилари-ку, ҳеч кимнинг эсига ҳам келмаган. Мазкур жавоблардаги баҳолашнинг кутилмаган ва тушунарсиз шкаласи одамни

<sup>1</sup> Прерафаэлитлар – XIX аср ўрталарида вужудга келган инглиз рассомлик санъати мактаби ва киллари, улар XIV ва XV асрлардаги (Рафаэлга қадар) илк Уйғониш (Ренессанс) давридаги итальян санъатига тақлид қилишга интилишган.

ҳайрон қолдиради, у танқидчилар ва адабиёт тарихчилари томонидан белгиланган “расмий” йўл-йўрикларга мутлақо тўғри келмайди. Паскаль бир қадар енгилтаклик билан даъво қилган бу хилдаги “китобхон фикри” бир қарашда гўё оқилона ваadolатидек кўринса-да, аммо барибир одамни ўйга толдиради. Мисол учун, газета орқали қуидаги мавзуда плебисцит (референдум) ўтказиш кифоя: Нобель мукофотига ким муносиб, адабиётга чинакам дахлдор кишиларнинг хаёлига ҳам келмайдиган номзодлар қандай аниқланади. Бир вақтлар “Au plus grand poete de France” – “Франциянинг энг буюк шоирига” йўлланган мактуб қанчалар кулгига сабаб бўлган. Мактуб почта орқали дастлаб Виктор Гюогога етказилган, у эса уни очмай, ўзига хос бўлмаган камтарлик билан Мюссега жўнатади, Мюссе Ламартинга ва шу тариқа мактуб яна Гюгонинг ўзига қайтиб келгач, ниҳоят, унинг машҳур бир газета учун ҳар якшанба қофияли фельветонлар ёзиб турадиган истеъдодсиз, нўноқ шоирга атаб жўнатилгани маълум бўлади. Гап эски ёзувчилар ҳакида борадиган бўлса, ўкувчилар оммасининг инжиқилклари мактаб, дарсликлар ва қомусий асарлар томонидан босиб қўйилади.

Бизнинг авлод ишончни окламоқда, олдингилардан ҳеч қайси бири китобнинг узоқ умр кўришини таъминлаш тўғрисида бунчалик ғамхўрлик қилмаган. Биз китобларни сақлаш учун тўхтамасдан, бузилмасдан ишлайдиган воситаларни яратдик. Йирик кутубхоналар еrosti галереяларидағи темир ва бетондан ясалган сейфларда сақланмоқда, улар оддий қофоз варақларини азалий душманлари – ўт ва сувдан эҳтиёт қиласди, китобларни замонавий урушларнинг вайрон қилувчи хатти-ҳаракатларидан химоялаш чора-тадбирларини кўради. Бунда микрофильмнинг ёрдами катта, у кич-кинагина чамадонга улкан кутубхоналарнинг бутун бойлигини сиғдириш имконини беради ва башарти хавф-хатар туғилгудай бўлса, чамадончани ишончли жойга яшириб қўйиш мумкин бўлади. Шундай қилиб, ана шунақанги микроскопик шакл туфайли нафақат китоблар, балки журналлар ва ҳатто омборларда жой етишмаслигидан йўқотиб юборишга тўғри келадиган, чунки қофоз сифатининг пастлиги боис, эртами-кечми, барибир ўз-ўзидан чириб, кукунга айланиб кетадиган газеталарни ҳам кўпгина асрлар давомида сақлаш имконияти туғилади. Бунинг устига, яна бир янгилик – баъзи бир асарларни босма матн, кўлёзма фотонусхаси, муаллиф ва асар иконографияси<sup>1</sup> ҳамда муаллиф овози ёзилган пластинкани ўз ичига олган қутича шаклида нашр этиш лойиҳаси ишлаб чиқилди.

Библиофиллар орқасидан қувиб, излаб юрадиган баъзи бир замонавий китобларнинг илк нашрларини тўла, бут ҳолда сақлаш чора-тадбирлари кўрилди: Париждаги Миллий кутубхонада бундай нусхалар яшил рангдаги учбурчакли муҳр билан белгиланиб, улар китобхонларга ё умуман берилмайди ёки жуда камдан-кам ҳолларда вақтинча берилади. Албатта, бундайин шон-шарафга дуч келган муаллиф мусассар бўлавермайди: фақат боқийликка дахлдорларгина танлаб олинади. Кутубхона маъмурияти буни қаттиқ сир сақлайди, адиллар эса бу сирнинг тагига етмоқчи бўлиб, жанжал қиласди. Овозаларга қараганда, Фахрий легионнинг розеткасидан<sup>2</sup> қолишмайдиган “яшил учбурчак”ка эга бўлиш учун ҳомийларни ишга соладиганлар ҳам бор экан. Келажак эса, албатта қандайдир фокус кўрсатади ва XXV аср библиофиллари муаллифлари ўз вақтида “яшил учбурчак”ка

<sup>1</sup> Иконография – бирор шахс ёки сюжетга доир тасвирларни ўрганиш, тавсифлаш ва шундай тасвирлар мажмуси.

<sup>2</sup> Розетка – орден ўрнида тақиб юриладиган лента, бант. – Тарж.

лойиқ топилмаган китобларнинг биринчи нашрларини тополмай, умидсизликка тушиб, қўлларини синдиришгача борадилар.

Бизнинг эҳтиёткор, тадбирли давримиз билан солиштирганда, илгаригилар – айниқса, антик давр охиридан то гуманизмга қадар – ўта палапартиш ва исрофгар бўлган. Антик адабиётдан нималар қолди ўзи? Макбара, қабрлар, сағаналардан топилган ва бизларга фиръавн ёки императорнинг тож кийиш маросимига оид либослари сифатида томоша қилиш таклиф этилган ва кейин музейларга қўйилган башанг либосларнинг парчаларию лахтакларидан бошқа ҳеч нарса. Софокл юзга яқин драма ёзган, Эсхил ундан сал камроқ, бироқ бизгача ҳар биридан фақат еттитадан асар етиб келган, холос. Еврипид ўз меросининг учдан икки қисмидан кўпроғини йўқотган, Аристофандан эса атиги ўндан бири қолган. Алкей, Сафо, Тиртей, Архилоҳ бизга бут бўлмаган ва калта-култа фрагментлар қолдирган. Кўпчиликдан номдан бошқа ҳеч нима қолмаган. Онда-сонда Мисрдаги қандайдир ахлат ўрадан папирус топилади ва у бизни қадимги адабиётнинг ўша пайтгача номаълум бўлган асари сифатида ҳайратга солади; яқинда Менандр қаламига мансуб илк комедиялардан бирининг тўлиқ матни топилган. Лекин файласуфларнинг – улар орасида эса гениал, зўр истеъоддилари кўп бўлган – юзлаб асарларидан фақат Диоген Лаэртский томонидан келтирилган иқтибосларгина сақланиб қолган, холос, у шу қадар ақлсиз бўлган эканки, Моммзен уни “олтин жунли қўй” деб атаган. Қадимги юонон адабиётини бизлар минглаб номлар билан шитирлаб турган маҳобатли ўрмон янглиғ тасаввур қиласиз, бугун эса у дарахтлари кесиб олинган худудда қаққайиб турган бир неча яккам-дуккам дов-дараҳтлару, у ер-бу ерда сақланиб қолган камгина тўнка, кундалардан иборат бўлиб кўринади, илгариги ўрмоннинг қалин дарахтзорларидан, уларни асрлар шип-шийдам кундаков қилгани боис, ном-нишон қолмаган.

Тақдир-қисмат лотин адабиётини ҳам унча сийламаган. Унинг асосчила-рига мансуб асарлар сақланмаган, фақат Плавт ва Теренций туфайли Рим комедияси бизгача етиб келган. Тўғри, Рим республикасининг инқирозидан тортиб, то Рим империяси даврига қадар, бизгача кўплаб муаллифларнинг асарлари етиб келган, лекин афсуски, даҳолар тиришқоқ истеъоддизлар билан ёнма-ён тикилишиб турибди.

Бунинг учун антик давни айблаш керак эмас, чунки у кутубхоначилик соҳасидан оз-моз хабардор бўлган. Искандариядаги китоб омборида Юнонистон томонидан адабиёт, фалсафа ва илм-фан соҳасида нимаики яратилган бўлса, деярли барчаси сақланган. Кичикроқ кутубхоналар ҳамма жойда: Грециянинг ўзида, Осиё ва Африкада ҳам бўлган. Император бошчилигидаги Рим юонон ва лотин тилларидағи китобларнинг бир қанча йирик тўпламларига эга бўлган, лекин босқинлар, ёнгинлар, қирғинларга қаршилик кўрсата олиш учун булар камлик қилар эди.

Ўрта асрларгача нималар омон қолган, буни ҳеч қачон билолмаймиз, чунки тақдир-қисмат китоб учун олдиндан янги оғатларни тайёрлаб қўйган эди. Ўрта асрларда қадимги замоннинг барча китобларига ҳам бирдек диққат-эътибор билан муносабатда бўлинмаган. Баъзи бир китоблар доимий равишда ўқилиб, доимий равишда қайтадан (тўғрисини айтганда, ҳар гал ёмонрок) кўчириб чиқилаверган, минглаб бошқалари эса, каламушлардан ташқари ҳеч кимни қизиқтирулмаган. Қадимги пергаментлардан янги ёзувлар учун материал сифатида фойдаланишни ўрганиб олишган-

дан сўнг, палимпсестлар<sup>1</sup> – бой берилган қадимий тафаккурнинг ғамгин сағаналари пайдо бўлган. Фақат энди ҳарфлар ҳаддан ташқари мураккаб манипуляциялар<sup>2</sup> ёрдамидагина ўрта асрнинг ранги ўчиб кетган сиёҳлари остидан билинар-билинмас ўргимчак инига ўхшаб кўринади.

Аммо шунча оғат, мусибатлардан сўнг омон қолган антик муаллифларнинг шу кичик гурӯҳи ҳам ўрта аср оҳирларига келиб, ҳалокат ёқасида эди – гуманистлар маҳкумларнинг ҳеч бўлмаса, бир қисмини кутқариб қолиш учун сўнгги дақиқада пайдо бўлдилар. Боккаччо Монте Кассинони бориб кўрганини шундай тасвирлайди: “Ажойиб таърифини эшигтганим кутубхонани кўриб, танишиб чиқиши мақсадида роҳиблардан бирига юмшоқ муомала билан мурожаат қилиб, у ерга бошлаб боришини сўрадим. Шунда у зинани кўрсатиб, кескин жавоб қилди: “Ана очиқ турибди, ўзинг борақол!”. Хурсанд бўлган Боккаччо зинадан юқорига чопиб чиқади ва қарасаки, китобий хазиналар сақланаётган жойда на эшик бор, на кулф; ичкари киргач, ланг очилиб ётган деразалардан эслан шамол “экиб” ташлаган ўтлар ҳаммаёқни босиб кетганини, китобларни эса қалин чанг қоплаб ётганини кўради. Бундай ачинарли манзарадан ранжиган Боккаччо энди китобларни жилдма-жилд кўздан кечира бошлайди – бу ерда антик ва чет эллик муаллифларнинг чорак қисми йиртиб олинган ёки ҳошиялари қирқилган, айримларининг эса бутунлай дабдаласи чиқиб кетган эди. Номуносиб кимсалар кўлига тушган, улуғ инсонлар қаламига мансуб бу асарларнинг аянчли қисматидан дили сиёҳ бўлган Боккаччо йиғлаб юборади ва паства тушиб, бошқа бир роҳибдан шу қадар қимматбаҳо китобларнинг бунчалик хунук, ачинарли ҳолга тушиб қолганининг сабабини сўрайди. Бунга жавобан, роҳиб оғалар озгина пул ишлаб олиш илинжида пергаментни йиртиб олиб, ёзилган жойларини ўчиришларини, сўнг болалар учун мўъжазгина псалтиrlар тайёрлашларини, кесиб олинган ҳошиялардан эса аёллар буюртмасига мувофиқ мактублар ёзиш учун фойдаланишларини айтиб беради.

Петрарка, Боккаччо, Колуччо Салутати, Пожо Браччолини ва бошқа гуманистлар узоқ, олис монастирларни зиёрат қилиб, черков архивларини, чордоқ ва қазноқларни ковлаштириб, текшириб чиқадилар, бутун Европа бўйлаб сафар қилиб, бу ишга элчилар ва элчихона ходимларини жалб қиласидилар ва моғор, пўпанак босган жилдлардан ўз қўллари билан нусхалар олиб ёки бу ишни кўчириб ёзувчи котибларга топшириб, китобларни ҳалокатдан сақлаб қоладилар. Улар туфайли биз Цицерон, Тацит, Катуллага эга бўлдик, агар Колуччо Салутати ўз вақтида нусха кўчирмаганида, Катулла ҳам ҳалок бўларди, негаки флоренциялик гуманист нусха олган Верона қўллэзмасининг тез орада йўқолгани маълум бўлади. Қолган ҳаммаларининг тақдир-қисмати ҳам худди шундай аянчли кечиши мумкин эди, – гоҳо бунинг учун атиги бир кун кифоя қиласиди. Петрарка Цицероннинг “De gloria” – “Шон-шуҳрат ҳақида” номли асарини ўзи олдиндан кўчириб олмасдан кимгадир бериб юборади ва ушбу асар унга бошқа қайтиб келмай, бутунлай йўқ бўлиб кетади. Китоб босиш ихтиро қилиниши билан қадимги замон ёзувчиларининг асарларини чоп этишга киришилди, бу билан гўё улар қабрлардан чиқариб олингандай бўлиб, шон-шуҳратнинг

<sup>1</sup> Палимпсест – янгитдан қиртишланган (китоб) – ювиб тозаланган ёки қириб ташланган матн устига битилган пергаментли қўллэзма. Палимпсестлар китоб босиш ихтиро қилингунга қадар кенг тарқалган.

<sup>2</sup> Манипуляция – кўл ишидаги қийин ва нозик ҳаракатлар. Ҳийла-найранглар билан омма онгига таъсир кўрсатиш ва уни бошқариш. – Тарж.

янги даврига қадам қўйдилар, бу эса баъзилари учун илгариги барча зафар, тантаналардан ҳам кўра ёрқинроқ, шукухлироқ бўлган эди.

Китоб босишни ихтиро қилган Йоҳанн Гутенберг адабий асарларга ҳатто энг вайрон қилувчи тарихий оғатлар ва катаклизмларга<sup>1</sup> қаршилик кўрсатиши имконини берди. Тўғри, XV ва XVI асрларда тиражлар ҳали унчалик катта эмас эди, шунинг учун у ёки бу инкунабулалар<sup>2</sup> тезда энг ноёб, нодир нарсага айланарди, лекин келгусида босиладиган нусхалар сони шу қадар кўпайиб, уларни сақлаш усуслари эса шунчалик такомиллашиб ва кенгайиб кетдики, эндиликда ҳар бир китоб учун абадийлик сари барча шарт-шароитлар мухайё. Ҳамонки адабий асарнинг биргина ягона нусхаси мавжуд экан, унинг йўқ бўлиб кетиши ҳакида гап бўлиши мумкинmas. Мутлақо тасодифан топилган Бакхирид ва Геронднинг шеърлари битилган папируслар бутунлай унугиб юборилган бу икки қадимги замон шоирини ҳаётга қайтарди. Ҳудди шунга ўхшаш воқеалар ёки китобхоннинг ногаҳоний қизиқиши унугиб ёки эътиборсиз қолдирилган у ёки бу муаллиф номи ва шуҳратининг қайта тикланишига сабаб бўлиши мумкин. Бугунги кунда ҳар қандай китоб, ҳаттоқи оддий телефон абонентлари рўйхатномаси ҳам антик давр ва ўрта аср ёзувчилари олдида устунликка эга: у ўзига вақт ажратиб, уни бир неча ойлар давомида кўчириб чиқадиган меҳрибон қалб саховатига муҳтож эмас.

Кимни ўқишини хоҳламасалар, уни кўчириб ёзмайдилар ҳам – ҳудди шу сабабли бутун бошли адабий даврлар ва кўпгина жанрлар йўқ бўлиб кетган. Бизнинг Польшада бутун XVII аср завол топган; мевали ва баракали, янги шаклларга бой, тўлақонли ва сермазмун бу ҳақиқий “ўтоқ қилинмаган боғ” аввалига қитмир ва маккор цензура, кейин эса жамиятнинг лоқайдлиги сабабли тириклийн кўмилган эди. Пасекнинг “Хотиралар” ва Потоцкийнинг “Хотиндаги уруш” и XIX асрдагина нашр этилиб, эски поляк тилини мактабда ўрганиш ва ҳаваскорларга ҳузур бағишилаш йўлида адабий ёдгорликларга айланган. Унугиб кетгани боис улар поляк ҳикоячилик прозаси ва поляк эпик шеъриятини шакллантириш имкониятларидан мосуво бўлиб, бир қанча авлодлар уларни ўқиш имкониятидан маҳрум эдилар. Шунингдек, Збигнев Морштин поэзияси ҳам поляк ҳарбий лирикаси ривожига табиий таркибий қисм бўлиб қўшилолмади. Ва бундан ташқари, кўллэзма ҳолида қолиб кетган яна юзлаб асарлар бамисоли капалаклари қачон учиб чиқиши номаълум бўлган пиллаларни эслатади.

Адабий боқийлик суст ёки амалий, таъсирчан бўлиши мумкин. Биринчи шакл, бу – фақат мавжуд бўлиш, холос. Омборнинг инвентарлар рўйхатида фалон-фалон рақам билан белгиланган кўллэзма ёки кутубхона токчаларидан, каталоглар ва библиографик нашрлардан муайян ўрин олган босиб бўлинган нусхаларнинг маълум бир сони – буларга агар вақти-вақти билан чангини артиб, токчадан-токчага олиб қўйилишини ёки титул варагидаги метрик маълумотлар текшириб турилишини ҳисобга олмагандан, асрлар давомида ҳам қўл тегизилмаслиги мумкин. Уларни кимлардир очиб, ўқигунга қадар, орадан кўп авлодлар ўтади ва ...иш ҳавола, изоҳлар ёзиг қўйиш ёки қисқача иқтибос келтириш билан чекланади. Ва шунинг ўзи ҳам кўпгина китоблар учун муайян ютуқ ҳисобланади.

Бироқ инсон қалбининг яратган ҳар бир асари яширин, аммо юзага чиқиши мумкин бўлган кучга эга. У мавжуд экан, уни фаол ҳаётга чор-

<sup>1</sup> Катаклизм – табиатда ва ижтимоий ҳаётда рўй берадиган кескин, хатарли, ҳалокатли ўзгаришлар. – Тарж.

<sup>2</sup> Инкунабула – ҳарф териш йўли билан чиқарилган дастлабки китоб. – Тарж.

лайдиган, инсонлар ақл-идроқига таъсир кўрсатишга изн берадиган, синчковлик, қизиқиши, қувонч ва завқ-шавқ уйғотувчи шарт-шароитлар доим юзага келиши мумкин. Кўпинча замондошлар, баъзан муаллифнинг ўзи ҳам нуқсонли ва муваффақиятсиз чиққан деб ёқтиргмаган асар башарти чиқинди саватчасидан ёки печкадан “қутулиб” қололган бўлса, энг сўнгги асрларга келиб, шон-шуҳратга сазовор бўлиши, билимдон ва омилкорлар уни ўтган даврнинг жонли овози сифатида қувонч билан қарши олишлари ва у ўз даври адабиётининг улкан парвозларига мансуб деб топилиши, ҳеч бўлмаганда, ўша давр ҳақида гувоҳлик берувчи қимматли хужжат сифатида хизмат қилиши мумкин.

Хужжатнинг роли – жиддий склерозга учраган китобларнинг сўнгги умидидир. Нафақат қандайdir адабий хислатлардан маҳрум бўлган, балки ўз дунёсидан ажраб, фазодан ерга тушган жисмлар – метеоритлар сингари шуҳрати сўнган дурдона асарлар ҳам шу қадар оддий, ўртамиёна даражага тушиб қолади. Адабий асар чинакамига ҳаёт кечириши учун уни яратган халқ ёки ҳеч бўлмаганда, шу халқнинг маданий анъаналари барҳаёт бўлмоғи лозим. Қадимги Бобил эпоси “Гильгамеш” номукаммал таржималарнинг ғира-шира тумани орқали ўқиб келинади, кўпчиликда у нафақат узок ўтган давр овози сифатида қизиқиши уйғотади, балки тўлқинлантириб, ҳаяжонга солади, ғоят даражада завқлантиради, аммо аслини олганда, ассирологларнинг<sup>1</sup> кичик бир гурухи учун илмий тадқиқот мавзуи бўлиб қолади, холос. Бу – қадимги Миср поэзияси дурдоналарига ҳам тааллуклиди, улар қандайdir ибора, жумбокли, сирли истиора ёки тоналлик (оҳангдошлиқ)ка мафтун бўлган замонавий шоир қалами остида олис ифода тарзida онда-сонда пайдо бўлиб қолади, бироқ улар ҳеч қачон ҳозирги замон кишиисига хос маънавий қадриятларнинг ҳаётбахш даврасига кира олмайди, чунки энди на бобилликлар, на қадимги мисрликлар ва на ана шу адабий ёдгорликлар замирида ўз миллий даҳоларининг асарларини кўриб, билиб, қадрлай оладиган халқ онг, шуури мавжуд эмас, улар қачонлардир яшаган ерларда умр кечираётган халқлар эса, уларнинг анъаналарини ўрганиб олмаган ва умуман, бу анъаналарни ҳеч ким ҳеч қаерда давом эттиргмаган. Агар Византия юонон анъаналарини сақлаб қолмаганида, роман халқлари лотин тилини қабул қилиб, ўзлаштиргмаганларида, антик адабиёт ҳам худди шундай ахволга тушган бўлар эди.

Адабий асар янги, келаси авлодлар дилида янгиланиш ва ўзгаришларга қодир қобилиятини йўқотмас экан, у ҳақиқий бокийликка дахлдор бўлиб қолаверади. Китоблар асрлар давомида турли хил ва фавқулодда, ҳайратланарли тақдир-қисматларни бошидан кечирган. Мабодо бирорта адабий асар “Илиада”, “Энеида”, “Илоҳий комедия” каби шунчалик узоқ умр кўрган бўлса, демак, у тобора янгича мазмун касб эта бориб, бир неча бор ўзгаришларга юз тутган. Ҳомернинг замондошлари қайси ёки қандай “Илиада”ни билишган, ким топади? Худди ўша овозлар, худди ўша сўзлар ва шеърлар, антик давр руҳи маъбуллар, қадимий урф-одатларнинг излари, эскича дунёқараашларнинг кўланкалари билан ҳамон бирга яшаб келаркан, ҳар бир юзийлилкда ўзгача, лекин албатта олдингиларига нимаси биландир ўхшаш бўлган тасаввурлар уйғотган. Ҳомер ўрта асрлардан бошлаб, дам узоқлашиб, дам яқинлашган, гоҳ юксалиб, гоҳ пасайган – у бутун XIX аср

<sup>1</sup> Ассиролог – қадимги Месопотамия халқларининг тарихи, адабиёти, тили ва ёзувларини ўрганувчи фан – ассирология мутахассиси.

мобайнида филологлар учун вивисекция<sup>1</sup> мавзуи сифатида хизмат қилган бўлса, бизнинг давримизга келиб, яна хаётга қайтди. Уни оқин, баҳшиларга ўхшаб, халқона либос кийиб юрган дейишади, шу билан бирга, худди сарой шоири каби, кўшк ва қасрларга ҳам бемалол қадам ранжида қилиб юрган.

Адабий асарларга ҳар хил ранг, оҳанг, тусдаги завқ-шавқ ва лоқайдлик, муҳаббат ва нафрат туйғулари бутун умр бўйи ҳамроҳлик қиласди. Диний тасаввурлар, сиёсий тузум, ижтимоий, назариялар, мода ва урф-одатларнинг ҳар қандай ўзгаришлари дарҳол асар шаклига таъсир қилгандай бўлади ва унга янгича мазмунни мажбуран қабул қиласди. “Ҳамлет” матнига нималарни ёзиб-чизиб, қўшиб, киритишмаган дейсиз! Ахир, унинг муаллифи, асрлар оша ўтаётиб, ҳатто ўз номини ҳам йўқотиб қўймадими? Қачонлардир янги Компаретти пайдо бўлиб, Шекспирнинг жўшқинликда Вергилийни-кидан қолишмайдиган метаморфозаларини тўплайди-да, таърифлаб, баён қилиб беради. Агар хотирам панд бермаса, Маколей Макиавеллининг ва-фотидан кейинги тақдири ҳақида очерк ёзган, маълум бўлишича, инглиз тилидаги иблис, шайтон номларидан бири унинг исмидан келиб чиқсан экан.

Адабий асар тақдири кутилмаган воқеа, ходиса, тасодифларга тўла. Ҳар бир асарнинг ўз ўқувчиси бўлиб, у асрлар давомида муттасил ўзгариб боради. Асарнинг жамиятдаги барча табақалар, ҳатто замондошлар томонидан бирдай эътироф этилиши ва тан олиниши камдан-кам учрайди. Бу – Вальтер Скотт ва Сенкевич асарларига насиб қилган, биринчисини Гёте ва дағал, қўпол шотланд фермерлари баравар севиб мутолаа қилишган бўлса, иккинчисининг “Трилогия”сини ўқиётуб, нафакат граф Тарновский, балки унинг поместье (ер-мулк)ларидаги дехқонлар ҳам кўз ёши тўкишган экан. Одатда асар дастлаб бир ижтимоий гуруҳнинг мулкига айланади, сўнг эса уни бошқалар ҳам берилиб ўқий бошлайди – “Робинзон Крузо”ни аввалига ақлли, бамаъни, мулоҳазали мешчанлар ўқишишган, кейин у болаларни ҳам ўзига жалб этиб, қизиқтириб қўйган. Косово даласи ҳақидаги ёки “Калевала” сингари халқ қўшиқлари аслида дехқон кулбаларida туғилади, сўнгра тез орада унутилгач, олимлар томон кўчиб боради. Ўрта аср рицарлар эпоси сарой амалдорлари ва маълумотли, жанговар рицарлар учун мўлжаллаб ёзилган, бугунги кунда эса унга фақат олимлар билан ёзувчилар қизиқади, холос. Агар умумтаълим мактаби бўлмаганда, барча классикларнинг бошига ҳам худди шу кун тушган бўлар эди.

Мумтоз адаблар ҳар бир адабиётда бор ва ўзини хурмат қиласиган ҳар бир ёзувчи қачонлардир уларнинг қаторига қўшилишига умид қиласди. Бирок классиклар ҳам ҳар хил бўлади. Ҳақиқий даҳолар билан ёнма-ён сийқаси чиқсан гапларни такрорловчи, ҳаммани ўзига қаратишни яхши қўрадиган сўзамол маҳмадоналарни ҳам, силлиқ ва бежамадор қилиб ёзадиганларни ҳам, шаклбозликка берилган сноб (куруқ олифта)ларни ҳам, жазавага тушадиган қийшанғи, қилиқдор, таманноларни ҳам учратиш мумкин. Эсимда, адабий ассамблеяларнинг бирида Каден-Бандровский Маринеттини “футуризм классиги” деб атаганида, унинг ёлғондакам жаҳли чиқсанди, холос. Келажакда бунинг ҳақиқатга айланиши учун кўп нарса керак эмас. Ёзувчилар китобхонларнинг уларга ўрганиши, қайта текшириб бўлмайдиган фикр, мулоҳазалар билан қўллаб-қувватланадиган обрў-эътиборлари ва кўпинча – мактаб туфайли классикка айланадилар. Ливий Андроник ўз “Одиссея”си билан Рим мактабида бир неча юз йиллар ўзини тутиб

<sup>1</sup> Вивисекция – тирик организмни илмий мақсадларда ёриб текшириш. – Тарж.

тура олди, унинг сатура шеъри<sup>1</sup> акс садосини эса навқирон Ҳорацийнинг ижодидаёқ эшитиш мумкин бўлган. Польшада нашриётлар мутлақо кутилмаган ёзувчиларга саҳийлик билан классик деган номни инъом қилиб юбораверади, бу билан гўё улар ҳар бир ўлган ёзувчи шундай номга сазовор деб ўйлашармикин, деган таассурот туғилади ва бу нарса газета таъзияномасидаги “янги ўлганларнинг” китобий версиясига ўхшай бошлади. Ҳар қандай мамлакатда мактаб ёзувчиларнинг боқийлигини ёки жуда узоқ ящашини таъминлайди, қадимгиларни эса, айниқса, лотин адиларини илоҳга айлантириб ҳам юборган. Илк ёшликтининг қуёшли ёғусидан мунаvvар мактабдаги ўқувчилик йиллари кейинчалик хотираларга кўчиб, бизларни қачонлардир адабиёт билан ошно қилган китобчаларга нисбатан ғоят нафис, нозик ҳис-туйғу уйғотади, – бу китобчаларда, таъбир жоиз бўлса, умр баҳорининг гулчанглари қолади ва кимдир агар ушбу маънавий қадриятларнинг меросий иерархиясини менсимай бузадиган бўлса, биз буни муқаддас нарсаларни таҳқирлаш деб биламиз.

Аммо ўзимизни ўзимиз алдамайлик: ушбу яхши кўрган нарсамиз кўпинча ёдгорликларда ёки кўчаларнинг номларида кўзга ташланиб турадиган муаллифларнинг исм-шарифлари билан чекланиб, ёдимиизда асарларининг номларидан бошқа ҳеч вақо қолмайди. Энг қадрланадиган китоблар, одатда, энг кўп ўқиладиганлар сирасига кирмайди. Лессингнинг машхур эпиграммаси бор:

*Клопштокни иззат-ҳурмат қиласиз,  
Лек борми бирор марта уни ўқиган?  
Қадрламанг бизларни юксак, яхиси,  
Ўқиб туринг, онда-сонда бўлса ҳам.*

Ҳа, албатта яхши тилак. Адабиёт клопштокларга, эъзозланишга муносиб эсадалик, ёдгорликларга, табаррук сиймоларга тўла, уларни ёд этиб, ҳурмат-эҳтиром ила ардоқлаш авлоддан-авлодга мерос бўлиб ўтади, бу ҳақдаги докторлик диссертациялари, мактаб дарслекларидан олинган парчалар ва қўшимча батафсил биографик маълумотлар билан тўлдирилиб, кўллаб-кувватлаб борилади. Бу боқийлик дорихона ҳапдорилари ва препаратларининг дозаларида ҳам мужассам, уни ёзиб бериш – умумий таълимни кўллаб-кувватлаш демакдир. Байни тошқотган бундай шаклдаги шон-шуҳрат қачонлардир жуда кўпсонли, сон-саноқсиз, жонли, оташин ёзувчилар учун тақдир-қисматга айланган. Бугунги кунда эса улар адабиёт ландшафтида худди сўниб қолган вулқонлар каби туришибди.

Ўтган асрларнинг баъзи бир ёзувчилари келажак авлодлар олдидаги ўз шон-шуҳратларига қанчалик ҳайрон бўлиб караган бўлишарди, буни гоҳида ўзимча тасаввур қилгим келади. Мадам де Севини энг аввало “Расин мосаси худди қаҳваники каби ўтиб кетади” деб айтган аҳмоқона даъвосига ишонч ҳосил қилган, сўнг эҳтимол, ўзининг интим мактублари щунчалик машхур бўлиб кетганини билгач, ниҳоят, француз прозасининг классикилари қаторидан мустаҳкам ўрин эгаллаганидан қониқиши ҳосил қилган бўлармиди. Ян Хризостом Пасек ўз кундакилари авлодлар эҳтиромида эканлигидан янаям кўпроқ ҳайрон бўлган, унинг инглиз ҳамкаси Сэмюэл Пипс эса ўзининг шифрланган ёзувлари узра қад кўтарган нашр ва

<sup>1</sup> Сатура шеър – қадимги Римдаги театрга хос жанр: у диалоглар, пантомима, мусиқа ва рақслардан иборат бўлган.

шарҳлардан иборат бўлган бутун бошли кутубхонани ҳозирги замоннинг энг катта ғалатиликларидан бири деб хисоблаган бўларди балки. Петрарка ва Боккаччо ўзларининг бутун куч-ғайратларини сарфлаб, кечаю кундуз меҳнат қилиб яратган лотин тилидаги асарларининг хазон бўлиб, завол топганига, вафотларидан кейинги шон-шуҳратлари эса бириники сонетлар, бошқасиники – назарга илинмайдиган “бузилган, дағал ва қўпол” тилда ёзилган новеллалар туфайли эканига маъюслик билан амин бўлган бўлардилар. Аммо Вольтер ўзининг улкан меросидан келажак авлодлар бир неча юпқагина жилдларни танлаб олишганини билгач, ўзининг зийраклиги ва олдиндан кўра билиш қобилиятидан мағрурланган бўларди, чунки у доим “боқийликка унча катта бўлмаган бағаж билан борилади” деб юргучи эди.

Охирги гап – жуда тўғри. Ҳар бир авлод ўзига яқин бўлган замондошлари-нинг китобларига эга бўлган ҳолда, аждодларнинг буюк ҳурматини камроқ харажатлар билан англаб, тушуниб етишга ҳаракат қиласи ва шунинг учун ҳам қадимги замон ёзувчиларининг кўпжилдли опуслари<sup>1</sup> ўрнига деярли ирим қилиб, кичикроқ асарларини танлаб олади. Вальтер Скоттнинг тўла асарлар тўпламига кўмилиб, мутолаасига берилишга бугунги кунда ким ҳам журъат қила оларди? Ҳозирги замон романларининг йирик туркумларига ҳам, эҳтимол, роман жанрининг ўзигаям худди шундай хавф-хатар таҳдид қилиб тургандир. Мана, юз йилларки, роман бадиий адабиётда бошқа жанрлар зиёнига бўлса-да, ҳамон ҳукмронлик қилиб келмоқда, лекин унинг қачонлардир назардан қолишини тасаввур қилиш жуда осон. Буюк романнависларнинг шон-шуҳрати бора-бора сўнади ва одамлар бир вактлар Бальзак музейи ташкил этилиб, Пруст асарлари учун изоҳли лугатлар нашр қилинганидан ҳайратга тушадилар.

Хораций ўз фикрига кўра, эҳтимол, дунё тургунча турадиган Рим ҳали мавжуд экан, ўзининг шон-шуҳратга эришишини олдиндан айтиб, башорат қилган. Ундан кейин ҳам шунга ўхшаш гаплар тез-тез такрорланиб турган, аммо вақт ўтиши билан минг йиллик тажриба адабиётни камтарликка ўргатди чоги, жуда узок келажакка назар ташлашга хеч кимнинг юраги бетламай қолди.

Бироқ кимдир агар Ибсеннинг олдида адабий шон-шуҳратнинг ўткинчи эканлиги ҳақида гапиргудай бўлса, ёмон аччиғи келар, – унга ўн минг йил ҳам камлик қиласиди. Гонкур эса ундан ҳам ошиб тушди. У гўё ер шарининг қачонлардир совиб, муз билан қопланиши ва унинг қор босган китобчалари ўлик коинот бўйлаб мудом айланиб юриши ҳақида Фламмарион айтган гапларга ишонишни мутлақо истамасди. Қалб боқийлигига ишонмаса-да, лекин адабий боқийликдан воз кечишини хоҳламас эди. Шу аснода қанақадир тўрт минг йил ҳақида эмас – бу Хомер учун яхши – ва Ибсенни бир оз тинчлантирувчи икки юз аср ҳақида ҳам орзу қилмасди, – ахир, шу қадар арзимас баҳо учун ҳаёт шодликлариан воз кечиш тўғримикин? Бунинг ўрнига ичиш, севиш ва тинмай ишлаб, ўз ҳаётингни заҳарлагандан кўра, тараалабедод қилиб юрган маъқул эмасми.

Гонкур бу ерда охирги сўзни айтмаган. Охирги сўз ундан бир қадар олдин, яъни Гонкурдан бир неча асрлар аввал – XV асрда итальян гуманистлари томонидан айтиб бўлинган эди. Улар хотинларини ўтмишидан рашк қилувчи эрлар каби азоб-уқубат чекишга қодир эдилар. “Инсон, – деган эди улардан бири, – тоабад ҳамманинг оғзида қолишга ҳаракат қиласи. У ўтмишда ҳам, барча мамлакатларда ҳам ва ҳатто ёввойи, йиртқич ҳайвонлар орасида ҳам машхур

<sup>1</sup> Опус – бадиий ёки илмий асар. – Тарж.

бўла олмаслиқдан қийналади...” Бу кулгили эмас, балки инсон табиатига фоят хос бўлган тушунча: одам абадий бир нима яратоётганига ўзи ишонмоғи лозим.

Ҳиндистон Британия империясига кўшиб олинган лаззатли кунларда Карлейль ўз ватандошларига шундай савол билан мурожаат қилган: “Инглизлар, сиз қайси биридан воз кечган бўлардингиз: Ҳиндистонданми ёки Шекспирдан? Нимани афзал кўрган бўлардингиз: Ҳиндистонсиз қолишними ё Шекспирсиз? Биламан, давлат арбоблари ўз тилида жавоб беради, бизнинг жавобимиз эса бундай: бизлар Шекспирсиз қололмаймиз. Ҳали шундай кун келадики, Ҳиндистон бизга қарашиб бўлмай қолади, аммо Шекспир ҳар доим яшайди, у абадий қолади”. Энди Англияниң ҳинд мустамлакаси йўқ. Демак, Карлейль овози “давлат арбоблари” эриша олмайдиган юксак ақл-идрок овози эди. Шекспир салтанати нафақат яшашда давом этмоқда, балки ўз сарҳадларини ҳам тобора кенгайтириб бормоқда. У энг дағал, энг дадил империалист орзу ҳам қилолмайдиган мамлакатларни қамраб олди.

Шекспирга ўхшаш доҳий, йўлбошчилар, қироллар, истилочи, жаҳонгирлар тарихда кўп бўлган. Ҳомер барча мустакил ва бир-бирига душман бўлган майда юонон давлатларининг фукаролари устидан ягона ҳукмдор, бутун Элладанинг қироли эди, ундан бошқа ҳеч ким ўз ватанини бирлаштиришга муваффақ бўломаган. Данте ўз изоди ва тили билан Италияни сиёсий қайта бирлашишидан олти юз йил олдин қайтадан бирлаштира олди. Буюк поляк романтиклари Мицкевич, Словацкий ва Красиньский томонидан ўша даврда географик харитада мавжуд бўломаган Польша яратилган эди. Ёзувчининг сўзлари сулолалар ва қабилаларни ўзаро бир-бири билан боғлаган, адолат учун курашган, кишанларни парчалаб, ҳалқларни озодликка чиқарган. Байрон грекларга илҳом бахш этган. Эскирган мактаб тизимларини ислоҳ қилиш, фабрика ишчилари ва тикувчи аёлларнинг турмуш шароитларини яхшилаш, қулликни бекор қилиш Диккенс, Элизабет Браунинг ва Гарриет Бичер-Стоунинг доимий иши бўлган. Руссо француз инқиlobини тайёрлаган. Рус ҳалқи ўзининг улуғ ёзувчилари кўмагида озодлик сари дадил борган. “Маҳобхората”даги каби, Савитра ёки Нал ва Дамаянти ҳақидаги ҳикояларда ҳам фалсафа ва этика ҳинд қалбига чукур сингиб кетган. Конфуций ақл-заковати ўз ифодасини топган, юксак маҳорат билан яратилган ҳикматлар асосида 2500 йил давомида хитой ҳалқининг урф-одатлари, ахлоқ, одоб ва ҳаётй донишмандлиги шаклланиб, вужудга келган.

Сўз – куч-кудрат манбаи. Ёзув орқали абадийлаштирилар экан, у кишиларнинг тафаккури ва орзу-умидлари узра куч-кудратга эга бўлади ва бу куч-кудрат чегараларини ўлчаб ҳам, тасаввур ҳам қилиб бўлмайди. Сўз макон ва замон устидан ҳукмронлик қиласи. Аммо тафаккур ҳарфлар “тўри”да бўлган пайтдагина яшайди ва амал қиласи. Барча қолганлари эса шамолга соврилиб кетади. Инсоннинг тафаккурий тараққиёти, ақл-идрок, заковати эришган ютуқлар оппоқ қофоз бағридаги ана шу нимжонгина ҳарфлардан туғилган. Маданият қон томирларида сиёҳ томчилари гупириб туради. Бу ҳақда ўйламаган ёзувчи ёмон, ўз асари ҳаётининг бардавомлигини ўткинчи лаҳзалар билан ўлчайдиган ёзувчи ҳам ёмон, агар лаҳза унга юз йил – бир асрга teng мажбуриятлар ва худди ўшанчалик масъулият юклашини ўйламаса, буям ёмон. Кимки ўз асари устида уни “aere perennius” – “бронзадан абадийроқ” кўриб, ишламас экан, кимки яратоётган асарига арзимас нарсадай караб, ўз ишончини поймол қиларкан, ундей одам қўлига қалам олмаслиги лозим, чунки у – ёмон, заарли нарсаларнинг уруғини сепувчи, тарқатувчидир.

## Ибройим ЮСУПОВ

(1929–2008)

Қорақалпоқ тилидан  
Ойдин ҲОЖИЕВА  
таржимаси

Қорақалпоқ адабиётининг атоқли намояндаси Ибройим Юсупов 1929 йили Чимбой туманидаги Озод қишлоғида таваллуд топди.

“Бахт лирикаси”, “Кунчикар йўловчисига”, “Ўйлар”, “Етти наво”, “Дала орзулари”, “Кўнгил кўнгилдан сув ичар”, “Тўмарис”, “Илҳом”, “Ташвишларга бой дунё”, “Тузли шамоллар”, “Кўнгилдаги кенг дунё”, “Беклигингни бузма сен...”, “Ҳар кимнинг ўз замони бор” номли шеърий китоблари ва “Танланган асарлар” тўпламлари нашр этилган.

Унинг шеърлари қозоқ, украин, белорус, грузин, латиш, болгар ва бошқа халқлар тилларига таржима қилинган.

Шоир Ўзбекистон ва Қорақалпогистон халқ шоири унвонлари, “Эл-юрт ҳурмати”, “Дўстлик” орденлари, бир қатор ҳукумат фахрий ёрликлари ва медаллари билан мукофотланди. Унга 2004 йили Ўзбекистон Республикаси Президентининг Фармони билан “Ўзбекистон Қаҳрамони” олий унвони берилди. Ҳозирда юртбошимиз Шавкат Мирзиёевнинг маҳсус қарори билан Нукусда шоир ҳайкали ва унинг номидаги ижод мактаби барпо этилди.

Қўйида эълон қилаётганимиз шоир шеърларини Ўзбекистон халқ шоири Ойдин Ҳожиевга ўзбек тилига таржима қилди.

Шоир анибади ўндан ортиқ шеърий тўпламларида инсон қалби кечинмалари халқона оҳангларда ўзига хос талқинини топган. Ватанга муҳаббат, маънавий поклик, тил билан дил ростлиги, ҳаётнинг унутилмас орзу-армонлари, инсон матонати, халқнинг бекиёс гўзал, олижаноб қалбини кўйлаш истаги Ойдин Ҳожиева ижодининг бош мавзуси ҳисобланади.

Шоира Ш.Петефи, А.Мицкевич, Р.Казакова, М.Дилбозий, Гулрухсор, М.Абдуқосимова, Ф.Унгарсинова ва бошқа қатор дунё адабиёти вакиллари шеърларини ўзбек тилига таржима қилган. Шеърлари рус, украин, қозоқ, қирғиз, тажик, белорус, француз, инглиз ва урду тилларида нашр этилган.

Баҳонаи сабаб ойдин туйгулар соҳибаси Ойдин опа Ҳожиевани муборак 75 ёшлари билан чин дилдан кутлаймиз.

### БУ ДУНЁ

Одам ўёли, ўз кўнглингни шод айла,  
Очилсанг, очилаберар бу дунё.  
Ўтганларнинг васиятин ёд айла:  
Йигнасанг, сочила берар бу дунё.

Ҳалол меҳнат билан тонса дунёни –  
Ҳақ ниятли ёши йигитнинг армони.  
Хийла қўлсанг, алдайман деб сен они –  
Шумлигин ошираберар бу дунё.

Элдан ортиқ яшайман деб агар сен –  
Манман бўлсанг, ўзинг азоб чекарсан,  
Тулкининг изидан този юборсанг  
Туттирилмай, қочира берар бу дунё.

Олтин деб йиққанинг темир том бўлиб,  
Охирида изза ерсан мот бўлиб,  
Сен қувсанг, ул сароб паризод бўлиб  
Юзларин яшира берар бу дунё.

Бу дунёнинг берган аччиқ сабогин  
Ҳар кўргандша шукр айла, товба қил,  
Ошиқ Аёз, очиқ турсин қабогинг,  
Ёпилсанг, ётила берар бу дунё.

\* \* \*

Бу дунё беш кунлик, ёлғончи деган  
Бурунгилар айтган сўзлари бордир.  
Ошиқади биздан қолганча дерлар,  
Бевафолик кулар юзлари бордир.

Тангрим бул дунёни йўқдан бор этди,  
Бандам яшасин деб лолазор этди.  
Лекин гофиљ банда ўзидан кетди:  
Баъзиди инсоф йўқ, базинда бордир.

Дунё деб одамзод бир-бирин қирган,  
Шайтон ғулгulasи ҳақ йўлдан урган,  
Бул учун не ёзиқ дунёда турган, –  
Ҳар бало одамнинг ўзида бордир.

Бу дунё ёлғончи эмас чининда,  
Нафсингни тий деган асли қадимда,  
Бир ҳовуч тупроққа тўлгани зумда  
Очкўзлик одамнинг кўзинда бордир.

Ошиқ Аёз, ҳақ йўлидан юрмаса,  
Бу дунёниг гўзалигин кўрмаса,  
Бул сўзга вақтида маъни бермаса,  
Қаттиқ пушаймонлар изинда бордир.

## БҮЛМАСА

*Күш боласи бўлиб кирмайди сонга  
Булбулнинг хушиқавас саси бўлмаса.  
Созни чертган билан келмас нағмага  
Кўнгилда бир андишиаси бўлмаса.*

*Одат қолар балким, хосият қолмас,  
Элга хизмат қилмай – тигит синалмас.  
Кўп яшаган билан оқсоқол бўлмас  
Фаросатли, ақл-эси бўлмаса.*

*Бировлар қартайса, зийнати ошар,  
Юртига кўрк бериб, тўрга ярашар.  
Бировлар ургочи маймунга ўхшар,  
Эсиз, одам суврат туси бўлмаса.*

*Кимлар ёш қайтса-да фикрати тўлган,  
Кимсалар гўлдираб, тил-жаси қолган,  
Отга “чух” дегандан бошқаси ёлғон –  
Ёшулканлик ҳафсаласи бўлмаса.*

*Тирик туриб кимдир отин йўқламас,  
Инсон бўлиб ичган тузин оқламас,  
Берёгидан қўйған билан тўхтамас,  
Нарёгинда бир нарсаси бўлмаса.*

## СУМАЛАК ПИШИРГАН ЯНГАГА

*Омон бўл, сумалак пиширган янга  
(Менга янга бўлсанг, ёшлар “чечা” дер).  
Навбаҳор уйгонган ойдин кечалар  
Шукrona этарсан ганимат дамга,  
Омон бўл, сумалак пиширган янга!*

*Сумалак қайнатмас ҳурлар сен учун,  
Сулув келинларга ўргат сен бугун:  
Қадим удумларни бир-бир танисин,  
Ўргат удумларнинг гўзал маънисин,  
Омон бўл, сумалак пиширган янга.*

*Байрам сумалаги удумдан қолмас,  
Удумин билмаган эл бўла билмас,  
Эркин бозорлардан, чет элдан келган  
Шириналклар унга тенг кела олмас.*

Обиҳаёт сувин ичган байрам бу  
Замондан замонга кўчган байрам бу.  
Ҳар кунимиз Наврӯз бўлсин деб, тилаб,  
Пайғамбар назари тушган байрам бу.

Наврӯз юртнинг шодлик салтанатидир,  
Эзгулик, яшилилк шарофатидир,  
Меҳру шафоатнинг инсон қалбига  
Илоҳий нур қўйган кароматидир.

Халқ яйраб мустақил Ўзбекистонда  
Дунё тинчу эллар ободон бўлсин.  
Шодлик сози янграб ҳар қутлуг тонгда  
Ҳар хонада тўкин дастурхон бўлсин!

Жайхун дарё тошиб, мавж уриб оқиб,  
Ватан ерларига оби раҳматлар ёгиб,  
Кутга, баракага тўлиб тўрт ёзи  
Хоразм, Қорақалпоқ гулистон бўлсин.

Келинг, биродарлар, даврангиз тўлсин,  
Етишимак ғанимат бу ёргуғ кунга.  
Наврӯз байрамингиз муборак бўлсин,  
Омон бўл, сумалак пиширган янга!

## БЎЛМАС

Ерга хизмат қилмай пўлат позалар  
Юзлари ярқираб очилган бўлмас.  
Элга хизмат қилмай ўқтам йигитлар  
Мардлик сифатлари очилган бўлмас.

Яшииларга хизмат қилсанг ёшингда  
Кексайганда ёшлар турар қошингда,  
Гур-гур ёнган ўтни ўчоқ бошинда  
Киши қўли билан ўчирган бўлмас.

Улугла ўзингнинг асли зотингни,  
Юқори тут беклик инобатингни,  
Бир кун келиб тутмасалар отингни,  
Ёшларга ўпкалааб, қисинган бўлмас.

Ошиқ Аёз айтар: тангрим берсалар,  
Яшиилар шод бўлиб даврон сурсалар,  
Аввал-охир феъли бузуқ кимсалар  
Ҳажса борган билан мусулмон бўлмас.

## ГУЛЛАР АНГЛАМАС

*Тўпидан айрилган тўрала гознинг  
Ғанқиллашин ойдин кўллар англамас,  
Гул ишқида куйган булбул ноласин  
Баҳорда очилган гуллар англамас.*

*Биронга айролиқ, биронга сайрон,  
Дунёниг ишига қоларсан ҳайрон,  
Сув излаб улоқса ярадор жайрон  
Ўзи сувсаб ётган чўллар англамас.*

*Қасдинг бордай шунча қийнаб боримни,  
Аёвсиз чертарсан қўнгил торимни,  
Менинг сен деб чекан оҳу зоримни,  
Худога минг шукур, эллар англамас.*

*Ўтар гул мавсуми – баҳору ёзи,  
Бемаҳал урмагай хазон аёзи.  
Ошиқ Аёз сен деб битган баёзин  
Бедард жонлар, бегам диллар англамас.*

## БОЗОР

*Чегарасиз бу дунёниг  
Ҳозир эркин бозори кўп.  
Ер-жасондан дунё молнинг  
Келиб турган гузари кўп.*

*Ҳар ким унга борин солган,  
Ҳатто номус-орин солган.  
Бирор қувнаб савдо қилган,  
Бирорларга озори кўп.*

*Асил гавҳар, зари ҳам бор,  
Аптекда йўқ дори ҳам бор,  
Пулинг бўлса, бори ҳам бор,  
Пулсиз кўзниг қизари кўп.*

*Ҳар ким фойдасин кўзлаган,  
Ёлғон-яшиқдан сўзлаган,  
Бироқ бунда мен излаган,  
Муҳаббатнинг бозори йўқ.*

*Шундай бозор бўлганида,  
Сен бозорлаб борганингда,  
Шоҳсанамдай боягида...  
“Мен Фаривни сотиб ол” деб  
Йиқилардим оёгингга.*

\* \* \*

*Ўзи қизиқ одамлар  
Қизиқ кўрар дунёни.  
Ўзи бузуқ одамлар  
Бузуқ кўрар дунёни.*

Ўзи қизиқроқ одам  
Ўйлаб юради фақат:  
Дунё деган – тўй-байрам,  
Қизиқликдан иборат.

Бузук одам мудоми  
Шумликни билар ақл деб.  
Дунёнинг барча одами  
Бузуқли шилаб ётар деб.

\* \* \*

Ошиқларнинг кўнгли дардли,  
Кўрган кунларин айтсанго,  
Бедардларнинг санинг билан  
Ўйнаб-кулганин айтсанго.

Бераҳим яратиб сани,  
Зору гирён этиб мани,  
Сулувлик деган балони  
Санга берганин айтсанго.

Маккор кулгинг, ҳар мазагинг –  
Бизга қилган даргазабинг.  
Ошиқликнинг бор азобин  
Манга берганин айтсанго.

Ошиқ Аёз тоқат этмай,  
Ишқи даргоҳингга етмай,  
Дардингдан ўртаниб кетмай  
Тирик юрганин айтсанго.

## ЙЎЛЛИ<sup>1</sup> ДАН САЛОМ

Ойжамолга

Одамлар бўлганми шунча беадаб?  
“Кетаман” демадинг одамга ўхшаб,  
Ўйласам, вужудим кетади музлаб,  
Қизиқ қиз экансан ўзинг, Ойжамол!

Сен кетганда тишида юриб эдим мен,  
Кетишингни қайдан билиб эдим мен?  
“Қайга борасан” деб ҳуриб эдим мен:  
Товшимни эшиштмай қолдинг, Ойжамол!

---

<sup>1</sup> Йўлли — шоирнинг ити

*Баҳром<sup>1</sup> келтирганда мен кучук эдим,  
Кўлларингдан ширин сут ичиб эдим.  
Қопогон им бўлар, деб кутиб эдинг,  
Бирорни қоптимми сира, Ойжамол?*

*Кўриқлаб мен сени ёмон кўзлардан,  
Мактабга қатнадим не бир излардан,  
Не ёмонлик кўрдинг ўзи бизлардан?  
Им кўнглини тушунмаган Ойжамол!*

*Кулогимни чимчиб ўтганингда ҳам,  
“Иркитвой” деб тергаб ўтганингда ҳам,  
Эшикни илмасдан кетганингда ҳам,  
Уйни пойлаб ётмадимми, Ойжамол!*

*Остонангда ухлаб қолсам хуриллаб,  
Уй супурдинг чангютаринг дариллаб,  
Сенга халал бермадим-ку ириллаб,  
Аста туриб кетар эдим, Ойжамол.*

*Сени қўмсаб, юлдуз қўриқлаб чиқдим,  
Кўчада им қўймай сўроқлаб чиқдим,  
Кўшинилар ҳовлисин оралаб чиқдим,  
“Это не хорошо!” билсанг, Ойжамол.*

*Одамлардай ҳамма им ҳам бир эмас,  
Им вафодир деганлари сир эмас,  
Ҳар им ўзи бўлак, Йўлли тур эмас,  
Энди мендай им йўқ сенга, Ойжамол!*

*Мен ёздиридим шеърни шоирга айтиб,  
Кўрсам, этагингдан ўйнарман тортиб!  
Майли, келма энди бул уйга қайтиб,  
Тушган ерингда баҳтли бўлгин, Ойжамол!*

16.01.92



<sup>1</sup> Баҳром — шоирнинг тўнғич ўғли. Ўғлимнинг отиниFaфур Ғулом кўйган эди, дейди Ибройим оға.

# DRAMA



**Жан КОКТО**

(1889–1963)

## ИНСОН ОВОЗИ

*(Бир кўринишидан иборат пьеса-монолог)*

Рус тилидан  
Бобониёз ҚУРБОНОВ  
таржимаси

Франциялик серқирига ижодкор, драматург, сценарийнавис, мусаввир ва кинорежиссёр Жан Кокто 1889 йилда Франциянинг Мэзон-Лаффит шахрида дунёга келган. У ўзининг 74 йиллик умри давомида санъатнинг кўпгина турларида гоят баракали ижод килган. “Орфей”, “Шоҳ Эдип”, каби драматик асарлар, “Шоир қони”, “Икки бошли бургут”, “Қабих ота-оналар”, “Соҳибжамол ва маҳлук”, “Орфей васияти” сингари кўплаб фильмлар муаллифи. Қуидга адабнинг “Инсон овози” пьеса-монологи таржимаси эътиборингизга ҳавола этмоқдамиз.

\* \* \*

— Алло, алло, алло... Йўқ, сиз бошқа жойга қўнғироқ қиласиз, ундан кўра, гўшакни қўйиб қўйинг... Йўқ, бу хонадон... Алло... хоним, аксинча гўшакни сиз қўйиб қўйишингиз керак. Алло, хоним, алло...

Алоҳида-алоҳида уланг... йўғе мен доктор Шмидт эмасман... бу нол етти эмас, нол саккиз... алло...

Нақадар кулгили... Менга нуқул адашиб қўнғироқ қилишади, мен бўлсан уларга жавоб қайтараман. (*Гўшакни жойига қўяди, қўлини олиб улгурмасданоқ қўнғироқ чалинади.*)

Алло, сиз мендан нима хоҳлайсиз ўзи? Ахир мен нима қила олишим мумкин?.. Нима учун сиз мен билан бунақа оҳангда гаплашяпсиз?.. Сиз нингча мен айборманми?.. Нима учун?..

Ҳеч ҳам унақа эмас, ҳеч ҳам!.. Алло... хоним... Мен умуман гаплаша олмаяпман...

Мени нуқул узиб қўйишияпти. Телефон тармоғига нимадир бўлган шекилли, ўша аёлга айтиб қўйсангиз, қайтадан улансин. (*Гўшакни қўйини биланоқ, яна қўнғироқ жисиринглайди.*) Алло... алло... Бу сенмисан?.. Сенинг ўзингмисан?.. Ҳа...

\* Манба: [www.theatre-library.ru](http://www.theatre-library.ru)

Жуда ҳам ёмон эшитиляпти... Сен жуда ҳам олисадасан, олисда... Алло, шунчалик ҳам бўладими? Бир вақтнинг ўзида тармоқда шунча овозларни эшитиб турибсан. Қайтадан қўнғироқ қил. Алло... Қай-та-дан... Қайтадан деяпман. Хоним, гўшакни қўйиб туринг... Яхши... Мен доктор Шмидт эмасман деб айтдим-ку. Алло...

*(Гўшакни жойига қўяди. Яна қўнғироқ жиринглайди.)*

Алло... Хайрият-е... Бу сенмисан? Ҳа, энди жуда ҳам яхши эшитиляпти. Энди жуда яхши! Алло... Алло... Ҳа... Шунча овозлар орасида сенинг овозингни эшитиш қанчалик азоб эканлигини билсанг эди. Ҳа, ҳа, йўқ... Ҳақиқатдан ҳам, ҳақиқатдан ҳам яхши бўлди. Мени қайтиб келганимга ўн дақиқаларча бўлди. Бугун сен қўнғироқ килмаганмидинг? А, йўқ, йўқ, мен Мартаникида меҳмондорчиликда эдим ва ўша ерда тушлик қилдим. Ҳозир соат ўн бирдан ўн беш дақиқа ўтган бўлса керак. Сен уйдан қўнғироқ қиляпсанми?.. Ундай бўлса, электрон соатга қарагин-чи... Мен ҳам шундай деб ўйлагандим. Ҳа, ҳа, азизим. Кечка кечқурун ўрнимга чўзилиб, тезроқ уйқуга кетиш учун дори ичиб олдим... Йўқ... Бор-йўғи бир дона холос... Соат тўққизда... Бошим бироз оғриди. Аммо тезда ўзимни қўлга олдим... Марта келувди, у билан биргалиқда нонушта қилдик. Мен у-бу харид қилиш учун дўконга бориб келдим. Мактубларни ҳаммасини сариқ портфелга жойлаб қўйдим. Мен нима?.. Тетикман... Мен сенга онт ичиб айтаманки, тетикман. Кейин нима қилдим? Кейин кийиниб олдим ва мени олиб кетиш учун Марта келди. Бор гап шу. Ҳозиргина мен унинг олдидан келдим. У жуда ҳам ажойиб аёл, мени жуда ҳурмат қиласди. Ҳақиқатдан ҳам у олижаноб инсон. Ҳа, унинг ташки кўриниши шунаقا бўлгани билан ўзи жуда ҳам яхши аёл. Ҳар доимгидек сен ҳақсан... Устимда пуштиранг қўйлак ва мўйна. Бошимда эса қора шляпа. У ҳали ҳам бошимда... Йўқ... йўқ... Мен ҳеч қачон чекмаганман... Лекин ҳозирнинг ўзида уч донасини чекиб тутатдим... Рост гапирайпман... Мен ҳам... Сен нақадар олийжанобсан... Сен ҳам ҳозиргина келдингми? Сен кун бўйи уйдамидинг? Қанақа йиғилиш ҳақида гапирайпсан? А, ҳа. Сен ўзингни эҳтиёт қил, кўп ҳам уринтирганинг ўзингни... Алло... алло. Узиб қўйманглар. Азизим... Алло... Агар бизни узиб қўйгудек бўлишса, сенинг ўзинг менга ҳозирнинг ўзидаёқ қўнғироқ қилгин. Албатта. Алло... Йўқ, эшитяпман... Хатларимизни портфелга жойлаб қўйганман, олиб кетиш учун исталган пайтда бирортасини жўнатишинг мумкин. Ҳа албатта, осон эмас... Азизим... Узр сўрашингга ҳожат йўқ. Бу шунчаки табиий ҳол, холос. Айб менинг ўзимда, сен жуда ҳам олижанобсан. Мен ўзимни бунчалик иродали ва матонатли бўламан деб сираям ўйламаганман... Мендан ҳайратланишга ҳожат ҳам йўқ. Мен худди телбаларга ўхшаб қолганман, шоша-пиша кийиниб кўчага чиқаман ва яна шундай қайтиб кираман. Балки эртага бугунгидай иродали бўла олмасман... Сенми? Йўғе... Йўқ, азизим, йўқ... Мен сени мутглақо айбламоқчи эмасман... Мен, мен... Нима? Бу ҳаммаси табиий ҳол... Шундай бўлиши мумкин эди. Аксинча, биз ҳеч қачон бир-биримизни алдамаймиз деб сўз берган эдик-ку... Агар буни сен мендан беркитиб юрганингда эди, буни менга нисбатан қилинган бир жиноят хисоблаб, асло кечирмаган ва кечира олмаган бўлардим. Бу менга жуда қаттиқ зарба бўларди. Ўша фикрларни англаб етиб, кўникма ҳосил қилиш учун менда вакт ҳам, имкон ҳам бор эди... Қанақа комедия?.. Алло... Ким?.. Мен артистлик қилаяпманми?

Мен-а?.. Бунақанги ишларга қодир эмаслигимни сен яхши биласан-ку. Мутлако йўқ. Йўғ-е, мен бутунлай хотиржамман... Нима бўлганида ҳам сен ўзинг буни сезган бўлардинг деяпман... Менинг овозим ниманидир яшираётган одамнинг овозига ўхшаётган бўлса?.. Йўқ, мен бундан буёғига яна ҳам дадил ва қатъиятли бўлишга аҳд килдим, бунга эришаман ҳам. Кўрасан, ҳали қараб тургин... Барибир эмас... Йўқ... Инсон рўй бериши мумкин бўлган баҳтсизлигу кулфатни олдиндан сезиб турса ҳам барибир довдираб, эсанкираб қолиши турган гап. Йўқ, менимча, сен ошириб юбординг чоғи... Ҳар ҳолда, сенинг бу фикрингга кўниши учун менда имкон ҳам, муддат ҳам бор эди ўшанда. Сен аввалида мени шунга тайёрладинг. Ўзингча далда беришга ҳаракат қилдинг. Бизнинг муҳаббатимиз жуда кўп тўсиқларга, қарама-қаршиликларга дуч келди ва уларга чидаб ҳам берди. Энди бўлса, иккисидан бирини танлаш керак, беш йил давомида эришилган баҳтдан воз кечиши ёки ҳаммасини қайтадан бошлиш. Эртанги кунга ишончсизлигим мен учун жуда ҳам қимматга тушган. Алло... Чексиз баҳт... Йўқ, мен бундан сира афсусда эмасман. Сен хато ўйляйпсан... Мен ўз қилмишимга яраша жазоимни олаяпман. Мен бир афсонавий баҳтга интилдим ва ўшанда мен гўё бир телба эдим. Жоним... меҳрибоним... азизим... эшитгин... севгилим... Ижозат бер, айтишим керак бўлган гапларимнинг ҳаммасини айтиб бўлай... Илтимос... Сен ўзингни айблама, ҳаммасига мен ўзим айборман... Ҳа... ҳа... Ўша Версалда якшанба кунги телеграммани бир эслагин... Ҳа... ана ўшанда сенинг олдингга биринчи бўлиб мен ўзим бормоқчи эдим... Ҳатто сени бир оғиз сўз айтишингга ҳам кўймадим... Менга ҳаммаси барибир... Йўқ... йўқ... йўқ... Бу борада сен ноҳақсан... Биринчи бўлиб мен қўнғироқ қилгандим. Йўқ ўшанда сешанба куни эди. Сешанба, ишончим комил. Сешанба, 27 кун. Сенинг телеграмманг эса душанба куни кечқурун етиб келганди. Йигирма олтинчида... Ўша кунларни мен ёддан билишимни биласан-ку. Онангми? Нима учун? Ташвишланма. Ҳозирча мен ўзим ҳам билмайман... Ҳа... эҳтимол.

О, йўқ, албатта бирданига эмас. Сенчи? Эртагами? Бунчалик тез ҳал бўлади деб ўйламагандим. Ҳозир, бир дақиқа... Бу ахир жуда ҳам осон-ку... Портфель эртага эрталаб қоровул аёлнинг қўлида бўлади. Жозеф келиб олиб кетади. Менми? Ўзинг яхши биласан. Балки ҳеч қаерга бормасман. Эҳтимол бир неча кунга шаҳар ташқарисига, Мартаникига бориб келарман. Ҳа, кучукчами? У шу ерда. У жуда ҳам безовта, кун бўйи хонадан дахлизга, дахлиздан хонага кириб чиқиб юрди. Қулоқларини динг қилганча кўзларимга тикилиб гапларимни диққат билан тинглайди. У ҳамма ердан сени излайди. Унга сени топишига гўёки ёрдам бермаётганимдек у мендан ўпкалаётгандай эди... Менимча, сен уни олиб кетганинг маъқулроқ. Агар ана шу тилсиз жонивор баҳтсиз бўлгудек бўлса... Йўқ... йўқ... О, мен уни кўчага айланишга олиб чиқолмайман. Шунинг учун ҳам у сен билан яшаса яхши бўларди... Йўқ... Тез орада у мени унутади, қўяди.

...Кўрамиз, кўрамиз, бу унчалик ҳам мураккаб иш эмас... Сен унга бу менинг дўстимнинг ити деб айтасан. У Жозефни жуда яхши қўради. Шунинг учун ҳам уни олиб кетиш учун Жозефнинг ўзи келади. Мен унинг бўйнига қизил бўйинбоғ боғлаб қўяман. Унда ҳеч қанақа ракам йўқ. Яхши, кутиб турамиз. Ҳа, ҳа, ҳа, азизим... Тушундим... Яхши азизим. Қанақа қўлқоп? Сен машина ҳайдаганингда ишлатадиган мўйнали қўлқопингми? Билмайман, мен уларни кўрмадим. Ҳозир у ёқ, бу ёқни қараб кўрарман... Кутгин... Бизни узиб қўйишмасин...

(У стол устидаги лампа чироқ ёнида турган қўлқопни олиб эҳтирос билан лабларига босади. Сўнг ёноқларига босганча телефон гўшагини олиб гапира бошлайди.)

Алло... алло... Йўқ... Мен уни жавоннинг ичидан ҳам, ҳамма ердан излаб кўрдим, лекин ҳеч қаерда йўқ... Қулоқ сол. Яхши... Мен уни яна излаб кўраман, топилишига ишончим комил... Мабодо топилиб қолгудек бўлса, қоровул аёлга қолдириб кетаман... Портфелнинг ичидан бўлади... Ҳа жоним... Мактубларимнами, сен уларни ёқиб юбор... Ушбу гапларим ғирт бемаънилик бўлса ҳам, сендан бир нарсани илтимос қилмоқчиман, у ҳам бўлса шуки, мактубларимни ёқиб бўлганингдан кейин, кулини бир вақтлар мен сенга совға қилган, тошбақа суюгидан ясалган қутичага жойлаб қўйгин. Бу ишим ғирт беъманилик эканлигини ўзим ҳам фаҳмлаб турибман... Мени кечир. Мен жуда кучли ва матонатли эдим. (*Йиглайди*) Мана... бўлдим... ҳасрат қилиб бўлдим... Мен ўша қутичани ўзим билан бирга сақлаб юрмоқчиман, холос... Сен жуда ҳам олижаноб инсонсан... Нима?

(Куйидаги сўзларни актриса ўзи яхии биладиган тилда сўзлаши мумкин.)

Синглинг, опангнинг қофозларини ошхонадаги плитанинг устига қўйиб ёқиб юбордим. Аввалига ўша қофозларнинг ичидан сен айтган расмларни олиб қолмоқчи эдим, аммо сен... Яхши... Ҳа! Сен ҳозир ҳақиқатдан ҳам халатдамисан?.. Ухламоқчимидинг?.. Бунчалар ҳам ярим кечгача ўтириб ишламасанг... Ахир эртага барвакт туришинг керак бўлса, эртароқ ётиб ухлашинг керак-ку. Алло... Алло... А, шундайми? Мен баланд овозда гапиряпманми? Энди эшитаяпсанми? Сен мени яхши эшитяпсанми, деяпман? Қизиқ, мен сени жуда ҳам яхши эшитяпман-ку, худди ёнгинамда ўтириб гапираётгандайсан? Аммо... Алло... Алло... Ана энди сени бутунлай эшитмаяпман.

Ана энди яхши, факат сенинг овозинг жуда олисдан келаётгандай. Сен мени яхши эшитяпсанми? Яхши... Ҳамма ишни ҳам ўз вақти соатида бўлгани маъкул. Йўқ... Гўшакни қўйиб қўймагин. Алло... Хоним мен ҳали гапимни тугатганим йўқ... Ҳозир ҳам гаплашяпман... Мен сени эшитяпман... Мен сени жуда ҳам яхши эшитяпман. Ҳа, бу албатта яхши эмасди. Мен ҳар қанча уриниб кўрмай, барибир яхши эшитилмасди, назаримда, сен гўёки ўлиб қолгандек эдинг. Ҳа, яхши, жуда яхши. Бизни бунчалик узок гаплашиб олишимизга қўйиб қўйганларига ҳайронман, одатда, уч минут ўтгач, узиб қўйиб, сўнг бошқа томонга улаб юборишарди. Ҳа, ҳа, мен олдингидан анча яхши эшитяпман. Лекин телефонингдан қанақадир шовқин эшитилаётгани учун сенинг телефонинг эмасдай туюляпти. Биласанми, шу тобда мен сени ғойибдан бўлса-да аниқ-тиник қўриб тургандайман.

(У кўраётгандарини тахминан тасвирлаб бершига ҳаракат қиласди. Бўйнидаги шарфини қанақалигини айтиб бермоқчи бўлади.)

Шарфингнинг ранги қизил, чап томондан бошлаб ўралган. Кўйлагингнингenglари шимарилган. Чап қўлингда телефон гўшаги, ўнг қўлингда авторучка, блокнотга расмлар чизаяпсан, шундайми? Бошчалар, юрак, юлдузлар... Сен жилмайяпсанми? Қулоқларинг ўрнида кўзларинг жойлашган... (У

тезда кафтлари билан юзини бекитади.) О, азизим... Фақат мен томонга қарамагин...

Мен кўрқаман? Йўқ, асло кўрқмайман. Бу ундан-да баттарроқ... Фақат мен ёлғиз ётишга ўрганмаганман. Ҳа... ҳа... ҳа... ҳа... Сўз бераман сенга. Мен... мен... мен... сенга ваъда бераман. Сен жуда ҳам олижаноб йигитсан... Билмайман. Мен ўзимни кўзгуга солиб кўришни ёқтирумайман... Мен ваннахонадаги чироқни ўчиришдан кўрқаман. Кечкаурун кўзгуга боқиб, гўё қари кампирга дуч келиб қолгандай бўлдим. Сен жуда ҳам яхши инсонсан... Лекин азизим, аслида ҳам шундай. Менинг юзим чиройлими? Қанақасига чиройли бўлсин? Айниқса, рассомлар шунака дейишса ёмон... Сен менга қараб туриб, мана бу ёқимсиз башарани қаранглар, деганинг менга хуш ёқарди ўшандা... Ҳа мўътабар зот, мен ҳазиллашдим, сен жуда ҳам соддасан-а...

Бахтимга сен укувсизроқ бўлганинг учун ҳам мени севиб қолгансан. Агар сен мени севмаганингда ва мени укувим бўлганида телефон деган мато овозсиз, ўзидан из қолдирмайдиган даҳшатли қуролга айланган бўларди... Менми? Жаҳлим чиқаяпти? Алло... алло... алло... Жоним нега жим бўлиб қолдинг? Алло... алло... Жоним... (*Қайтадан рақам терауди.*) Алло жоним... (*Қайтадан рақам тера бошлиди.*) Алло... алло... жоним... Бу рақам хато терилган. Мени нол тўрт олти билан улашяпди. Менга эса нол тўрт етти керак... Отей... (*Қутади.*)

Алло... Отей, бу нол тўрт еттими? А! Жозеф бу сизмисиз? Бу менман... Мен хоним билан гаплашаётганимда бизни узиб қўйишиди. Уйда йўқми? Ҳа... Ҳа... Бугун у қайтиб келмайдими?

О, худойим-ей, нақадар паришонхотирман-а, у ресторандан қўнғироқ қилаётганида бизни узиб қўйишиди. Энди эса уни уйига қўнғироқ қиласайпман. Мени кечиринг Жозеф, миннатдорман, миннатдорман... Яхши, тунингиз хайрли ўтсин, Жозеф. (У гўшакни жойига қўяркан, ўзини ёмон ҳис қила бошлиди. Яна қўнғироқ овози.) Алло... алло азизим... Бу сенмисан? Бизни узиб қўйишиди... Йўқ, йўқ мен кутаётгандим... Қўнғироқ жиринглагандан мен гўшакни кўтаргандим, ҳеч ким гапирмади. Албатта, албатта...

Сен ётиб ухламоқчимисан?.. Қўнғироқ қилганинг учун раҳмат. Сен жуда ҳам яхши инсонсан. (*Йиғлайди. Пауза.*) Йўқ, мен эшитяпман... Нима?.. Узр, албатта буларнинг бари шунчаки бир тентаклик, холос. Ҳечқиси йўқ, ҳечқиси йўқ мендан асло хавотир олмагин, ҳаммаси жойида. Онт ичамки ҳаммаси жойида. Йўқ, балки сенга шундай туюлгандир. Ҳеч нарса бўлгани йўқ. Сен хато ўйлайпсан. Ҳозир ҳам илгаригидай гаплашяпман-ку... Фақат... Биласанми? Узундан узоқ гаплашишни тўхташишни ҳам, гўшакни ўз жойига қўйишини ҳам унутиб, ўзингни бўм-бўш зулмат ичра ҳис этганинг ҳолда... (*Йиғлайди.*) Севгилим, менга қулоқ сол, мен сенга ҳеч қачон ёлғон гапирмаганман... Ҳа, мен биламан ва сенга ишонаман... Мен шунга ишонаман. Йўқ, айнан шунга. Мен ҳозиргина сенга ёлғон гапирдим. Ҳозиргина... шу тобда... Мана ўн беш дақиқа бўлибди, сенга ёлғон гапириб ўтирибман. Мен шу нарсани аниқ биламанки, энди кутишга ҳам, умид қилишга ҳам ҳожат йўқ. Бахтсиз одамга ёлғондан заррача фойда йўқ. Ҳатто сенинг фойданг учун ҳам ёлғон гапириш менинг қўлимдан кел-маслигини яхши биласан... О, йўқ... Асло хавотир олма... Ташвишланишга ҳожат йўқ. Устимдаги қўйлагим ва Мартаникода овқатланганим ҳақида айтган гапларим мутлақо ёлғон эди.

Мен тушлик ҳам қилганим йўқ. Устимдаги кўйлагим ҳам пуштиранг эмас. Шу тобда мен ички кўйлагимни устидан ҳарир мато ташлаб олиб, сенинг қўнғироғингни кутар эканман, ўзимнинг ақлдан озаётганимни сезган ҳолда, у ёқдан бу ёққа юра бошлайман. Шундан сўнг, матони елкамга ташлаганча кўчага чиқиб, такси тўхтатиб деразангнинг тагига бориб сени кутгим келди... Билмайман... Аммо сабабини билмасам ҳам кутардим, кутардим, кутардим... Сен ҳақсан... Ҳа... Ҳа... Эшитяпман... Мен эса хушимни йиғиб олдим... Эшитяпман, қасам ичиб айтаманки, гапларингни эшитиб ўтирибман. Йўқ, мен ҳеч нарса еганим йўқ... Ахволим оғир бўлгани учун ҳам ҳеч нарса ея олмадим... Кеча кечкурун яхши ухлашим учун уйқу дори ичмоқчи бўлдим. Ўзимча озроқ ичсам ухлаб қоламан, агар меъёридан кўпроқ ичгудек бўлсан қайтиб уйғонмайман, яъни ўламан! (*Йиглайди.*) Шунда илиқ сув ёрдамида ўн икки донасини ичиб, тошдай қотиб ухлабман ва туш кўрибман. Тушимда сен ёнимда йўқ эмишсан... Мен бирданига уйғониб кетиб, ўрнимдан сакраб турибману ёлғиз ўзим ётганимни, бошим сенинг елкангда эмаслигини англаб, энди яшолмасам керак деб ўйлабман. Мен худди жон бераётган одамдай, баданим совуб, ўзимни жуда ҳам енгил хис эта бошладим. Танҳоликда ўлим топишга иродам етмаслигига амин бўлганимдан сўнг Мартага қўнғироқ қилдим. Азизим, жоним, соат тўртлар эди чамамда... Иситмам қирқлар атрофида эди... Дори ёрдамида ҳаётдан кўз юмиш жуда ҳам қийин бўлар экан. Доза масаласида доим хато бўлади. Дўхтир менга дори ёзиб берганида Марта менинг ёнимда эди ва сен билан бемалол гаплашиб олишимиз учун, мен уни уйига кетишга кўндиридим. У яқиндагина кетди.

Энди ўзимни жуда яхши ҳис этяпман, ҳақиқатдан ҳам яхшиман, бошим умуман оғримаяпти. Ҳа, сен ҳақсан. Фақат бироз алаҳсираётгандайман. Ўттиз саккизу уч...

Буларни ҳаммаси асабдан... Мутлақо ташвиш тортма... Мен нақадар эҳтиётсизман-а... Ахир сен билан бир кунга хайрлашаётгандай, бемалол жўнаб кетишинг учун умуман ташвишга кўймасликка сўз бергандим-ку... Ҳа... Ҳа... Йўқ... Менинг бу ишим фирт аҳмоқлиқдан бошқа нарса эмасди... Ҳа... Ҳа... Албатта тентаклик-да... Шу тобда энг мушкул иш гўшакни жойига илиб қўйиб, ёлғиз қолишидир... (*Йиглайди.*) Алло... сизни яна узиб қўйишиди шекилли...

Сен жуда ҳам очиқўнгил ва олижаноб инсонсан... Менинг бечораги-нам... Дилингни оғритиб қўйдим шекилли... Йўқ, гапиравер... Мен шунчалар қийналдимки, ҳатто полда ётиб олиб, у ёқдан бу ёққа ағанар эканман, ўз овозимни ўзим эшитиб, яна ўзимга келдим, тинчландим. Биласанми, биз бирга ёнма-ён ётганимизда, мен бошимни ўзим истаган жойга қўйиб, сенинг нималарнидир ҳикоя қилиб бераётган овозингни ҳозиргина телефондан келаётган овозингга ўхшатиб юбордим...

Разолат... Йўқ аксинча, сен эмас, мен разилман. Ахир сенинг олдингда мен қасам ичгандим-ку. Мен... Нималар деяпсан?.. Сен ҳалиги... Сен менга чексиз баҳт ато этгансан... баҳт... бошқа нарса эмас... Лекин азизим, сени бу гапларинг мутлақо нотўғри... Мен содир бўлиши керак бўлган мана шу ишни олдиндан, сезганман ва кутганман. Дунёдаги кўпгина аёллар ўз севгандари билан бир умр бирга бўламиз деб ўйлайдилар, ажралиш улар учун жуда катта фожеа ҳисобланади... Мен бўлсан сенинг ўша севгилингнинг суратини столимиз устида ётган журналда кўрган кунимданоқ, ҳаммасини

фаҳмлаганман... Буларнинг ҳаммаси фақат аёлларга хос бўлган оддий ҳол. Мен ҳаммасини олдиндан билган бўлсам-да, сен билан бўладиган сўнгти кунларимизни барбод қилмаслик учун бу ҳақда сенга ҳеч нарса демадим... Энди мени ўзгартиришга урина кўрма, мен қандай бўлсам шундайлигимча қоламан... Алло... Қулоғимга қандайдир мусиқа овозлари эшитиляпти... Мусиқа овозлари эшитиляпти деяпман... Унда сен қўшнингнинг деворини тақиллатиб вақт алламаҳал бўлганини, мусиқа овозини учириш кераклигини айтиб қўйсанг бўлади-ку. Қўшнинг сенинг ҳеч қачон уйда бўлмаслигингни билиб ярим кечасигача мусиқа эшитишга ўрганиб қолган, шекилли. Йўқ, керак эмас... Эртага эрталаб Мартанинг врачи келади... Йўқ, у жуда яхши врач, бошқа шифокор чакириб, уни ранжитишнинг кераги йўқ... Ташибланма, мен бор гапни айтаяпман. Мартанинг ўзи сенга хабар беради. Тушунаман, тушунаман, йўқ, бу гал ўзимни қўлга олишга, дадилроқ бўлишга уриниб қўраман... Аммо... О, минг чандон зўр... Аммо ҳозир, шу тобда қўнғироқ қилмаганингда ўлиб қолишим ҳам мумкин эди... Йўқ... Тўхтаб тур... Тўхтаб тур... Бирор чорасини топишга уриниб қўрамиз... (У ёқдан бу ёққа юра бошлиди. Паст овозда инграгандай бўлади.) Кечир мени, менинг ушбу ҳолатим кечириб бўлмайдиган даражада турган-битгани азобдан иборат... Сен жуда ҳам бардошли, чидамлисан... Лекин шуни билиб қўйгинки, мен азоб чекаяпман, қийналаяпман, ақлдан озаяпман... Бизни боғлаб турган телефон сими мен учун сўнгги имкондир... Ўтган куни кечқурун... у пайтда ҳали ухлаётгандим... Мен телефонни ўзим билан тўшагимда олиб ётгандим...

Ха, ўзим ҳам биламан. Бу албатта қанчалик қулгили бўлмасин, бизни боғлаб турган яккаю ягона имкон бўлгани учун ҳам шундай қилдим... Телефон сими... Сен яна бир бор қўнғироқ қиламан, деб ваъда бергандингку... Тасаввур қиляпсанми, мен кўп тушлар кўрибман. Сен ўз қўнғирофинг билан бир тарсаки уриб, овозимни учириб қўйган эмишсан... Ўша тарсаки зарбидан ер узра йиқилиб тушибман, яна бир тушимда эса кимдир мени бўғаётган эмиш... ва шунда тўсатдан денгиз тубига тушиб қолган эмишман. Ўша ердан тўғридан тўғри сенинг Отейдаги уйингга борса бўлар экан. Мени бошимга ғаввосларнинг скафандри кийдирилган, унинг симлари эса сени қўлларингга уланган эмиш. Мен уларни узиб юборма, деб сенга ёлвораётган эмишман. Накадар беъмани ва телба тескари тушлар-а?.. Агар ўша тушларим ҳақида бировга овоз чиқариб гапириб бергудай бўлсам, гўё улар ўнгимда ҳам содир бўладигандай даҳшатга тушасан киши. Ҳозир айни пайтда ҳеч нарсадан қўрқмаяпман, чунки сен билан гаплашиб, овозингни эшитиб ўтирибман. Мана беш йилдирки, мен сен билан қалбан, хаёлан ва руҳан яшаб келаяпман, сен билан биргаман, сен билан нафас оляяпман ва доим сени кутиб юрган бўламан. Агар сен кечиккудек ёки ушланиб қолгудек бўлсанг, худди ўлиб қолгандай туюласан ва ўзим ҳам ўлиб қоладигандай бўлавераман. Чунки, сенинг овозинг менинг оғрикли дилимга худди малҳамдай, бебаҳо малҳамдай туюлади. Ҳозир сен билан гаплашиб турганим учун ҳам нафас оляяпман. Қўрган тушларим унчалик ҳам аҳмоқона эмас шекилли... Агар сен ҳозир телефон гўшагини қўйиб қўйгудек бўлсанг, бу ишинг билан телефон симини қирқиб ташлагандек бўласан!

Ха, севгилим, биринчи кеча ҳар ҳолда ухладим. Дўхтирнинг айтишига қараганда, буларнинг ҳаммаси асабларнинг зўриқишидан экан.

Одамлар одатда биринчи кечаси яхши ухлашади, кутилмаган оғриқ кутилмаган зарбага ўхшаса-да, ҳар ҳолда чидаса бўлади. Иккинчи кеча эса чидаб бўлмайдиган даражада даҳшатли бўлиб, учинчи кеча эса бир неча дақиқадан кейин бошланади. Сен гўшакни жойига қўйиб қўйганингдан кейин эрта, индин ва яна сон-саноқсиз кейинлар, мазмунсиз бўм-бўш кунлар... О, худойим-еї, мен қандай қиласман, кунларим қандай ўтаркин? Йўқ, ҳеч ҳам алаҳсираётганим йўқ, эс-хушим ҳам жойида. Буларнинг ҳаммасини аниқ кўриб, англаб турибман... Ўзимда куч топиб сенга ёлғонлар тўқишдан бошқа яхшироқ чорам йўқ эди!

...Масалан, мен туш кўрдим дейлик. Барибир ҳам уйғонгач, туриб кийиниб, ювиниб бўлиб, албатта кўчага чиқардим, лекин қаёқка ҳам борардим... Менинг яккаю ёлғиз инсоним, қадрдон инсоним сен. Менга бошқа юмушнинг ўзи йўқ ва бўлиши ҳам мумкин эмас. Ҳа, мени кечир... Мен доим сен билан банд бўлганман ва барча харакатларим фақат сен учун бўлган... Мартами, уни дунёси мутлақо бошқа... Жоним, бу худди сувсизлиқда балиқни қандай яшashi билан қизиқишдай гап... Менга ҳеч кимнинг кераги йўқ деб аввал ҳам айтганман... Эрмак, овуниш, кўнгил ёзиш ҳакида гапирайпсанми? Мен бир нарсани аниқ тан олишим мумкин. У ҳам бўлса, ўша тиш дўхтири асаб толаларимни ўлдириб бўлгандан кейин менга ҳеч ким керак бўлмай қолди... Менинг бу гапларим шоирона бўлмаса-да, ўша сен мени ташлаб кетган даҳшатли кунингдан бошлаб, мен бутунлай ёлғизман... ёлғизман... танҳо ўзим ёлғизман... Ахир сенга айтдим-ку, ташлаб кетган кучугинг мана икки кундирки даҳлиздан жилмайди. Агар силамоқчи бўлсам, мени ўзига яқинлаштирумайди. Менимча, бироз вақт ўтса у мени тишлаб олиши ҳам мумкин. У баъзида тишларини ғичирлатиб, ириллаб ҳам қўяди. Сени ишонтириб айтаманки, кейинги пайтларда у бошқача бўлиб қолган... Мен ундан қўрқаман... Мартагами?... Сенга айтдим-ку, у ҳеч кимни ўзига яқинлаштирумаяпти деб. Марта уни бир амаллаб ташқарига олиб чиқди. У ҳатто эшикни очишга ҳам қўймайди. Ҳа шундай қилинса, тўғри иш бўлади. Ишон, мен ундан қўрқаяпман. У ҳеч нарса емаяпти ҳам, ётган жойидан қўзғалмаяпти ҳам. У менга шундай қараш қиласади, кўриб этим жимиirlаб кетади. Қаердан ҳам билай сабабини... Балки мени сенга ёмонлик қилган деб ўйлаётгандир... Бечорагина жонивор, ҳатто ундан ранжишга ҳаққим ҳам йўқ. Мен уни яхши тушунаман. У сени яхши кўради, ёқтиради. Сени интизор бўлиб кутаяпти, аммо сендан дарак йўқ... У буларнинг бари учун мени айблаяпти шекилли. Сен Жозефни жўнатишга харакат қил, ўйлайманки, у Жозеф билан кетади. Ах, мен... Барибир ҳам... у мени эъзозламасди. Қанақасига? Бунинг кимлигини аҳамияти йўқ... Мисол учун тунов куни бир таниш аёлни учратдим, исми “С” ҳарфидан бошланади... Б.С. Ҳа, шундай, у Анри Мартен шаҳарчасида яшайди...

У мендан сенинг ҳали аканг ҳам борми, уни никоҳ тўйи ҳакида газеталарда ёзишганди, деб сўради. Наҳотки, сен мени ундан хафа бўлди деб ўйлаган бўлсанг... Ахир буларнинг ҳаммаси бор гап-ку... Қанақа кўринишда эдим? Юрагим тўла таъзиялар билан... Ишонтириб айтаманки, уйда меҳмонларим бор деб баҳона қилиб тезроқ кетишга шошилдим... Вазиятни чигаллаштирма... Ҳаммаси жўнгина ва оддий... Агар одамларга нисбатан эътиборсизрок бўлгудек бўлсанг, улар сени кўрарга кўзи йўқ. Мен бўлсам, аста-секин ўз дўстларимнинг баҳридан ўтдим... Мен сен билан бўладиган лаҳзаларимнинг бир дақиқасини ҳам бехудага кетказишни хоҳламасдим.

Бу ҳақида одамларнинг нима дейишлари мен учун аҳамиятсиз... Нима бўлганда ҳам адолатли бўлиш керак... Бизнинг муносабатларимизни бегона одамлар ҳеч қачон тушунишмайди... Сен... Сен баъзи бир нарсаларни уларга мажбурлаб ўргата олмайсан ҳам. Бунақа пайтларда энг яхшиси менга ўхшаб ҳаммасига қўл силтаб қўя қолган маъқул, тамом вассалом.

Одамлар фақат икки нарсанигина тушунишади, у ҳам бўлса, муҳаббат ва нафрат. Ажралиш ўз номи билан ажралишдир, уни бошқача аташ мумкин эмас. Одамлар бу нарсаларга мутлақо юзаки қараб муносабатда бўлишади... Уларга сен бу гапларни мажбурлаб тушунтиrolмайсан-ку... Бу борада энг маъқул йўл менга ўхшаб ҳаммасига қўл силтаб қўя қолиш, тамом-вассалом... Мутлақо... (*У күтилмаган қаттиқ оғриқдан инграб юборади.*) О!... Йўқ, ҳечкиси йўқ... Мен шу топда сен билан гўёки шунчаки гаплашиб ўтиргандай гапирайпман, гапирайпман ва бирданига ҳаммаси тугаганини сезиб қоляман! (*Йиглайди.*) Ўз ўзингни алдашни нима кераги бор?.. Ҳа... Ҳа... Йўқ... Одамлар қадим замонларда ҳам бунақа ҳолларга тушишган, ҳатто эс-хушларидан айрилиб, берган ваъдаларини унутишиб, севганларига эришиш учун ҳаммасини қайтадан бошлишган. Бир қиё боқишининг ўзи ҳаммасини ўзгартириб юбориши мумкин бўлган... Бугунги телефонлар даврида ҳаммаси тугадими, тамом тугади... Асло ташвишланма... Инсон ҳеч қачон ўз жонига икки марта қасд қилмайди... Мангу уйқуга кетиш учун бир мартасининг ўзи кифоя... Йўқ, мен тўппонча сотиб олишимни сен тасаввур қилоласанми ўзи? Сенга ёлғон сўзлашм учун менда куч йўқ, мадор йўқ, улар қаердан ҳам бўлсин... Мен кучли ва иродали бўлишим керак... Одатда шундай ҳоллар бўладики, ёлғон яхшиликка хизмат қилади... Мисол учун сен менинг дардимни енгилатиш учун ёлғон сўзлайдиган бўлсанг, мен сенга ёлғон гапирайпсан, деб айбламайман-ку... Сенинг ёлғон гапираётганингни сездим деяпман. Масалан, сен ҳозир уйда бўлмаганингда, бу ҳақда айтган бўлардинг... Йўқ, йўқ, азизим... Кулоқ сол... Мен сенга ишонаман... Ахир мен сенга ишонмайман деб айтмадим-ку... Нима учун ранжияпсан?.. Йўқ, хафа бўляяпсан... Ранжиганинг овозингдан билиниб турибди... Агар азбаройи менга раҳминг келганида сени янада қаттиқроқ севган бўлар эдим... Алло... Алло... (*У тез ва паст овозда гапиранча гўшакни секин жойига қўяди.*) О, худойим, шундай қилгинки, у менга қўнғироқ қилсин! (*Телефон жиринглайди. У гўшакни олади.*) Бизни узуб қўйишиди. Айтмоқчиманки, агар сен оқ қўнгиллигинг сабабли менга ёлғон гапирганингда, мен буни албатта пайқаган ва сени янада кучлироқ севган бўлардим... Сўзсиз... Сен ақлдан озаяпсан... Севгилим... жоним... азизим... (*У бўйнига телефон симини ўрай бошлайди.*) Бу ишим ҳар қанча даҳшатли бўлмасин, барибир қилишим керак... Йўқ, бунга менинг иродам етмайди... Ҳа шу тобда биз иккаламиз гаплашаяпмиз, гўё бир-биримизга жуда ҳам якинмиз, бир-биримизни пинжимизга суқилиб кириб олганмизу бирданига бизни икки томонга ажратиб юборишиди. Қарабсанки, яна ўша ертўлалару канализациялардан иборат бўлган бутун бир шаҳар орамизда пайдо бўлади... Инсон овозининг телефон симлари орқали ўтишини айтиб ҳайратга тушганим эсингдами?.. Мен телефон симини бўйнимга ўрадим... Сенинг овозинг менинг бўйнимни чирмаб олайти... Шу тобда станция тасодифан ҳаммасини узуб қўймасайди деб кўрқаман!

...О, азизим, сенингча мен сени яхши билмайман, қандай қилиб сени бошингга шундай фикр келиши мумкин? Ушбу операция мендан кўра

сенга қийинроқдир. Йўқ... йўқ... йўқ... Марселгами? Жоним, қулоқ сол, истардимки, агар индин кечкурун икковингиз Марселга келмоқчи бўлсангиз... ўтиниб сўрардимки, сизлар... бир вақтлар иккаламиз тунаб қолган меҳмонхонада тунамасангиз. Утинаман сендан. Ранжимаяпсанми?.. Бундай дейишимнинг сабаби шундаки, ҳамма нарса гўё туман ичра қўринаётгандай бўлса-да, аммо тасаввуримдан ўчиб кетмаган ва хеч қачон ўчмаса ҳам керак... Тушундингми?...

*(У ўрнидан зўрга туриб, телефонни қўлига олганча тўшаги томон боради.)*

Шундай қилиб... яна... беихтиёр “ҳозирча хайр” деб юборишимга сал қолди. Ишончим комил... Ҳеч ким, ҳеч қачон, ҳеч нарсани билмайди... О, ха... Шундай бўлгани маъқулроқ... *(У телефонни қўксига босганча тўшакка ҷўзилади.)* Азизим... севгилим... Мен мард ва дадил бўламан... Гўшакни тезроқ жойига қўй... Тезроқ, тезроқ... Ахир, тезроқ қўйсангчи... тезроқ... Мен сени севаман... севаман... севаман...севаман... севаман... *(Телефон гўшаги унинг қўлидан сиргалиб полга тушади...)*



Б.ҚУРБОН. “Илтижо” 2010 й.

# ADABIYOTSHUNOSLIK. FALSAFA

**Наим КАРИМОВ**

## МАЪЛУМ ВА НОМАЪЛУМ “ЭГМОНТ”

Таниқли ёзувчи ва олим, филология фанлари доктори, профессор, кўпдан-кўп илмий ва оммабол асарлар муаллифи, Давлат мукофоти совриндори, «Эл-юрт хурмати» ордени соҳиби, Ўзбекистон Республикаси фан арбоби, Ўзбекистон Республикаси Фанлар академияси ҳақиқий аъзоси Наим Каримов бу йил табаррук 85 ёшга тўлдилар. Олим бутун умрини адабиёт соҳасига бағишилаб, эл-юрт хизматида ҳамиша камарбасталар. Наим Каримов фаолияти маърифатпарварлик адабиётидан то буғунги кун адабиётигача бўлган даврни қамраб олади. Олим ўтган йиллар мобайнида жуда кўп шогирдлар тарбиялади. Уз илмий мактабини яратди.

Наим Каримов сўнгги йилларда нафақат етук олим, балки адаб сифатида ҳам баракали ижод қўлмоқда. Унинг қаламидан чиққан Чўлпон, Сўфизода, Ойбек, Ҳамид Олимjon, Шайхзода, Миртемир, Усмон Носирга бағишиланган маърифий-биографик роман ва қиссалар ўзбек адабиётида шу жанринг шаклланиши ўйлидаги дастлабки қадамлардан бўлди.

Биз устоз олим, адаб Наим Каримовга янгидан-янги илмий-ижодий муваффақиятлар, умрларига баракот тилаймиз. Ўзбек адабиётшунослиги, ўзбек адабиёти ривожидаги меҳнатларида куч-тайрат, сиҳат-саломатлик ёр бўлсин.

Таҳририят

Буюк немис шоири ва мутафаккири Иоганн Вольфганг Гёте (1749-1832) жаҳон адабиётининг мумтоз намояндалари орасида Шарқ адабиётини, айниқса, форс шеъриягини катта меҳр билан ўрганган, Алишер Навоий ижодидан ҳам баҳраманд бўлган ва Шарқ бадиий маданиятига ихлосининг далили сифатида “Шарқу Фарб девони”ни яратган буюк ижодкордир. Унинг “Фауст” асари жаҳон адабиётининг энг муҳташам намуналаридан бири сифатида фан ва маданият арбоблари эътиборини ҳамон ўзига жалб этиб келади. Миллий тиллар тараққиёт даражаси шу асарнинг таржима этилганлиги ва шу таржиманинг сифати билан белгиланади, десак муболага бўлмайди.

Ўзбекистонда Гёте ижодига қизиқиш узоқ тарихга эга эмас. XIX аср охири – XX аср бошларига қадар ҳозирги Ўзбекистон ҳудудида хукм сурған тарихий-ижтимоий шароит, Европа билан Ўрта Осиёдаги мамлакатлар ўртасида маданий алоқаларнинг йўлга қўйилмаганлиги ўзбек ҳалқининг Гёте ижоди билан кечроқ танишишига сабаб бўлган.

1922 йили Германияга ўқишига юборилган олтмишдан зиёд ўзбек ёшлари Гёте диёридаги турли ўқув юртларида тахсил олиш билан бирга немис халқининг бой адабиёти, санъати ва илғор техникаси билан ҳам танишиш имкониятига эга бўлдилар. Улар Германиянинг дикқатга сазовор тарихий ва маданий жойларига, театрлари ва музейларига ташрифларидан олган таассуротлари, олиб борган ва олиб бораётган ишлари ҳақида Берлинда нашр этилган “Кўмак” журналида, Ўзбекистон газеталарига юборган мақолаларида жўшиб ёздилар. Ўзбекистонга қайтиб келганларидан сўнг, ким олий ўқув юртида ишлаган бўлса, талабаларга, ким матбуот муассасаларида хизмат қилган бўлса, газетхон ва журналхонларга немис фани, адабиёти, санъати ва шу соҳаларнинг дарғалари ҳақида маълумот беришга, ватандошларини улар ижоди намуналари билан таниширишга интилдилар. Шундай мақолалардан бири Марям Султонмуродова қаламига мансуб бўлган “Ўлмас бир сиймо”дир.

“Жаҳон адабиётида, – деб бошланган “Гулистон” журналининг 1935 йил 8-сонида босилган мақола, – энг юқори ўрин тутган ёзувчилардан бири XVIII асрнинг охирларида яшаган немис шоири Иоганн Вольфганг Гётедир.

Гёте феодализм жамияти ўрнига капитализм бош кўтараётган бир даврда яшади...

...Буржуазия маданиятининг тараққиётига қадам қўйи[ли]ши дастлаб Англияда, кейин Францияда бошланди. Уларда маданият буюк суръатлар билан ўсаётганида Германияда ҳам буржуазия табақаси пайдо бўлган эди. Лекин у маҳалларда Германия ўз қўшниларига нисбатан ниҳоят даражада қолоқ бўлганидан немис буржуазиясининг ғояларини қувватловчи ва унга эргашувчи омма йўқ эди. Мамлакатдаги барбодлик, йўқсулиқ, маданиятсизликка барҳам бергудай бир куч бўлмагани каби, турмушнинг яхши томонга қараб ўзгаришига ҳам умид йўқ эди. Бу ахволга қарши амалий курашиш учун ўзида куч топа олмаган буржуазия[нинг] фикр ва санъат ахлари бутун кучларини адабиётга бера бошладилар. Бу орқада немис адабиёти мислсиз даражада гуллади, Германиянинг бутун адабий сиймолари бир вақт ичida деярлик юзага чиқдилар. Гёте билан Шиллер, файласуф Кант билан Фиҳте, Хегель – ҳаммалари бир даврнинг болалари эдилар...”

М.Султонмуродова мақоласининг каттагина қисми Гёте яшаган тарихий давр таҳлилига бағишлиган. Бунинг сабаби шундаки, биринчидан, бу мақола, янгишмасам, ўзбек матбуотида босилган Гёте ҳақидаги биринчи мақола эди. Иккинчидан, шу даврдаги ижтимоий-сиёсий шароит газета ва журнал таҳририятларидан ҳам, муаллифлардан ҳам нафақат Навоий, Бобур, балки Гёте сингари хорижий адиллар яшаган тарихий даврларни ҳам тавсифлашни, иложи бўлса, жиндек қоралаб ўтишни талаб қилган. Бундан ташқари, яна шу нарса ҳақиқатки, нафақат Навоий ва Бобур, балки Гёте сингари даҳолар ҳаётига теран назар ташлаган киши, бу даҳолар билан улар яшаган давр ўртасида муайян зиддият бўлганини кўрган. Бунинг боиси даҳоларнинг ўз даврларидан илғорлаб кетиб, шу даврларда канонлаштирилган тартибу ақидаларни парчалашга қаратилган ижодий фаолиятларидир.

Германиянинг тараққиётда бошқа Европа мамлакатларидан орқада қолганлиги илғор немисларни безовта қилмай қолмаган. Гёте 1749 йили шундай кишилардан бири Иоханн Каспар оиласида туғилган ва шу оила-

да дастлабки таълим ва тарбияни олган. Сўнгра Лейпциг (1765-1768) ва Страсбург (1770-1771) шахарларида таълим-тарбия олган. Шу йилларда ҳуқуқшуносликка қаттиқ берилган Гёте айни пайтда турли соҳалар, ҳатто тиббиёт билан ҳам қизикиб, шу соҳаларга оид маърузаларни тинглашни канда қилмаган. У ҳатто ўша вақтдаги университет таълимининг самародорлигига шубҳа билан қараб, “ҳақиқий билим”ни ахтариш дардига йўлиқкан. Унинг ўша йиллардаги қарашлари кейинчалик “Фауст” трагедияси ҳамда “Шеърият ва ҳақиқат” китобида ўз ифодасини топган.

Гёте Страсбургда таҳсил кўраётган кезларида немис файласуфи, ёзувчи ва адабиётшуноси Иоҳанн Хотфрид Гердер билан танишиб, унинг таъсирида “Бўрон ва ҳужум” номи билан машҳур бўлган ҳаракатда фаол қатнаша бошлайди. У 1775 йили герцог Карл Августнинг таклифи билан Веймарга бориб, маъмурий ишлар билан шуғулланади. Аммо тақдирнинг бу киноясини тушунгач, 1785 йили Карл Августнинг “қўғирчоқ” феодал давлатини тарк этиб, Италияга йўл олади. Ҳатто герцогнинг саъй-ҳаракати билан эришган дворянлик унвонидан ҳам воз кечиб, гулчилик корхонасида ишлаётган Христина Вильпиус деган оддий қизга уйланади. Бўлажак шоир француз инқилобини вазминлик билан кутиб олган бўлса-да, 1792 йил сентябррида Вальм бўсағасидаги жангдан кейин шу инқилобга бўлган муносабатини кескин ўзгартиради. Унинг ёзишича, “Шу куни, шу ерда умумжаҳон тарихининг янги даври бошланган эди”.

Веймар Гёте ва Ф.Шиллер ижодий дўстлигининг бешиги бўлди. Кўп ўтмай Европанинг барча гўшаларидан X.Хайне, У.Теккерей, А.Мицкевич, В.А.Жуковский сингари адабиёт ва санъат дарғалари ҳам Веймарга оқиб кела бошладилар. Гётенинг қайноқ ижодий ҳаёти ана шу илҳомбахш муҳитда кеча бошлади.

Гётедан бой адабий мерос қолган. Гётенинг билим ва қизиқиш доираси уфқисиз бўлганидек, адабий меросини ташкил этган асарлар ҳам тасвир этилган давр, мавзу, жанр, услубий йўналиш, бадиий (шеърий) шакллар нуқтаи назаридан ранг-баранг. Агар машҳур “Фауст”ни Гёте ижодининг чўққиси ҳисобласак, шу чўққи сари интилишимизда “Ёш Вертернинг изтироблари”, “Муҳаммад ҳакида қўшик”, “Гёц фон Берлихинген”, “Торквато Тассо”, “Ифигения Тавридда”, “Вильхельм Мейстернинг таҳсил йиллари” сингари ўнлаб қоя-асарлар эътиборимизни ўзининг мунаvvар қирралари билан жалб этади. Шундай асарлар орасида “Эгмонт” (1788) трагедияси ҳам бор.

“Эгмонт”ни ёзиш ғояси Гётенинг Франкфуртни тарк этиб, Веймарга кўчиб борган кезларида туғилган. Гёте 1775-1787 йилларда Италияда асар устида ишлаб, унга 1788 йилда сўнгги нуқта қўйган. “Эгмонт”дан аввал ёзилган “Гёц фон Берлихингер” драмаси конфликти негизида тарихий шароитнинг етилмаганлиги туфайли ҳалқ оммасини ўз ортидан эргаштира олмаган доҳий фожиаси ётган. Ҳудди шу конфликт “Эгмонт”нинг ҳам ғоявий йўналишини белгилаб берган. Аммо “Гёц”дан фарқли ўларок, қаҳрамоннинг ўлими бу асарда фаол ҳаракатга даъват янглиғ бонг уриб туради.

“Гёте, – деб ёзган эди шоир ижодининг рус тадқиқотчиси Н.Вильмонт, – “Эгмонт” мавзуига мурожаат этганида, яқин-орада қўзғолон бўлишига ишонганми? Ҳа ҳам, йўқ ҳам. У ўзининг сабрсиз юрагига қулоқ солганида – ишонган, теварак-атрофдаги воқеликка қараганда эса – йўқ. Ҳар ҳолда

“Эгмонт” Франкфуртда ҳам, Гётенинг Веймардалик даврида ҳам ёзib тугалланмаган. Бунинг боиси шундаки, яхши ҳаёт учун курашган кишининг қатл этилиши XVII асрда Германиядаги воқеаларнинг инқилобий ечимини тезлаштира олмас эди” (*Гёте. Эгмонт. Трагедия в шести действиях, 1958*).

Н.Вильмонтнинг юқоридаги сўзларида ҳақиқат зарралари йўқ эмас. Аммо унинг “Эгмонт” устидаги ижодий жараённинг чўзилиш сабаби ҳақидаги сўзларига қўшилиш қийин. Зеро, ҳеч бир ёзувчи, айниқса, Гёте сингари улуғ ижодкорлар “инқилобий воқеалар ечимини тезлаштириш учун” асар ёзишмаган ва, ишонаманки, бундан кейин ҳам ёзишмайди. Лекин шундай асарлар бўладики, улар жамият “дараҳт”ида ниш урган “куртак”ларнинг “яшил барглар”га айланишини тезлаштириб юборади.

Эгмонт – XVI асрда Нидерландияда яшаган тарихий шахс. У бутун ҳаёти ва фаолиятини Нидерландияни испан мустамлакачилари чангалидан халос қилиш ишига бағишлаган ва шу қутлуг йўлда ҳалок бўлган. Гётешунослар берган маълумотга қараганда, Гёте мазкур асарини ёзишда иезуит Страда ва холланд тарихчиси Эмануэль ван Матерннинг тарихий-мемуар асарларидан кенг фойдаланган. Шу манбалардан аён бўлишича, Гаврия шахзодаси граф Эгмонт Нидерландиянинг таникли дворянларидан бири бўлган. У Испания қиролига содик, ҳақиқий католик, ор-номусли ва олийжаноб инсон бўлганлиги туфайли асилзодалар ҳам, оддий кишилар ҳам уни хурмат қилишган. Унинг сиймосида сотқинни эмас, ватанпарвар саркардани кўришган. Реал Эгмонтнинг хотини ва 11 фарзанди бўлган. У қатл этилгач, хотини ва фарзандлари очлик, муҳтожлик ва доимий тазиқ остида яшашган. Гёте реал Эгмонтнинг шахси ва ҳаёти фактларига бир мунча эркин ёndoшиб, уни Нидерландиянинг озодлиги учун курашган, Клерхен сиймосида мазлум нидерланд ҳалқи билан бир тан, бир жон бўлишга интилган қаҳрамон даражасига кўтарган.

Асар мазмуни тўғрисида тасаввур ҳосил қилиш учун асосий қаҳрамонлар билан танишиш мақсадга мувофиқ. Булар: Нидерландия маликаси Маргарита Пармская – император Карл V нинг қизи, Филипп II нинг синглиси; герцог Альба ва унинг ўғли Фердинанд – испан саройидаги хушомадгўйликка нафрат билан қараган, оққўнгил йигит; муҳаббати Клерхен томонидан рад этилган шаҳарлик Бракенбург ва Клерхенning режали-риштали онаси. Шу қаҳрамонлар орасида Эгмонт исёнкорлик руҳи, кучли ва эҳтиросли табиати билан кескин ажralиб, томошабинларни ўзига ром қилиб келган. Ҳибсга олинган, романтик ният ва орзулари сароб бўлган Эгмонтнинг зиндандаги оташин монологи нафақат оддий томошабинлар, ҳатто буюк немис композитори Людвиг ван Бетховеннинг қалбини ҳам жунбишга келтирган. У ёзган музика Гёте асарига учкур қанот бағишлаган. “Эгмонт” шу икки даҳо илҳомининг меваси сифатида ханузга қадар жаҳон театрлари саҳналарини безаб келади.

Иккинчи жаҳон уруши хавфи остида яшаган совет давлати ёш авлодни, ҳалқни ватанпарварлик руҳида тарбиялашда “Эгмонт” трагедиясидан фойдаланишга қарор қилган. Исёнкорлик руҳи, зулмга қарши эрк ва хуррият учун кураш гояси билан суғорилган Гёте асари Катта театр саҳнасида ижро этилибгина қолмай, машҳур актёрлар ижросида моноспектакль сифатида ҳам собиқ совет республикаларини айланиб чиққан. Ўзбекистон радиоси ҳам бу маданий компаниядан четда турмади. Эгмонтнинг “Зин-

дон” саҳнасидағи монологи ҳамда Клерхеннинг икки қўшиғи ўзбек тилига таржима этилди ва Гётенинг ўлмас асари асосида радиоспектакль тайёрланаб, эфирга узатилди. Буни қарангки, “Эгмонт” трагедиясидаги “Зиндан” саҳнасини таржима қилиш Усмон Носирга, асардаги бош қаҳрамон образини яратиш эса Аброр Ҳидоятовга топширилган эди. Агар Эгмонтнинг эҳтироси билан Аброр Ҳидоятовнинг эҳтироси ва ижро манерасини кўз олдимизга келтирсан, радиорежиссёрнинг ботиний туйгусига тасаннолар айтишдан бошқа иложимиз қолмайди.

Афсуски, Аброр Ҳидоятов таржима матнини қўлига олиб, роль устида ишлай бошлаганида, қатағон гулхани гурлаб, асар таржимони Усмон Носир қамоққа олинади. Шундан кейин “Эгмонт” радиоспектакли эфирга чиқдими ё йўқми, бу ҳақда турлича фикрлар мавжуд.

Архив ҳужжатларидан маълум бўлишича, Ўзбекистон компартияси Марказий Комитетида масъул лавозимда ишлаган, айни пайтда республика Ёзувчилар уюшмасига раҳбарлик қилган Қурбон Берегин “Эгмонт”дан олинган парчани таржима қилишни Усмон Носирдан, уни радио микрофони олдида ўқишини эса Аброр Ҳидоятовдан илтимос қилган экан.

“Тахминан июль ойи ўрталари ёки август ойи бошларида, – деган Ўзбекистон радио комитети адабий-музиқий эшиттиришлари таҳририятида хизмат қилган ходималардан бири тергов ҷоғида, – мен “Эгмонт” мусиқали эшиттириш таржимони Усмон Носировнинг миллатчи сифатида қамоққа олинганини эшитиб қолдим. Мен шуни Пеккер (радио комитетидаги адабий-музиқали эшиттириш таҳририяти мудири, таникли санъатшунос олима Ян Борисович Пеккер – Н.К.)га айтиб, “Энди нима қиласиз?” деб сўрадим. Пеккер менга аниқ жавоб бермади. Орадан кўп вақт ўтмай, Ўзбекистон радио комитетига республикада хизмат кўрсатган артист Аброр Ҳидоятов кириб келди ва Пеккер ундан таржимоннинг аксилиңқилобчи, миллатчи Усмон Носиров бўлганини онгли равища яшириб, “Эгмонт”дан олинган монологни ёдлаш учун берди. Бу ҳам майли-я, Аброр Ҳидоятов: “Таржимани ким қилган?” деб сўраганида, [Пеккер] “Усмонов деган аллақандай киши”, – деб жавоб берди. Таржимоннинг миллатчи эканини яширди. Пеккер эса таржимон фамилиясини онгли равища бузди. Пеккер менга миллатчи Усмон Носиров асарини эфирга чиқариш учун Ўзбекистон компартияси Марказий Комитетидан рухсат олмоқчи эканлигини айтди.

Биламан, таржима учун 700 сўм тўланган. Шунга қарамай, ўзбек тилидаги адабий эшиттириш [таҳририяти] муҳаррири Ҳошимов Қосим ҳам “Эгмонт”ни ким таржима қилганини яшириб юрди. [Шундай кунларнинг бирида] Пеккер Ҳошимовга [“Эгмонт”ни] 200 сўмга [қайта] таржима қилиб беришни таклиф қилди. Шунда Ҳошимов хафа бўлиб, Пеккерга унинг, яъни Пеккернинг миллатчиларга бўлган муносабатини фош этажагини айтган. Мен буни Ҳошимовнинг ўз оғиздан эшитганман...”

Яна шу гувоҳнинг қайд этишича, “Эгмонт” радиоспектакли ўзбек маданиятининг юксалганини намойиш этувчи кўрсатгич сифатида Париж кўргазмасига юбориш учун тайёрланган.

Пеккернинг “жиноий иш”и бўйича терговга чақирилган гувоҳлардан яна бирининг кўрсатма беришича, у 1937 йил 31 июнда айнан шу радиоспектаклни эшитган. Унинг айтишича, сухандон радиоспектакль намойиш қилиниши олдидан бундай сўзларни айтганмиш: “Ўртоқ радиотингловчилар! Халқаро урушга қарши кунга бағишиланган концертни эътиборингизга ҳавола қиласиз. Шопеннинг “а-дур” этюдини тингланг. [Фортепианода]

артист Абрамова ижро этади”.

Сухандоннинг шу сўзларидан кейин “эшиттириш” бошланган эмиш.

Мазкур кўрсатмадаги “концерт”, “Шопен” сўзларига асосланиб шундай хulosага келиш мумкинки, гувоҳ ё “Эгмонт”ни бошқа бирор концерт билан аралаштириб юборган ёки шу концертдан кейин радиоспектакль хам эфирга узатилган.

Орадан бир қанча вақт ўтгач, 50-йилларда радио комитетига ишга келган таникли санъаткор Убай Бурҳон ташаббуси билан “Эгмонт” радиоспектакли қайта тайёрланиб, эфирга берилиди. Спектаклда Эгмонт монологини Бетховеннинг илоҳий мусиқаси фонида Убай Бурҳон қойилмақом қилиб ўқиди. Радиоспектакль радио тингловчилари ўргасида шундай катта муваффақият қозонганки, ҳатто 60-70 йилларда хам ижро этилиб, фаол яшашда давом этди.

Юқорида илк бор эълон қилинган тергов материаллари билан танишганимдан сўнг, менда Убай Бурҳон ижросидаги “Эгмонт” радиоспектакли ёзилган магнит лентасини топиш истаги туғилди. Бахтимга, бу асар Ўзбекистон радиосининг “олтин фонд”ида сақланаётган экан. Мен уни магнит лентасидан кўчириб олиб, Эгмонт монологи ва Клерхен кўшиқлари матнини қофозга туширдим. Бу монолог ва қўшиқлар таржимони Усмон Носир деган қатъий ишонч билан уларни “Ўзбекистон адабиёти ва санъати” газетасида эълон қилдим.

Мана, ўша матн:

## ЭГМОНТ

(Трагедиядан парча)

### Клерхен қўшиғи

(Мусиқа)

Янграп барабанлар  
Ҳам флейта кўйлар.  
Менинг ёрим отряд  
Олдида борар.

Эй, завқинг келар,  
Кўнглинг қўзголар.  
Эй, бўлса агар  
Дубулга, қалқон,  
Курашига чиқардим  
Мен ҳам бегумон.

Борардим ортидан  
Қолмай изма-из.  
Чекинди ёв. Олга –  
Борар полкимиз.

Қандай яхии ботир,  
Зўр жсангчи бўлмоқ,  
Зўр жсангчи бўлмоқ...

Э г м о н т (*ёлғиз*). Қадрдон дўстим! Вафоли уйқу! Бошқа дўстларим каби наҳотки сен ҳам мени тарк этдинг! Сен ахир эркин ўйларимга ором берар, гўзал ва сўнмас бир севги чамбари каби ардоқлар эдинг. Жанглар сурони ва дунё ташвишлари остида мен, бир бегуноҳ гўдак сингари, оғушингда тинч ва енгил нафас олар эдим. Бўрон дараҳт бутоқлари ва япроқлари орасидан эсиб ўтиб, унинг танасини силкитса ҳам ўзаги омон қолади-ку! Нечун мен қалдирамоқдаман? Дадил ва содик қалбимни ғалаёнга солаётган нима? Биламан: бу – қотил болтаси! У менинг ҳаёт илдизларимни кемирмоқчи бўлади. Қоматим расо турса ҳам, ичдан қалтироқ сезаёттирман. Нима учун сен, энг қўрқинчли хавф-хатарларни совун қўпилклариdek учирив юборган киши, сенга қарши келаётган даҳшатларни маҳв этиб ташлаёлмайсан? Ахир сен ўлимнинг ҳар қандай даҳшатлари ичида, ҳаётнинг оддий ташвишлари ичида яшагандек баҳузур яшардинг-ку!.. Йўқ. Мени даҳшатга соглан ўлим эмас. Бу мард юрак ногиҳон ўлим билан олишишга ҳар қачон тайёр. Гўрга ўхшаш бу зиндан қўрқоқлар назарида ҳам, ботирлар назарида ҳам жирканч қўринади. Давлат кенгашида князлар ҳал қилиниши жуда осон бўлган масалалар устида узундан-узоқ музокара юритганларида, юмшоқ креслода ўтириб, уларни тинглаш накадар оғир эди менга! Узилмас залнинг деворлари остида мен ўзимни худди бўғилгандек хис қиласдим. Ўшанда мен имкон борича у ердан тезроқ қочишга шошилар ва отга минар, соф ҳаводан тўйиб-тўйиб нафас олиш учун олисларга, эркинлик қўйнига, қирларга чопардим. У бепоён далаларда табиат ўзининг ер тагидан чиққан бутун ноз-неъматларини инъом этар ва осмон ўз юлдузлари билан оламни ёритарди. У ерларда биз она ернинг фарзандлари каби унинг оғушида худди паҳлавонларга ўхшаб юксакларга баланд парвоз қилиш учун яна кучлироқ интилардик. Биз у ерда бутун инсоний хис-туйғуларни сезардик, қонларимизда бутун инсоний интилишлар алансаси ёнар, у ерда ёш овчининг кўнглида олға интилиш, зафар ташналиги, ўз куч-қудратини кўрсатиш орзуси жўш уради.

Ох, бу фақат хаёлот, холос. Кўп замонлар молик бўлганим саодатнинг сохта хаёлоти, холос! Бу маккор тақдир сени қаёққа ундар? Ёки сени ҳеч қачон қўрқита олмаган ўлимни қуёш чехрасига келтириш ўрнига гўр азобидан дарак бермоқчими? Бу тош деворлар накадар бадбўй ҳид сочадилар менга! Ҳаётим сўнаёттир. Тобутга ўхшаш бу уйқу тўшагига бош қўйиш накадар даҳшатли...

Ох, ҳасрат, қайғу! Мени бевақт ўлимга маҳкум этмоқчи бўлган ҳасрат, тўхта, қўй мени!.. Қачондан бери Эгмонт оламда бутунлай танҳо қолди? Сени эзаётган нарса баҳт эмас, шубҳалар, шубҳалар эзаётир... Наҳотки, сен бутун умр ишонганинг қиролнинг адолати ёки маликанинг муҳаббатсимон дўстлиги сени қоронғи сўқмоқда ёлғиз қолдириб, тун қўйнида фойиб бўлиб кетди? Наҳотки, шаҳзода Оранский дўстларга бош бўлиб, мени озод этишга журъят этолмаса? Наҳотки, ҳалқ қўтарилемаса? Наҳотки, қудратли куч бўлиб ўз қадрдон дўстига нажот бермаса?

Эй, мени ўз исканжасига олган деворлар! Ўз қалбларини қалқон қилиб мен учун ёрдамга келаётганларнинг йўлини тўсмангиз! Авваллари ме-

нинг кўзларимдан эмиб олганлари у жасорат оловлари энди уларнинг қалбларидан яна менинг қалбимга қуюлсин. Ҳа, ҳа! Улар минг-минг бўлиб кўзғолаётирлар! Улар менга мадад берадилар! Уларнинг ўтинч нидолари кўкка учмоқда, улар мўъжиза истайдилар, улар найза ва қилич олажаклар. Уларнинг зарбалари остида дарвозалар қулааб тушади. Кишанлар парчаланади, деворлар йиқилади ва Эгмонт ёришаётган тонг шуълалари остида озодлик қаршисига пешвуз чиқади. О, қанча-қанча таниш юзлар шодиёналиқ билан кутиб оулурлар мени!..

## Клерхен қўшиғи

(*Mусиқа*)

*Шодлик ва қайгу  
Фикринг банд этар.  
Ёрим чарчаб, нафас  
Кучланар, қийнар.*

*Фақат муҳаббат  
Бахту баҳор билан,  
Севги-муҳаббат...*

*Азоб тугаб, уни  
Кучади шафқат  
Ва баҳтиёрлик.*

Э г м о н т. Ҳаммаси тугади. Ҳаммаси ҳал. Нажот йўқ. Турмадан чиқишига ҳам йўл йўқ. Жаллодлар бостириб кирадилар. Мен эса бошимни болта остига қўяман ва шу турмада мангу уйқуга кетаман. Мен қўлда қилич билан эмас, шуҳратли жангда эмас, Гравелин жангидага ўзини жангга ташлаган ва орқасидан бутун қаҳрамонлар полкини етаклаб борувчи қаҳрамон сифатида эмас, турмада ҳаёт билан видолашмакдаман. Энди шу кора турма деворлари остида, шу болта остида танҳо жон бераман.

Ҳаммаси тугади. Ҳаммаси ҳал. Нима бўлди менга? Нима учун кўнглимда осойишталиқ? Бу қандай тоза рух? Менга ҳеч нарса қўрқинчли эмас. Мен танҳо эмасман. Эй менинг дўстларим, жонажон халқим, ўртоқларим! Мен сиз учун яшадим ва менинг руҳим абадий сиз билан бирга. Қалбим тўла нур ҳам ором. Мен ухламоқ истайман ва ишонаманки... Эй, жаллод, мени уйқудан уйғотмасданоқ...

Кел, эй менинг тинч оромим! Мен ухламоқ истайман ва ишонаманки, ухлайман. Ум-м... жаллод мени уйқудан уйғотмасданоқ умримга хотима бера қолсайди. (*Мусиқа*.) Кел, эй менинг тинч оромим! Кел, ҳаёт ва ўлим хақидаги бутун тасаввурларни бир-бирига қориштириб юбор. Шодлик ва ўлимни ҳам бир-бирига қўш. Сен ҳам кел, эй менинг севгилим! Кел, эй менинг ягона Кларам, лабларимга лаб қўйиб, сўнгги видолашув бўсасини бер. Кел, тинч оромим, ҳаётимнинг сўнгги ороми, кел. (*Мусиқа*.)

Мен ажойиб лавҳани кўрдим! Қуёш нурига бурканган озодлик тимсолини кўрдим ва унинг орази, бу – эрк орази, севгилим Кларанинг оразидек табассум қилди менга. Сизлар – менинг қалбимдан жой олган эрк ва

севгилим, айтинг, қайси бирингизнинг севгингиз кучли экан?.. Бироқ мен сўнгида кўрдимки, Кларанинг табассуми озодлик қайғуси билан ва қон офтоб қиёфасида равшан кўринди. Бу қон эрк оёғи остида тупроқни қип-қизил қилиб бўяди. “Бу, сенинг қонинг, сенинг, Эгмонт! Бу, кўпларнинг қони, эрк севувчиларнинг қони!” – деган садо янгради. Бу қон беҳуда тўкилмади. Бу қон озодлик учун тўкилган қутлуғ қондир.

Сенинг қонинг табаррук бўлади, Эгмонт! Кўзғол, ҳалқим, қўзғол, сени зафар кутади. Сен денгиздек улуғвор ҳалксан, денгиздек қурдатли ва қўрқинчлисан. Сен денгиз тўғони каби бутун тўсиқларни парчалаб ташлайсан.

О, жонажон шахрим, душман сенинг деворларингга яқинлашмоқда. Ҳалқим, гражданлар, дўстларим, нега ҳозир сиз билан бирга эмасман? Аммо руҳим сиз билан бирга. Яна мардон бўлинг, ўлимдан қўрқманг! Озодлик учун, ўлмас мұхаббатга эга бўлган ҳамма одамлар учун ўлим йўқ! Демак, озодлик учун курашингиз! Бу турмада тинч ва шодлик билан жон бераётган мен каби сиз ҳам жангда шодлик билан жон беринг.

Жаллод, қани кир, ўз ишингни тугат! Эй, сиз, ёлланган солдатлар, сиз жанг майдонида керак эмассиз. Менинг олдимга бостириб кирсангиз ҳам, ўз сафларингизни оширангиз ҳам, барибир, менинг олдимда ожиз қоласиз, мен энди икки умр билан яшайман. Бирини сиз оласиз, аммо иккинчисини сизга бермайман. Иккинчиси – менинг умрим. Бу умр ҳалқ билан озодликда яшайди. (*Тантанали мусиқа.*)

Эгмонт-Убай Бурҳоннинг магнит лентасига ёзилган сўзлари шулардан-гина иборат.

Мен “Эгмонт” трагедиясининг ўзбек тилига Усмон Носир қалами билан таржима қилинган бу лавҳасини ўзлон қилганимдан мамнун бўлиб юрдим. Орадан бир мунча вақт ўтгач, бу таржима ҳам, мендаги мамнуният туйғуси ҳам бориб-бориб унтилди. Аммо...

Аммо орадан беш-олти йил ўтгач, эски газета тахламларини варақлаётганимда, кўзим дафъатан Миртемирнинг “Эгмонт” сарлавҳали унтилган мақоласига тушиб қолди. Мақола хассос шоир ва таржимоннинг бундай сўзлари билан бошланган эди:

“Эгмонт” Гётенинг революцион трагедиясидир. У бундан бир ярим аср илгари ёзилишига қарамай, энг илғор гуманизм ва революцион пафоси билан бизга замондош асарлардан саналади. Буюк Гёте “Эгмонт” асарида нидерланд ҳалқининг XVI аср испан абсолютизмига қарши озодлик курашини ўлмас образларда ва юксак драматизмда тасвирлагандир. Эгмонт – озодлик учун курашган нидерланд ҳалқининг етакчиси – қаҳрамон сифатида берилган. Бу тарихий ҳақиқат бўлиб, Гёте қаламида хеч ўлмас бир асар, драматургиянинг класик намунаси бўлиб қолган. “Эгмонт”га буюк бастакор (*композитор*) Бетховен мусиқа ёзган. Бетховен мусиқаси асарни яна юкори поғонага кўтарган, асарда қаҳрамонлик руҳи тағин ҳам кучайган, бадиий қиммати яна ҳам ортган» (*Миртемир. “Эгмонт”, “Қизил Ўзбекистон” газетаси 1940 йил 14 ноябрь*).

Мақоладан маълум бўлишича, 1937-1938 йиллар бўрони тиниб, 1940 йилнинг совуқ кузи бошланган айёmdа Ўзбекистон радио комитети яна Гётенинг ўлмас асарига мурожаат этиб, “Эгмонт” радиоспектаклини тайёрлаб, радио тингловчиларига армуғон қилган. Германиянинг сўнгги ҳарбий техника билан куролланган қўшинлари СССР чегарасига яқинлашиб,

Иккинчи жаҳон урушининг қонли нафаси келаётган кунларда бу асарнинг эфирга чиқарилиши тасодифий эмас эди. Совет давлати 37-йил қилкўпригидан омон-эсон чиқкан фуқароларини Эгмонтнинг: “Эй менинг дўстларим, жонажон халқим, ўртоқларим! Мен сиз учун яшадим ва менинг руҳим абадий сиз билан бирга... Қўзғол, халқим, қўзғол, сени зафар кутади. Сен денгиздек улуғвор халқсан, денгиздек қудратли ва қўрқинчлисан. Сен дengиз тўғони каби бутун тўсиқларни парчалаб ташлайсан...”, – деган сўзлари билан яқинлашиб келаётган урушга тайёrlаши, унда ватанпарварлик туйғуларини қайта уйғотиши лозим эди. Шунинг учун ҳам радио комитетининг адабий-музиқий эшиттиришлар таҳририятидаги ходимларнинг тиллари 37-йилда куйганига қарамай, улар “Эгмонт” устида ишлаб, уни халққа тақдим қилганлар.

Миртемирнинг ёзишича, Эгмонт ролини радиоспектаклда “артист М.Канадов ижро этган, асар таржимаси устида эса М.Шайхзода “қунт ва маҳорат билан” ишлаган.

Миртемирнинг бу мақоласини ўқиганимдан сўнг, юқорида эълон қилинган лавҳанинг Усмон Носир қаламига мансублиги масаласи менда шубҳа уйғота бошлади. Таржимани қайта-қайта ўқиб чиқдим. Ўқиганим сайин Усмон Носир руҳи ундан аста-секин узоклашаётгандек бўлди ва охири мен билан хайрлашмасдан гойиб бўлди-қолди...

1937 йилда “Эгмонт” радиоспектаклининг тайёрланишига бош-кош бўлган Я.Б.Пеккер қамоққа олинганидан, таҳририят ходимлари эса кетма-кет терговга чақирилганларидан кейин Усмон Носир таржимасининг омон қолиши амримахол эди. Унинг йиртиб йўқотилган бўлиши шубҳасиз. Бинобарин, Убай Бурҳон ижросидаги Эгмонт монологининг таржимони Усмон Носир эмас!.. У ҳолда 50-йилларнинг ўрталарида эфирга чиқкан “Эгмонт”ни ким таржима қилган? Мақсад Шайхзодами? Ахир у ҳам 50-йиллар аввалида қатағонга учраган, Маяковскийнинг Шайхзода таржимасида мактаб дарсликлариға кирган асрлари бекор қилиниб, уларни бошқа шоирлар таржима қилган эдилар-ку?! Убай Бурҳоннинг шундай хавфли шароитда Шайхзода таржимасини топиб, уни эфирга олиб чиқиши ақл бовар қилмайдиган ҳодиса эмасми?! Йўқ, Убай Бурҳон Шайхзода таржимасадан ҳам фойдаланмаган. Балки “Эгмонт” трагедиясидан радиоспектакль учун танлаб олинган лавҳани Убай Бурҳоннинг ўзи таржима қилгандир...

Менимча, шундай. Сиз-чи, сиз қандай фикрдасиз?..



## ХОРАЗМ ШЕЪРИЯТИНИНГ ШАМСИ

Бугун хоразмлик адабиёт муҳлислари воҳа ижодкорларининг янги авлоди қаламига мансуб асарларни алоҳида эътибор ва завқ-шавқ билан мутолаа қилиб, эртанди адабий кунга умид билан қарамоқдалар. Чунки устоз Матназар Абдулҳакимдан кейин қуий Амударё соҳиблари адабиётига Устюртнинг қаҳри қаттиқ қишининг нафаси етиб, бу ерда совуқ бир ҳувиллаш ҳумронлик қилаётгандай эди.

Шоура Шамс бугун Хоразм адабиётчилиги йўқотаётган ўша жонбахш руҳни қайта тирилтираётган ижодкорлардан бири. Шоиранинг, айниқса, газал жанридаги изланишилари бирчани бирдай тўлқинлантироқда. “Навоийлар ижод қилган тилда ғазал битиши – жасорат. Бунинг устига ўзбек шеъриятида шаклий изланишилар ниҳоясига етмаган, айрим ижодкорлар ўз муваффақиятини турфа шакллардан ахтараётган, муваффақиятсизлигини эса шеъриятилизда шаклий турғунлик, Маҳмуд Кошгарийдан бери келаётган бармоқ тизими-ю, Рабғузийдан бери урф бўлган аруздан кўраётган бир пайтда Шоура Шамс “эски танбур”да ҳам бетакрор оҳанглар борлигини кўрсатиб бера олди”, дейди филология фанлари номзоди Абдулла Ўрозбоев.

Ҳақиқатан ҳам Шоура Шамснинг ғазаллари киши руҳиятини хоразмча айтганди, “бу дунёning ўткинчи ғалла-ғашларидан” озод этиб, тубсиз осмонларга олиб кета олади. Бу эса ҳақиқий истеъдод соҳибларигагина насиб этадиган қудратдир.

Шуҳрат МАТКАРИМ,  
ёзувчи

### Шоура ШАМС

(1978 йилда туғилган)

Шоура Шамс (Қаландарова Шоура Қадамбаевна) Хоразм вилоятида туғилган. 1997 – 2001 йилларда УрДУнинг “Ўзбек филологияси” факультетида таҳсил олган.

“Орзулар қояси”(2003) номли илк шеърий китоби нашр этилган. 2012 йилда “Навқирон наволар” жамоа тўпламида, Республика ва вилоятнинг нуфузли нашрларида шеърлари мунтазам ёритиб келинади.

Ҳозирги кунда Шоура Хоразм вилояти Янгиариқ тумани 11-сон умумтаълим мактабида она тили ва адабиёт муаллими сифатида фаолият кўрсатиб келмоқда.

### ЗУЛАЙХО ҚИШ

Хазонлар саҳнидан аста ўзин кўрсатди зебо қиши,  
Виқору ҳам ғурур бирла қадам ташлар бу лайло қиши.

*Тутиб бөгү адирларни узун соchlар шамоликим,  
Қошин уйса кўзида то булутлар гоҳи пайдо қиши.*

*Ажаб эрмаски эгнига кумушранг тўнини илса,  
Этагин остида сокин кетар уйқуга дунё – қиши.*

*Қамашгай кўз самода сел каби нур қатрасин кўргач,  
Тўкар олам уза дурру жавоҳир ёши гёё қиши.*

*Довул лашкарини ёйиб, жаҳонни қилса-да тафтии,  
Топилмас бўлмаган бунда анга ошиқу шайдо, қиши.*

*Демиишларки, жаҳон ризқи келур ҳимматларинг бирла,  
Тўкиб борини бермасанг замин бўлгуси расво, қиши.*

*Сен, эй Шоира, қишининг зийнатин қўзга тавоғ айла,  
Диёрим узра хуши кўрдим, кел, эй ҳусни зулайҳо қиши.*

### СЕНСИЗИН...

*Сенсизин қолдиргунингча, ўлдириб кетгил мани,  
Барибир олгай хазон бөгбони йўқ ҳар гунчани.*

*Нечаким нур сочмасин бу хонумонимга қуёши,  
Сояи ғамдин чиқолмас беумидлар маскани.*

*Очилар турфа гулу райҳон чаманин тўлдириб,  
Андалиб билмас вафо гар хордир ул гулишани.*

*Боқки майдонинг аро ким дўст эрур, бу чинмикан,  
Чорасизликда ики кўз бир-бирининг душмани.*

*То висолинг ёр бу қалбимга сифотинг куйладим,  
Мулки сўздин дилда топдим шуълаи ранг равзани.*

*Бўлмагай сен бирла вайрон ишиқ ила обод кўнгил,  
Кўзларинг бирла бинодур кўзларимнинг равшани.*

*Шоира булбулга сўз бермас, агар берсанг умид,  
Чун муҳаббатдан яралмишидир вужудин хирмани.*

### ЭЙ ДИЛИ ПОК...

*Тунинг осуда бўлсин, эй дили пок,  
Бу тун бедор хаёлинг бирла ғамнок.*

*Шикаста гунчадек дил ўз яқосин  
Жафо тийги билаким қилди чок-чок.*

Етиб оҳим фалак тоқини тутди,  
Танимдек титради теграмда афлок.

Само тўқди-ю аиқини паришон,  
Ювиб боғлар юзини айлади пок.

Нетай, дардинг кўзимга бермас ором,  
Ҳаловат билмагай ишқингда идрок.

Кўнгулда ўт, кўзимда сув, гамингдан  
Ҳаволар оҳиму, бошим уза хок.

Дема Шоира захмига шифо йўқ,  
Давойин истасанг ул васли тарёк.

## КЎЗ

Барг уза ёмғир мисоли сувда кўз,      Бир замонлар баҳтидан масрур эди,  
Фурқатингдин йўл қараб қайгуда кўз.      Нозу гамза кўргузиб кулгууда кўз.

Билмадим қилгаймикан энди насиб,      Чехраи ракшинда чўх равшан бўлиб,  
Боққали кўзинг каби кўзгууда кўз.      Ёритарди тунларинг ўтруда кўз.

Демакум қилди мунаввар тунни ул,  
Шамсдек ёрқин эди ёғдууда кўз.

Келмадинг согинч аро ул захмдин  
Ёшини тўқди, бироқ беҳуда кўз.

Шоира, гамлар қачон барҳам топар?!  
Йўқса мангу қолсаким уйқуда кўз.

## ВИСОЛИН ИСТАДИМ...

Висолин истадим, ул моҳ келди,  
Дилим дарди била огоҳ келди.

Ғамида гамгин эрдим, шавқида ўт,  
Шарорим тобидан юз оҳ келди.

Мену тун иккимиз қайгууда эрдик,  
Қумуш поёндоз узра шоҳ келди.

Кўйида музтарибим охир айлаб  
Нечукким ёдлади, ногоҳ келди.

Мунаввар айлади оқшиом кўзини,  
Кўриб кўзимга шабнам гоҳ келди.

Дудогин нўшини ичмакдин аввал,  
Тилим зикрида “Бисмиллоҳ” келди.

Изидан ахтари мирриҳ дуолаб,  
Тузуб карвон сафин маддоҳ келди.

Фано аҳли, кўрингким Шоиранинг  
Муродин ҳосили, валлоҳ, келди.

## ЭЙ ҒАНИЙ...

*Эй ғаний, севдим сани – бўлдим адо, деб алдагил,  
Доми ишқинга кўнгулдири мубтало деб, алдагил.*

*Майли элга айтгил чин сўзларинг борини, лек  
Ман дили озурданни жоним фидо, деб алдагил.*

*Васф қил: Сочинг қаро, қошинг қаро, кўзинг қаро,  
Бу қаролар дардида кундуз қаро, деб алдагил.*

*Илтифотинг неча дилбарга қилибсан сарфароз,  
Бир қалом-ла барини бўлди хато, деб алдагил.*

*Телба бўлдим дам-бадам оҳу фигоним кўкдадир,  
Ростликни қўйгил эмди, бир бало деб алдагил.*

*Раҳм этиб қўйсанг на бўлгай бир нафас бошимга қўл,  
Чун қазоим олдидан бу не азо, деб алдагил.*

*Шоира ўлсин ишониб токи ёлғон ишқинга,  
Даҳр аро то муандин ортиқ йўқ нидо, деб алдагил.*

## ҲОЛАТИМ ЭЛГА АЁН

*Ҳолатим элга аён, сенга аёномасдир нега,  
Дилда боринг мен учун тилда баёномасдир нега?*

*Ишқинг озорида битдим номалар ҳасрат ила,  
Зарра меҳру шафқатинг ўти уйонмасдир нега?*

*Жон била кирди танимга фурқатинг савдолари,  
Чиқса ҳам жон дард ила агёр инонмасдир нега?*

*Лаъли ёдинг айлади заъфимни ҳар недан зарир,  
Неча йил ўтди сенингсиз, ёд ўтонмасдур нега?*

*Мен жунун водийси узраким макон топдим, ажаб,  
Бу равоқ дайр итига ҳам ошиёномасдир нега?*

*Эй, фалак ойинасига қоними сочган ҳабиб,  
Уфқа тутдинг бағрихуним, улки қонмасдур нега?*

*Ўйлама Шоиранинг бу афғонин захми йўқ,  
Ашқини тўқди агар ким, ўтда ёнмасдир нега?*

## ТУШМИДИ ЁКИ ХАЁЛ

Тушимиди ёки хаёл, мен бирла эрдинг, эй Ҳилол,  
Бог ичида икки печак диллашиб даври висол.

Ишиқ ариғидан сув ичиб, ари тоқича ўсиб,  
То кавокиб сайридан қайтур муроди кўп маҳол.

Ман ҳикоят айладим ҳажсру фироқинг ёдини,  
Ошкор этдим қошингда хаста-ю заифи ҳол.

Васл завқи бирла сен сармаст ўлуб кулдинг, ажаб,  
Ҳар ниҳонинг фоши этиб қўйди лабинг устида хол.

Шамс – соқий, ошигинги, рашидин тонг жомига,  
Ҳар сафар тўлдирди дилхун оҳ чекиб майи ол.

Кўрмаган олам бақоси ҳам мунингдек вақт хуши,  
Сўз деёлмай шоири озди қалам олдида нол.

Шоира, не баҳт эди, уйғонмасанг тушибин ҳамон,  
Бўлмас эрди бу каби чин орзунг поймол.

## ОСОН ЭМАС

Лафз аро ҳуснинг сифотин айламак осон эмас,  
Сўзни ҳам ўрнини билмай қўйгудек майдон эмас.

Гар аruz арзига эксан дарду шавқим гулларин,  
Чехраи олингда бир кулгич каби хандон эмас.

Кипригум гардини артиб тушиса минг шабнам суйи,  
Пойинг ўпган хўйдек ул дур мисол маржон эмас.

Журъатим етмаски васлинг мақсадин этсан хаёл,  
Не ажабким, ишиқ мақсуд этмаган инсон эмас.

Оразинг муштоқидурман ташнадек кўҳан аро,  
Маствор ҳолим манинг бу ишиқда мезон эмас.

Эй қуёш, кетсанг мисоли уфқдек алвон кўзим,  
Ошигинг кўп, ҳеч бири мендек юраги қон эмас.

Шоира, ашъор бит, ҳар сўзинга сайқал бериб,  
Тер ила ҳар мазраин тўлдирмаган дехқон эмас.

## ЛАБИНГДАН ҚАТРА МАЙ

*Лабингдан қатра май сўрдим, фирогинг узра қон тутдинг,  
Кўзинг кўрсатмайин ҳар дам кўзим ёшин равон тутдинг.*

*Кечиб кетдим ҳузурингга бу боғу бўстонлардин,  
Узоринг ошкор этмай, жамолингни ниҳон тутдинг.*

*Висолинг истаган қалбим тешар ҳар лаҳза ҳажер ўқи,  
Даги новак экан ишқинг, кўнгулни чин нишон тутдинг.*

*Синиб ҳар устухонимдин тўқулдим пойинга ушиоғ,  
Ёғургач Бесутун тошин, нечун бошим омон тутдинг?*

*Ватан истаб қаро гил остига мангу кетай десам,  
Жафойинг чекдуургаким қулинг бехонумон тутдинг.*

*Таманно айламак ҳам шунчалик кўрку фазилатми,  
Ажаб, гамзанг била дилга дам отаи, дам жинон тутдинг.*

*Агарчи Шоира васлига зарра ҳожатинг йўқдур,  
Нетай, яхшим, муҳаббат ўйлида они ямон тутдинг.*

## БАҲС

- *Не, дедим, кўнглинг қатида? Не бўларди, ғам!* – деди.
- *Не сабаб кўзинг қизарди? Ашк ила ул нам, деди.*
  
- *Бу забунликдан дилингга захм етгайдур, десам,*
- *Бу балолардан дилимни, кош, қутқарсан, деди.*
  
- *Кеч, дедим, – бу ёр, бир кун бошинга етгувчиидир,*
- *Умр битгунча тўларми ишқ паймонам, деди.*
  
- *Ул жафожёй бевафодур, ҳеч назар қилмас, десам,*
- *Бир куни тош қалбин эритгайки бир бўсам, деди.*
  
- *Шубҳасиз, бунча саботни кўрмаган олам, дедим,*
- *Нола қилма, Лайлисин деб куйди Мажнун ҳам, деди.*
  
- *Бу жунунликдан фанода роҳатинг бўлмас, десам,*
- *Жовидон лаззатлари олдида бу ҳам кам, деди.*
  
- *Шоира, бас қил, аниг отини юз бора дема,*
- *Ғофил ўлма, ҳамд учун ҳар он ганимат дам, деди.*

## ЗУЛФИНГ

Қошингни ўпар кулола зулфинг,  
Шамиодингга тенг шалола зулфинг.

Тун қўйнида эрка моҳтобинг  
Хуснини қилур ҳавола зулфинг.

Кўз тушибди-ю бекарор ўлубман,  
Партаев юзинг узра хола зулфинг.

Бир дам фирогинг балоси етса,  
Тўлдирди кўзимга жола зулфинг.

Оҳим фалак тоқини тутубдур,  
Чектириди фигону нола зулфинг.

Мастона бу даҳр боғда соқий  
Лолани қилур пиёла зулфинг.

Шарҳингни тилаб қалам йўнибман,  
Шоирага чин рисола – зулфинг.

## ШАБНАМЛАР

Хаёлинг бирла тун олам кўзида ноб шабнамлар,  
Фироқу ҳажсру дардингнинг гувоҳи об шабнамлар.

Дема, ҳар хун қизил ўлгай юрак даргоҳидан чиқса,  
Кўнгил хиргоҳидан ул салсабил хуноб шабнамлар.

Кумиб зулмат аро шуъла дилин ёрутқали лаҳза,  
Висол уммиди-ла то тонг қадар бехоб шабнамлар.

Етар деб бир куни пойинг жаҳонни покрав қилди,  
Қаро мужсгон аро туиган ажисб иноноб шабнамлар.

Сано айлаб дегай отинг гулистан саждагоҳида,  
Нафис гулбаргини қилгай ҳамон меҳроб шабнамлар.

Хазиндур булбули шайдо бу янглиг хор даҳр ичра,  
Фигону нолалардан ютгай ул зардоб шабнамлар.

Магар келмас эсанг, келгай хазон саркори бу дилга,  
Нечук саргармасин Шоира, юзда тоб шабнамлар.

## КОШКИ

*Манзилим охир бўлиб, ёнингда бўлсам, кошки,  
Тоабадлиг васли давронингда бўлсам, кошки.*

*Ташна онингда тиёланг узра чойинг бўлсаму,  
Лабларинг хўллаб ўтиб, жонингда бўлсам, кошки.*

*Майли бир булбул каби солсанг қафас ичра мени,  
“Гаҳ” десанг илкингда, фармонингда бўлсам, кошки.*

*Бўлса-ю бир мўъжиза, эй дил, севиб қолсанг мени,  
Истасанг-у, чаими гирёнингда бўлсам, кошки.*

*Бандаман ҳажру фироқинг даррасига мубтало,  
Бир куни, не тонгки, афғонингда бўлсам, кошки.*

*Не ажаб, қалбинг аро сен ҳам муҳаббат топсангу,  
Байт битсанг, сирру пинҳонингда бўлсам, кошки.*

*Шоира, узмас умидин тандадир жон қатраси,  
Чун гаҳи мужгони пайконингда бўлсам, кошки.*

## БИЛМАДИНГ

*Эй малойик сарвари, дил санда эрди, билмадинг,  
Гул юзуңг деб икки кўз гулишанда эрди, билмадинг.*

*Ошуриб нарғиз кўзинг нозини, кўнгил ўйнадинг,  
На кўнгил, жон ҳам қўлингда банда эрди, билмадинг.*

*Ол яногинг ёдида ороми йўқдир кўзларим,  
Улки ёқут косага баҳишанда эрди, билмадинг.*

*Моҳ кўргач ҳолатим, ҳар кеча ойинанг уза,  
Номайи ишиқим ўқиб, гўянда эрди, билмадинг.*

*Шоира кўзини чехранг шамси этмиши мубтало,  
То ҳануз чехранг аро гулханда эрди, билмадинг.*

## УЧРАДИ

*Қайдаки дилсизни кўрдим, таъби хуррам учради,  
Ман дилим топган кунимдан кўзима нам учради.*

*Телба кўнглим бўлди ҳар ширин каломнинг бандаси,  
Найлайин, лафз ортида сидқу вафо кам учради.*

Орзу қилдим сўз аҳли мажлисин роҳатларин,  
Мен учун анжум эшигин қулфи маҳкам учради.

Даҳр бозидан ҳаловат истадим бир лаҳзага,  
Ғамда шоду, шодумонлик ичра мотам учради.

Ташна-ю беморлигда ишқ топдим, бўйлаки,  
Лайли лаби нўшидин Мажнунга малҳам учради.

Суратинг чизмии мусаввир кафтидан гаҳ томди нам,  
Во ажаб, гул барги узра тоза шабнам учради.

Шоира, ҳар давру даврон муддаосин англағил,  
Чун, бу майхонада май таъмин билар кам учради.

## ОВВОРА ҚИЛДИНГ

Мани ишқинг била оввора қилдинг,  
Кўзим ёшини ҳам фаввора қилдинг.

Сочинг торидан оздур балки умрим,  
Анинг борини ҳам тим қора қилдинг.

Таним Жайҳун каби тўлғонди оқишом,  
Кўзимни уфқадек хунбора қилдинг.

Умид этдим висолга бекаликни,  
Ва лекин телба-ю афгора қилдинг.

Қара, Шоира, парво қилмагай ул,  
Минг оҳу нолани бекора қилдинг.

## ДЕСАНГ ОТИМ

Десанг отим, тилинг ҳалвога дўнгай,  
Кўзинг чақнаб, гўзал Зуҳроға дўнгай.

Мани деб томчи ёшинг сувга туиса,  
Балиқлар тангаси тиллога дўнгай.

Сенингсиз гулъузорим заъфарондур,  
Менингсиз қоматинг дутога дўнгай.

Фанодан истама кўнглинг овунчин,  
Ки гилдан чиққани туфрога дўнгай.

Муҳаббат қадрига етмас киши гар,  
Садоқат, Шоира, анқога дўнгай.

---

# Иброҳим ҒАФУРОВ



Ҳамидулла БОЛТАБОЕВ

## ХАЁТДАН ТАШҚАРИДАГИ ҲАЁТ

Шундай бўлиши мумкинми?

Ер юзида ҳаёт – умр борки, инсон ундан ташқарида яшай олмайди. Ер ости ва фазодаги ҳаётни гапирмаса ҳам бўлади. Бироқ осмон ва Ер орасидаги оддий турмушдан ташқарига чиқиб, унинг катта-кичик ҳаётий ташвишларини унутиб, бошқа ҳаёт билан яшаётганлар бордай.

Таниқли адид ИброҳимFaфуров ёзади:

– Ҳамма нарса ҳаётнинг ичida, ҳаётнинг ўзида. Даврон тўхтovсиз айланиб туради. Бир нимадан бошқа нимани... иккинчи, учинчи... чексиз нималарни яратиб туради. Ҳаммаси ҳаётнинг ичida. Унинг оқимида.

– Суврат чизиб битирган эдим. Ҳаётдан ташқаридаги ҳаётни чизган эдим...

Йигит узоқ ўйланиб қолди. У ҳеч ҳаётдан ташқаридаги ҳаётни тасаввур қилолмас, кўз ўнгига келтира олмасди. Валлоҳу аълам, борми шундай ҳаёт?<sup>2</sup>

Қиз ниманинг суратини ва қандай чизганини билмаймиз. Бироқ шундай ҳаётдан ташқаридаги ҳаёт билан яшаётганлар ҳақида тасаввур оламиз, адид ҳам бизни мана шундай ҳаётга бошлиётгандай бўлади. Аслида моддий-маиший турмушимиздан ташқарида зиёли инсон қалбида шундай ботиний ҳаёт кечиши мумкин. Шундай яшаётганлар борлигига қаҳрамони ҳам ишонади ва бизни ҳам ишонтира олади адид. Бундай ҳаётда умргузаронлик қилаётганлар учун мансаб, шавкат, тириклик – кун кўришлик муҳим эмас. Муҳими, шу ҳаётнинг ичida яшаб туриб ҳаётдан ташқаридаги ҳаётни яратмак. Ана шу каби яратувчанлик рухи билан яшаган француз рассоми Андре Малро “Агар биз руҳга шакл берсак, ундан ўзимизни кутқарамиз”, деб ёзган экан. Руҳнинг шаклини топиш ва уни ўз шакли билан яшатиш рассомнинг орзуси! Эҳтимол, нафақат рассом, бошқа ижодкорларнинг ҳам иштиёқи шундадир. Руҳга шакл бериш худди ҳаётдан ташқаридаги ҳаётнинг суратини чизишдай гап. “Агар кўзингиз ўтса ва кучингиз етса, – деб ёзади Ф.Достоевский, – ҳаётнинг кичик бир заррасидан ҳам Толстойда йўқ улуғворликни топишингиз мумкин, лекин ҳамма гап кимнинг кўзи ўтиши ва кимнинг кучи етишида”.

Иброҳим Faфуров “романлари”нинг қаҳрамонлари ана шундай фавқулодда шахслар – интеллект одамлари. Улар: “Ёмон бўлса ҳам ҳаёт яхши. Тирик юрганга нима етсин” дея кунлик турмуши билан қониқмайдилар, улар ердаги ҳаёт тугул “юлдузларнинг оппоқ шуъласида қайнагиси” келади, “руҳият ҳаракатларининг тошбитиклари”ни ўқиди, “тарихнинг тошларда қолган саси”ни тинглайди. Мана шунинг ўзини ҳаёт

<sup>1</sup> Ҳамидулла Болтабоев – филология фанлари доктори, профессор.

<sup>2</sup> Faфуров И. Менинг романларим / Ҳаё – халоскор. – Тошкент, “Шарқ” НМАК, 2006. – Б. 86.

ва ўлим орасидаги ўзининг мангу ризки деб билади. Тарихлар қаъридан ҳам, замонининг кўзидан ҳам миллатнинг рухий ривожини излайди. Интеллект дунёси унга руҳи равонни эмас, “сўлим-сўлим суяқ овозини рўпарў” қилганда ҳам ота тарих билан тиллашишдан тийилмайди.

*Ишқ олдида ўлим тору мор бўлди,  
Ўлим ўлди, севги барқарор бўлди,*

дэя бўзлаган шоир Мұхаммад Иқбол сўзларидан нажот топади.  
Ўлимни ўлдириб яшаш – руҳият иқлими нуфузига тегишли.  
Иброҳим Faфуров ижодий дунёси сари яқинлашганингиз сари шу каби фавқулоддаликлар тўсинда олдингиздан чиқаверади. Уларни излаш, топиш ва тушуниш насиб қиласмикин?!

### Болаликни ўқиши

Иброҳим Faфуровнинг болалигини таржимаи ҳолидан ўқиб бўлмайди. Гарчи ҳамма қатори бола бўлгани, 1944 йилнинг кузида мактабга боргани ва мактабни аъло баҳоларга тугатгани кабилар ташқи тавсифлар холос. Бу ахборий воқеалар замираида Иброҳим Faфуровдай улкан адид ва мунаққиднинг беғубор ва покиза қалбини топиб, кўришлик...

Болалик қиссаларини ўқищда тажрибакор бўлганимиз ҳолда Лев Толстой (“Болалик. Ўсмирик. Ёшлиқ”)дан тортиб Абдулла Қаҳхорнинг эртакка йўғриб айтиб берганлари (“Ўтмишдан эртаклар”)дан муаллиф “мен”ини излаб топишга қанчалик уддабурон бўлмайлик, Faфуров таржимаи ҳолидан болаликни ўқиб бўлмайди. Худди бир пайтлар урф бўлган адид Темур Пўлатовнинг жажжи қаҳрамони бешикда муштласини сўриб, дунёнинг муаммоларини ўйлаб ётгани каби ҳасби ҳолдан ҳам бола бўла туриб улғайиб қолган зукко устоз қайдларини ўқиймиз: “3-4 яшарлик пайтларимни эс-эс хотирлайман... Қичқириқ беш-ён қулоқ пайтда пишқириб, уввос солиб чакалакзорлар орасидан буралиб-буралиб оқади. Айникса, унинг увиллашлари кечаси одам кўнглига ваҳима солади ва узоқлардан эшитилади”. Эҳтимол, Қичқириқ сувининг “увиллаши” қулоғимизга қандайдир оғир эшитилар, ғайритабиийдек туюлар. Бироқ бу болалигига уруш муҳрланиб қолган авлоднинг қора кунлар манзарасини қайта идрок этиши, уни бутун ваҳимаси ва шовқини билан китобхон кўз ўнгидаги акс эттиришнинг маҳоратли адид томонидан ижросидир. Эҳтимол, қишининг кунида оёқ оғриғига чидай олмай, лойга ботган “жухӯд калиш”ни жойида қолдириб, енгил тортган боланинг тасаввуридир: “Тириклик қон силқиб турган оёқ бўлиб кўринарди бизга”. Бу бола нигоҳи эмас, балки болалик завқини азобга алишган авлод тасаввuri. Кейинроқ у кунларни қайта кўнглидан кечирган адид “қийинчиликлар юракларимизни ипақдай юмшатиб кўйган эди” деб ёзади. Энди қаҳратон қишдагидай қақраган тасвир бир оз юмшагандай бўлади, бунинг боиси тасвирда энди Она кўрина бошлайди: “Онам соchlари қордай оқарган, икки юзи нақш олмадай қип-қизил...” Бошқа бир ўринда: “Онам жуда ҳам маъюс ва жуда кичрайиб кетгандай кўринди кўзимга” деб ёзади беморлик ҳолатини чизиб. Тасвирни ўқиётиб, хаёл ҳар кимнинг ўз онаси томонга олиб қочади. Унинг сиймосини кўз ўнгига келтиаркан, яна муаллиф тасвирига қайтади... Айни тасвиirlар

нафақат бир адид болалиги, балки уруш даврида болаликни бошдан ке-чирган авлод тарихидай тасаввур беради.

“...Мансурадай очилар гуллар!” Эҳтимол мутолаага иштиёқманд китобхон қалбидан мансуралар гуллардай очилар, бироқ муаллиф ташбеҳ объектини алмаштиради. Буни кейинги сатрларда асослайди: “Биласизми, тўқмас экан гулларини олмалар, мевасининг учидан доим сақлар гулинини. Олмада садоқат бор ўз гулига”. Худди шу каби мансурадай очилади олма гуллари, эҳтимол, шу олма гулига менгзаган садоқати туфайли бу битикларни муаллиф “Мансуралар – менинг романларим” деган хulosага келгандир. Уларни муаллиф шу жанрга киритиб, садоқат билан бизга хизмат қилдириб, замондош қаҳрамонимизга айлантиргани каби романлардай садоқат ва салобат билан хизмат қилмоқда адабиётимизга...

Бугунги кунда гўзал минироманлардай ўқилаётган мансураларда биз Қуръон қаломлари сехри, “Забур”да акс этган Довуд (а.с.) тараннуни, И мом Фаззолий тасаввуфи, Навоий унсияти, Машрабнинг ўтли байтлари, Ницше шиддатини ҳис қиласиз. Улар бизни ўша муқаддас манбаларни қайта ўқишига чорлади, бир бора ёки вактида юзаки ўқиш орқали биз топмаган янги маъниларни топишга ундаиди.

...Иброҳим Ғафуров Машраб ҳакида: “Қатлгоҳда ўйнаган бола” деб фикр қиласиди, ёки “Пастда рўмол ўраган, қизил нимча ва қизил кўйлак кийган (Машрабнинг байти эсга келади: *To кийди қизил ўзини зебо қилайн деб –* Х.Б.) ўн беш ёшлардаги бир қиз унинг танбурини шоҳдан олиб ҳавас билан оҳиста чертади. Бобораҳим шарпа берди...” деб ёзади. Бундай тасвир “Шоҳ Машраб” қиссасида йўқ ва бу қизғин тасвирни “Бобораҳимнинг сариқ гуллари” деб хulosалашга изн бермайди, бироқ биргина “Кўрдим юзингни девона бўлдим...” мисраси тарихини мана шу тасвир – “қисса”да ўқийсиз. Шоҳ Машрабнинг “исёнларидағи ифрат жўшқинлиги”га, ўзини холис қилиб, тушида кўрган Мажнундай назар топганига ишонасиз. Ҳатто Мажнуннинг “икки кўзачага ўхшаган юзи”га термулиб, Иброим Ғафуров тасвирлаган “У кўзаларга Мажнун кўзларидан ёш куюлиб оқар, кўзачалар тўлиб-тошиб тинимсиз Мажнун кўксига шовуллаб оқарди” деганига ишонасиз. Шуурингизга архетипдай ўрнашган Машраб сиймосини И. Ғафуровнинг “дунёning барча байтларини ойга айтган вирди забон шоири” билан солишири бошлийсиз. Гарчи бу бутунлай янги, хеч қайси сийратда ўқимаган тасвирингиз бўлса ҳам Сизнинг кўнглигиздаги Машрабнинг яқинлашиб келаётганини ҳис қиласиз! Машраб Мансур Ҳаллож йўлини тутса-да, И мом Фаззолийнинг “Яратганинг йўли бандаларининг кўнгилларидан ўтади” деган ҳикматига шоир Машраб каби ишонасиз. Нега энди “Бобораҳимнинг сариқ гуллари” сарлавҳага чиққани ҳакида тўлиқ англамга келмасангиз ҳам девона шоир Сизга қадрдон дўст бўлиб қолади, у Сизга танбурини тиринг-тиринг қилиб сирли қўшиқ айтаётгандай туюлаверади:

*Ичолинг бодани гуллар сўлиюр...  
Умримиз оқибат тупроқ бўлиюр...*

### Танқид ва таржима

Агар шу икки ижодий юмушни Иброҳим Ғафуров фаолиятининг бош йўли деб белгиласак, улар ўзаро уйғун келади, худди ўзи Шоҳ Машраб

ҳақида ёзганидай: “Дарё дарёга қўшилгандай унинг ғазаллари улуғларнинг абётларига уйғун ва теран оқимда қўшилиб кетар, нимаси биландир уларни тўлдирап ва нималари биландир уларни давом эттирап, аллақандай томонлари билан уларнинг барчаларидан ажралиб турап эди”. Одатда, таржима асаридан мутаржим услугбини уқиш қийин. Кўп таржимонлар ўз бисотидаги сўзлару ўзининг бутун тажрибасини таржима қилинаётган асар муаллифининг услугбини беришга қаратишади. Ўзини, ўзлигини унугтиб бўлса-да, таржима объектини худди муаллиф шу тилда ёзганида қандай ёзадиган бўлса, шунга ўхшатишга ҳаракат қиласидилар. Бироқ Иброҳим Faфуров таржималаридан бирор парча ўқиганинг ҳамоно таржимондаги ўзига хосликни илғайсиз. Бу аслият муаллифининг “мен”лигини ёпиб қўймайди ёки “кўриниши”га монелик қилмайди, аксинча, китобхон муаллиф ўзига хослигини таржимоннинг маҳоратли ўзлиги орқали танийди. Шунинг учун ҳам у китобхон қалбida таржима асари бўлибгина қолмай, балки аслият каби ўрин олади. Иброҳим Faфуров таржимонгина эмас, таржимашунос сифатида ёzádi: “Таржимон бу – услуб. Услуб эса жумла. Жумла яратиш маҳорати. Жумласи йўқ одам ёзувчи, шоир, драматург бўлолмаганидек, жумласи йўқ кимса ҳам ҳеч қачон таржимон бўлолмайди. Ишнинг тугал замирига келсак, роман – бу жумла, шеър ҳам – жумла... ёзувчига ҳам, таржимонга ҳам энг муҳими – жумлани, ўз жумласини чиқара олишда... Жумласидан ёзувчини таниб оладилар”<sup>1</sup>.

Иброҳим Faфуровнинг таржималари бизга Достоевскийнинг ўқилиши оғир кечган жумлаларини уқишга ўргатди, унинг романлари (“Жиноят ва жазо”, “Киморбоз”, “Телба” ва “Иблислар”) қатидаги турфа қаҳрамонлар келбати ва “миқёсан олганда оламга сиғдириб бўлмайдиган азоб фалсафаси”ни ҳис қилишга ўргатди. Достоевский асарларидаги “оғриқ онгнинг оғир ҳақиқатлари” билан ўзбек китобхонини танитар экан, “романчилик даҳосининг улуғ Рухи” ёзганини унинг айтганидек қабул қиласавериш шарт эмаслигини, уни оғрикли бўлса-да онгли идрок этиш лозимлигини ҳам уқтириб қўйди. Чунки муаллиф ёзишича: “Даҳо ҳамма нарсани ўзи айтади... Ўзи кўради. Ўзи тавба қиласди”.

Асрнинг энг мураккаб сиймоларидаги даҳолик сирларини уқишга киришар экан, Иброҳим Faфуров Нитшени, Жойсни, Маркесни тушунишга ва тушунтиришга ҳаракат қилди. Faфуров таржималари шунчаки ғайри тилидаги матнни ўзбекчага ўгириш эмас, балки ўша даҳолар синоатининг ўзбек китобхони учун талқинлари ҳамдир. Баъзи ўринларда мунакқид Faфуров талқинлари аслиядан йироқлашиши, таржима қилинаётган асарга сўзма-сўз, сатрма-сатр ва саҳифама-саҳифа мос келмаслиги мумкин. Бироқ “Европа фалсафаси ва социологиясининг том маънодаги каашфиётчилик рухи”ни ўзига сингдирган Фридрих Нитшенинг ўзидан салкам уч минг йил аввал яшаган Зардушт каломи орқали айтган фалсафасини ўзбекка боридай бериб бўлармикин?! Ҳар қандай зукко китобхон ҳам шу ўринда таржимон талқинларига суюнади. Қадимги лотин тилидаги “феросия аними”нинг “кўнгил ғалаёни” дея ўзбекчалаштирилиши кифоя эмас, Нитше ҳикматларидаги “кўнгилнинг териси”, “мустабиднинг даҳоси” моҳиятини англаш учун ўқувчининг мутаржимга мурожаат этиши табиий. Мана бу ҳолни олдиндан сезган мутаржим талқинлар билан таржима қиласиди, тўғриси, мутолаа заҳматини енгиллаштиришга китобхонга ёрдам

<sup>1</sup> Faфуров И. Таржимонлик мутахассислигига кириш. – Тошкент, 2008. – Б. 56.

беради. Бу китобхон завқи савияси учун ҳам тараққиёт имкони. Нитше ёзади: “Йиқилаётганни йиқит”. Бу жумлани шундай яланғоч ҳолда қабул қилишилик ғайриинсоний хulosаларга олиб боради. Шунда китобхон мутаржим талқинига юзланади. Иброҳим Faфуров ёзади: “Нитшедан келиб чиқсак, бу инсон йиқилиб, йиқилиш азобини бошидан кечирсин, оқибатда чиниқсин, тажриба ортирусин ва ҳеч қачон қайта йиқилмайдиган бўлсин деганидир”.

Фарбнинг мураккаб дунёсини тараннум қилган адиллар ижоди ўз йўлига. Шу билан бирга биз билан бир мухитда яшаб, ўсиб, бизлардан осмон қадар йироқлашиб кетган Айтматов дунёсини ҳам Faфуров талқинларида қабул қилиш нақадар мароқли. Айниқса, улуғ қирғиз адабининг сўнгти видосига айланган “Қулаётган тоғлар”, вақтида “Асрга татигулик кун” романига сиғмай, ундан йигирма йилча кейин мустақил асар сифатида дунё юзини кўрган “Чингизхоннинг оқ булути” сингари асарлар таржимасини мунаққид талқинлари билан бирга ўқигандагина бу асарлар тубидаги мангу хақиқатни англаш сари йўл топиш мумкин.

... Ҳамма мунаққидлар ҳам мутаржимликни ўзига эп билишмайди, ҳамма таржимонлар ҳам мунаққидлик тажрибасидан ўтмаган. Бироқ И. Faфуровда шу икки йўл тулашиб, ўзига хос теранликни ҳосил қиласди. Таржимон тажрибалари мунаққид танқидини тўлдириб, ажиб бир жозиба касб этади. Шунинг учун Иброҳим Faфуров таржималари шеърдай ўқиласди, мансураларининг ички ритмикаси китобхон қалбининг тепишига ҳамоҳанг келади. Таржима шунчаки тил билиб, матнни ўзга тилда беришлиқ эмас, ўзи ўқиганини бошқаларга ўқитиши, ўзи суйганни ўзгаларга сүйдириши, ўзи азиз билганни бошқаларга ҳам соғиниш ҳисси билан яшашдир. Ўқиганда, таржима қилганда ҳам, шунчаки машҳур асарларни эмас, миллий эҳтиёжни ҳисобга олиб дунё адабиётининг улуғларини сайлайди. Агар Хемингуэй ёки Достоевский ўзбек бўлганида қандай қилиб ўзбекча гапира олишини кўрсатади. Мунаққидликда ҳам шу каби ўзи туйғанларини бошқалар ҳам ҳис қилиши учун, ўзи англаганларини бошқалар ҳам тушуниши учун тилда ўзбекона ёзиб, тимсолда эса асл матнга яқинлашади.

Мунаққид Иброҳим Faфуров ҳақида кўп ёзишган. Бироқ танқид мутолаасига киришган китобхон борки “Гўзалликнинг олмос қирралари”дан бошланган нафис ва гўзал талқинларни севиб қолади. Даврида Ёшлар иттифоки мукофотига сазовор бўлган “Ёнар сўз” китобхонларга шеър ўқишинига эмас, балки яхши шеърни танишликни ҳам ўргатади. Танқидчининг “Адабий қаҳрамонларга мактублари” ўзбек талқиншунослигида янги саҳифани очгани ҳеч кимга сир эмас. Одатан, асар муаллифларига мактуб битилар, шу баҳона битикчи китобдан олган таассуротларини муаллиф билан ўртоқлашар, мактуб ёзувчи ва мунаққиднинг самимияти асосига қурилар эди. Иброҳим Faфуров Ўлмас Умарбеков қаҳрамонларига мактуб йўллаб, уларга тирик инсондай муносабатда бўлгани, қаҳрамоннинг тириклиги асарнинг ўқишилигини таъминловчи асос бўлиши кераклигини танқидчиликда сингишига кўмак берди. Танқид декларативликдан, минбарда туриб, адигба ақл бўлишиликдан чекинди, у том маънода ёзувчи ва китобхоннинг дўсти бўлиши кераклигини тушундик. Айни муддао билан ёзилган “Адабий ўқишилар” – мутолаа сирлари ва маҳорати ҳақида тасаввуримизни тўлдирди. Дунё адабиётшунослиги рецептик эстетика дея китобхон мутолаасига эттибор қаратаётгани сир эмас. Чунки китоб китобхон учун

ёзилар экан, муаллиф, матн ва мунаққид муносабатларида китобхоннинг ўрни жуда мухим. Мунаққид ҳам аввало китобхон, агар у асардаги бадиият сирларидан озиқланмаса, унинг ёзганлари ўқувчи қалбига етиб бормайди. Китобхон учун мутолаа бурч ёки таҳсил азоби эмас, балки ҳеч нарсага алмаштириб бўлмайдиган бир завқли юмушга айланиши керак. Мутолаа машаққати ҳақида ёзганлар (Асмус: “Чтение – это труд”) унинг завқли машғулот эканини бир зум ҳам унтишмаган. Танқид ҳам мутолаа объекти. Шеър ҳақида ёзилган мақола шеърдай ўқилиши, роман талқинидаги тадқиқот романдай салобат ва муҳташамликни китобхонга юқтира билиши керак. Мана шу маънода Иброҳим Ғафуровнинг мақолалари: XX аср ўзбек адабиёти устунлари Ғафур Ғулом, Ойбек, Қаҳхор, Усмон Носир, Шайхзода, Миртемир, Зулфия, Асқад Мухтор, Саид Аҳмад, Эркин Воҳидов ҳақида ёзган мақола ва китобларини ҳаяжонсиз ўқиш мумкин эмас. Танқид муаллифни нафақат тўғри тушуниши, балки тушунтира олиши ҳам керак. Мутолаага киришаётган бугунги китобхон XX аср ўзбек адабиётини бадиий асарлар билан таниши баробарида мунаққиднинг шарҳ ва талқинларини ўқир экан, бадиий матн сари ўзини етакловчи beminnat устозни топгандай бўлади. Унинг ёрдамида “гўзалликнинг олмос қирралари”ни кашф этади, бадиий матн “жозиба”сига мафтун бўлади, “насрнинг шоири” ҳам бўлиши мумкинлигига имон келтиради.

Иброҳим Ғафуровнинг “Ҳаё – халоскор” деган сўзлари Достоевскийнинг “Дунёни гўзаллик қутқаради” шиори каби машҳур бўлиб, адабиёт, санъат – инсонийлик илмидаги кўп моҳиятларни англашга йўл очди. Аслида бир мўъжазгина талқинга асос бўлган жумла имоннинг сарлавҳасига айланди. “...уят, ҳаё, номус – ахлоқнинг жилvasи. Эркин Воҳидов ўзининг ҳалқ менталитетини тасвирлаб берган машҳур шеърида “одамийлик дини” деган тушунчани қўллаган:

*Одамийлик дини бирла тоза иймон ўзбегим...*

Ахир одамийлик дини нима? У инсониятга нима беради? Бу шеърда шу фавқулодда тушунча илк бора дунёга келди. Одамийлик динида балки инсон ҳар нарсадан афзалроқдир... Бу Навоийнинг “Одами эрсанг...” деб бошланадиган ҳаётий улуғвор ғоясининг давоми, балки ундан туғилаётган тушунчадир. Одамийлик динида адаб, шарму ҳаё, ҳалқпарварлик, оддий одамларнинг дардларига дармон бўлиш, барча одамларни бир одам деб қараш ҳукмрон бўлади. Одамийлик динида одамлик энг қимматли, энг қадрли ҳодисага айланади. Бизнинг бу ерда ҳаё деб айтаётган барча гапларимиздан мурод ҳам шунинг ўзи<sup>1</sup>.

Мунаққид тушунчани англатиш учун Сүкротдан Чўлпонга қадар ўтганлар ижодидан талқинлар беради, ниҳоят китобхон англаши керак бўлган ҳақиқат юзага чиқади: “Яланғочликка хушомад қилаётган ҳирсий тилёғлама санъат нақадар юзаки ва нақадар одамийликдан йироқ. Яланғочни ер ҳам қабул қиласайди. Одамийликда ҳаё халоскор. У ҳамиша разолатдан қутқаради”.

<sup>1</sup> Ғафуров И. Мангу латофат. – Тошкент, “Шарқ” НМАК, 2008. – Б. 330.

## РАҚС ТУШАЁТГАН ОДАМ

(Мансурага татаббуъ)

Сарлавҳа топаман деб эзилиб кетдим. Йўқ, йўқлигидан эмас, кўплигидан, азбарой мўллигидан қийналдим. Унинг ҳар бир битигидан не-не сарлавҳалар уфуриб туради. Беистисно ҳар биридан...

Сарлавҳа фикрнинг қаймоғи, тафаккур ёмбиси. Битиккаки муваффакиятли сарлавҳа топдинг, омадинг чопгани ёки илҳом паривашлари меҳмонига айланганинг шу. У ёғи сарлавҳадан қўр олиб, равон кетаверади. Бежизмаски, сарлавҳа ҳар қандай асарнинг ярим ютуғи, дейишади. Менимча, асл ютуғи, айни ютуғи.

Устанинг ёзишича, “Нитше образ яратиш санъатини ракс деб билади. Рақс инсониятнинг энг қадимий санъати ва ҳамма санъатлар ва шунингдек, сўз санъатининг ҳам ота-онаси.”

Модомики шундай экан, ижод ахли образ яратувчилар – ракс тушувчи-лардир. Мантиқ шу, сарлавҳанинг мақсад-муддаоси ҳам шу!

Камина уввало уриниб, минглаб сарлавҳалар ичра ажратганим ифоданинг таърифлангувчиси – бугун барча – юрт отасидан тортиб муҳлису муҳибгача алқаб, улуғлаб турган инсон Иброҳим Ғафуровдир.

Алишер Навоий ҳақидаги машҳур фильмимизнинг сценарий муаллифларидан Виктор Шкловскийга ўхшатаман Иброҳим акани. Шкловскийнинг Лев Толстой, Сергей Эйзенштейн ҳақидаги китобларини яхши қўраман. “Тортилган камон. Ўхшашнинг ўхшамаслиги ҳақида” (“Тетива О несходстве сходного. Теоретическая работа М., 1970 г.) ўзига хос ажойиб назарий китоби бор. Умуман, ёруғ дунёда 91 йил яшаб, ўзи ҳам саноғига етолмаган бир кўп китоблари (бадиий, илмий, илмий-назарий), эсселари, сценарийлари билан машҳур мутафаккир олим, танқидчи, ёзувчи, киночи, санъатшунос ва ҳоказо. Китоблари, умуман битиклари бари тезислардан иборат. Билим, фикр, мулоҳаза, мушоҳада шу қадар жўшқинки, тўлиб-тошиб келади. Ортиқча тафсилот, эга-кесим қидириб ўтиришга фикр пўртанаси чидамайди. Тезислар шаклида қоғозга қуйилаверади. Шкловскийнинг назарий, амалий қараашлари XX аср инсоният бадиий-илмий тафаккурининг ноёб кўринишларидан. У бадиий онг турларининг барчасида салмоқли ишлар қилган, залворли мерос қолдирган. Адабиёт, кино, тасвирий санъат, театр... барчасининг “...шунос”ликлари ривожига қўр берган буюк эссеист, қомусий тафаккур одами. Унинг тезисларда фикрлаб яратган ўнлаб китоблари ҳам бари сарлавҳалар таассуротини беради. Ҳа, ана шу сарлавҳа-матнларда бир олам маъно, мантиқ, мазмун. Ҳайратинг ошиб-тошиб кетади. Во дариф, ҳамманини каби шу бир кафтга сифгулик чанокда шунча илм-билим, тушунча бўладими деб қоласан...

Бизнинг Иброҳим Ғафуровни шу закий мутафаккирга ўхшатаман.

Гарчи кўринишидан сира ўхшашлиги бўлмаса-да, сийратан ўхшаш улар. Тортилган камон мисол икковлон ҳам. Ўхшамасларнинг ўхшashi. Улар гёё маънавий ака-уқадек.

Агар яна шу ердан изҳоримни узиб, янги сарлавҳа қўйиш мумкин бўлса, “Баланд тепалар” туркумидаги “Оқ бургутлар” дан мана бу ифодани хат бошига муҳрлаб қўярдим:

**“Жўнлик устидан қозонгим келар ғалаба”.**

О, нақадар долзарб фикр, мардона ифода! Бугун, ҳа бугуннинг энг керак гапи, энг зарур сарлавҳаси. Ҳаётини “ракс тушишга” тиккан бари санъат ахли ва санъат ҳабибларининг қўнглидаги гапи, қалбидаги изтироби бу бугун. Чор атрофингни “жўнлик” умргузаронлиги метастаза берган саратон касали мисол босиб келаётган бир паллаларда нақадар интиқ, тансиқ бу ғалаба. Билооқибат, мумкинмикан бу музофарият?!

“Ўки, ўқи, ўқи” деган сокин, шикаста сас чалинади қулоққа. Сас танишдек туюлади. Муқаддас қаломни такрор-батакрор садолантираётган овоз ўша исёнкор истак ифода топган иккинчи сарлавҳанинг муаллифиники экани аёнлаша боради...

Гаштакнинг навбатдаги улфатчилигига ўртага баҳс тушди. Баҳс мавзусига оид не бир мақолани ўқимаган экан, мунозарага киришган носир акамиз. Ўқимаслик касалига чалингансан дея, чунонам ёғилди таъна, дашном.... Ка-ломга жуфтланган лаблар қимтиниб, тупуклар қилт этиб ютилди. Лоларухсор юзлардаги кўзлар ерга қадалди. Чапани давра эмасди бу улфатчилик... Аммо шаҳд билан қилинган тазийқ дилда қадар қолдирди, совуқлик инди. Бунинг рутубати анчагача тарқамади. Кўнгилда чўкинди бўлди. Озод домланинг гапи ёдимга келди:

“Кизиқ мен ҳар гал Иброҳимжон билан кўришганимда, унинг кўзларидағи алланечук таъна аралаш кинояли нигоҳ қаршисида, ундаги сўз билан ифодаланмаган, лекин яққол сезилиб турадиган талабчанлик қаршисида сал-пал довдираб қоламан, қилган ишларимни, гапирган гапларимни бирма-бир хаёлдан ўтказиб, боримдан кўра яхшироқ бўлишга ҷоғланаман”.

Устоз Шарафиддинов ана шу ҳолат – талабчанликни ИброҳимFaфуровнинг асарларига ҳам нисбат бериб, пировардида уни, “ҳеч иккиланмай адабиётимизнинг виждони, деб атасак хато бўлмас”, дея хулоса чиқаради... Вактида Озод домланинг ўзига шу сифатни бериб эдик. Шукрки, адабиётимиз виждонсиз қолмаган экан. Бинобарин, не тонгки, виждон ва адолатни давлатчиликнинг бош мезони деб саъй кўрсатаётган Раҳнамомиз мазкур битикларимиз қаҳрамонининг тўйи сабаб ҳам юртдаги устувор маънавий-ғоявий сиёсатнинг асосларини мустаҳкам этаётир.

Кимгадир бу шоҳона лутф бўлиб туюлар, аммо нафсиламирини айтганда, бу қонуний ҳол. Айниқса, бугун жўнлик ботқоғини қуритмоқ зарур. Давлат бошқарувидан тортиб иқтисоду сиёсатда, саноату зироатда, табобату таълим-тарбияда, маънавият-маърифатда, санъат ва адабиётда, албатта. Чучмал эътирофлар, мақтанчоқлик, сафсатабоз худпарастлик, пучқоқ риторика, сохта табассумлардан воз кеча билмоқ керак.

Ахир:

*Оlam гўзал. Olam телба. Olam тубсиз.*

*Телбалик гўзаллик тубсиз.*

*Ўзини жинниликка солди Суҳравардий*

*Ва қутулди дордан.*

Омон қолди жони  
боши омон қолди.  
Менинг ҳамма хазинам бошимда дерди.  
Баъзан олам ҳаводислари  
қулогингни учиреб ўтаман дейди.  
Сен ҳам ўйлайсан иришайиб:  
бошимни олиб қўйсам қутиласманми  
Ёқадими сизга боисиз чавандоз?..

Майн Риднинг буюклигини кўринг, замонавийлигини туйинг. Ҳамма саргузашт адабиётининг зўр намунаси деб билгувчи умрбокий роман макону замонлар оша инсониятга чақириқ экан. Буни-да бизга англатиб, эслатиб турган қаҳрамонимиз.

Қаҳрамонимизнинг тафаккур ва кўнгил бисотини кавлайверса, сонсаноқсиз турфа оламу оламчалар чиқаверади. Жўн нигоҳга улар бир-бири билан қандай алоқадорликда деган саволлар қутилиб, алжирашдек туюлади гўё. Жўн эмас, огоҳ билгич учун улар алжираш эмас, билъакс, темир қонун билан тартибланган тугаллик – низом. Қуроқ, синик, йиртиқ, ямок-яски, лахтакларни бир-бирига мослаб улашдан пайдо бўладиган ғалат шаклни мозаика дейдилар фарангилар. Сўз, асл маъносида музалар билан боғлик бўлгани учунми, бу бора-бора муйян табиийлик қонуниятига бўйсунувчи, Шкловский мисолида юқорида айтганимиз, ўхшамасликнинг ўхшаши асосидаги санъат турига айланди. Мозаика шакл санъати авангард адабиётига ҳам кўчиб, Жеймс Жойс каби улкан адиларнинг романларида авж-адосига етди. Оддий назарга ғалат туюладиган Фафуров мансуралари мозаика санъатига хос муштараклик намуналариdir. Фақат буни сезиш, кўриш ва англаш учун қалб кўзлари керак ўқигувчига.

Рост-да, ахир ҳамма қатори туғилмай, йўргакка олинмай, боши қолиб, оёғи билан ёруғ дунёга чиққан ва ўлик дея эски-тускига чирмаб, совук уйнинг бир чеккасига элтиб қўйилган ва иттифоқо онанинг сезими – савқи табиийси билан тириклиги аёнлашиб, бағирга олинган мурғак, аввало, қалб кўзлари туфайлидан омону эсон қолиб, камол топди. Ўзи айтмоқчи, ўттиз еттинчи йилнинг қаҳратонида Қодирий, Чўлпон, Фитратлар... қатағон этилган кунларда таваллуд топди. Бамисли уларнинг жисми йўқликка инган паллада миллатнинг қуриб битмас чашмаларидан янги чашма кўз очгандек бўлган эса не ажаб?! Шудир балки табиатдаги темир қонун, тартиб-интизом. Катта миллатларнинг юзи бўлгучи фарзандлари туғилишу ўлишида, наслларнинг ворислигу бардавомлигига, албатта, бир илоҳий низом – мунтазамлик бўлмоги азалдан бор гап. Ўтлиғ шоиримиз Фурқат айтмоқчи, “жаҳон холи қолурму ҳеч расолардин”.

Ёруғ кайфият ва ажиб таъмнинг муждаси бўлиб, хоҳишлирини қитиқлаган зарғалдоқ шафттолиларга қўйни-кўнжини тўлдириб чиққан маъсум болакайнинг жазоланиб, олма шохига осиб қўйилгани азобини бир эсланг-а... мансура хикоядан. Ўғриликнинг, бесўров хоҳишининг жазосини онгу вужудига умрбод муҳрлаган бола тасаввурнинг даҳшатидирки, кейинги етмиш йиллик умр, ҳаромдан ҳазар шиори билан ўтди. У ютаётган лукмасинигина эмас, ўқиган китобию, ёзган битиклари, ўзбекчага ўгириган бадиий дурданалари, ирод этган нутқу маърузалари билан, кўйингчи, давралардаги иштироқи билан-да виждонларни уйғотиб, ҳалолликнинг унутилаётган

кўшиқларини куйлашдан тинмади, тонмади. Бу қанчалар қийин, азобли машфулот бўлмасин, шу маёққа интилаверди. Солланиб, салмокланиб ўша бисот билан шу кунларга етди. Бу бисотга жамиятда эҳтиёж ўлмаган эканки, уни алқаб, улуғлаб ўлтирибомиз-биз... Рост бўлсин, рост бўлсин, мувакқат ҳол бўлиб ўтмасин дегинг келади...

Мансураларни “Менинг романларим” деган Иброҳим ака “Ҳаё-халоскор” ида: “кучли нутқ оқимига асосланган “Мансуралар” деган жанр яратдим. Мансуралар эркин шеър жанрига жуда яқин, лекин эркин шеър эмас. У мени ўртаган ўй, хаёл, орзу ва эришилмаган, йўқотилган нарсалар тўғрисида фикр оқимлари”.

Ўсмир тасаввуримнинг инжа маликаси Одри Хепберн ҳақида ўзбеклардан илк бор Иброҳим ака ёзганини ўқидим. Ўқидиму ўша ўспирин паллада бу “хуркак оху”га ғойибона кўнгил қўйиб, у ҳақда ҳар нечук маълумот, таас-сурот, битиклар излаб, бори топган ўқиганларим орасида Иброҳим аканинг мансураси бошқачароқ, кучлироқ таъсир қилди. Бир ўзим эмас эканман, бу қизгинага хаёлий шайдо. Биргина менинг кўнглим эркаси эмас экан бу малак. Рашқ эмас, умумхайрат туйғуси эгаллаганди мени. О, менинг туйғуларим, мафтунлигим – илк бор “Рим таътиллари”ни кўргандаги...

*Кўк сизар эди Одрининг кўзига. Курра сизар эди  
Одрининг кўзига.  
Чексиз Ҳимолайлар чўккан эди Одрининг кўзига.  
Оксанлар маъсум ётар эди Одрининг кўзларида.  
Мен ҳам ўсмир чоғларим сикқан эдим бу кўзларга.  
Бошдан-оёқ мужассам ҳуркак нигоҳ эди Одри Хепберн.*

Мана сизга мансура – роман. Эҳ-ҳе, мана шу олти сатрда озмунча маз-мун, тафсилот, тарих борми. Бу тафсилот-тариҳлар бари ўзиники, ҳар бир қалбнинг ўз-ўзиники, ҳар бир хотиранинг ўз сурати, ўз ёндашуви, кўрими, муносабати. Бунга факат ана шу олти сатргина туртки беряпти. Олти сатр бутун бир умрни хаёл кўзгусида жонлантиряпти. Фақат сеники, факат ўзингники бўлган тафсилот-тариҳларни жонлантиряпти бу олти сатр.

Мансура – романда Одрининг ўлими чексиз қайғуга солган титроқ қалбнинг яна бир неча ўн сатр гиряси бор, олтига билан тугаган эмас. Лекин улар энди кўпроқ, асосан ИброҳимFaфурники, менини эмас. Мен ўлимига ҳар қанча қайғурсам-да, тирик ёруғ сурат бўлиб хаёлимда жилваланиб тураверади. Одри менга хотира, таассурот бисотимни очиб берган олти сатр етади. У ёғини ўзим тўлдириб оламан, тўлдирадиган тафсилотлар кам эмас... Фақат ақадан яна бир сатрни сўраб оламан... сарлавҳа қилгани. Чунки бундан зўрроқ, ёмбироқ ташбех-сарлавҳани мен тополмасам керак.

Одамзоднинг мунгига муҳр-охуларнинг кўзлари.

Шу ўринда фикр нишаби яна сарлавҳага тортиб, “Ҳаё – халоскор” деган маънавий оламимизга Иброҳим Faфуров ибораси ўлароқ дарж этилган сўзлар қояланади.

Роман дейману қўшиққа ўхшайди бу Мансура. Балки қўшиқ-роман, гиря-роман дейиши керакмикан бу мансурани. Ва балки Иброҳим Faфуров қалбидан отилган нидолар, видолар бари қўшиқдир..., унинг ўз қўшиқлариидир?! Товуш тембрлари, диапазон зоҳирان қўшиқчиникига ўхшамагани учун у қўшиқ дея қадр топмаслиги мумкинлигидан бу сангдил издиҳомда, мансурани ўйлаб топдимикан...

Яқинда бангладешлик элчи-шоир Мъясуд Маннаннинг таклифи билан Тошкентда меҳмон бўлган Танвири Мукаммал исмли кинорежиссер билан танишдим ва унинг “Лоло” номли фильмини кўрдим. Қизиқ, Лоло исмли ўтган аср бошларида Бангладеш қишлоқларида яшаб ўтган хат-саводсиз дарвеш шоир ўз таълимот-тушунчаларини куйлаб айтган экан. Тинимсиз куйлаган – бори ҳаёт, турмуш кўшиқдан иборат. Шуниси қизиқки, ҳар ким ўзини ифода этишининг турфа йўлларини топар экан...

Аксарият ўзини ифодалашга имкон қидирадиган истеъоддлар инсоният асрлар оша уларгача яратган усул, услугуб, жанр, вазн, ўлчов, қонун-қоида ва ҳоказоларга мурожаат этади. Қолипларга мослашади. Лекин шундай саркаш кўнгил ва шуур одамлари борки, улар бошдан-оёқ яратгувчилардир. Ўз розларини фақат ўзлари кашф этган шаклларга мувофиқ ифода этадилар.

Иброҳим ака француз адаби Андре Морлонинг “рухга шакл бериш” ҳақидаги фикрларидан муттасир бўлиб ёзган эдилар. Уша биз назарда ту-таётган яккаш саркашлар айнан рухга шакл излаётган одамлар бўлса-чи?! Топгани баҳтили, тополмагани, қуввати етса, тинимсиз изланишда. Шу мъяномда Иброҳим ака баҳтили. Ютуғи, каму кўстини ҳам ўзи ҳаммадан яхшироқ билади. Инчунун, “Мансура” жанрини яратдим” деганда ишонмаслик мумкин эмас... Билғеъл аканинг “Персонализм” хусусидаги мана бу икрори орий рост: “Ҳар бир одам ўз ҳаётида инқилоб қилсин. Ҳар бир кимса ўз ичидаги ҳам инқилоб ясасин.... Илоҳий инқилоб! У қалбимда! Турғунлик деви (дев бўлса ҳам – Ш.Р) енгилмас эмас”.

Мана Одри Хепберн хотирасидан палак олган ўйлар, ўйчиқлар. Буни эҳхе, не-не тафаккур силсилаларига улаб давом эттириш, эттиравериш мумкин. Ҳа, мана сизга роман...

– Э, бўйингдан ўргилай, Иброй ака! – деворгинг келади волидаи азизага ўхшаб, гарчи “таъна аралаш кинояли нигоҳи” тушиши мумкинлигидан хавфсирасанг ҳам.

У Толстойдан уялади. Достоевскийдан, Жойсдан, Хеменгуэй, Айтматов, Маркес....дан уялади, хижолат қиласи жўн ёзишдан, жўн фикрлашдан. Ва, албатта андиша қиласи ҳазрат Навоийдан. Шу андишасики, уни Навоийга унсияти – яқинлашмоғи учун, “Фалакий кўламлар”га интилмоғи учун қалбига кўр, танига қувват, фикратига қудрат бағишлайди. Ва у шу андишаси билан бирор кун Толстой бобо унга жўнлиги учун ҳаёлан айтиб қолиши мумкин бўлган таъналардан асрнади. Асрнаб, муҳофазаси улғайиб, кўнглини мансура куйлашга сомеъ этади.

Мен дастлаб Тургеневнинг насрдаги шеърларини ўқиган эдим, кейин Миртемир, сўнг Ойбек, яна кейинроқ бир-икки Чўлпонда. Булар бари ҳиссий эпкинлар самараси, шеърга, ўлчам ва қатъий мезонларга сифмаган, сифиши истамаган саркаш туйғуларнинг юзага чиқиш усули эди. Назаримда, бу ҳол туйғулари чандон чаппар уриб турганда шоду ҳандон ва ёки тамоми шикаста кўнгилли ижод аҳлининг барчаси вақти-вақти билан мурожаат қилиб, гоҳ пинҳон тутадиган, гоҳ ошкор этадиган муваққат чизгиларига ўхшайди. Ўзим ҳам ёзганман, ёзаман шундай насрдаги шеърларни. Улар кўпинча ёндафттарларда, жавонларда, архивларда қолиб кетадиган ўта интим, тийиксиз ҳиссий эҳтиёж натижалари. Шунинг учун ҳам фикрловчи ошуфта аҳли қалам бари мансура ёзадигандек туюлади. Модомики, мансура фикр алангаси ёлқинлантирган ҳиссиётлар эпкинида туғилар экан, у ҳам тафаккур, ҳам ҳиссиётлар зурриёти, фарзанд эса ўсувландир. У нимага мойил бўлса,

шу томонга қараб бўй чўзади, шаклу шамойил касб этади. Фикрга бўлса “...шунослик” (адабиётшунослик, санъатшунослик, адабий-бадиий танқид...) йўлини тутади, ортиқ даража туйгуларда турғун туриб, шунга нойил эса бадиий ижод (шеър, наср, драма ва ҳоказо)га жўяқ солади. Ҳа, назаран, мансура шу икки илмий ва ижодий жараённинг ибтидоси, асоси, пойдевори. Кимлардир қай бир йўналишга тортиб кетади, кимлардир ҳар иккисинида бўлак-бўлак, мустақил юргизади. Кимлардир (булар жуда камчилик) ўша ибтидода мустаҳкам туриб қолади – худди Иброҳим Faфуровдек.

Аслику у ҳам “...шунослик” дарёларида сузиб, адабий танқид, адабиётшунослик, таржимашунослик оролларини обдан кезинди, гоҳ-гоҳ яна сафарлар қилиб туради бу оролларга. Аммо бу ороллардаги мухит, маром зерикарлироқ туюлади шекиллик, улар оромидан ором топмай, яна фикр, мушоҳада билан ҳиссиёт уйғунлигидаги эссеистикани кўнгил хоҳиши, ифода воситаси деб белгилайди. Энди унинг “Мангу латофат” (айниқса), “Паривашлар мажлиси”даги рисолалари ҳам бари бирлиқда эссеистика – бадиалар бўлиб жамланади. Қаранг, ўша китоблар тартибида жадид боболар адабиёти, матбуоти, Беҳбудий, Фитрат, Эркин Вохидов, Faфур Гулом, Саид Аҳмад, Абдулла Орипов, Озод Шарафиддинов, Абдулла Қаҳҳор, Ойбек, Шайхзода, Зулфия, Усмон Носир, Одил Ёкубов, Асқад Мухтор, Максуд Қориев, Сайёр, Тогай Мурод, Лазиз Каюмов, Нуриддин Шукуров, Азим Суюн, Саъдулла Ҳаким ва бугуннинг ёш шоирларигача таҳлилга, мушоҳадага тортилган турли авлод қалам аҳли ҳақидаги рисола, мақола, тақриз, сўз, кириш сўз, сўнгсўз ва ҳоказо турли илмий-танқидий жанрдаги барча битиклар хеч муболағасиз, бари эссеистика намуналари. Уларнинг қаеридадир таҳлил, илмий мушоҳада, баҳс-мунозара каби “...шунослик” методлари кўриниб ё кучайиб кетса-да, барчаси бора-бора ҳиссиётлар зилолига қўшилиб, бадиа дарёсига сингиб кетади. Булар қатори рух, ҳаёт, ўлим, имон, эътиқод, тил, ироди, ахлоқ, ҳаё, матонат, жасорат, миллат, ватанпарварлик... каби алоҳида мақола, чиқишиларга мавзу бўлган қатор маънавий категориялар ҳақидаги фалсафий ўйлар, тезислар, фикралар, муносабатлар... ҳам ўша дарёнинг балиқлари.

“Эътиқод ҳосиласи” номли Озод Шарафиддинов ҳақидаги эссеисида Иброҳим Faфуров синчковлик-фаросат-ҳафсалана хусусларида фикр юритиб, уларни түгма, эгиз, туғишган, бирлашган, туташган, чатишган хусусиятлар дейди. “Булариз адабиётчи йўқ, танқидчи, санъаткор йўқ. Вассалом”. Ана шу бири бирига эш уч фазилат мансура ва эсселарнинг уруғдони ва дояси. Агар синчковлик акада энг ривож топган индивидуал хусусият десам, битикларидан боҳабар бирор кас фикримга шубҳа билдирилас. Фаросат ҳафсалана борасида ҳам худди шундай. Ҳафсаласизликни кечириб бўлар, чунки бундан энг катта зиён кўргувчи сизнинг ўзингиз бўласиз, қилмаган ва бажаришга қувват ва фурсат топмаган, турли ботиний ва зоҳирий важ-карсонлар топиб, ўз-ўзини алдаб юрган ўзингиз бўласиз ҳафсаласиз одам. Аммо фаросат бобида уни одамнинг яккаш камчилигигина деб айтиб бўлмайди. Бефаросатлик бу нуқсон, иллат, қусур одамдаги. Одамлик шаънини не қадар ерга ургучи тубан, тақир бир ҳолат.

*Фаросатсиз нодонлардин қочмоқ керак.  
Бефаросат, бефаҳм одам мисли эшишак.*

дейди донишманд ҳалқ.

Хўш, синчилиги йўқ одам ҳаёт, тирикликнинг турфа кўринишларида не бир ҳаводисларни ажратиб, уларнинг моҳиятини излаб, ўрни, аҳамияти, ке-рак нокераклигини билиб, билдириб биладими?! Табиатда неки яратик бор-барининг ўрни, вазифаси бор. Ҳеч бир нарса оламу одамдан ташқарида эмас. Фақат синчковликкина бор нарсанинг борлиги, қай бир даражада кераклигини англатади. Уни ўша кераклик доираси-даражасини топиш фахму фаросатдан. Кўллаш, ишлатиш, амалиётга кўя билиш эса ҳафсаладан. Биринчи ва иккинчи хусусиятлар ижодкорда ҳаётий зарур бўлгани ҳолда учинчиси ҳаракатсиз туриши мумкин. Бу энди юзага чиқмаган имконият, потенциал. Ўзида Достоевский, Шопенгаурларни ўлдирган Вания тоганинг ёзғиришлари, йиги-армонлари. Бу уч сифатнинг бир инсонда мужассамлиги бахти, омади, тақдир қилгани. Бироқ бу фазилатлар боридан бўликроқ, бўртиброк кўринса-чи, ортикроқ фаоллиқда намоён бўлса-чи. Бу энди улуғлик, ўзгалардан, бир кўп инсонлардан ўзгачароқ, қатору сафлардан бўйчанроқ кўриниш бўлса керак. Бундайларни ҳарбийда қатор бошига кўйиб, белги олинади. Маҳалла-кўйчилиқда ҳамиша олдинга ўтқазиб, сафнинг савлати, эътибор-иззатини белгилашади. Илмда, ижодда агар шундай олим, адаб, санъаткор бўлса, у зотни табаррук ва улуғ санаб, устоз ва пир дея этагидан тутишади. Бугун неча-неча маънавиятга ёндош мардум Иброҳим акани устозу пир макомида билиб, сухбатларига интилади, этакларини тутиб, бу табаррук инсонга эргашади.

Агар инсонни синчковлик безаса, бахтиёр этса мисоли Иброҳим Faфуров, фахму фаросат фазилатмаоб қиласа, намунаси Иброҳим Faфур, ҳафсала туфайли ўз ҳаётида инқилоб қиласа, турғунлик девини енгса, Иброҳим Faфур. Ана шу илохий бахтдан ибратланиб юрганлар муродига етсин, албатта.

Турли давра, учрашувларда иқтиbos келтириб айтиб юраман – “Аргументы и факты” газетасининг 2016 йилги сонларидан бирида машхур кинорежиссёр Павел Лунгин “Стыда больше нет” дея афсус-надомат билан интервью берибди. Ҳа, у энди ҳаётда, дунёда уят бўлмайди, шарму ҳаё туйғуси йитиб кетди, энди буларнинг бари пулга сотиладиган товарга айланди, энди шарму ҳаё бу шоу-бизнес деганидир дейди.

Бизнинг Иброҳим ака буни роппа-роса 10 йил олдин кўра билиб, бутун бир китобининг сарлавҳасига чиқарган эди – “Ҳаё – халоскор” – “Шарқ” НМАК, Тошкент, 2006 йил.

Бу билан қаноатланмай, икки йилдан сўнг “Мангу латофат” ида яна бонг уриб “Ахлоқни соғиниши. Ҳаё – халоскор” деб чиқди. “Адаб - одамийликнинг ўзаги. Балки одамийликнинг бари бошдан охир адабдан иборат. Адабнинг илиги эса – ҳаё. Илик қуриган ерда ҳаё бўлмайди. Ҳаёни ор-номус, ҳамият, орият, шаън, уят сингари тушунчалар қаторига қўямиз.... Уят жуда қадимдан келаётган туркий ўзбакий сўз ва тушунча. У ёпиш, паналаш маъноларини англатади... Уят туркийча, ҳаё – арабийча, шарм – форсийча келиб чиқишига эга. Руслар бу тушунчаларни “стыд”, “срам” сўzlари билан ифодалашади.

Ҳа, ана-рус кинорежиссёри айтган “стыд” – ҳаё жамиятда, одамларда йўқола бориб, товарга айрибошланган экан, демак, уни асраш чоралари кўрилмоғи зарур. Дараҳтки танасида кесилган ва очилиб қолган жойини ёпиб қобиқ қопларкан, нега одамзод яланғочликдан асраниш эвини қилмайди?! Ҳеч кимнинг ҳаёлига келмаган энг оддий, ҳамиша кўз олдимиздаги ҳақиқатни эслатади Иброҳим Faфур: “Яланғочни ер ҳам қабул қилмайди”. Дарҳақиқат, на насроний, на буддавий, на исломий эътиқодларда майитни яланғоч ҳолда дафн этиш йўқ.

Ха, ҳаё – халоскор. Фақат тананинг яланғочлануви, авратнинг очилиб қолиши эмас, фикру ўй, сўз-муносабат, мулоқот-мусоҳабаларнинг яланғоч кўринишлари – бу ҳам беҳаёлик-ку. Биз гоҳо қадим водий миллий маданий қадриятларидан келадиган асқияни уятсизроқ жанр, деймиз. Аммо шу уятсиз аталгувчи айтишув-диалогларда қанча парда, ишорат тасаввури билан англанадиган қанча фасоҳатли завқ-шавқ бор. Ҳатто сўзиники шу қадар пардалаган мардум нега энди ҳар не унсурдан пардани кўтаряпти. Ҳаёсизларча ялтоқланяпти, беҳаёларча мақтаняпти, уятсизларча куляпти, шармандаларча тана ўйинлари билан ҳирсу ҳарисликни оддий ҳолга айлантиряпти.

Бола эканмиз, раҳматлик бувимнинг бўйинларида пайдо бўлган нуктадек кизил сўгални кўрсатиб – нима деб сўрабман. “Ўғил бола бунақа нарсаларни сўрамайди”, дея танбеҳ эшитдим. Шу-шу ёшинг ўта бошлаб, қўлу томоқ, бўйинларингда ўз-ўзидан пайдо бўлиб қоладиган ҳолу сўгалларни энди ўзимизда кўриб, булар ҳар қандай тананинг ўз таманнолари, вужуд-тери кимёларининг не бир зухури эканини англаб, шугинага ҳам дакки олганимиз учун ҳаё пардаси оналаримиз, момоларимизда шунчалар бўлган экан-да, деб қўямиз. Иброҳим ака мавзу очаётган ҳаё-ку глобал дунёning хавотир-ташвишлари. Бора-бора Лут қавми ё Содом, Гоморра шаҳарларини қўпган қиёматлардан огоҳлантириш хушёрги.

Ўзи-ку аканинг мансура, эсселари бу унинг ҳайратлари ичра охлари, андуҳлари, армонлари, ошкор айтилмаган аламлари, дардлари ҳам. Озод домла ҳақидаги “Эътиқод ҳосиласи” да ёзади: “Таржима мақолаларни Озод Шарафиддинов адабий-танқидий, ижтимоий, инсоний эътиқодининг сар мевалари, деб қараша керак. Ўзи шундай ҳам. Озод ака ўзи ёзолмаган, айттолмаган (турли сабабларга кўра) фикрларини шу таржималар орқали ўқувчисига етказади. Зоро, биз учун озодлик ва маънавиятга ҳизмат қиласидиган ҳар бир нарса қадрлидир.”

Асли Иброҳим Faфуров ҳам закий мутафаккир, хушёр нигоҳ ва сира бефарқ бўлмайдиган инсон ўлароқ кўнгил розларию норозиликларини, ёқмаган, ёқтиргани номарғуб сўз, китоб, одам, авом, қилиқ, қийтиқларни яланғоч танқид қатларига қайд қилмай, мансуралар, эсселарнинг не бир оҳанг мисраларига жо этади. Фаҳму фаросати бор одам бу ишора, истеҳзо, эссеистик киноя ва фасиҳ кесатиқларда неқадар ништар пардаланганини аник сезиб билади. Ва, албатта, Иброҳим аканинг хунукни чиройли қилиб, бадномга мажоз топиб, бадбинга ороиш кўзгу тутиб, билиб-билиб, архаик аталувчи сўз бисотидан аник ифодалар танлаб муносабат билдиришига тан беради.

*Мана шулар  
менинг ватандошларим  
бошқасини қайдан оламан  
уй солишини севишиар  
тўй қилишиша, қувишиар  
аза келса, туришиар  
вазминликни суйшишиар –  
мана шулар –  
менинг ватандошларим  
бошқасини қайдан оламан.  
Офтобликка аста чиқшишиар  
жаҳон билан секин сўрашиар*

эҳтиёти унга ярашар  
мана шулар – менинг ватандошлиарим  
боиқасини қайдан оламан...  
жисқ бўлиб кетдим фикр чопқинларида

ёки мана бу сатрларга жо бўлган кўхна сўзлар ташигувчи оҳангни тинглаб, мажозини чақиб кўринг-а:

*Нисоланар сўзлар –  
Багримга бои қўяр қатор бўлишиб –  
аёлга ўхшаб қолар сўзлар –  
қора қуши ёмғирида ивиган, бўртган, тиниқ тортган  
аёл шундай бўлар.  
Конган аёлдан ғўзал аёл бўлмас –  
мен шундай қонеъ сўзларни қучаман – ўпаман,  
эркалаб – эркалаб етаклайман  
Сўзларнинг кўксидан тизилиб отилар сутлар  
мен ичолмайман  
лек  
бала каби  
сўзлар олдида ожизман.  
Қора қушлар ўтишар  
қуюн тортшишиб,  
нисоланар сўзлар кузги бодринг каби  
кўм-кўк, қарсилдоқ – мен уларни багримга босаман  
муқаддас нима бор шундай сўздан ортиқроқ.*

Мансураларни Иброҳим ака менинг романларим, деганини эслатиб эдик. Юкорироқда фикр билан туйғуларнинг турфа ва ажиб муштараклигига туғилиб, сўнг шоҳлаб кетадиган илмий ва ижодий жараённинг ибтидоси дедик. Агар адабиёт ва замон нисбатида бугунги шитобдаги глобал жараёнларни бор шошқину тошқини билан кўрадиган бўлсақ, мансуралар айнан роман ва айни чоғда ибтидо ҳам, интиҳо ҳам бўлиб қолади. Шу билан бирга, улар ИброҳимFaфуров зако ва фасоҳат сайёрасининг ноёб яратиқлари ва муҳташам обидалари бўлиб ҳам кўп ҳассос кўнгилларда машъалалар ёқади. Бадиий сўзнинг тилсим дунёсига не-не авлодларин чорлайверади.

Устоз ўзбекчага ошуфталик билан ўтиргани “Зардўшт таваллоси”нинг ижодкори Нитшени ниҳоятда сяди. Унга турли муносабат билан бот-бот мурожаат этади. Модомики, Нитше “образ яратиш санъатини рақс” деб билган экан, Иброҳим Faфуров мансуралар, эсселар, таржималар, ёниқ сўзлар воситасида образ яратишнинг ҳаддини эгаллаб, тимсол уммонининг ғаввоси ўлароқ шаън ва шуҳрат топди, табаррук ёш ва одамийликнинг қутлуғ мартабаларига этишди. Яна устознинг ўзи “Инсонийлик рисоласи”да “Яшаш бу санъат” деб ёзган эди. Демак, у образ яратиш санъатини яшаш санъатининг меҳварига айлантириб, ажиб самовий кенгликлар ичра рақс этишда бардавомдир.

Фақат ҳавасланиш мумкин бундай умргузаронликка.

Шуҳрат РИЗАЕВ

*Ҳасан АМИНОВ*

## ХАЛҚ ҚАЛБИНИНГ КЎЗГУСИ

Мамлакатимиз ўз мустақиллигини кўлга киритгач, халқимизга муносиб ҳаётни таъмин этишга қаратилган “Озод ва обод Ватан, эркин ва фаровон ҳаёт барпо этиш”дек муҳим ғоя илгари сурилди. Маълумки, бундай ҳаётни бозор қонунларисиз, демократик тамойилларсиз қуриб бўлмайди. Бу борада тарихан тараққий этган мамлакатларда самарали ҳаётий механизмлар ишлаб чиқилган. Бироқ, ҳар бир жамият, давлат ўз худудида демократик меъёрларни, унинг барча тамойилларини эълон қиласин, фуқаролар мазкур тамойилларни ўз ҳаётига татбиқ қиласа, уни фаолиятининг мезонига айлантирмаса, улар инсонга тўлалигича хизмат қила олмайди.

Улкан маданий йўқотишларга бой бўлган, турли ижтимоий-иқтисодий системаларнинг ҳалокатли мусобақасини бошдан кечирган инсоният янги асрда бозор муносабатлари ва демократик қадриятларга асосланган ҳукуқий демократик давлат ва фуқаролик жамиятини қуришни ўз тараққиётининг асосий парадигмаси деб эътироф этмоқда. Мазкур ҳолат инсоният ўзини, ўз тақдирини ўзи белгилашини англаб етганинг, маданий-маърифий тараққиётгина унинг бугуни ва эртасининг мазмунини ташкил этишини тан олганинг натижасидир.

Шунинг учун бугунги кунда дунё ҳамжамияти демократиянинг келажаги, унинг ҳаётйилигини ўзини-ўзи бошқариш муссасалари фаолиятини самарали ташкил қилишда деб қарамоқда. “Кучли давлатдан – кучли фуқаролик жамияти сари” деб номланувчи стратегик тамойил асосида ривожланиб бораётган мамлакатимизда бу йўлда қатор ислоҳотлар амалга оширилиб, уларнинг ҳукуқий асоси яратилди. Ушбу муассасалар зиммасига бугун кўпгина вазифалар юклантган, зеро, фуқароларнинг ўз тақдирига бефарқ бўлмаслиги ёки ўзини-ўзи назорат қилиши айнан шу муассасалар доирасида амалга ошади.

Фуқаролик маданиятини юксалтиришда таълим бекиёс ўрин тутади. Бугунги кунда ҳам олдимиизга қўйган асосий мақсад – фуқаролик жамиятини барпо этиш ва уни такомиллаштириш учун Миллий дастурда кўзда тутилган билимли, онгли, тафаккури озод, замонавий дунёқарашли, миллий ва умуминсоний қадриятларга содик инсонларни тарбиялашга янада муҳим эътибор қаратиш ва бу масалалар таълим ислоҳотларининг бош вазифаси деб қабул қилиб, уни амалга оширишдан иборат.

Бироқ бугунги маданий жараёнларнинг глобаллашуви, дунёning тезлик билан ўзгариб бораётган мафкуравий манзараси, ўз таъсирига олишни

\* Ҳасан Аминов – Ўзбекистонда хизмат кўрсатган ёшлар мураббийси.

кўзлаган турли ахборот ва ғоялар хуружи бугун ҳар қандай оммавий кирғин қуроллар кучидан-да каттароқ куч билан ёшларни ўз таъсирига олмоқдаки, бу борада Ўзбекистон каби дунё ҳаритасидан ўзининг мунособ ўрнини топиб бораётган мустақил давлатлар ўз аҳолиси, жумладан, ёшларида қатъий фуқаролик позициясини, турли ёт ғояларга қарши мустаҳкам им-мунитетни шакллантиришдек улкан вазифаларни қўймокда. Бу борада Республикализнинг ҳар бир соҳасида олиб борилаётган ишлар таҳсинга сазовор. Бироқ бугун ўзини-ўзи бошқариш муассасаларининг роли ва ўрни ниҳоятда муҳим бўлса-да, бу борада ечилиши лозим бўлган муаммолар ҳам мавжуд.

Инсониятнинг бутун тарихи, унинг ижтимоий-маданий тараққиёти жараёнини воқеликни бадиий инъикос эттирувчи соҳа – санъатсиз тасаввур этиб бўлмайди. Санъат бугунги кунда кишилик жамиятининг барча қатлами, унинг бутун турмуш тарзига кириб борган дейиш мумкин. Шундай экан, илм-фан тараққиёти кескин ривожланган ҳозирги мураккаб ва зиддиятли қатъий фуқаролик позициясини кенг ёшлар қатламида шакллантириш ва уларда мустаҳкам иммунитет ҳосил қилишдаги энг кучли восита-лардан бири ҳам айнан санъатdir. Санъатга ахлоқийлик руҳида ёндашув, инсоннинг маънавий-руҳий жиҳатдан такомиллашувига энг таъсирчан ва энг самарали восита сифатида унинг имкониятларидан фойдаланиш ҳар қандай жамият учун эҳтиёжга айланди.

Тасвирий санъат маънавий ҳаётда содир бўлаётган ҳар қандай ўзгаришларга муносабат билдиради, давр маънавий муҳитининг ҳамма томонларини ўзида ифода этади, шаклланаётган ижтимоий тафаккурни акс эттиради. Ана шу жиҳати билан у одамлар қалби ва онгига таъсир этади, маълум даражада уни ўзгартириш, такомиллаштириш имкониятига эга бўлади. Унинг ана шу имкониятларидан унумли фойдаланиш бевосита тасвирий санъатни тушуниш, англаш, шу асосда фалсафий тафаккурни такомиллаштириш, инсон эстетик дидини, бадиий савиясини такомиллаштиришга хизмат қиласи.

Тасвирий санъат ўзининг эстетик хислатларига ва эстетик мақомига эга бўлиб, унинг айрим турлари ва жанрлари инсон руҳиятининг ва кечинмаларининг турфа оламларини ифода этади. Унинг мусаввирлик, ҳайкалтарошлиқ, амалий санъат ва бошқа тур ҳамда жанрларида яратилган намуналардаги ифодавий воситалар орқали инсон қалбига таъсир этилади.

Тасвирий санъат фазовий-тасаввурний ҳолат бўлиб, у воқеликни айни таассуротлар орқали ифода этади, уларда тасвиirlanaётган ҳодиса, илгари сурилаётган ғоя ўзига ҳос хусусиятларга эга бўлиб, бу бевосита ҳис-туйғу, қалб кечинмалари орқали инсон оламини забт этади, натижада маълум воқеа ёки бир лаҳзалик ҳолатни тасвиirlаш орқали ҳаракатдаги дунё ва ривожланишдаги ҳаётнинг бутун мураккаблиги, зиддиятлари, қарама-қаршиликларини акс эттириб, ёшларни ғоявий-маънавий тарбиялашга кучли таъсир кўрсатади. Натижада фазовий-тасаввурний тасвир реал воқеликка, конкрет ҳаёт жараёнига таъсир этувчи воситага айланади. Зоро, тасвирий санъат бугунги одамнинг ана шу сифат ва фазилатларини шакллантиради. Демак, тасвирий санъат инсон такомилининг муҳим омили сифатида тобора катта аҳамият касб этмоқда.

Санъатда нафосатни, гўзалликни, инсон қалбининг энг нозик туйғуларини такомиллаштирадиган құдратли хусусиятлар мавжуд.

Айниқса бугунги мураккаб ва зиддиятли бир шароитда, кишиларнинг воқеликни вербал эмас, кўпроқ визуал англаш, ўзлаштириш омиллари-нинг таъсири ошиб бораётган бир шароитда миллий гояга асосланган, миллий ўзликни англаш, дунёда муносиб ўринга эга бўлиш мақсади билан қуроллантиришга қаратилган, ёшларни чукур ўйлашга, фикрлашга, фалсафий тафаккурини такомиллаштиришни кўзда тутувчи миллий тарбияни келажак авлодлар онги ва қалбига сингдиришда энг таъсирчан омиллардан бири – бу тасвирий санъатdir.

Тасвирий санъатнинг бекиёс кучидан, унинг интеллектуал ва ҳиссий-эмоционал имкониятларидан ўзини-ўзи бошқариш институти фаолияти самарадорлигини оширишда унумли фойдаланиш механизмлари сифатида қуидаги йўналишдаги ишларни амалга ошириш лозим.

Ёшларни, айниқса, улар уюшмаган қисмининг бўш вақтини мазмунли ташкил этиш мақсадида ҳар бир маҳаллада ижодий тўгараклар ташкил этиш, “Санъат – шахс маънавиятини бойитиш ва юксалтириш омили” мавзуси доирасида ёзувчилар, шоирлар, санъаткорлар, рассомлар, адабиётшунос олимларни маҳаллаларга таклиф этиш ва улар иштирокидаги учрашув ҳамда давра сұхбатларини ташкил этиш ҳамда республиканинг чекка худудларида ҳалқ рассомлари, ҳалқ усталари билан болалар, ёшлар ва уларнинг ота-оналари учун “Бунёдкор ҳалқим билан мулоқот – ижодим илҳоми” мавзуида мастер-класслар ва ижодий учрашувлар ташкил этиш ўзининг ижобий самарасини беради.

Кейинги бир йил давомида Ўзбекистон Республикаси Президенти Шавкат Мирзиёевнинг маданият ва санъат соҳасини ривожлантиришга қаратилган бир қатор фармон ва қарорлари қабул қилинди. Жумладан, “Маданият ва санъат ташкилотлари, ижодий уюшмалар ва оммавий ахборот воситалари фаолиятини янада ривожлантириш, соҳа ходимлари меҳнатини рағбатлантириш бўйича қўшимча шароитлар яратишга доир чора-тадбирлар тўғрисида”, “Ўзбекистон Бадиий Академияси фаолиятини ривожлантириш ва янада такомиллаштиришга доир қўшимча чора-тадбирлар тўғрисида”ги қарорлари ва ушбу қарорда белгилаб берилган “Ўзбекистон Бадиий академияси фаолиятини ривожлантириш ва янада такомиллаштириш” бўйича 2017-2021 йилларга мўлжалланган чора-тадбирлар дастури, шунингдек, Ўртбошимизнинг Ўзбекистон ижодкор зиёлилари вакиллари билан учрашуви соҳага алоҳида эътибор қаратилаётганини кўрсатмоқда.



## Жаъфар ХОЛМЎМИНОВ

### НИТШЕНИНГ ШАРҚОНА ТУШЛАРИ

(Нитше, Зардушт, Румий иқлими)

#### I

Шарқ ва Ғарб ўртасидаги фикрий ва мағкуравий мубоҳасалар тарихи анча чигал масала. У узоқ ўтмишга, биз биладиган ва тасаввур қила оладиган тариҳдан Искандар Мақдуний замонларига, ундан-да олдинроқ Ахамонийларнинг Қадимги Юнонистонга қилган музafferона юришлари даврига бориб тақалади.<sup>1</sup> Қадимги эронликларнинг Қадимги Юнондан нима олганлиги (табиийки, моддий бойлик назарда тутилмаяпти) номаълум, аммо Искандар Мақдунийнинг Эрон ва Туронзаминга лашкар тортиб, неча юз йиллик аламининг хуморидан чиққанлигидан ташқари, ўша даврларда инсоният маънавий хазинасининг энг ноёб дуру гавҳари бўлмиш “Авесто”ни кўриб, азбаройи ҳasad ва рашидан унинг барча асл нусхаларини ёқиб юбориб, бир-икки нусхасини Юнонистонга жўнатганлиги аник. Шундай экан, қандай қилиб Қадимги Юнон, у орқали бутун Ғарб олами “Авесто” таъмини татиб кўрмаган, деймиз? Агар Европа Уйғониш даврининг биринчи босқичи XIV асрда Италияда бошланган бўлса, нега ундан неча юз йил олдин – IX–XII асрлардаги Мусулмон шарқининг биринчи Уйғониш даври (ана шу масалада ҳам бир оз ноаниқлик мавжуд: биринчидан, бу Уйғониш аслида VIII асрдан бошланади, чунки ислом тарихидаги фикрий уйғониш ва кўтарилиш аслини олганда ана шу асрдан бошланган. Ислом таълимоти доирасидаги фалсафий мактаблар – мұтазилия, ашъария, мотуридия каби калом фалсафаси (ислом теологияси), тасаввуф таълимоти ва ирфон фалсафаси (ислом теософияси) айнан ана шу даврда вужудга келган. Иккинчидан, бу уйғониш бутун Шарқ халқлари ва мамлакатларига эмас, балки фақат Мусулмон Шарқигагина мансуб бўлган) буюк кўтарилиш ва юксалиш даврининг илк босқичи сифатида ҳеч кимнинг хаёлига келмайди? Шарқ доимо Ғарбдан олганларини эътироф этиб келган. Буни Форобий ва Ибн Синонинг фалсафий рисолаларидан ҳам, Ибн Рушднинг Арасту асрларига ёзган шарҳларидан ҳам билса бўлади. Аммо негадир Ғарб олами иложи борича буни яширишга, четлаб ўтишга, билмаганга олишга ҳаракат қилиб келади. Ғарб, ҳа-ҳа демасанг, ҳатто тасаввувф таълимотининг илдизларини ҳам Қадимги Юнон фалсафаси, айниқса,

\* Жаъфар Холмўминов – фалсафа фанлари номзоди.

<sup>1</sup> Болқон ярим оролида жойлашган ва 5 та оролни (Керакира, Лефкас, Кефалиния, Итака, Закинтос) ўз ичига олган Иония шаҳарлари (Юнонистон) милоддан аввалги 546 йили форслар томонидан забт этилган (изоҳлар таржимоннини).

неоплатонизмга ва христианлик эътиқодига олиб бориб тақашга интилади. Чунки, сир эмас, тасаввух таълимотининг сир-синоатлари, ундаги юксак руҳий-маънавий уруж, ақл-идрокларни ўзига мафтун ва маҳлиё этадиган фалсафа юз йиллардан бўён жаҳон аҳлини ҳайратга солиб келмоқда. Ҳолбуки, ушбу мангуликка дахлдор таълимотнинг ислом тафаккурининг Хизр чашмасидан балқиб чиққанлиги ҳеч кимга сир эмас. Шундай экан унга “Ота”, “Она” ва “Бола” қидиришнинг ҳеч қандай ҳожати йўқ.

## II

XIII асрнинг 30 йиллари бошларида папа Григорий IX томонидан эълон қилинган бир қанча ҳужжатлар асосида марказлашган папа инквизицияси (“инквизиция” – “қидирув”) таъсис этилди. Кўп ўтмай, Иннокентий IV томонидан 1252 йилда эълон қилинган булла “Ad extirpanda” инквизицияга расмий ва ташкилий мақом берди. Ушбу мақомга биноан инквизиция тергови жараёнида айбланувчиларни қийноққа солишга расман рухсат берилди. Бу даврга келиб Мусулмон Шарқи мӯғул боскинига учради: Шарқ тамаддунининг қуёши салкам икки юз йил мобайнида – то Амир Темур қудрат ва салтанат тепасига келгунга қадар – зулм, истибод ва жаҳолат булувлари ортида қолиб кетди. Темурийлар салтанати Мусулмон Шарқининг каттагина бир қисмида янги Уйғониш даврини бошлаб берди. Шарқ қайтадан эркин нафас ола бошлади: сиёсий куч-қудратга, марказлашган давлатга, ўзига хос бошқарув тизимиға эга бўлди; ҳалиқ мӯғул зулми ва истибодидан кутулди, ўз эрки ва инсоний ҳақ-хуқуқига эга бўлди; инсоф, адолат, иймон, дин, эътиқод каби тушунчалар яна диллардан тилларга кўчди; маърифат, маъно ва маънавият ўз ҳомийлари ва муҳлисларини топа бошлади; илм-фан, адабиёт, санъат, маданият ривож топди; ҳалқнинг иқтисодий аҳволи олдинги даврга нисбатан анча яхшиланди ва натижада, одамлар шеър ўқийдиган, ундан лаззат оладиган даражага етдилар; энг муҳими, фалсафий тафаккур қуёши яна нур тарата бошлади: файласуфлар, мутасавифлар, орифлар, тарихчилар, адабиётшунослар яна инсониятни ҳайратга солгувчи асарлар яратишга киришдилар. Шарқнинг иккинчи Уйғониш фасли Фарбнинг биринчи Уйғониш даврига уланиб кетди...

Аммо афсуски, бу саодатли давр узоққа чўзилмади: темурий шаҳзодалар ўртасидаги ўзаро низо ва нифоқлар Улуғ Амир Темур асос солган Буюк салтанатни инқироз ва таназзулга учратди. Яна тафаккур қуёши бота бошлади, илм-фан, санъат, адабиёт ва фалсафа машъаллари сўнди...

Ана шундай бир вазиятда Шарқ Уйғониш даврининг инерцияси Фарбни мунаvvар эта бошлади: бу бир пайтлар Шарқда бошланиб, ўзининг юксак даражаларига етган Уйғонишнинг мантиқий давоми эди. Фарб шоир-ёзувчилари ва файласуфлари бир томондан Арасту метафизикаси ва Афлотун идеализмига, иккинчи томондан Форобий, Ибн Сино ва Ибн Рушд фалсафий меросига, шунигдек, бир томондан христиан динининг асослари, патристика, апологетика ва схоластика каби илоҳиётшунослик мактабларига, иккинчи томондан ислом динининг ҳаётбахш ғоялари, ислом рационал тафаккури – калом фалсафаси ва ислом иррационал тафаккури – тасаввух таълимоти ва ирфон фалсафасига мурожаат эта бошладилар.

Натижада, Ғарбда зоҳирان қараганда ғарбона, аммо ботинан қараганда шарқона адабиёт ва фалсафа вужудга келди. Устоз Нажмиддин Комилов нигоҳлари билан қараганда, “Ибн Сино ва Ибн Рушд фикрларини Данте уларнинг лотин тилига ўгирилган асарларидан ўқиб ўрганганд. Шунингдек, шоир ихлос қўйган ғарблар мутафаккирлар – “хамма нарсадан хабардор” Улуғ Алберт, Рожер Бэкон, Сигерий Брабантний, Жилбер де ля Порре, Гвидо Квалканти Шарқ файласуфларининг муҳиблари эдилар” (*Н.Комилов. Тафаккур карвонлари, 1999*).

Мусулмон Шарқи таассуб, бидъат ва хурофот ботқоғига ботди. Ғарб эса тараққиётга юз тутди, Шарқни бўйсиндириш, беҳисоб бойликларига эгалик қилиш пайига тушди. Ғарб инсони моддиётнинг чиркин чангларида лаззатланишни истади. Бойлик, моддий ҳаёт, катта сармоя ва дунёга эгалик қилиш илинжи Ғарб инсонининг ҳис-туйғуларини манфаатлар балчигига ботирди, рухиятини нафс ва фаҳш чирклари булғади. Одамсимон машиналар ёки машиналашган одамлар олами кўкка бўй чўзган буржлар, баланд ва ҳашаматли иморатлар, товусдай товланиб турадиган машиналар билан бирга воқеликка айланди. Аммо инсон рухияти паканалашиб, майдалашиб кетди, ҳис-туйғу чўққилари, тафаккур буржлари дарз кетиб, кулаги бошлади. Қадриятлар, инсон қадр-қиймати маъносизлик манзилида макон топди. Ана шунда яна фалсафа ёрдамга келди: иродиа фалсафаси, ҳаёт фалсафаси, инсон фалсафаси, экзистенциализм (мавжудлик; Хайдеггер фалсафасида инсон ички борлигининг моҳияти) фалсафаси, қадриятлар фалсафаси... бўлиб. Инсониятни тафаккурсизликдан лаззатланиш вабосидан кутқазиш маҳсадида... Аммо Исосини йўқотган, моддийончиликка муккасидан кетган Ғарбни ҳеч қандай бир некбин фалсафа ҳайқириги орқага қайтара олмади: Дарвиннинг биологик, Фрейднинг психоаналитик таълимотлари Ғарбни маймунлар, бўрилар ва вамперлар билан қариндошликка ундали. Яхши “изм”лар ҳам, ёмон “изм”лар ҳам кўпайиб кетди. Аввалига марксизм, сўнг нацизм, ундан сўнг фашизм ана шундай ноинсоний таълимотларнинг маҳсулоти бўлиб майдонга чиқди. Бу вабо инквизиция балосидан ҳам мудҳишроқ бўлиб чиқди. Ғарбда тафаккур қуёши ботиб бўлган эди. Тафаккур қилиш, мулоҳаза юритиш, оддий инсоний муносабатларга риоя қилишдан мосуво дунё яратилди... Хантингтоннинг “Ғарб қуёшининг сўниши”, Патрик Бюкененнинг “Европа ўлими” номли асарларида ҳам ана шу аччиқ ҳақиқатлар ҳақида фикр юритилади...

### III

Шарқ ва Ғарб ўртасидаги фикрий баҳслар ҳакида устоз Нажмиддин Комилов ўз асарлари, тадқиқот ва кузатишларида диққатга молик фикрларни билдириб ўтганлар. Жумладан, у кишининг “Шарқ халқлари маданиятига паст назар билан қараш адабиётшуносларгина эмас, балки европалик файласуфлар, тарихчилар орасида ҳам бирмунча кенг тарқалгандир”, “В.Жирмунский XII-XIII асрларда Андалусияда араб тилидан ўгирилган таржималарнинг Европа маданияти учун аҳамиятини қисқача қайд этсада, испан олимлари Менендес Пидал ҳамда Аниш Паласиоснинг Шарқ шеърияти трубадурлар лирикасига таъсир этди, деган фикрларини шубҳа

остига олади” каби мулоҳазалари ушбу можароларнинг яқин ўтмишда ҳам, хозирги пайтда ҳам давом этиб келаётганини тасдиқлайди. Н.Комилов ушбу нохолис қарашларнинг асоссиз эканлигини, Ғарб Шарқдан уларнинг ўзи ўйлагандан ҳам кўпроқ нарса олганлигини, шу билан бирга, Шарқ ҳам Ғарбдан нималарнидир ўрганганлигини исботлаб берадилар. Бу ҳакда фақат шуни қўшимча қилиш мумкинки, Ғарб – рационал тафаккур – ақлиёт ва реализм рамзи бўлса, Шарқ – иррационализм – ҳиссиёт ва романтизм тимсоли. Бир инсоннинг вужудида ақл билан ҳиссиёт мужассамлашгани каби бу кўхна дунё ҳам ушбу икки унсурсиз мавжуд бўлолмайди. Демак, Шарқ билан Ғарб аслида ушбу икки жараёндан таркиб топган ягона бир вужуд экан. Униси буниси билан, буниси униси билан яхлитлашадиган, мукаммаллашадиган ягона вужуд. Кун тунсиз маъносини йўқотади, қиши бўлмаса, баҳор ҳам оддий бир фаслга айланиб қолади. Инсоният ҳам фақат ақлиётга таяниб, ёки мунтазам ҳиссиётга берилиб яшай олмайди. Хайриятки, Европада ҳам Шарқни эътироф этган, унинг мафтункор ва жозибали дунёсига кўнгил қўйган соғлом фикрли инсонлар олдин ҳам бўлган, ҳозирда ҳам бор. Данте, Гёте, Байрон, Ч.Диккенс, М.Арнолд, С.Моэм, Т.С.Элиот, М.Лермонтов, С.Есенин, Л.Арагон каби улуғ шоир ва ёзувчилар, Г.Этте, А.Арберри, Э.Фицжералд, И.М. Катарский, А.А.Фет, Н.Г.Чернишевский, М.Л.Михайлов, В.А.Жуковский, Н.Конрад, И.Ю.Крачковский, Е.Э.Бертельс, И.Брагинский, Ж.Сартон, Ж.Томсон, В.Бартолд, И.А.Орбели каби бир қатор европалик йирик таржимон ва олимлар Шарқнинг бой ва қадимий тарихи, маданияти, тамаддуни, адабиёти ва санъатига юксак баҳо бердилар, унинг тарғиботчилари ва муҳибларига айландилар. Ушбу рўйхатни Гегел ва Бэкон каби бир қатор европалик буюк файласуфларнинг номи билан ҳам давом эттириш, тўлдириш мумкин. Улуғ олмон мутафаккири Фридрих Нитше (1844-1900) эса ҳам файласуф сифатида, ҳам шоир ва ёзувчи сифатида ана шу силсилада алоҳида ўрин тутади.

## IV

Ғарб мутафаккирлари сир-синоатларга бой ва афсонавий Шарқдан ҳамиша узок ўтмишда қолиб кетган инсоний ўзликни, сохта ва риёкорона илтифотлардан, ҳар қандай гараз ва моддий манфаатдорликдан холи бўлган оддий инсоний муносабатларни, айниқса, самимият ва муҳаббатни излаганлар.

Ўтган асрда яшаб ижод этган машхур инглиз ёзувчиси Сомерсет Моэм (1874-1965) Шарқий ва Жанубий Осиёнинг Ҳиндистон, Сингапур, Бирма, Хитой, Малайзия ва Индонезия каби гўзал ҳамда афсонавий мамлакатлари бўйлаб турли-туман саргузаштлар ва таҳликали вазиятларга бой сайру саёҳатларга чиқиб, шундай деган экан: “Цивилизациялашган жамиятда шахснинг индивидуаллиги йўқолиб кетади, чунки одам ҳар қадамда ўнлаб қонун-қоидаларга, тартиб-интизомга бўйсунишга мажбур. Маданият юзимизни беркитадиган ниқобга айланади. Бу ердагилар эса жамиятга мослашиш учун юзига никоб тақмасди. Улардаги индивидуаллик аниқ кўринарди” (С.Моэм. Ёмғир. Ҳикоялар. Инглиз тилидан А.Отабоев таржимаси, 2014.). Осиё ўлкаларида бўлиб, Шарқ ҳалқлари турмуш тарзини

Ғарб мамлакатлари маданияти билан таққослар экан, Моэм Европадаги катта шаҳарларда яшайдиган одамларни қопга тўлдирилган тошларга ўхшатади. Бир-бирига ишқаланаверган тошларнинг ҳаммаси бир хил силлиқ ҳолатга келиб қолади. Таити, Бирма, Индонезия каби тамаддундан узоқ мамлакатларда яшаётганларда эса шу “қирралар” силликланиб, йўқолиб кетмайди. Уларнинг характеристида инсон табиатига хос хусусиятлар анча яққол кўринади”. Кейинчалик, ўзининг Европадаги ҳаёти қанчалик қизиқарли туюлмасин, дўст-ёрлар, улфатлар ва гўзал аёллар даврасида қанчалик роҳат-фароғат ва айш-ишратда ўтаётгандек кўринмасин, аслида анча чегараланганди ва зерикарли бўлганини мардонавор эътироф этган адид, “Шарқ тематикасига мурожаат қиласкан, Ғарб босиб ўтган барча йўллардан холи одамлар ҳаётини акс эттиришга киришади ва жавобни, ҳақиқатни ажнабийлар тажрибасидан излайди. Адид ҳикояларида Шарқ дунёқарашининг янгилиги европалик одам характеристидаги анъанавийликка қарши қўйилади. Таити, Самоа, Бирма ёки Ҳиндистонга келиб қолган Моэмнинг ғарблик персонажлари бу мамлакатлардаги маданиятга мослашишга қийналишади. Адид буни Ғарб ва Шарқнинг бир-биридан узоқлашиб, икки хил дунёга айланиб қолгани билан изоҳлади. Адид ҳикояларидаги кўпчилик қаҳрамонлар бу номаълум мамлакатларда қолиб кетади. “Бу ерга келгунимча менда қўнгил борлигини билмаган эканман”, – дейди улардан бири”. Моэмдан ўттиз йил олдин оламга келган ва ундан олдинроқ оламдан кўз юмган Фридрих Нитше “Зардушт таваллоси”да биринчилардан бўлиб Шарқ факторини ўртага ташлади. Бу асар орқали у шарқлашган Ғарб мутафаккири сифатида тафаккур майдонига келади: унда у Зардушт билан сухбат қуради, уни ўзида, ўзини эса унинг сиймосида қўради. Унинг тасаввуридаги Зардушт реал ҳаётдан, инсоният оламини ўраб олган табиатдан, борликдан айро эмас, балки унинг ажралмас бир бўлаги, таркибий бир қисми, борлиқнинг чексиз-чегарасиз, таг-туби номаълум денгизига шўнғиб, унда эркин суза олган, тубидан ҳикмат жавоҳирларини кўлга кирита олган Аъло одамдир.

V

Буюк немис экзистенциалист ёзувчиси ва файласуфи Фридрих Нитше “Зардушт таваллоси”да Телба образи билан алғов-далғов тушлар кўраётган Ғарбнинг XX аср инсонини бедорликка, хушёрликка даъват этди; тафаккурсизликнинг лойқа дарёсида хас-хашақдек шиддат билан оқиб кетаётган оломонга имдод қўлини чўзган, кибр-ҳаво, нафс ва зўравонлик зулматлари қоплаган Ғарб осмонини қўхна Шарқ қуёши – донишманд Зардушт тафаккури билан чароғон этмоқчи бўлди. Шу сабаб ноанъанавий фикрлари билан қўзбўямачи, зоҳирпаст анъаначиларнинг айшини бузган Мансур Ҳаллож, Ибн Сино, Ибн ал-Арабий, Айнулқузот, Насимий, Машраб, Бруно, Коперник... каби тафаккур осмонининг қуёшларидек ботишига маҳкум этилди. У ўзининг “Фожианинг мусиқа руҳидан туғилиши”, “Инсонга хос, ҳаддан ташқари инсонга хос”, “Йўловчи ва унинг сояси”, “Кувноқ билимлар”, “Зардушт таваллоси”, “Аччиқ ҳикмат”, “Яхшилик ва ёмонликнинг нариги тарафида”, “Ахлоқнинг келиб чиқиши”, “Санамларнинг оқшоми”, “ЕССЕ НОМО” ва “Дажжол” (Антихрист) каби асарлари

билин аввал Европани, кейинчалик Осиёни ҳайратга солди. Аммо яна бир муроҳаза: Шарқда Мансур Ҳаллож, Айнулқузот, Умар Хайём, Насимий ва Машрабга бўлган муносабат ўта зиддиятли бўлиб келганидек, Ғарбда Нитшега бўлган муносабат доимо айқаш-уйқаш, телба-тескари бўлиб келгани ҳам сир эмас. Жумладан, абсурд ва исёнкор одам фалсафасини олдинга сурган XX аср машхур француз экзистенциалисти ва файласуфи Албер Камю (1913-1960) “Исёнкор одам” асари устида ишлаш жараёнида шундай деган эди: “Европанинг ёвуз даҳолари номини олган файласуфлар бор, уларни Гегел, Маркс ва Нитше дейишади... Биз уларнинг Европасида, улар яратган Европада яшаяпмиз”. Камю “Немис дўстимга мактуб”ни эълон қилгач, Томас Маннга ўхшаган кўпгина интеллектуалист ёзувчилар Нитшенинг гўзал афоризмларини баҳолашга ва уни ёқлашга киришадилар. Камюнинг Нитшега бўлган салбий муносабати кейинчалик ижобий томонга ўзгаради ва у ўзининг машхур асарларидан бири – “Сизиф ҳақида асотир”ини маълум даражада Нитше қарашлари таъсири остида яратади. Агар Нитше инсониятга йўқолиб кетган “абадий қайтиш” ҳақидаги миф – асотирни таклиф этган бўлса, Камю “Сизиф ҳақидаги асотир”да ўзликни тасдиқлаш ҳақидаги мифни ўртага ташлайди.

Фридрих Нитше “Зардуст тавалло”сида “ўзини инсоният имкониятлари чегарасидан ташқарига чиққан онгни ўзида мужассамлаштирган Зардуст билан тенглаштирган”. У инсоният ва ҳаётга душман бўлган нарсалар, кимсаларни йўқ қилишга, йўққа чиқаришга тайёр турувчи, нажоткор, қудратли, матонатли, фидокор инсон идеали – Аъло инсон тимсолини яратишга интилади. Мусулмон Шарқида Комил Инсон тимсолини яратган мутафаккирлар – Ибн ал-Арабий, Фаридиддин Аттор, Жалолиддин Румий, Азизиддин Насафий, Ҳофиз Шерозий, Абдураҳмон Жомий, Алишер На-воий, Мирзо Бедил... сингари. “Қаранг, – деб ёзади Нитше, – мен сизларга аъло одам ҳақида таълимот беражакман”.

Аъло одам заминнинг мазмуни. Сизнинг иродангиз айтсин “Майли, аъло одам заминнинг мазмуни бўлсин!” (*Ф.Нитше. Зардуст тавалоси. Рус тилидан И.Фафуров таржимаси, 2007*). Нитшенинг Аъло Одами – кайхоний одам. Унда биз ҳам “Авесто”да улуғланган Инсон, ҳам тасаввуф алломалари – Мансур Ҳаллож, Боязид Бистомий, Айнулқузот Ҳамадоний, Ибн ал-Арабий, Фаридиддин Аттор ва Румий тасаввур этган Комил Инсон тимсолини кўрамиз. Олий Инсоннинг зардустийлик ва ислом фалсафий тафаккуридаги тимсолларининг бир-бирига қоришиб кетган ҳолатини мушоҳада этамиз.

Сиёсатшунос ва жамиятшунос олим Нарзулла Жўраев Зардуст ва Нитше ўртасидаги алоқадорлик ҳақида фикр юритар экан, “асар услубида Зардуст билан Нитшенинг тенглиги яққол кўзга ташланади. Дарҳақиқат, муаллиф илоҳий шахс билан ўзини тенг кўяди, ўзаро мuloқotda бўлади, кўп ҳолларда Зардуст номидан гапиради, Зардуст ғояларини ўзининг қалб кечинмалари билан синтезлаштиради. Гарчи, улар туғилган макон турли минтақаларда жойлашган, жуда улкан, маҳобатли тарихий давр уларни ажратиб турган бўлса-да (улар яшаган давр қарийб уч минг йиллик масофа билан фарқланади), қарашлар уйғунлиги фавқулодда ҳодиса сифатида, айни пайтда ўта табиий ҳолатда юзага келади. Бу шу даражада табиий, шу даражада мусаффо ва гўзалки, уни бир-биридан ажратишга интилиш ёки

бир-биридан айро ҳолда тушуниш жиддий хатоликка олиб келади. Асарда муаллиф Зардушт билан замондошдай, яқин дўстдай ёнма-ён туриб гаплашади. Ўзининг ғояларини тўғридан-тўғри Зардушт орқали тушунтиришга ҳаракат қиласди ва бунга ўта табиийлик билан эришади”, – деган ҳаққоний хуносага келади (*Н.Жўраев. Тахайюл, тасаввур, тафаккур, 2015*). Муаллиф Нитше тафаккурини таҳлил қилар экан, унинг “баён услубида, фикрни ифодалаш шаклида Европалик донишмандлар услубидан кўра кескин ва ёркин ўзига хослик бор”, – дейди ва буни қуйидагича изохлади: “Биринчидан, у ҳар қандай оғир, залворли фикрни, ақлни остин-устун қилиб юборадиган гапни жўшқин ҳиссиёт ва қайнот эктирос билан йўғрилган ҳолда баён этади. Иккинчидан, у бевосита ва тўғридан-тўғри Шарқ феноменига мурожаат қиласяпти, унинг оламида яшяпти. Ўзини ўзи танлаган, ихлос қўйган Зардушт тимсолида кўрмокда. Шунинг учун Нитшенинг услуби “Авесто” матнларининг услугуга жуда ўхшайди, яқин туради. Нитшега “Авесто”нинг таъсири шу даражада кучли бўлганки, ҳатто фикрни баён этиш услублари ҳам бир-бирига ўхшаш”.

## VI

Нитшенинг “Худо ўлди”, деган машҳур ибораси бор. “Нитше “Худо ўлди” иборасини биринчи марта “Зардушт таваллоси”ни ёзмасидан олдин, 1882 йили нашр этилган “Қувноқ билимлар” асарида кўллаган. Унда шундай келтирилади: “Куппа-кундуз куни чироқ ёқиб, бозормайдонда тентираганча: “Худони қидиряпман! Худо қаерда?” – дея тинимсиз қичқирган телба ҳақида эшиятганмисиз? – Унинг атрофида тўпланганларнинг кўпти даҳрийлар бўлиб, телбани майна қилишарди. Худони йўқотиб қўйдингми? – сўради улардан бири. Худо ёши боладай бўлса, адашиб қолгандир-да, – сўз қотди бошқаси. Балки беркиниб олгандир? Ёки биздан қўрқяптишимкан? Сувга тушиб, чўкиб кетган бўлса-чи? Ё кўчиб кетдимикан? – усти-устига шарақлаб кулишарди. Шу пайт телба тўпланганлар орасига отилиб кирди-да, кўзини чақчайтириб ҳаммасига бир-бир қарай бошлади. “Худо қани? – ҳайқирди ў. – Биласизларми, сизларга нима демокчиман! Биз Уни ўлдирдик – сиз ва мен! Биз унинг қотилимиз!”

Илк ўрта асрлар Мусулмон Шарқида Мансур Ҳалложнинг ислом оламини ларзага келтирган “Анал-Ҳак” деган ҳайқиригини эслатадиган ушбу таъбир ҳам ўз навбатида ноанъанавий, кулоққа эриш туюладиган, иймон-эътиқод ахли учун қуфрандаги ўзга нарса эмас эди. Юз йилдан буён Ғарб ва Шарқда анчагина мунозараларга сабаб бўлиб келаётган, “Қувноқ билимлар” асарининг “Телба” номли 125-қисмида келтирилган ушбу таъбир ўзбек олими – Нарзулла Жўраев томонидан ҳам ўзига хос талқинини топади: “Бу билан Нитше, биринчидан, инсоният ҳали баркамол эмас, у ҳали тарбияга эҳтиёж сезмоқда. Одамларда Эътиқод, Иймон, Адолат, Ҳақиқат туйғулари заиф. Аксинча, разолат, қабоҳат, мунофиқлик ва эътиқодсизлик инсон қонида кўпирмокда, демоқчи. Иккинчидан, телба воеаси Нитше фалсафасидаги Олий одам тушунчасининг ўзига хос, бетакрор ифодаси. Бу ғоятда оғир, изтиробли руҳий ҳолат. Кишини чуқур ўйлашга, фикрлашга даъват этадиган, инсон ҳақидаги тасаввурларни остин-устун қиласидиган, қалбингни ларзага

солиб, ҳиссий бўхронлар ва руҳий тӯғонлар уйғотадиган драматизм. Балки фожеадир! “Худо ўлди!” дейишнинг ўзи қанчалар оғир. Бироқ, Худо билан бандаси, Олий хилқат билан инсоният ўртасидаги масофа одамларнинг чекланган дунёкараши, мураккаб феъл-автори, суст эътиқоди, нотўқис ахлоқий ва маънавий даражаси туфайли анча узоклашиб кетмаяптимикан?”

Тасаввур қилинг: “Худо ўлди!” дейишнинг ўзи даҳриёна сўз. Аммо бу сўзни айтиётган Телбанинг ёнида ундан-да даҳрийроқ кимсалар Худони масҳаралаб туришипти. Нитше бу билан нима демоқчи? У даҳрий бир файласуфми? Муаллиф бир жойда буни инкор этади ва бизнингча ҳам шундай бўлиши керак: “Умуман олганда, телба қандай одам? У Нитше тасаввурнида ростдан ҳам ақли заиф одамми? Балки бундай эмасдир. Чунки у ҳайратомуз даражада, тасаввурга сифмайдиган ҳолатда Олий ҳақиқатни изляяпти, жамиятдан, атрофдаги одамлардан нафраланаяпти. Уларнинг Олий ҳақиқатдан узоклашаётганидан дарғазаб. уни йўқотиб, аникрофи, унутиб қўйган кишилик оламининг бедаволигидан изтироб чекяпти” (*Н.Жўраев. Тахайюл, тасаввур, тафаккур, 2015*). Юқоридаги талқинга қараганда, бу ерда Телба – хушёр ақл ва бедор қалб тимсоли. Аслида, унинг атрофидаги одамлар – ҳақиқий телбалар, ҳақиқий даҳрийлар. Бу билан Телба, яъни Нитшенинг Аъло Одами айтмоқчи: инсоният ўлди, инсонийлик ўлди! Ўлган инсониятда Худо бўладими? Ахир Худонинг мавжудлигини англайдиган, тасдиқлайдиган мавжудот ҳам инсон-ку! Қалби, онг-шуури, тафаккури ўлиб бўлган инсонда, албатта, Худо ҳам мавжуд бўлмайди-да!

## VII

Фридрих Нитшенинг Телбаси “Худо ўлди！”, деб бонг уради, нафс, шаҳват, мол-дунё, кибр-ҳаво, тафаккурсизлик, онгсизлик, жаҳолат, зўравонлик ботқоғига ботган, инсоний қиёфасини йўқотиб бўлган кимсаларни тўғри йўлга солмоқчи, уларни инсоф-диёнатга чакирмоқчи бўлади ва шунда зулмат қоплаган бу муҳитда “*Куппа-кундуз куни чироқ ёқии фурсати келмадими?*”, деб ҳайқиради. Нитше ўзининг “Худо ўлди!” деган ибораси билан қайсиdir маънода Мансур Ҳалложнинг “Мен Худоман!” деган таъбирига яқинлашса, “*Куппа-кундуз куни чироқ ёқиб, бозормайдонда тентираганча: “Худони қидиряпман! Худо қаерда?”* деган сўzlари билан Мавлоно Жалолиддин Румийнинг “Девони Кабир”даги мана бу сўzlарини бир оз ўзгартирилган шаклда такрорлаётгандек:

*Дий шайх бо ҷароғ ҳамегашт гирди шаҳр,  
К-аз дебу дад малуламу инсонам орзуст*

Яъни: У куни шайх чироқ қўтариб, шаҳарни айланар экан дейди: “*Девлар ва инс-жинслардан бездим, бир инсонни кўриши орзусидаман*”. Албатта, бу баҳсли ҳолат. Бу фикр Шарқ мутафаккирларидан олинган бўлиши ёки Нитшенинг ўз муроҳазаси бўлиши ҳам мумкин. Аммо шунинг ўзи Ғарб ва Шарқ олами аслида бир-бирига бегона эмаслиги, қачонлардир ягона бир вужуд бўлганлигига мисол бўлолади. Энг муҳими, “кундузи чироқ ёқмоқчи бўлаётган” инсон – Нитшенинг “Телба”си, яъни ўша Аъло одам

Ғарбда тафаккур қуёшининг ботиб бораётгани, фалсафа машъалининг сўниб бораётганини бутун вужуди билан англаган, идрок этган ва бундан қаттиқ изтироб ва даҳшатга тушган одам. Бу одам бугунги даврда – глобаллашувнинг ҳеч қандай қудратли куч олдини ололмайдиган цунамилари, тўфонлари, зилзилалари дунёни ларзага солаётган даврда ҳам огоҳлик бонгини уриб юрибди...

Нитшенинг Телбаси – исёнкор одам. Унинг исёни – фалсафий исён, тафаккур ғалаёни, ўз-ўзини рад этаётиб, ўзлигини тасдиқлаётган ақл эгасининг исёни. Албер Камю “Исёнкор одам”ни шундай таърифлайди: “Исёнкор одам” дегани нимани англатади? Бу – “йўқ!” дейдиган одамдир. Аммо у инкор этаётиб, бу одам ўзининг биринчи ҳаракатидаёқ “ха!” дейдиган одам эканлигини ҳам рад этолмайди”. Нитшенинг девонаси аслини олганда буюк бир файласуф тимсолидир. Нитше ўзининг “Фалсафа, маърифат ва ҳақиқат” номли асарида файласуф сиймосига хилма-хил чизгилар чизади. Жумладан, шундай ёзади: “Файласуф – замон чархини тўхтатадиган тормоздир. Файласуфлар буюк бир хавф-хатар юзага келган даврларда зохир бўладилар. Замон чархи ўта катта суръатлар билан айланётган бир паллада улар санъат билан бирга асотирнинг ичидаги бўш жойга қадам кўядилар. Лекин ўлар ўз даврларига қараганда анчагина олдинроқдадирлар”.

Фридрих Нитшенинг мастонавор, девонасифат, исёнкор ва ғалаёнли рухияси Шарқ мутафаккирларининг кўпчилигига бот-бот учрайдиган ҳолат бўлган. Бунга Боязид Бистомий, Мансур Ҳаллож, Умар Хайём, Айнулқузот Ҳамадоний, Фаридуддин Аттор, Жалолиддин Румий, Насимий, Машраб каби буюк мутафаккирларнинг ҳаётини мисол келтириш кифоя. Бу ҳолатни тасаввуф аҳли юмшатиш ва зохирпараст шариатчилардан жон сақлаш максадида “шатҳиёт”, яъни, илоҳий жазба, кучли руҳий ғалаён ва бехудлик ҳолатида ихтиёрсиз равища айтилган, шунинг учун ҳам узрли бўлган сўзлар, деб изоҳлаганлар. Масалан, Боязид Бистомийнинг “Субҳани, субҳани, ма аъзам шаъни”, яъни, “Улуғланганман, улуғланганман, менинг шаъним улуғдир” деган машҳур сўзлари ана шундай “шатҳиёт”лардан биридир.

## VIII

Мавлоно Жалолиддин Румий фалсафани унчалик хуш кўрмаган. Унинг ўзи буни “Маснавийи маънавий”да ҳам, “Девони кабир”да ҳам таъкидлаб ўтган. Аммо қандай фалсафани? Мана буниси муҳимроқ. У Мутлақ Вужуднинг борлиқдаги жилвасини мушоҳада этолмайдиган, илоҳий ишқ жазбасидан холи, Инсоннинг гўзал ва айни пайтда зиддиятларга тўла ботин оламидан бехабар, сўқир, хис-ҳаракатсиз, ишқ-муҳаббатсиз, Гёте айтганидек, қуруқ алжираш-валжирашлардан иборат бўлган, олам ва одам моҳиятини англашга ожиз фалсафани рад этади. Шунинг учун бўлса керак, у ҳам Нитшенинг Телбасига ўхшаб, ожиз, нотавон, ҳиссиз-ҳаракатсиз оломон дастидан фарёд чекади:

З-ин ҳалқи нуришикояти гирён шудам малул,  
Он ҳою ҳўю наъраи мастонам орзуст.  
Гўётарам зи булбул, аммо зи рашки ом,  
Муҳр аст бар даҳонаму афгонам орзуст.

**Яъни:** *Бу йиғлоқи, фақат ишикоят қилишидан боиша нарсани билмайдиган бу халқдан дилгир бўлдим. Мастларнинг наъраю фарёдларини эшитишини хоҳлайман. Булбулдан ҳам яхшироқ сайрайман, аммо омманинг рашику ҳасадидан оғзимга муҳр урганман ва фарёд этишини (овозимни чиқаришни) орзу қиласман.*

Нитшенинг “Зардушт таваллоси” аслида Зардуштнинг эмас, балки Нитшенинг таваллолари, ўз-ўзига нисбатан исёнлари, бир умр унинг ичини кемириб юрган кўнгил ғалаёнлари ва дарду ҳасратларидир. Бу дарду ҳасратлар ичида ҳаёт ва ўлим баҳси алоҳида ўрин тутади. Нитше ҳам Румий сингари лаззатбахш лаҳзаларга асир бўлмасликни, алдоқчи зоҳирий гўзалликларга гирифтор бўлмасликни тавсия этади: “Агарда сиз ҳаётга кўпроқ ишонганингизда эди, унда сиз лаҳзаларга ўзингизни камроқ бағишилаган бўлардингиз... Ҳар томондан ўлимни тарғиб қилувчиларнинг саслари эшитилмокда; ер ҳам ўлимни тарғиб қилиши керак бўлганлар билан тўлди”.

Тасаввуф таълимотида ва айниқса, Румий ижодида нафсга қарши курашиш масаласи қайта-қайта ўртага ташланади. Нитше ҳам нафсга берилмай яшашни олий баҳт деб атайди: “Мен учун энг олий баҳт шундаки, – дейди ўзига ўзи сизнинг кўп ёлғончига чиқкан руҳингиз, – ҳаётга тили осилган итдай эмас, балки хирсу ҳавога берилмай қарашибир”. Ҳаёт ҳақида фикр юритар экан, Нитше иродада фалсафасига ҳам алоҳида эътибор қаратади. Унинг назарида, ҳаёт ва иродада тушунчалари уйғун нарса, чунки бири мавжуд бўлган жойда иккинчиси ҳам мавжуд бўлиши лозим: “Фақат ҳаёт бор ердагина иродада ҳам бор; лекин бу ҳаётга иродада эмас, бироқ – сенга шундай ўргатганман – бу хукм суриш иродасидир! Ҳаётнинг ўзидан кўра ундан юқорида яшаш кўпроқ қадрланади”.

Инсоният тафаккури асосан учта фалсафий билиш усули – мантиқ ёки мантиқий фикрлаш, диалектика ёки диалектик тафаккур, трансценденция ёки интуитив билим билан чегараланган. Фалсафий тафаккур тарихида “гарчи мантиқ ва диалектика ҳам зарур бўлса-да, улар қуйи поғона вазифасини бажаради холос, юқори поғонани эса трансценденция эгаллайди. Трансценденция – файласуфнинг ғоят юксак фикрлаш салоҳиятидан далолат бўлиб, у барчага ҳам насиб этавермайди. Ҳатто Арастудек мутафаккирда ҳам мантиқ ва диалектика кучли бўлса-да, интуиция борлиги кузатилмаган” (*Қуёшини тўсиб қўйманг! Файласуф олима Ш.Қаҳҳорова билан сұхбат. “Тафаккур” журнали, 2015/4.*). Румий ботин сир-асрорининг кошифи, хис-ҳаяжонлар океанининг ғаввосидир. Унинг назарида “ботиний туйгулар зоҳирий сезгилардан кучлироқдир. Зоҳирий сезгилар йўлини тўсиш мумкин, лекин ботиний туйгулар йўлини тўсиш имконсиздир”. У бекарор ва беором рух тилидан сўйлайди. Ушбу доимий безовта ва бесаранжом руҳият унинг барча баҳс мавзуларида ўз аксини топган. Айниқса, ҳаёт ва ўлим баҳсида.

Румий тафаккури инсон руҳиятининг диалектикасини очиб берадиган тафаккурдир. У “Маснавий маънавий”да ҳам, “Девони кабири Шамс”да ҳам ана шу диалектикани тасвиirlаб беради: *Ҳосили умрам се сухан беш нест /Хом будам, пухта шудам, сўхтам. Яъни: Умримнинг самараси уишиб учта сўздан ўзга нарса эмас: хом эдим, пишидим, куйдим.*

Румий назарида ҳаёт ва ўлим деган тушунчалар ўртасида ҳеч қандай чегара йўқ. Аксинча, ўлим ҳам ҳаётнинг давоми саналади. Четдан қараганда

бу икки нарса икки мустақил ва бир-бирига зид ҳолатларга ўхшаб кетади. Аслини олганда улар битта ҳолатнинг турлича манзаралари дидир. Улар измайиз, ҳеч қандай узилишсиз, бир-бири билан алоқадорликда содир бўладиган ходисалардир:

*Жанозаам чу бубиний, магў фироқ, фироқ,  
Маро висолу мулоқот он замон бошад.  
Маро ба гўр супурдий, магў видоъ, видоъ,  
Ки гўр пардаи жамъияти жинон бошад.*

Яъни: *Агар жанозамни кўрсанг, жудолик деб ўйламагин. Ўша замон (ҳолат)да мен учун висол ва мулоқот онлари юз беради. Мени қабрга қўйганда алвидо демагин, чунки қабр жаннат аҳлиниң пардасидир.*

Румий ўлимни маъшуқани кутиб олгандек катта қувонч билан қаршилаб олишни талқин этади. Жумладан, “Маснавийи маънавий”да дорга осилаётган Мансур Ҳаллож айтган сўзларни келтиради: *Уқтулуни, уқтулуни, ёсиқот / Инна фий қатли ҳаётан фий ҳаёт. Яъни: Ўлдиринглар, ўлдиринглар. Менинг ўлимим (қатлим)да ҳаёт ичра ҳаёт мавжуд.*

Зотан, бу ҳолат унинг назарида рухнинг қайта туғилиши дидир. Шу нуқтаи назардан қараганда, Румий ўртага ташлаган ҳаёт ва ўлим баҳсини Ғарб абсурд фалсафасидаги “ўлим мантиқсиз ҳаётдан қутулишнинг ягона йўлидир” тушунчаси билан тенглаштириб бўлмайди. Абсурд фалсафасидаги ўлим – бу нуқта дегани. Бошқача айтганда, ҳаётнинг ўзи абсурд – маъносиз ва мантиқсиз нарса, шундай экан унинг давоми ҳам мантиқсизликдан ўзга нарса эмас. Албер Камюнинг назарида Инсон табиатдан, Коинотдан узилган мавжудот. Коинот эса жонсиз, мавхум нарса. У ҳеч қачон Инсонни тушунмайди, Инсон ҳам у билан боғлиқ эмас. Натижада, Инсон яккалиниб, ёлғизланиб қолади ва ҳаёт унинг учун аянчли, зерикарли манзарага айланади. Лекин Инсон зарурат ва мажбурият юзасидан ана шу бемаъни ҳаётни яшаб ўтиши шарт. Шу ўринда Мавлоно Румийнинг “Маснавийи маънавий” сидаги Садри жаҳон вакили билан Камюнинг “Бегона” сидаги Мерсо образларини таққослаш кифоя. “Бегона” асарининг бош қаҳрамони – Мерсо “жамият билан ички алоқаларини узиб, инстинктларга итоат қилиб яшайди. У деярли ғайришуурый ҳолда одам ўлдиради” (*А.Сайдов. Альбер Камю – Ғарбнинг вижидони / А.Камю. Бегона, 2016*). Садри жаҳон вакили эса тухматга учраб, Бухородан қочиб кетади ва бир муддат яшириниб юради, аммо охир-оқибат ишқ савдоси (Бухорога ва Садри жаҳонга бўлган муҳаббат, садоқат) бошидан ошиб, уни яна Бухорога қайтиб келишга ундейди. Дўстлари уни Бухорода муқаррар ўлим (шоҳнинг жазоси) кутаётганини, у ерга қайтиб бормасликни маслаҳат беришади. Аммо вакил оқибат нима бўлишини била туриб, ўз ихтиёри билан Бухорога қайтади ва ўлимни бўйнига олади. Мерсо эса ҳаётда фақат ўзи учун яшайди. Бошқача айтганда, у европача индивидуализм ва эгоизмнинг типик вакили. У Садри Бухоронинг вакилидан фарқли ўлароқ, ҳеч кимни севмайди, на бирон яқин инсонини, на она ватанини. Ҳатто онаси вафот этганда қабр устида унга таклиф этилган қаҳва ва сигаретни ҳам рад этмайди, бамайлихотир қаҳвасини ичиб, сигаретини чекади. Унинг одамларга бўлган меҳр-муҳаббати аллақачон сўниб бўлган. Ноҳақ тухматга учраган Садри

жаҳон вакили эса бутунлай унинг акси: у Садри жаҳонни, Бухорони жондилидан яхши кўради, уларсиз яшашни ўлим, улар бағрида ўлишни эса ҳаёт деб билади. Ҳатто севган ва идеал деб билганлари унга қилинган тухматни чин деб билган бўлсалар-да, у барибир уларни яхши кўраверади ва бунинг учун афсусланмайди ҳам. Садри жаҳон вакили қалб одами, у оламга қалб кўзи билан қарайди, қалб кўзи билан идрок этади. Тухмат ўз ишини қилиб бўлган, вакил ўзини оқлашга ожиз. Ҳукм эса қатъий: у қатл этилиши керак! Энг қизиги, вакил ўзини оқлашга харакат ҳам қилмайди. Унинг фақат биргина муддаоси бор: бир бор бўлса-да, хожаси – Садри жаҳонни ва ватани – Бухорони кўриш! Вакил Садри жаҳонни ва Бухорони кўриш учун бир пайтлар уни қочишга унданаган кўркув хиссини енгиб, бошини баланд кўтарганча Бухорога кириб келади. Унинг учун жондан азиз кишиси олдидা ўлиш – ҳаётнинг айни ўзи. Аммо Мерсо бутунлай ёлғизланиб қолган, у ўзига ҳам, ўзгаларга ҳам кераксиз киши. Ҳаёт унинг учун бутунлай бемаъни ва мантиқсиз нарсага айланаб бўлган. У хиссиз, жонсиз машинага ўхшайди, қаёққа бориш ёки нимага бориб урилишнинг фарқи бўлмаган машинага. Фақат ўлимгина уни ана шундай маъносизлик ва абсурддан кутқариши мумкин. Унинг учун ягона йўл – пуч ва маъносиз ҳаётга туман ва бўшлиқ билан қопланган ўлим билан якун ясаш. Лекин у орзу қилаётган ўлим Румий назарда тутган ҳаётнинг абадий ва чексиз давоми эмас, балки унинг мутлақ чегараси, ниҳоясидир.

Нитшенинг ҳаёт ва ўлим ҳақидаги қарашлари Камюникидан нафақат кескин фарқ қиласди, ҳатто аксинча, Мусулмон Шарқининг ўзига хос “экзистенциализм”и – тасаввуф таълимоти foяларига ўхшаб ҳам кетади: “...Сизнинг эзгулигинизнинг қоидаси шундай бўлсин: “Сен ўз-ўзингни ўлдиришинг керак! Сен ўзингни ўзингдан ўғирлашинг керак!”. Тасаввуф улуғлари, жумладан, Румий нигоҳида инсон то ўзлиги – ўзининг “Мен”идан воз кечмаса, Ёрга – Мутлақ Ҳақиқатга етишолмайди. Бир ошиқ, – дейди Румий, – ҳар куни Дажла дарёсини кечиб ўтиб, соҳилнинг нариги томонида ўз Ёрининг висолига етарди. Кунлардан бир куни дарёнинг қоқ ўртасига етар экан, баногоҳ Ёрнинг юзидаги доғ эсига келади ва ғарқ бўлади. Румийдаги Садри жаҳон вакилининг ватанини соғиниб, ўз ўлимини бўйнига олган ҳолда Бухорога қайтиб келиши ҳам, ошиқнинг девонасифат Дажла дарёсини кечиб Ёр васлига етиши ҳам таслим ва фано даражасининг олий намунаси эди. Аммо кимнинг кўнглида Ёрнинг ниҳоясиз камоли ва жамолига нисбатан заррача бўлса-да, шак-шубҳа ўйғонса, албатта ўша ошиққа ўхшаб мақсад соҳилига етолмайди.

Нитше ҳам Румий ва бошқа Шарқ мутафаккирлари каби одамларга ҳаётни севишни маслиҳат беради: “Сизнинг ҳаётга муҳаббатингиз, сизнинг энг олий умидингизга муҳаббат бўлгай – ҳаёт ҳақидаги энг олий фикрингиз мана шу олий умидингиз бўлгай”.

## IX

Ойнинг ярми қоронғи бўлса, ярми ёруғ, дейди донишманд ҳалқимиз. Инсон зоти борки, ана шу ёруғлик, нур ва эзгуликка қараб интилади, унинг иссиқ нафасини туйишни истайди. Нафақат инсон зоти, балки оламдаги

барча мавжудотнинг пировард мақсади ёруғликка эришишdir. Тасаввур қилинг, тошни ёриб ўсиб чиқсан нозиккина гиёх ёки гулни ҳам аслида ана шу ёруғлик ва нурга бўлган кучли иштиёқ ва муҳаббат ўзига чорлаган. Инсониятни доимо оғир ва қайгули дамларда сабр-тоқат қилишга, эртанги яхши кунга умид боғлаб яшашга ҳидоят этиб келган ушбу ҳикмат замирида чуқур фалсафий тафаккур ётади. Буни қалбининг туб-тубида хис этган киши хеч қачон ҳаётдан, жамиятдан нолиб ўтмайди. Бундай инсоннинг қалби хеч қачон қаримайди ҳам, аксинча, унинг ҳаётга бўлган интиҳосиз муҳаббатидан балқиб чиқсан нурдан ойдинлашган, чирой олган чехраси олам ва одамни мунаvvар этади, инсониятни нур ва нурониятга, эртанги ёруғ кунлар умиди билан яшашга даъват этади.

Нур ва ёруғликка интилиш – ҳалқимизнинг қон-қонига сингиб кетган, ментеллитетимиз атрибуларидан бирига айланган ғоядир. Узоқ ўтмишда яшаган аждодларимиз ёруғлик, қуёш, нур ва рўшнолик шайдоси бўлганлар. Уларнинг бу ҳақдаги қарашлари Наврўз фалсафаси ва зардустийлик таълимотида ҳам, мифологик адабиётимиз, ҳалқ эртаклари ва достонларида ҳам, минг йиллик мумтоз адабиётимиз, жумладан, Юсуф Хос Ҳожибининг “Кутадғу билиг” асарида ҳам, ҳатто, бизнинг қундалик ҳаётимиз ва тафаккур тарзимизда ҳам энг гўзал шаклларда ўз аксини топган. Нега деганда, сув ҳаёт манбаи бўлгани каби ёруғлик ҳам ҳаёт манбаи саналади. Чунки инсон ҳеч қачон умрининг охиригача зулм ва зулматда, жаҳл ва жаҳолатда яшай олмайди. Нафақат инсон, балки оламдаги бор мавжудот ана шу илоҳий нур файзидан, ёруғлик неъматидан баҳраманд бўлолмас экан, ўз мавжудлигини йўқотиши тайин...

Француз экзистенциализмининг йирик намояндадаридан бири Жан-Поль Сартрнинг “Инсон эркинликка маҳкум этилган”, деган машҳур иборасини эслайлик. Бу фикр, албатта, асосли, аммо чуқурроқ мулоҳаза қилинса, ҳар қандай эркин инсон ҳам ўтмиш, бугун ва келажак ҳақидаги ўй-фикрлар, ҳаётий муаммолар, қундалик турмушдаги икир-чикирлар, ташвишлар ва охир-оқибат, ўзининг ички кечинмалари, ҳис-туйғулари, юрак туғёнларидан қочиб қутуломайди. Инсоний суврат ва сийрат эгаси бўлган ҳар қандай зот, у ким бўлишидан қатъи назар, ана шу фикр-хаёллар ва ички кечинмалар гирдобида яшайди, бир лаҳза бўлса-да, тафаккур, ички кечинмалар ва ҳис-туйғулардан холи бўлолмайди. Шундай экан, инсон тафаккур қилиш ва ўзининг ички кечинмалари билан яшашга маҳкум этилган зот бўлиб чиқмайдими?


...Бир куни тулки узумзорлар ичидан ўтаётиб, етилиб, ғарқ пишган ва қуёшнинг заррин нурларидан ялт-ялт товланиб турган бир бош энг катта узум тагида тўхтаб қолибди. Узумни узиб оламан деб, сакрабди, сакрабди, аммо мақсадига етолмабди. Шунда бечора тулки ҳафсаласи пир бўлиб, “Пуфф, сассиқ узум экан-ми?!”, деганича йўлида давом этган экан... Қиссадан ҳисса шуки, тарихда инсон феноменининг меҳвари, субстанцияси – рухият ва тафаккур оламининг бепоён узумзорларидан узум узиб олмоқчи бўлиб, муродига етолмаган ва “Пуфф, сафсата экан-ку!” – деб чиқиб кетган кишилар ҳам кам бўлмаган. Буни ожизларнинг – мол-дунё ва мансабу шуҳрат учун борини сотишга тайёр одамларнинг заиф ва нотавон ақли доирасига сиғмаган, ғайритабиий ва ғайриоддий уфқларда тафаккур

суреб ўтган, чексиз-чегарасиз тахайюлоти ва тафаккуроти қаршисида оламлар ҳам тор бўлиб туюладиган ақл ва тафаккур даҳолари – Мансур Ҳаллож, Айнулқуззот, Жордано Бруно, Насимий ва Машраб фожеасида ҳам, Форобий, Ибн Сино ва Хайём сиймосида ҳам, Ибн ал-Арабий ва Мавлоно Румий тимсолида ҳам, Аттор ва Ҳофиз, Жомий ва Навоий мисолида ҳам, Николай Коперник, Леонардо да Винчи ва Галилео Галилей тақдирида ҳам, Бедил ва Аҳмад Дониш, Фридрих Нитше ва Албер Камю, Фитрат ва Чўлпон қисматида ҳам кузатиш мумкин. Шарқнинг мутаассиб жазаваси ва Ғарбнинг инквизитор ақли ғолиб чиқмаганида эди, Мансур Ҳаллож энг ваҳшиёна тарзда дорга осилиб, танаси бурда-бурда қилиниб, ўтда куйдирилиб, кули Дажла дарёсига сочилмаган, Ибн Сино дарбадарлик, қувғин ва зиндонларга маҳкум этилмаган, Жордано Бруно тириклайн ўтда куйдирилмаган, Айнулқуззот, Насимий ва Машраблар дорга осилмаган, Фитрат, Чўлпон ва Усмон Носирлар қатағонга учрамаган бўларди. Афсуски, ҳақиқий инсоний ҳаётни Хитой ва Туркия бозорлари деб тасаввур қиладиган, маънавият ва маърифат ахли устидан кулиб, уларни телба, деб атайдиган, инсоний қиёфасини йўқотиб, жаҳолат ва разолат ботқоғига ботиб кетган, бутун яйловни ўзимники, деб ўйлайдиган сигирга ўхшаб тинмай кавшаш васвасасига тушган маънавий қашшоқ кимсалар, пул топиб, ақл топмаган бечоралар бугунги кунда ҳам хоҳлаган жойда истаганча топилади. Фридрих Нитше бундай кимсалар ҳақида ўз таваллосида шундай дейди: “Мана улар, худди ваҳший ҳайвон монанд тасқаралар, уларнинг ҳирсу ҳаво ёхуд ўз-ўзини ўлдиришидан ўзга ўйлари йўқ...”

*Бу тасқаралар ҳали одам бўлиб улгурган эмаслар; майли, уларга ҳаётни нафрат деб тарзиб қилсалар қилаверсинлар ва ўзлари жўнаб кетаверсинлар!*

*Уларнинг юраклари – сил: тугилар тугилмас улар жон таслим қила бошларлар ва улар ҳоргинлик ҳамда муртадликка мукка кетурлар.*

*Улар жон-жон деб ўлик бўлишини хоҳлардилар ва биз уларнинг бу хоҳшиларини маъқуллашимиз керак! Бу ўликлар тирилмасликлари учун ўзимизни эҳтиёт тутамиз ва бу тирик тобутларга зарар етказмаслик ҳаракатини қиласиз! Уларга ким дуч келмасин, касалми, қари-қартангми, мурдами, дарҳол унга шундай дейдилар: “Ҳаёт рад этилади!”*



## ДУНЁ ТАНИЁТГАН ЎЗБЕК АДИБЛАРИ

Ўзбекистонда хизмат кўрсатган маданият ходими, таниқли ёзувчи Исажон Султон Швеция пойтахти Стокгольмда бўлиб ўтган “Open Eurasia – 2017” номли нуфузли халқаро танловнинг совринли мукофотини қўлга киритди. Адиднинг “Ҳазрати Хизр изидан” номли асари танловнинг “Кичик насрый асар” йўналиши бўйича юқори ўринлардан бирига лойик топилди. Танлов ташкилотчиларнинг қарорига кўра, мазкур ижодий танловнинг барча галиблари китоблари Европада нашр этилади. Жорий йилда 37 мамлакатдан 1100 муаллифнинг асарлари “Open Eurasia – 2017” танловига тақдим этилган. Танлов “Open Eurasia literature festival & Book Forum” деб аталган VI халқаро адабиёт фестивали доирасида бўлиб ўтди.

Ҳозирда фаол ижод қилаётган ва асарлари дунё миқёсида эътироф этилаётган истеъодли ёзувчимиз Исажон Султоннинг “Муножот”, “Ойдинбулоқ”, “Боқий дарбадар”, “Озод”, “Боғи Эрам” номли китоблари чоп этилган. Асарлари инглиз, немис, рус ва турк тилларига таржима қилинган ҳамда АҚШ, Россия, Туркия ва Молдова адабий нашрларида чоп этилган. Адид Жавоҳарлаъ Неру, Рюносқэ Акутагава, Ясунари Кавабата, Дино Буццати, Умар Сайфиддин асарларини ўзбек тилига ўгирди. “Озод” романи учун муаллиф Ўзбекистон Ёзувчилар уюшмасининг “Ватан учун яшайлик” республика танлови галиби бўлди.

Исажон Султон – бир қанча халқаро адабий танловлар ғолиби. “Қисмат” ҳикояси АҚШнинг Чикаго шаҳрида чоп этиладиган “Lexicon” адабий нашрининг (2011), “Боғи Эрам” ҳикояси Туркиянинг Антalia шаҳрида чиқадиган “Güncel Sanat” журнали халқаро танловининг ғолиби (2015), “TODD” ҳикояси Россия Федерацияси маданият, таълим ва мудофаа вазирлиги томонидан ўтказилган “Буюк ғалабанинг қаҳрамонлари” танловининг маҳсус мукофоти билан тақдирланган (2017). Ёзувчи, шунингдек, “Адабий Вена” (Австрия), “Сехргарлар ҳадяси” (АҚШ), “Органик проза” (Россия) халқаро танловларида ҳам ўз асарлари билан иштирок этган.

Мамлакатимизда китоб маҳсулотларини нашр этиш ва тарқатиш тизимини ривожлантириш, китоб мутолааси ва китобхонлик маданиятини ошириш ҳамда тарғибот қилиш бўйича комплекс чора-тадбирлар кенг миқёсда амалга оширилаётган бугунги кунда Исажон Султоннинг “Ҳазрати Хизр изидан” номли асари мисолида замонавий ўзбек адабиётининг халқаро миқёсда эътироф этилиши барча юртдошларимизни қувонтиради. Исажон Султонни ушбу ижодий муваффақият билан муборакбод этамиз.

## Таржимонимиз Мирзали Ақбаров – халқаро танлов совриндори

Иккинчи жаҳон урушидан кейинги йилларда, Европанинг кўпгина мамлакатлари қаторида Австрияда ҳам вайрон бўлган халқ хўжалигини қайта тиклаш билан биргаликда маънавий-маданий ишларга, жумладан, адабиётга, хусусан, бадиий таржимага ҳам алоҳида эътибор қаратила бошланди. Шу максадда федерал ҳукумат томонидан таълим, санъат ва маданият вазирлиги ташкил қилинди ва унинг қошида адабиёт бўлимига асос солиниб, бадиий таржималар учун маҳсус мукофот таъсис этилди.

Мазкур мукофот икки хил йўналишда тақдим этилади:

- биринчидан, замонавий Австрия ёзувчиларининг энг яхши асарларини хорижий талларга юксак маҳорат билан таржима қилган чет эллик мутаржимлар учун;
- иккинчидан, Австрияда яшаб ижод қиласиган мутаржимларга улар томонидан чет эл адабиётидан немис тилига қилинган энг яхши таржима асарлар учун берилади.

Мукофот учун номзодлар Австрия таълим, санъат ва маданият федерал вазирлигининг адабиёт бўлими танлов ҳайъати аъзолари томонидан ҳар йили ноябрь ойида кўриб чиқилиб, ғолиб деб топилган таржимон номи эълон қилинади.

Ушбу нуфузли мукофот бу йил ҳамюртимиз, таржимон Мирзаали Ақбаровга насиб этгани журнализмнинг ижодий жамоаси ва барча адабиёт ихлосмандларини қувонтириб юборди. М.Ақбаров ўтган 2016 йилда “Энг яхши насрый таржима” рукнида (поляк адаби Ян Парандовскийнинг “Сўз кимёси” (3-4-сонлар) асари ва немис ёзувчиси Томас Манн ҳикоялари (7-сон) таржимаси учун) “Жаҳон адабиёти” журнали таҳририяти томонидан таъсис этилган Озод Шарафиддинов номидаги йиллик мукофот билан тақдирланган эди.

Таржимон учун 2017 йил ҳам омадли бўлди. М.Ақбаров Австрия федерал ҳукуматининг энг яхши бадиий таржималар учун бериладиган мазкур нуфузли мукофотига австриялик истеъодди ёш ёзувчи Арно Гайгернинг “Қувфингдаги кекса қирол” номли қиссаси таржимаси учун сазовор бўлди. Бу асар аввал журнализм саҳифаларида, сўнг китоб ҳолида чоп этилди (“Файласуфлар” нашриёти, Тошкент, 2015).

2011 йилда нашр этилган “Қувфингдаги кекса қирол” қиссаси асар муаллифига нафақат Европа, балки дунё миқёсида ҳам шуҳрат келтирди. Асар тез орада кўпгина жаҳон тилларига таржима қилиниб, китобхонлар меҳрини қозонди. Унда муаллиф Алцҳаймер касаллигига дучор бўлган кекса отаси қисмати ҳақида ҳикоя қиласи.

Биз журнализмнинг ижодий жамоаси ҳамда барча адабиёт мухлислари номидан таржимон Мирзаали Ақбаровни ушбу мукофот билан самимий қутлаймиз ва унга янги ижодий зафарлар тилаймиз.

*Муаттар АЛИЕВА  
тайёрлади.*



## МУСАВВИРНИНГ СЎЗСИЗ ШЕЪРИЯТИ

*“Ранглар – бу клавишилар, кўзлар – болгачалар, қалб эса бамисоли кўп торли роялдир. Рассом қўллари шулар воситасида инсон қалби тебранишиларини юзага чиқаради.”*

*В.КАНДИНСКИЙ*

Буюк рассом, тасвирий санъат назариётчиси, абстракционизм оқимининг йирик намояндаси Василий Кандинский ижодини тушунишу унинг асарлари ҳақида сўз юритиш нафақат шунчаки санъат мухлислари, балки тўлақонли мутахассислар учун ҳам бироз мушкуллик пайдо қилиши табиий. Унинг бадииятини англашга интилиш кишига тафаккур машаққати билан бирга ғоят завқ ва ҳаяжон бағишлийдиган жараёндир. Бир қараганда киши диққатини маҳф этиб, хаёлот оламига бошлайдиган, аммо жозибасининг сири нимада эканлигини ҳадеганда билдиравермас ажиб суратларда анъанавий ифода шаклларини, кўзлар одатланган чизгиларни учратиш қийин. Чунки мусаввирнинг мавхумлика бурканган ранг-баранг асарлари замирида яширин аниқлик, изчил мантиқийлик, тафаккурнинг шаклдаги турфа жилолари, тасаввур чексизлигида туғилган фикрларни уқиш, англаш осон эмас. Бироқ, уларни англашга интилишнинг ўзи киши руҳига теранлик ва лаззат бағишлийди. XX асрда юзага келган абстракт санъатнинг намояндалари кўп. Улар орасида Василий Кандинскийнинг номи асосчилар сафида биринчилардан бўлиб тилга олиниши бежиз эмас.

Василий Васильевич Кандинский 1866 йилнинг 16 декабрь санасида Москвада савдогар оиласида таваллуд топган. У болалик чоғида оиласининг Одессага кўчиб борганилиги сабабли мусиқа ва санъат бўйича дастлабки таҳсилни ўша ерда олади. Кейинчалик ота-онасининг истаги билан Москва университетида ўқиб, юрист бўлиб етишади. Узок йиллар давомида университетларда педагоглик фаолияти билан шуғуланиб, илмий изланишлар олиб боради. 30 ёшга етгандагина рассомлик билан жиддий шуғуланишга қарор қиласди. 1896 йили Мюнхенга жўнаб, то биринчи жаҳон уруши бошланган 1914 йилга қадар ўша ерда яшаб, ижодий қиласди. Дастлаб Антон Ашбе студиясида, 1900 йили Мюнхен Бадиий академиясида Франц фон Штук раҳбарлигида тасвирий санъат бўйича профессионал таълим олади. Немис экспрессионистлари Явленский, Кардовский, Грабар ва бошқа модернистик рассомлар билан яқин ижодий муносабат ўрнатади. Унга дастлаб Москвада ўтказилган кўплаб импрессионистларнинг кўргазмалари, жумладан, Клод Моне асарлари катта таъсир кўрсатган бўлса, ижодининг дастлабки даврларида реалистик, ярим абстракт руҳдаги асарлар ишлаган.

Ўша даврлар Кандинскийнинг ижодий юксалишида жуда муҳим ўрин тутган. Айниқса, 1911 йилда унинг бошчилигига “Кўк суворий” номли ижодий бирлашманинг тузилиши ва фаолияти тасвирий санъатда янги нигоҳ ахтарувчи рассомларнинг фаоллашувида муҳим роль ўйнаган. Кандинский дастлабки кўргазмаларини ҳам айни шу даврда ташкил этган. Мусавириңинг санъатга оид мулоҳазалари унинг 1912 йилда чоп этилган “Санъат руҳияти ҳақида” китобида жамланган. Бу китоб абстракцион санъат моҳиятига бағишлиланган дастлабки назарий асарлардан бўлиб, рассом унда ўзининг замонавий санъат ҳақидаги қарашларини батафсил баён қиласди. У “ҳар бир даврнинг ўз санъати бўлади. Ҳеч қайси давр ўтган даврни такрорламайди. Ҳусусан, санъат ҳам. Масалан, биз қадимги греклар каби бўла олмаймиз. Ҳатто грекларнинг ўзлари ҳам антик даврдагидек бўла олмайди” – деб ёзади. Бу унинг ижодда янги шакл ва ифода усусларига интилиши билан бирга санъатнинг қадим китобида янги саҳифа – абстракционистик усул кенг ривожланиб, тасвирий йўналишлар бошқа босқичга кўтарилиши ҳақидаги жиддий қарашлари эди.

Биринчи жаҳон уруши бошлангач, рассом яна ўз ватани Россияга қайтиб, жамият ҳаётининг турли жабхаларида фаол меҳнат қиласди. 1921 йилда яна Германияга қайтиб, мутлақо бошқа услубда маҳоратини намоён қила бошлайди. У геометрик абстракция жанрида ранг-баранг асарлар яратиб, жаҳон замонавий тасвирий санъатининг етакчиларидан бирига айланади. Бу даврда унинг турли геометрик шакллар ва рангларни ўзгача қўллаш тажрибалари акс этган кўплаб композициялари яралади. Ушбу композициялардаги предметсиз, аммо, изчиллик ва гармонияга эга асарлар Кандинскийга хос индивидуал бадиий тасаввур шакли сифатида эътироф этилди. Абстракционизм замонавий тасвирий санъатнинг шундай шаклини, унинг намояндалари предметсиз, реал фигураларсиз конструктив, ҳандасавий шакллар ва бўёклар асосида янги санъат яратишга эътибор қаратган. Бирок бу йўналиш кубизмдан, экспрессионистик усуслардан ўсиб чиқсан бўлса ҳам, улардан фарқли равишда шаклларни восита сифатида қўлламай, уларни мустақил обьектлар сифатида олиб чиқишиди. Масалан, Кандинскийнинг “Сарик, қизил, ҳаворанг” номли асарида шундай тасвирини кузатиш мумкин: кенг юзада турли ранг ва ҳажмдаги айлана, тўғри чизик, тўғри тўртбурчак, ёй, учбурчаклар акс этган бўлиб, уларнинг умумий фони марказида деярли табиатнинг барча ранглари мужассам. Бирок, сарик, қизил ва ҳаворанг нисбатан асосий планда ифодаланган. Кандинский таъбирига кўра, бундай абстракт санъат замирида табиатнинг космик қонунлари ётади. Шунинг учун абстракт санъат бу – аниқ санъатdir.

Кандинский ижодининг бундай юксалишларига унинг назарий изланишлари катта омил бўлди. Ҳар қандай буюклиknинг ортида катта изланишлар ётганидек, бу изланишлар ортида ҳам Кандинскийнинг улкан мақсадлари ётади. Айниқса, ижодкорлик аъмолида инсон тафаккури кудрати ва илохий салоҳият бирлиги ўта муҳимдир.

Василий Кандинский Мюнхен Бадиий академиясида фаолият олиб борган даврида ўз назарий қарашларини амалий тадбиқ этиб боради. 1933 йилда Германияда ҳокимият тепасига нацистлар келгач, у оиласи билан Францияга кетади. 1939 йили Франция фуқаролигини олиб, то умрининг сўнгигига қадар ўша ерда яшаб, ижод қиласди ва 1944 йил 13 декабрда оламдан кўз юмади.

Кандинскийнинг мусавири сифатида оламни бадиий идрок этишдаги ўзига хос услуби, санъат дунёсида ноанъанавийлик анъанасини бошлаб,

ранг аталмиш кимёнинг сехри инсон тасаввуридан нақадар куч олишини кўрсатиб, XX асрнинг энг шуҳратли шахсларидан бирига айланди. Жаҳон замонавий тасвирий санъатида унинг номи ниҳоятда юксак эътироф билан тилга олинади.

Кандинский услуби мутлақо ўзига хос бўлиб, фактуралар, ранглар қўлланилиши билан яққол ажralиб туради. Унинг ижоди геометрик шакллар асосий планда. Бироқ бу факат шаклий бетакрорликка интилиш эмас, унда томошабин бир қарашда англаши мураккаб бўлган мантиқ мажассам. Кандинский асарлари ва ижодий хослиги хусусида сўз кетганда шуларни айтиш мумкинки, унинг ижодий изланишларида жанрий ранг-баранглик бор. Кандинский тасвирий санъат намуналари, умуман, санъат асарида янги шаклдан ташқари, биринчи навбатда мантиқ, рух бўлиши лозимлигига жиддий қараган. Унинг фикрича, “Мазмунсиз қуруқ шакл – бу жонли кўл эмас, балки ичи бўшликка тўла қўлқоп демакдир.”

Кандинский ўз ижодини абстракционизмгача ва ундан кейинги даврдаги асарларга бўлади. Унинг графика, гравюралари ва реалистик асарлари биринчи турга кирса, иккинчиси унинг туркум композициялари, шишадан ишланган дикоратив асарларида ўз ифодасини топган. Буларнинг бари Кандинский ижодининг умумий бутунлигини ташкил этади. Унинг 1903 йилда ёғочга ишланган гравюралари жуда машҳур бўлиб, 16 сахифадан иборат гравюра-альбом “Сўзсиз шеърият” деб номланади. Бу альбомдан ўрин олган 12 асарда ифодаланган мавзулар ва шаклий оригиналлик худди бетакрор қофияли шеърлар каби тасаввурда муҳрланиб қолади. “Амazonка”, “Тоғлар амазонкаси” номли шишага ишланган декоратив асарлари ҳам рассомнинг ўзгача изланишлар йўлида яралган биринчи даврига хос асарлардир. Унинг “Икки отлик”, “Рок. Қизил саҳна”, “Мовий тоғлар”, “Интерьер”, “Кўл”, “Импровизация”, “Фуга”, “Импровизация”, “Москва. Қизил майдон”, “Кулранг овал”, “Оқ овал”, “Қора квадратда”, “Сарик, қизил, ҳаворанг”, “Қизилдаги кичик орзу”, “Бир неча айланা”, “Айлана атрофида”, “Сўнгги акварель” каби асарлари ижодининг иккинчи ярмида яратилган абстракция намуналари ҳисобланди.

Шу каби асарлари жаҳон санъатининг дурдоналарига айланиб, номи XX асрнинг энг машҳур мусаввирлари ўнталигининг юқорисидан ўрин олган Кандинский ижоди ўзининг аниқликка асосланган мавҳумияти, бетакрор жилоси, ранг жилvasи ҳамда бадиият сири билан келгуси авлод эстетик тафаккури ривожига хизмат қиласди.

2007 йилда Россияда Кандинский номидаги мукофот таъсис этилган бўлиб, унинг бош мезони янги ғояларни рағбатлантиришга қаратилган. 2012 йилда эса Меркурий сайёрасидаги кратерга Кандинский номи берилганки, бу рассомнинг бадиий мероси бутун жаҳонда янгиланиш, тафаккур курдатини англатувчи тимсолга айланганидан дарак.

*Мафтуна МУҲАММАДАМИНОВА*

## УЛАР ҲАМ ШУ ОЙДА ТУҒИЛГАНЛАР...

2 ДЕКАБРЬ

**1873–1924 йиллар.** Валерий Яковлевич БРЮСОВ, рус ёзувчisi, шоир, драматург. “Дурдоналар”, “Бу мен”, “Учинчи қоровул” тўпламлари шоир ижоди камолотидан дарак беради. “Одамовилар” достонида давр тузуми кескин танқид қилинади. “Шаҳарларга ва жаҳонга” тўпламига кирган асарларида ишчи меҳнати мадҳ этилади. Брюсов XX аср бошларида рус адабиётидаги модерн ва символизм оқими раҳнамоси бўлди. “Гулчамбар” шеърий тўплами шоирнинг романтик руҳдаги энг яхши асари саналади.

5 ДЕКАБРЬ

**1910–1982 йиллар.** Сойиб ХЎЖАЕВ, таниқли ўзбек актёри, Ўзбекистон халқ артисти (1939). Актёр “Маликаи Турандот”да Труффальдино, “Ўртоқлар”да Соли домла, “Бой ила хизматчи”да Холмат каби кўпроқ комик ролларни зўр маҳорат билан ижро этиб муҳлислар олқишига сазовар бўлди. Сойиб Хўжаевни халққа танитган ва юксак маҳорат билан ижро этган роллари орасида адиб Ҳамид Ғулом ва бастакор Манас Левиевнинг “Тошболта ошиқ” асари алоҳида ўрин тутади. Актёр Наби Фаниевнинг “Насриддиннинг саргузашлари” ва “Фарғона қизи” фильмларда бирбиридан фарқ қилувчи икки замон кишиси ролини ўйнаган.

8 ДЕКАБРЬ

**1879–1949 йиллар.** Павел Петрович БЕНЬКОВ, рассом. Ўзбекистонда хизмат кўрсатган санъат арбоби. Қозон катта театрининг “Руслан ва Людмила”, “Кармен”, “Аида” каби мумтоз опералари, “Олия Бону”, “Тоҳир ва Зухра” каби спектакллар учун декорациялар яратган. У ўзининг санъат асарларида Ўзбекистон миллий ёдгорликлари, қадимий шаҳарлар қиёфаси, ўзига хос иқлими, ўзбек миллий маданияти ва ўзбек миллатини ёрқин бўёкларда гавдалантириди. Рассомнинг санъат асарлари Москва, Тошкент, Самарқанд музейларидан муносиб жой олган. Республика рассомлик коллежи Беньков номи билан аталган.

10 ДЕКАБРЬ

**1920–2012 йиллар.** Қодир МИРМУҲАМЕДОВ, таржимон ва киносценарийчи. Ўзбекистонда хизмат кўрсатган санъат арбоби (1999), Ўзбекистонда хизмат кўрсатган маданият ходими (1981). Биринчи йирик таржимаси индонез ёзувчisi Абдул Муниснинг “Сурапати” романидир. Шундан кейин у жаҳонга таниқли ёзувчилар Жек Лондоннинг “Мартин Иден”, Рабинранат Тагорнинг “Хонадон ва жаҳон”, “Сўнгги достон”инини, Максим Горкийнинг “Клим Самгиннинг хаёти”, Кришан Чандарнинг “Бир

қизга минг ошиқ”, Виктор Гюгонинг “Бюг Жаргалъ”, Михаил Булгаковнинг “Уста ва Маргарита”, Гомернинг “Илиада” асарларини рус тилидан ўзбек тилига таржима қилган. Мирмуҳамедов булардан ташқари, чет эл ёзувчиларининг қатор драмаларини, кўплаб бадий фильмларни ҳам ўзбек тилига таржима қилган.

## 11 ДЕКАБРЬ

**1911–2006 йиллар. Нажиб МАҲФУЗ**, мисрлик ёзувчи, драматург, сценарист. Нобель мукофоти лаурети (1988). Адиб “Бемаъни шивир-шивир”, “Илоҳий дунё”, “Бадном хонадон”, “Кора мушук қовоқхонаси”, “Шийпон остида” номли новеллалар тўплами, “Тақдир ўйини”, “Родопис”, “Хон ал-Халилий”, “Мидак тор кўчаси”, “Нил устидаги сафсата”, “Ёмғир остидаги севги”, “Ўғри ва ит” каби романтик-тарихий романлар муаллифи. Махфуз Нажибнинг кўпгина асарлари экранлаштирилган.

## 12 ДЕКАБРЬ

**1909–1944 йиллар. Ҳамид ОЛИМЖОН**, шоир, драматург, олим ва жамоат арбоби. Унинг “Кўклам”, “Олов соchlар”, “Ўлим ёвга”, “Пойга”, “Дарё кечаси”, “Чирчиқ соҳилларида”, “Ўлка”, “Бахт” каби шеърий тўпламлари нашр этилган. “Икки қизнинг ҳикояси”, “Оигул билан Бахтиёр”, “Зайнаб ва Омон”, “Семурғ” достонларида даврнинг илфор ғоялари тараннум этилган. Шоир, шунингдек, “Муқанна”, “Жиноят” номли шеърий драмалар ҳамда “Жангчи Турсун”, “Роксананинг кўз ёшлари” каби қатор балладалар ҳам яратган.

## 20 ДЕКАБРЬ

**1922–2007 йиллар. Берта ДОВИДОВА**, хонанда, мақом йўллари моҳир ижрочиси, Ўзбекистон халқ артисти. Довидова репертуаридан ўрин олган “Муножот”, “Баёт”, “Наво” мақомидаги “Талқини Баёт”, “Насри Баёт”, “Рост” мақомидаги “Насри Ушшоқ”, “Дугоҳ” мақомидаги “Сараҳбори Оромижон”, “Уфари Оромижон”, шунингдек, “Самарқанд Ушшоғи” ва бошқалар мумтоз ашуалалар унинг ижросидаги нозик, ички ҳиссиятларга бой, юксак бадиий ифодасини топган. Хонанда ҳақида “Муножот” телевильми суратга олинган.

## 21 ДЕКАБРЬ

**1917–1984 йиллар. Генрих Теодор БЁЛЛЬ**, немис адиби. “Тўққиз яримда ўйналган бильярд” романида асар воқеалари бир кунлик ҳаёт билан чегараланган бўлса-да, адид хотира ва чекинишлардан унумли фойдалangan ҳолда, уч авлод ҳаётини қаламга олади. “Масҳарабоз нигоҳи билан” деб номланган қиссасидаги воқеалар ҳам бир кунда ўтади. Бёллнинг “Сўроқсиз келмаган” ва “Бир сафар интиҳоси” асарларининг мавзуси расмий ҳокимиятга қарши руҳда яратилган. “Хоним билан гуруҳдаги портрет” унинг аввалги барча асарларига нисбатан муфассал ва мукаммал. Ушбу роман ёзувчига Нобель мукофатини тақдим этиш маросимида ҳам тилга олинган. 1972 йилда “характерлар яратиш борасидаги юксак маҳорати

билин ҳаёт ҳақиқатини кенг қамраб олган ҳамда немис адабиётини ти-клашга улкан ҳисса бўлиб қўшилган ижоди учун” Бёлл Нобель мукофати билан тақдирланади.

## 22 ДЕКАБРЬ

**1858–1924 йиллар. Жакомо ПУЧЧИНИ,** композитор, итальян мумтоз операсининг сўнги вакили. Жами 12 та опера, шунингдек, симфоник, хор, камер, диний асарлар яратган. Дунёга машхур “Манон Леско”, “Богема”, “Қайғу”, “Батерфляй хоним” опералари лирик куйланиши гўзаллиги ва эҳтирослиги билан тингловчи қалбини забт этади. Жакомо Пуччини Верди анъаналарини ривожлантириб, замонавий операда етакчи ўрин эгаллаган.

## 23 ДЕКАБРЬ

**1881–1957 йиллар. Хуан Рамон ХИМЕНЕС,** испан шоири. Унинг “Бинафша”, “Нилуфар”, “Рифмлар”, “Ғамгин оҳанглар”, “Олисдаги боғлар”, “Пастораллар”, “Ёз мавсуми” каби шеърий тўпламлари чоп этилган. 1956 йилда Хименес “испан поэзиясидаги олий маънавият ва бадиий софликнинг намунаси бўлган лирик шеърияти учун” адабиёт соҳасидаги Нобель мукофати билан тақдирланади.

## 24 ДЕКАБРЬ

**1798–1855 йиллар. АДАМ Мицкевич,** поляк шоири. Шоирнинг ilk тўплами “Шеърият” Польша адабиётида романтик оқимининг манифести бўлди. Мицкевич романтик руҳдаги “Гражина” лиро-эпик достони билан Польшада “шеърий қисса” жанрига асос солди. “Крим сонетлари”, “Конрад Валленрод”, “Дзядлар” каби достонлар муаллифи. Шоирнинг реалистик ғоялар, интилишлар ёрқин намоён бўлган “Пан Тадеуш” достони миллий эпопея ҳисобланиб, эски поляк турмушининг қомусидир. Мицкевич шеърлари М.Шайхзода, Шухрат, Мухаммад Али, Сайёр ва бошқалар томонидан ўзбек тилига таржима қилинган.

## 30 ДЕКАБРЬ

**1865–1936 йиллар. Жозеф РЕДЬЯРД Киплинг,** инглиз ёзувчisi. “Маҳкама қўшиқлари”, “Етти денгиз”, “Беш миллат” сингари шеърий тўпламлар, “Тоғ ҳикоялари”, “Уч аскар” новеллалари, “Нур сўнди”, “Ким” каби романлар муаллифи. Қўшиқлари халқ оғзаки ижоди услубига якин. Болалар ҳакидаги “Довюрак денгиз сайёҳлари”, “Шунчаки эртаклар” қиссалари, Маугли саргузаштларига бағишлиланган “Жунгли китоби” кенг тарқалган. “Рикки-Тики-Тави”, “Маугли” ва бошқа асарлари ўзбек тилига таржима қилинган.

Жамила АСҚАРОВА  
тайёрлади.

---

## РЕЗЮМЕ

••• Рассказ сирийского писателя Валида Ихласа “Черный цветок” отображает самые злободневные социально-политические проблемы, волнующие сегодня мир. Художественная стилистика данного произведения, в котором автор выступает в роли рассказчика, весьма современна. Развитие сюжета построено на параллели – линии матери писателя и ее связь с любимым садом, являющимся источником вдохновения; линии жизненных путей героев рассказа.

••• Особое место в многогранном творчестве французского поэта, писателя, драматурга и художника Жана Кокто занимают одноактные пьесы-монологи. Произведение «Человеческий голос» признано вершиной творчества автора в жанре моноспектакля. В пьесе раскрывается душа героини и вся глубина ее трагедии. Это драма женщины, испытавшей страх и боль, отчаяние и надежду.

••• Именитому переводчику, ученому-литературоведу, заслуженному деятелю искусств Узбекистана Ибрагиму Гафурову исполнилось 80 лет. Профессор Хамидулла Балтабаев (статья “Жизнь вне жизни”) и литературовед Шухрат Ризаев (статья “Танцующий человек”) преподнесли достойный подарок юбиляру и читателям журнала – увлекательный экскурс в творческую и научную деятельность И. Гафурова.

••• Сообразные и отличительные стороны философии, мышления Востока и Запада, определенные идеологические противоречия, разнообразие мировоззрений... Данная тематика не раз оказывалась предметом исследований ученых. Изучив творческие взгляды, нравственно-философские доктрины мыслителей двух сторон света – Джалалиддина Руми и Фридриха Ницше, кандидат филологических наук Джазар Халмуминов выразил свою точку зрения.

••• В декабре литературная общественность отмечает 220-летие со дня рождения одного из ярчайших немецких поэтов Генриха Гейне (1797-1856). Автор статьи “И воздали мне хвалу” Равияджан Абдуллаева рассматривает такие вопросы, как роль Гейне в мировой литературе, история знакомства узбекского читателя с творчеством немецкого поэта, художественная специфика переводов произведений данного автора.

••• Газели молодой хорезмской поэтессы Шаиры Шамс – это изящный образец классических поэтических традиций. Они увлекают читателя задушевными и волнующими нотами.

••• Также в данном номере представлено итоговое оглавление материалов, опубликованных в журнале в течение года – подробный список художественных произведений, образцов мировой поэзии, эссе, научно-публицистических статей.

---

## RESUME

- Syrian writer Valid Ihlosiy's "The Black Flower" story written in a new manner narrates about social-political problems of nowadays. The author became a teller. A plot of the story develops in two routes – the author's attitude to his mother and to his lovely garden which is a source of inspiration, and a narration of personages' lives.
- Well-known author Jean Cocteau in his play in a one act named "A Human Voice" analyzes inner life and soul feelings of human in a special manner.
- Popular translator, Honored Man of Art of Uzbekistan, literary critic Ibrohim Gofurov is 80 years old in this month. Professor Hamidulla Boltaboyev in an article "The Life beyond a Life" and literary critic Shuhrat Rizayev in his article "A Dancing Man" analyze I.Gofurov's creative and scientific works in detail.
- A lot of research works have been written about eastern and western philosophy, intellect, similar and dissimilar aspects, different views and ideological confrontation between these two sides. Candidate of Philology Jafar Holmuminov researched this problem in accordance with creative and morally-philosophic opinions of great thinkers Jaloliddin Rumiy and Friedrich Nietzsche.
- The 220th anniversary of Great German poet Heinrich Heine (1797-1856) is celebrated this year all over the world. Roviyajon Abdullayeva in her article named "All Those Who Praised Me" wrote about a place of this poet in world literary history of his influence to Uzbek cultural-literary life, artistic aspects of translations of his works.
- A young poetess Shoira Shams from Khorazm presents her original, incomparable ghazals written in classic manner.

---

# **2017 ЙИЛДА “ЖАҲОН АДАБИЁТИ” ЖУРНАЛИДА ЧОП ЭТИЛГАН АСАРЛАРНИНГ ЙИЛЛИК МУНДАРИЖАСИ**

## **МУҲАРРИР МИНБАРИ**

**Ислом Каримов сабоқлари.** № 1  
**Анжумандаги ўйлар.** № 6  
**Шахс ва ижодкор.** № 11

## **НАВОИЙ САБОҚЛАРИ**

Алишер Навоий ғазалларининг асли, инглизча ва русча таржимаси, таҳлили, шарҳи. (*Руқнни Д. Юсупова, А. Обид, А. Буматова, Д. Ражаблар тайёрлади*) № 1, 2, 3, 4, 5, 6, 7, 8, 9, 10, 11, 12.

## **НАСР**

Исай КАЛАШНИКОВ. (Бурятия) **Қаттол аср.** (*Рус тилидан М. Йўлдошев таржс.*) № 2, 3, 4, 5, 6

Танзил ус-солихин. (*Наирга тайёровчи А. Турдиалиев*) № 2, 3

Такэси ИНОУЭ. (Япония) **Самимиистак.** Ҳикоя. (*Рус тилидан Д. Алиева таржс.*) № 4

Неъмат АРСЛОН. **Аширит.** Новелла. № 7

Ҳисса ал-ҚАҲТАНИЙ. (Қатар) **Ахду паймон.** Ҳикоя. (*Араб тилидан Ш. Аҳмедова таржс.*) № 7

Лоранс КОССЕ. (Франция) **31 август.** Роман. (*Рус тилидан Р. Умматов таржс.*) № 8

Дино БУЦАТТИ. **Кӯчки.** Алберто МОРАВИА. (Италия) **Май ёмғири.** Ҳикоялар. (*Итальян тилидан А. Умаров таржс.*) № 8

Барбара КАРТЛЕНД. (Англия) **Шарқона мұхаббат.** Роман. (*Рус тилидан Ш. Аҳророва таржс.*) № 9, 10

Япон ҳикоялари. Ясунари КАВАБАТА. **Италия ҳақида қўшиқ.** Ҳол ҳақида мактуб. Хидэо ТАКУБО. **Ёғоч тўй.** Ҳикоялар. (*Рус тилидан О. Отакон, Д. Алиева таржс.*) № 9

Араб ҳикоялари. Маҳмуд ТАЙМУР. **Салом пошонинг холаси.** Абдлураҳмон АЛ-ХАМИСИЙ. **Ҳақиқат узуғи.** Юсуф ИДРИС. **Шўрпешона.** Ҳикоялар. (*Араб тилидан С. Абдуллаев таржс.*) № 9

Жан-Доминик БОБИ. (Франция) **Скафандр ва капалак.** Қисса. (*Рус тилидан Н. Усмонова таржс.*) № 10, 11

Лу СИНЬУ. (Хитой) **Ланъчжоудаги учрашув.** Ҳикоя. (*Рус тилидан О. Отакон таржс.*) № 10

---

Фозил ИСКАНДАР. (Россия) **Қарздорлар. Айниган зиёлилар ва афериизмлар.** Ҳикоялар. (*Рус тилидан Отаули тарж.*) № 10

Анатолий ДОМБРОВСКИЙ. (Россия) **Афлотун ва Арасту.** Роман. (*Рус тилидан А. Файзулла, М. Маҳмуд тарж.*) № 11, 12

Николай КАРАМЗИН. (Россия) **Бечора Лиза. Қисса.** (*Рус тилидан Қ. Носиров тарж.*) № 11

Абрахам ВАЛЬДЕЛОМОР. (Перу) **Кабальеро Кармело.** Ҳикоя. (*Рус тилидан О. Отакон тарж.*) № 11

Валид ИХЛОСИЙ. (Сирия) **Гули сиёҳ.** Ҳикоя. (*Араб тилидан Г. Жалилова тарж.*) № 12

## ЖАҲОН АДАБИЁТИ ДУРДОНАЛАРИ

Виктор ГЮГО. (Франция) **Париж Биби Марям ибодатхонаси.** Роман. (*Рус тилидан Б. Зокир тарж.*) № 1, 2, 3, 4

Борис ПАСТЕРНАК. (Россия) **Доктор Живаго.** Романдан парча. (*Рус тилидан С. Содиқ тарж.*) № 7

## ШЕЪРИЯТ МИНТАҚАЛАРИ

Анна АХМАТОВА. **Шундокқина денгиз бўйида.** Достон. (*Рус тилидан А. Шер тарж.*) № 1

Жеймс ЖОЙС. (Ирландия) **Донаси бир пенни.** Шеърлар. (*Инглиз тилидан Ҳумоюн, Ойдиннисо ва А. Абдужалилов тарж.*) № 2

**Замонавий АҚШ шоиралари ижодидан.** Рашида Исмоилий АБУ БАКР, Ивон ДЕЙВС, Уша АКЕЛЛА. (*Инглиз тилидан А. Обид тарж.*) № 3

**Рус шеърияти.** Анна СВИРШИНСКАЯ. Елисавета БАГРЯНА. Лилияна СТЕФАНОВА. Шеърлар. (*Рус тилидан Р. Мусурмон тарж.*) № 3

Алёна ЕЛЬЦОВА. (Россия) Шеърлар. (*Рус тилидан Гўзал Бегим тарж.*) № 3

Иоганн Волфганг ГЁТЕ. (Германия) **“Охирги ижод” туркуми.** Назмий хикматлар ва эпиграммалар. (*Рус тилидан С. Оллоёр тарж.*) № 4

Рафаэл АЛЬБЕРТИ. (Испания) **Шеърий тавсиялар.** (*Рус тилидан Я. Тога тарж.*) № 4

Евгений ЕВТУШЕНКО. (Россия) Шеърлар. (*Рус тилидан Н. Жонузоқ тарж.*) № 4

Татьяна СНЕЖИНА. (Украина) **Олис-олисларга қарар икки кўз.** (*Рус тилидан Х. Рустамова тарж.*) № 4

Юлиан ТУВИМ. (Польша) Шеърлар. (*Рус тилидан У. Қўчқор тарж.*) № 5

Макнуна. Ғазаллар. (*Форс тилидан О. Эркин тарж.*) № 5

Энахон СИДДИҚОВА. **Она ҳақида достон.** № 5

**Осмон менга суйганимдан хотира.** Япон мумтоз шоирлари ижодидан. Аривара-но НАРИХАРА, Оно-но КОМАТИ, Ки-но ТОМОНОРИ, Фудзивара-но ТАДАФУСА, Фудзивара-но ТОКИХИРА, Ки-но ЦУРАЮКИ, Осикоти-но МИЦУНЭ, Мибу-но ТАДАМИНЭ, Фудзивара-но ЁРУКА,

---

Фудзивара-но КОТОНАО, Киёхара но ФУКАЯБУ, Мононобэ-но ЁСИНА,  
Сакаи-но ХИТОДЗАНЭ. Шеърлар. (*Рус тилидан М. Мирзо тарж.*) № 7

Иван БУНИН. (Россия) **Ҳам ҳақиқат, ҳам шеърият маёғи.** Шеърлар.  
(*Рус тилидан В. Файзулаҳ тарж.*) № 7

Франческо ПЕТРАРКА. (Италия) **Сонетлар.** (*Рус тилидан С. Оллоёр тарж.*)  
№ 9

Евгений ЕВТУШЕНКО. (Россия) Шеърлар. (*Рус тилидан А. Азим тарж.*)  
№ 10

Марина ЦВЕТАЕВА. (Россия) Шеърлар. (*Рус тилидан Г. Сайдгани тарж.*) № 10

**Япон мумтоз шеъриятидан. Осмон янада мовий.** (*Рус тилидан Ф. Афруз тарж.*) № 11

Хонхе Каррера АНДРАДЕ. (Эквадор) Шеърлар. (*Рус тилидан F. Мирзо тарж.*) № 11

Ибройим ЮСУПОВ. (Қорақалпоғистон). Шеърлар. (Қорақалпоқ тилидан О. Ҳожиева тарж.). № 12

Хорхе Луис БОРХЕС. (Аргентина). **Денгиздан-да теран ҳар дақиқа.**  
Шеърлар. (*Рус тилидан Т. Али тарж.*) № 12

Шоира ШАМС. Ғазаллар. № 12

## ДРАМА

Жан САРМАН. (Франция) **Мамурэ.** (*Рус тилидан Ш. Бошибеков тарж.*)  
Драма. № 1, 2

Сотим УЛУҒЗОДА. (Тоҷикистон) **Рӯдакӣ.** (*Тоҷик тилидан Н. Маллаев тарж.*) № 3

Эдмон РОСТАН. (Франция) **Сирано де Бержерақ.** (*Рус тилидан И. Мирзо тарж.*) № 5, 6.

Жан-Поль САРТР. (Франция) **Ёпик эшик ортида.** (*Рус тилидан Ш. Назарова тарж.*) № 7, 8

Дюла УРБАН. (Венгрия) **Пишлокхўрлар.** (*Рус тилидан Ҳ. Махмудова тарж.*) № 7

Александр ВАМПИЛОВ. (Россия) **Ўрдак ови.** (*Рус тилидан М. Хайруллаев тарж.*) № 8, 9

Тунжар ЖЎЖАНЎФЛИ. (Туркия) **Кўчки.** (*Турк тилидан О. Вейсал ўғли тарж.*) № 10

Жан КОКТО. (Франция). **Инсон овози.** (*Рус тилидан Б. Курбон тарж.*)  
№ 12

## НОБЕЛЬ СОВРИНДОРЛАРИ

Патрик МОДИАНО. (Франция) **Менинг сюжетим – замон.** (*Рус тилидан А. Файзула тарж.*) № 9

Габриэл Гарсиа МАРКЕС. (Колумбия) **Полковникка ҳеч ким хат**

**ёзмайди.** Қисса. (*Рус тилидан В. Файзулаҳ тарж.*) № 11

## АДАБИЁТШУНОСЛИК. ФАЛСАФА

Абу Али ибн СИНО. **Ёруғланиш.** Фалсафий рисола. (*Рус тилидан M.Махмудо в ва З. Баҳриддинов тарж.*) № 1

Виктор АЛИМАСОВ. Лазиз БАХРАНОВ. **Фикр-ҳикмат излаш – файласуф қисмати.** Суҳбат. № 1

Шаҳноза НАЗАРОВА. **Қаҳрамонлик достонларида синов мотивлари.** №1

Кодиржон ЭРГАШЕВ. Алишер Навоий ва Ғарб адиллари: муштарак мавзулар. № 2

Муҳаммаджон ХОЛБЕКОВ. **Бобур ва “Бобурнома” француз шарқшунослиги сахифаларида.** №2

Расул ҲАМЗАТОВ. (Доғистон) **“Биз ҳақиқатдан юз бурмаслигимиз керак”.** Суҳбат. (*Рус тилидан A.Мўмин тарж.*) № 4

Узоқ ЖҮРАҚУЛОВ. **“Сабъаи сайёр”да тоғ-ғор хронотопи.** № 6

Шаҳло АҲМЕДОВА. **Замонавий Қатар адабиётида ижтимоий ахлоқий муаммолар.** № 7

Дилмурод ХОЛДОРОВ. **Руҳий таназзул тасвири.** № 7

Қалдибек СЕЙДАНОВ. **Авезов ва Ўрта Осиё адабиёти.** № 9

Луи МАССИНЬОН. (Франция) **Мансури Ҳаллож.** Рисола. (*Форс тилидан O. Давлатов тарж.*) №10, 11

Наим КАРИМОВ. **Таржима санъати ва жаҳон адабиёти.** № 10

Хусан ЭРМАТОВ. **Япониядан чиққан инглиз Кадзуо Исигуро.** № 10

Абдуғафур ҚОСИМОВ, Наргиза ТОИРОВА. **Сурат ва кўзгу тилсими.** № 11

Шаҳноза НАЗАРОВА. **Йўл қаердан ўтади?** № 11

Наим КАРИМОВ. **Маълум ва номаълум “Эгмонт”.** № 12

## ЭССЕ

Ян ПАРАНДОВСКИЙ. (Чехия) **Сўз кимёси.** (*Рус тилидан M.Акбаров тарж.*) № 1,2,6,7,8,9,10,11,12

Марио ВАРГАС ЛЬОСА. (Перу) **Ёш романнависга мактуб.** (*Рус тилидан O.Отахон тарж.*) № 1

Миразиз АЪЗАМ. **Одил Ёқубов ибратлари.** №1

Ашурали ЖҮРАЕВ. **Одил Ёқубов хазинаси.** № 1

Андре МОРУА. (Франция) **Марсель Пруст.** (*Рус тилидан O.Отахон тарж.*) № 2

Ёкубжон ХЎЖАМБЕРДИЕВ. **Соат кағғири.** № 3

Иброҳим ҒАФУРОВ. **Ҳажр вақти.** № 4

Кўчкор НОРҚОБИЛ. **У Ер шарини кўтариб яшади.** № 4

Аҳмаджон МЕЛИБОЕВ. **Чеховни англаш.** № 4

Валентина ИВАШЕВА. (Россия) **Жеймс Жойс.** № 5

Мухтор МАҒАВИН. (Қозогистон). **Абиш икковимиз.** (*Қозоқ тилидан Отаули тарж.*) № 5

---

Сомерсэт МОЭМ. (Англия) **Сарҳисоб.** (*Рус тилидан О.Отахон тарж.*)  
№ 6, 7  
Жаъфар ХОЛМЎМИНОВ. **Нитшенинг шарқона тушлари.** № 12  
Шухрат РИЗАЕВ. **Рақс тушаётган одам.** № 12

## УСТОЗ ТАРЖИМОНЛАР БИСОТИДАН

Сирожиддин АҲМАД. **Венгриядаги ўзбек таржимони.** №1  
Абдулла ОРИПОВ. Шухрат РИЗАЕВ, Отабек САФАРОВ. № 3  
Тилак ЖЎРА. Султонмурод ОЛИМ. № 5

## ШАРҚ ВА ҒАРБ ҲИКМАТИ

Қиёмиддин НАЗАРОВ. **Илдизлари туташ маъволар.** № 1  
Қиёмиддин НАЗАРОВ. **Икки томчи сувдек ўхшаш.** № 3

## ЖАРАЁН

Матиасс ЮГЛЕР. (Германия) Н.УМАРОВА. “Романим қаҳрамони – ўзим”. Суҳбат . №1

Бенедик ПЕРИ. (Венгрия) Зулхумор МИРЗАЕВА. “Алишер Навоий ижоди – мўъжиза”. Суҳбат. № 2

Хисао КОМАТЦУ. (Япония) Баҳодир КАРИМОВ. “Ўзбек тилини мустақил ўргандим”. Суҳбат. № 4

Хисао КОМАТЦУ. (Япония) **Уч жадид ва ўзгарган дунё.** (*Турк тилидан Б.Нурмуҳаммад тарж.*). № 4

Ҳамидулла БОЛТАБОЕВ. **Ҳаётдан ташқаридағи ҳаёт.** № 12

## ЖАҲОН МАДАНИЯТИ ВА САНЪАТИ

Оқилхон ИБРОҲИМОВ. **Юнус Ражабий ҳақида сўз.** № 1

Лайло ЖЎРАЕВА. **Алишер Навоий ижодида най таърифи.** № 2

Муҳаббат ТЎЛАХЎЖАЕВА. **Театр ва янги замон.** № 3

Андрей ТАРКОВСКИЙ (Россия) “Софлом тафаккурга ишонамиз”  
Суҳбат. (*Рус тилидан Ш.Абдурасолов тарж.*) № 4

Муқаддас АҲМАДЖОНОВА. **“Мария Стюарт” – мозийдан сўзловчи фожиа.** № 4

Георгий ТОВСТОГОНОВ. (Россия) **Саҳна кўзгуси.** (*Рус тилидан Ж. Маҳмуд тарж.* ). № 5,6

---

Дилдора УМАРОВА. Ўзбекистон санъатида постмодернизмнинг  
ўзига хослиги. № 5

Тўхтасин ФОФУРБЕКОВ. Шарқ ва Рахманинов. № 6

Нодира ҚОСИМОВА. Кинематографияда неореализм оқими. № 7

Муҳаббат ТЎЛАХЎЖАЕВА. Кулги ортидаги дард. № 8

Виктор ШКЛОВСКИЙ. (Россия) Чаплин ва Эйзенштейн. (*Рус тилидан Ш. Абдурасулов тарж.*) № 10

## ПУБЛИЦИСТИКА

Эдвард РАДЗИНСКИЙ. (Россия) Қонсираган илоҳлар. (*Рус тилидан Ж.Сафоев тарж.*) № 6,7

Маҳмуд ТОИР. Европа саёҳати: ҳайрат ва шукроналик. № 8

Жалолиддин САФОЕВ. Китоб – биринчи мўъжиза. № 9

Ҳасан АМИНОВ. Халқ қалбининг кўзгуси. № 12

## ЭПОС –ТАФАККУР ДУРДОНАСИ

Манас. (Қирғизистон) Достондан парча. (*Кирғиз тилидан З.Исомиддинов тарж.*) № 9

## КУНДАЛИКЛАР

Анна ФРАНК. (Германия) Чордоқ ҳикоялари. (*Инглиз тилидан М.Менглиева тарж.*) № 5,6

## “ЖАҲОН АДАБИЁТИ” ЖУРНАЛИ 20 ЁШДА

Қўшалоқ янгиликлар. № 4

Отабек САФАРОВ, Жамила АСҚАРОВА. Журналхонлик давом этади. № 5

Кутлов. “Жаҳон адабиёти” журнали ташкил топганининг 20 йиллиги муносабати билан хорижий давлатларнинг Ўзбекистондаги фавқулодда ва муҳтор элчилари Сунъ ЛИЦЗЕ (Хитой), Риза Ҳусайн БУХОРИЙ (Покистон), Константин ЖГЕНТИ (Грузия), Мосуд МАННАН (Бангладеш) нинг табриклари. № 6

Адабиётнинг ўрни бекиёс. Франция Республикасининг Ўзбекистондаги Фавқулодда ва Мухтор Элчиси Виолен де Вильмор хоним билан сұхбат. № 6

Эътироф. “Жаҳон адабиёти” журнали ташкил топганининг 20 йиллиги муносабати билан хорижлик ва ўзбек адабиётшунослари -- Ҳанс-Райнҳард ҲЁРЛ (Германия), Хайриддин СУЛТОНОВ, Муҳаммад АЛИ, Иброҳим ФАФУРОВ, Қиём НАЗАРОВ, Абдулла ШЕР, Аҳмаджон МЕЛИБОЕВ, Баходир КАРИМОВ, Нурбой ЖАББОРОВларнинг табриклари. № 6

Шуҳрат РИЗАЕВ. Жаҳон адабиётини ўрганиш – ниҳоясиз йўл. № 7

---

---

Жамила АСҚАРОВА. **Илмий анжуман.** № 7  
Муслимбек ЙЎЛДОШЕВ. Эътирофга муносиб нашр. № 7

## ЖАҲОНДАГИ ЁШЛАРИМИЗ

Шаҳбоз ҲАЙИТОВ. Отабек САФАРОВ. “Умидвор кўзлар далда бўлади”. Суҳбат. № 1

## ЗОМИН МАВЖЛАРИ

Зомин семинари иштирокчилари ижодидан намуналар. № 8

## ЖАҲОН БОЛАЛАР АДАБИЁТИ

Валентин БЕРЕСТОВ. Владимир ОРЛОВ. Семён ОСТРОВСКИЙ. (Россия) Шеърлар. (*Рус тилидан Р.Исақов, Д.Ражаб тарж.*) № 6

**Жаҳон болалар шеъриятидан.** Генри ЛОНГФЕЛЛО. (АҚШ), Роберт Луис СТИВЕНСОН (Англия), Уолтер де ла МЭР (Англия), Ян БЖЕХВА (Польша), Огден НЭШ (АҚШ). Агния БАРТО (Россия), Овсей ДРИЗ (Исраил), Ҳалфдан РАССМУССЕН (Дания), Леннарт ХЕЛЬСИНГ (Швеция), Екатерина СЕРОВА (Россия), Шэл СИЛВЕРСТАЙН (АҚШ). Шеърлар. (*Рус тилидан Н.Остон тарж.*) № 6

Виталий БИАНКИ (Россия). Суратдаги пат. Созандা айиқ. Пашша айиқни ўлимдан қутқарди. Бойқуш. Ҳикоялар. (*Рус тилидан F.Раҳмон тарж.*) № 6

## ЖАҲОНИЙ ТАБАССУМ

**Жаҳон машҳурлари ҳаётидан.** (*Рус тилидан Ш.Отабек тарж.*) № 9

## МУҚОВАМИЗДА

(Руқнни Ш. Қосимова, Р. Фатхуллаев, К. Нишионова, Г. Орифжонова, Д.Ражабов, З. Йўлдошева, М. Маҳмадаминова, О. Собир ўғлилар олиб борди.)

**Жим УОРРЕН.** (АҚШ) № 1

Георгий Николаевич НИКИТИН. (Россия) № 2

Марк АРИАН. (АҚШ) № 3

Пьер Огюст РЕНУАР. (Франция) № 4

Михаил НЕСТЕРОВ. (Россия) № 5

Рембрандт Хармен Ван РЕЙН (Голландия) № 7

Шамсируй ҲАСАНОВА (Ўзбекистон) № 8

Альбрехт ДЮРЕР. (Германия) № 9


---

Пётр Филиппович АЛЬБЕРТИ. (Россия) № 10  
Николай Гаврилович ХЛУДОВ (Қозоғистон) № 11  
Василий КАНДИНСКИЙ (Россия) № 12

### ТАРИХДА БУ КУН

Саодат ҚАМБАРОВА. **Маърифат эҳтиёжи.** № 2  
Рахима ШИРИНОВА. **Таржимон эътирофи.** № 5  
Даврон РАЖАБОВ. **Маданий мерос – халқлар ўртасидаги мулокотга йўл.** № 5  
Даврон РАЖАБОВ. **Зоминда навқирон адабиёт анжумани.** № 7  
Мунисжон ҲАКИМОВ. **Фарғонада адабиёт кунлари.** № 8  
Муаттар АЛИЕВА. **Хорижлик ҳамкорлар билан мулокот.** № 10  
Муаттар АЛИЕВА. **Дунё таниётган ўзбек адиллари** № 12  
**Тақвим.** (*Ш. Абдурасулов, Ж. Асқарова, О. Собир ўғли тайёрлади*) № 1, 2, 3, 4, 5, 6, 7, 8, 9, 10, 11, 12.  
**Журналнинг русча ва инглизчча муҳтасар мазмуни.** (*Ю. Ҳошимова, А. Отабоев, О. Сафаров, А. Тоҷиев олиб борди.*) № 1, 2, 3, 4, 5, 6, 7, 8, 9, 10, 11, 12.

---





*2017 йил декабрь сони*

Навбатчи муҳаррир: А.ОТАБОЕВ  
Техник муҳаррир: О.СОБИР ўғли  
Мусаххих: Д.АЛИЕВА  
Компьютерда сахифаловчи: З.ЖАЛОЛОВА

ИНДЕКС 828, 829

2007 йилда №0252 рақами билан лицензия олинган.  
Ўзбекистон Матбуот ва ахборот агентлигига рўйхатга олинган, №189.

Уч босма табоқ ҳажмгача бўлган кўллэзмалар қайтарилмайди.  
“Жаҳон адабиёти” журналида эълон қилинган асарларни кўчириб босиша  
ва қайта нашр этишда таҳририятнинг ёзма розилиги олиниши шарт.

**Таҳририят манзили:**

100011, Тошкент, Навоий кўчаси, 30.  
Телефонлар: (0371) 244-41-60, 244-41-61, 244-41-62.  
Сайт: [www.jahonadabiyoti.uz](http://www.jahonadabiyoti.uz)  
E-mail: [jahonadabiyoti@list.ru](mailto:jahonadabiyoti@list.ru)

Босишига руҳсат этилди 17.01.2018 й. Бичими 70x108 1/16. Офсет қофози.

Офсет босма. Шартли босма табоқ 18,2. Нашриёт босма табоғи 20,0.

Адади 2068 нусха. 5050 рақамли буюртма. Баҳоси шартнома асосида.

“Жаҳон адабиёти” журнали компьютер марказида терилиб, “Sharq” НМАҚда чоп этилди.

**Босмахона манзили:**

100000, Тошкент, Буюк Турон кўчаси, 41.

© Жаҳон адабиёти, 2017 й.